

د. محمد طه



بطعم الفلا منكو

الرواق للنشر والتوزيع

لأ... بطعم الفلامنكو

د. محمد طه

■ الطبعة الأولى يناير 2019

الغلاف: كريم آدم

التصحيح اللغوي: محمد حمدي أبو السعود

رقم الإيداع: 2018/22341

الترقيم الدولي: 1 - 048 - 824 - 977 - 978

جميع حقوق الطبع محفوظة

186 عمارات امتداد رمسيس 2 - أمام أرض المعارض - مدينة نصر

هاتف: 0220812006

rewaq2011@gmail.com

facebook.com/Rewaq.Publishing



للنشر والتوزيع

ع
ل
بطعم
الفلامنكو

د. محمد طه

الرواق للنشر والتوزيع

المحتويات

١٣	إهداء.....
١٥	شكر وامتنان.....
١٧	مقدمة.....

الباب الأول

واحد صحيح

٢٣	
٢٥	١ - قصة شَعر (حياة).....
٣٣	٢ - ثمن الوعي.....
٤٠	٣ - إنتي جاية تشتغلي إيه؟.....
٤٧	٤ - الكومفورت زون.....
٥١	٥ - الولاء الخفي.....
٦٢	٦ - صباح الخير: أنا إنسان طيب.....
٦٧	٧ - يو دونت هاف توبي سو نايس.....
٧٠	٨ - بر الوالدين.. وبر الأبناء.....
٧٨	٩ - ماتتجوزوش.. ماتتخلفوش.....
٨٦	١٠ - لأ.. بطعم الفلامنكو.....
٩٦	١١ - الاستقلال.. والاستغناء.....
١٠٠	١٢ - ده أنا.. وأنا مش عار.....
١١٣	١٣ - جذور القلب.....
١٢٧	١٤ - مَرَايا الروح.....

- ١٥ - حكاية (سالي) و(آن) ١٣٥
 ١٦ - القيامة النفسية ١٣٩
 ١٧ - واحد صحيح ١٤٤
 ١٨ - أنت عبقرى ١٦١
 ١٩ - هنا ودلوقت ١٦٦
 ٢٠ - وفيك انطوى العالم الأكبر ١٧١

الباب الثاني

ألعاب نفسية

- ٢٠١
 ٠ - لعبة (مالهاش حل) ٢٠٦
 ١ - لعبة (القرب والبعد) ٢١٠
 ٢ - لعبة (الحبيب الشبح) ٢١٣
 ٣ - لعبة (الحب المستحيل) ٢١٧
 ٤ - لعبة (أمل حياتى) ٢٢٢
 ٥ - لعبة (مين هيمسك الكونترول؟) ٢٢٥
 ٦ - لعبة (خُد وخُد) ٢٢٨
 ٧ - لعبة (زعلان بينى وبين نفسى) ٢٣١
 ٨ - لعبة (اتغير بس خليك زي ما انت) ٢٣٤
 ٩ - لعبة (أنا اتغيرت أهو) ٢٤١
 ١٠ - لعبة (الطلاق اللي اسمه جواز) ٢٤٤
 ١١ - لعبة (السرسوب) ٢٤٧
 ١٢ - لعبة (لما) ٢٥٠
 ١٣ - لعبة (أنا مش لأعب) ٢٥٣

- ٢٥٧..... لعبة (قلب الترابيزة) ١٤ -
٢٦٣..... لعبة (الساخرون في الأرض) ١٥ -

الباب الثالث
الطريق إلى نفسك

- ٢٦٧
٢٧٢..... أنا موجود ١ -
٢٨٠..... أنا محتاج ٢ -
٢٩٥..... أنا عايز ٣ -
٣٠٥..... من حقي ٤ -
٣١٣..... أنا قررت ٥ -

د. مُحَمَّد طَه صِدِّيق

استشاري وأستاذ م الطبِّ النَّفسي

كلية الطب - جامعة المنيا - مصر

نائب رئيس الجمعية المصرية للعلاج النفسي الجمعي (سابقاً)

زميل الكلية الملكية البريطانية للأطباء النفسيين

عضو الجمعية الأمريكية للعلاج النفسي الجمعي

عضو الجمعية العالمية للعلاج النفسي الجمعي

كُلُّ ما هو مكتوبٌ في هذا الكتابِ، هو اجتهاداتٌ وتحليلاتٌ ورؤى شخصية بحتة، مبنيةٌ على تجربتي الحياتية الخاصة (كإنسان)، وعلى خبرتي العلمية والتعليمية والعلاجية المتواضعة (كطبيب نفسي وعضو هيئة تدريس جامعي).

كُلُّ كلمةٍ هنا تحملُ الخطأ والصواب، وتخضعُ للنقد والتفنيد، ويُؤخذ منها ويُرد عليها. وليس لها أيُّ هدفٍ سوى نشر التوعية النفسية، باستخدام لغةٍ سهلةٍ ومفرداتٍ بسيطةٍ، اجتهدتُ في فهمها واستيعابها وتوصيلها قدرُ المستطاع.

مُحَمَّد طه

إهداء..

إلى روح أخي وزميلي د. أحمد علي فؤاد.

عرفتك أكثر.. بعد رحيلك.

شكر وامتنان

شكري الأول للأستاذة هالة البشبيشي والأستاذ شريف الليثي..
اللي أخذوا المخاطرة من أربع سنين، وقرروا إنهم ينشروا لواحد غير
معروف؛ بيكتب طب نفسي بالعامية المصرية.. لولاهم ماكتتوش
عرفتوني ولا سمعتو عني.. أدعو لها الآن بكل توفيق ونجاح..
يستحقوه عن جدارة.

امتناني لا ينتهي ليكم، القراء والمتابعين الكرام، أتمم الأصل،
وأصحاب الفضل، ووجهة الرحلة.

عميق العرفان لزوجتي الغالية، اللي مابخلتش عليا بوقتها، ولا
مجهودها، ولا أفكارها واقتراحاتها المثمرة والمبدعة جدًا، واللي أضافت
إلى كل صفحة في هذا الكتاب رحيقًا خاصًا وحسًا مختلفًا.

كل حبي لكريم وسلمي، وأولادي الشجعان.. اللي روحهم الطيبة،
وأنفاسهم العطرة، موجودة في كل كلمة وكل حرف وكل خطوة في
من حياتي.

كل الشكر لزمايلي، وأساتذتي في قسم الطب النفسي بكلية الطب -
جامعة المنيا.. اللي بيشجعوني، ويسندوني، ويتحملوا تقصيري.

وما فيش أي كلام، ولا أي وصف، يقدر يوقّي أبي الروحي
وأستاذي الغالي د. رفعت محفوظ حقه؛ فهو المؤلف الحقيقي لكل ما
أكتب، والصاحب الأصيل لكل ما أعلم، والمستحقّ الأولى للشهرة
والانتشار.. لكنه يؤثّر البعد عن الأضواء، والعمل في صمت، ونقل
الرسالة من خلال تلاميذه، وأبنائه، ومرضاه.

وأخيرًا.. أبي رحمة الله عليه، المعنى المتجسد للإيثار.
وأمي.. أطال الله في عمرها، الصورة الحية للعطاء.

ربنا يديم بيني وبينكم جميعًا الحب والود والمعروف.

محمد طه

مقدمة

التغيير هو أكبر تحدي ممكن يواجهك في حياتك.
إنك تبطل حاجة اتعودت عليها، بعد ما أصبحت جزء منك ومن وجودك.
إنك تحرك شيء ثابت ومستقر جواك، بعد سنين من الجمود، وعمر من التيبس.
إنك تقرر تبقى نفسك، رغم كل الجهود والضغط من اللي حواليك
إنك تبقى حد تاني.

والتغيير الحقيقي، يكون معاه صعوبتين..

الصعوبة الأولى: إنك هتكون عامل زي الطفل المولود جديد..
بتخرج للحياة ومعاك كل المخاوف زي ما معاك كل الفرص.. بتتعرف
على نفسك، وعلى الناس كأنك بتشوفهم لأول مرة.. بتختار اختيارات
جديدة، وتمشي في سكك مختلفة.. حتى لو كانت مؤحشة، أو مهجورة.

الصعوبة الثانية: هي إن التغيير ليه تمن، والتمن ده ممكن يكون غالي
جدًا.

التمن ممكن يكون ألم في النفس، ووجع في الروح.
ممكن يكون بُعد، أو هجر، أو - أحياناً - انفصال.
ممكن يكون استقلال، أو تخلي، أو حتى استغناء.

التغيير مكلف، وتكلفته قد تكون باهظة.

التغيير مخاطرة.. محسوبة وغير محسوبة.

التغيير يشبه المشي على الصراط.. أن تجتاز الجحيم، لتصل إلى جنة نفسك العامرة.

وعلى هذا الصراط، وفي هذه الرحلة.. هتعدى بمحطات مهمة وفارقة جداً.

محطة إنك تخرج عن النص القديم الموروث المتهالك.. اللي كتبه حد غيرك، وأصبح مش مناسب ليك.. وده اللي عملناه في كتاب (الخروج عن النص).

ومحطة إنك تكتشف كل العلاقات الخطرة اللي في حياتك، وتعالجها أو تنهيها فوراً.. وده اللي شفناه في كتاب (علاقات خطيرة).
وتلات محطات كمان، هي قدمهم لك الكتاب ده.

الكتاب مقسم إلى ثلاثة أبواب، كل باب فيهم بمثابة كتاب مستقل، ومحطة منفصلة.

الباب الأول هيوريك بعض صور التغيير، وهي عرض لك بعض طُرقه وأساليبه.. زي إنك تسأل نفسك: «هو انا في البيت ده بشتغل إيه؟»، وإنك تخرج من «الكومفورت زون - منطقة الراحة»، اللي انت ساجن نفسك فيها، وانك تشوف إنت عندك «ولاء خفي» لمن وليه.. وانك تصدق إنك إنسان طيب، بالرغم من كل حاجة.. وان ده في الوقت نفسه.. مش معناه إنك تبقي ساذج أو متهاون في حق نفسك.

الباب ده هيوضح لك إيه هو «البر الحقيقي» بالوالدين، وهيعلّمك ازاوي تقول: «لأ»، اللي تكبرك وتوصل رسالة إيجابية لبي قدامك.. هيفرّق لك بين «الاستقلال» و«الاستغناء».. وهيخليك تقول بأعلى صوتك: «ده أنا.. وأنا مش عار».

هيووريك ازاى تزرع جذور الناس في قلبك.. وازاي تشوفهم وتحسهم
بمرايات روحك..

هيعرفك على أجزاء نفسك، ويكشف لك أوجه شخصيتك، ويصالحك
عليهم كلهم.

وهيصحبك -أخيراً- في رحلة ممتعة عبر مستويات وعيك، وطبقات
وجودك؛ علشان تكتشف إن العالم كله حته منك، وإن الكون كله
مطوي داخلك، وإنك بكل دول (واحد صحيح).

وطبعاً مش هينفع تبقى (واحد صحيح) من غير ما تعرف كويس
إيه هي (الألعاب النفسية) اللي ممكن تكون بتلعبها، أو حد غيرك
بيلعبها معاك، وفي الآخر تطلع منها خسران.

الألعاب دي هي اللي بتخلينا نلف حوالين نفسنا في علاقة ما.. وهي
اللي بتخلينا ننسى نفسنا في علاقة أخرى، وهي اللي بتخلي (العلاقات
الخطرة) خطرة فعلاً.

علشان كده الباب الثاني من الكتاب، بيعرض لك بالتفصيل عدد
كبير من الألعاب النفسية، اللي بتلعب في كثير من العلاقات والظروف
والمواقف، واللي بتنتهي دايمًا بالفشل والإحباط.

الباب ده هيعرفك يعني إيه ألعاب نفسية، وهيساعدك إنك
تكتشفها، وهيقول لك إزاى تنهيهها أو توقفها أو تخرج منها.

وعلشان أجاب على السؤال المتكرر بأكثر من صيغة: «هنعمل إيه
دلوقت؟»، «أدينا عرفنا إن فيه مشكلة، الحل إيه بقى؟». «إنت سلطت
الضوء على العقد والكلاكيك، قول لنا نحل ده كله ازاى؟». أنا خصصت
الباب الثالث من هذا الكتاب لعمل خارطة طريق نفسية، مكونة من
أربع خطوات، هتساور لك على بعض المعالم، وتوضح لك بعض الإشارات،
اللي ممكن تساعدك في الوصول إلى حل من داخلك، والعثور على إجابة
خاصة بك، واتخاذ القرار المناسب، في الوقت المناسب، وبالطريقة المناسبة.

مش بس كده، الباب ده فيه أمثلة من حياتك، وناذج من علاقاتك،
وتمرينات نفسية مهمة، تقدر تعرف بيها احتياجاتك، وتكتشف عن
طريقها مخاوفك، وتصدق بيها حقوقك، وتأخذ من خلالها قراراتك
الجديدة.

كما ذكرت.. الكتاب ده في الحقيقة، عبارة عن ثلاث كتب مدججة في
بعضها.. محتواها العلمي دسم ومكثف للغاية.. رغم إنها مكتوبة بلغة
سهلة، ومفردات بسيطة.. كأني فعلا قاعد باتكلم معاك. نصيحتي إنك
تقراه على مهل، وبجرعات مناسبة، دون تعجل، أو حماس زائد.

انتظرت ستين كاملتين قبل ما انشر هذا الكتاب، علشان الحفر
في النفس البشرية ليه احترام، والتوغل في أعماقها ليه قدسية، ومن حق
القراء هدنة نفسية مناسبة لالتقاط الأنفاس، واستعادة التوازن، بعد
جرعة (الخروج عن النص)، و(علاقات خطيرة) الثقيلة، اللي كانت
محتاجة وقت علشان تتبلع وتهضم وتفيد، وتتحول إلى تصرفات
وسلوك يومي عند كل من تناولها.

الحكاية مش كلام بيكتب أو يُقرأ، دي عملية جراحية دقيقة، فيها
نفوس بتتعري، وعيون بتتفتح، وقلوب بتتعلم النبض من جديد..
وأي توقيت غير مناسب، أو جرعة زائدة، ممكن يكون ضررهم أكثر
من نفعهم.

لو حسيت في أي وقت إنك مخضوض، أو متلخبط.
لو اتفاجأت برؤيا أزعجتك، أو اكتشفت اكتشاف حيرك.
لو اتحركت جواك علامات استفهام أو استفسار أو استيضاح.
لا تتردد في إنك تقعد مع طبيب نفسي متخصص، يسمعك،
 ويفهمك، ويقدملك يد المساعدة.

الكتاب ده عن التغيير، عن خطواته، وعن تمنه.
عن العلاقات .. أولها، وآخرها.
عن الحب، والكراهة.
عن القرب، والبعد.
عن الوحدة، والونس.

الكتاب ده عن احتياجاتك، ومخاوفك، وحقوقك النفسية.
عن قراراتك اللي أخذتها زمان.
وقراراتك اللي هتاخذها دلوقت.

الكتاب ده هينقلك بهدوء وثقة، من مرحلة (الحبو) خارج النص ..
و(المشي) فوق أشواك العلاقات الخطرة وتجاوزها ..
إلى الضرب على الأرض بشكل إيقاعي متتابع وباهر ..

كأنك راقص فلامنكو محترف ..
يرقص فوق آلامه، ويزلزل القلوب قدام عينيه.
يعلن عن نفسه في وجه العالم .. مع كل دبذبة عالية مدوية من
قدميه.

يرفع عنقه نحو السماء، ويغرس بذور وجوده الجديد في أعماق
الأرض.

قرب ..
هات إيدك ..
وجهز قلبك وعقلك وروحك ..
لتقابل نفسك ..
كما لم تعرفها من قبل.

الباب الأول
واحد صحيح

قصة شعر (حياة)

- ١ -

- أنا قصيت شعري يا دكتور.
- آه يعني عملي قصّة جديدة.. ماشي، كويس.
- لا يا دكتور.. أنا حُشت شعري.. قصيته خالص.
- خالص؟ يعني زيرو؟ ما بقاش فيه شعر؟
- آه.. بالظبط كده.

طبعا أول ما تبادلر لذهني بعد ما سمعت الكلمتين دول من (حياة)،
وده مش اسمها الحقيقي، هو إنها عملت ما نسميه في كتب الطب النفسي
(سلوك مُشوّه للنفس Self-mutilating Behavior). وده بيكون وراه أسباب
كثيرة، ومعاني أكثر، زي الإحباط، أو الغضب، أو الانتقام. بس بدل ما
يتم توجيهه لمصدره الأصلي (شخص أو أشخاص آخرين)، بيتم توجيهه
لصاحبه، يعني بدل ما تؤذي حد، تؤذي نفسها.. بدل ما توجع حد،
توجع نفسها.. بدل ما تشوه حد، تشوه نفسها.

لكن في الحقيقة اللي حصل في باقي الجلسة، كان على غير توقعي تماماً، وعلى غير توقع اللي كتّبت كتاب الطب النفسي نفسه.

نتكلم الأول عن علاقة البنت بشعرها، وعلاقة الولد بشعره..
وبعدين أقول لك اللي حصل في باقي الجلسة.

- ٢ -

علاقة البنت بشعرها علاقة معقدة ومركبة جداً، رغم إنها قد تبدو غير ذلك، وده مالهوش دعوة بكونها محجبة أو غير محجبة.. أنا باتكلم هنا عن علاقتها بشعرها، اللي هو جزء منها ومن جسمها.

الانطباع السائد والأشهر، هو إن شعر البنت هو أحد مظاهر أنوثتها.. وحبها ليه واعتزازها بيه ينعكس بشكل كبير حبها لأنوثتها واعتزازها بيها.. بس ده مش كل حاجة.

قصة شعر البنت ليه معنى، طبيعة شعرها وتغيرها مع حالتها النفسية ليه معنى، أمراض وأعراض الشعر ليه معنى.. وما يمثله الشعر بالنسبة لصاحبه قد لا يخطر على عقل بشر.

شعر البنت بيكون أحياناً زي المراية اللي بتعكس علاقتها بنفسها، يعني لما تكون متضايقه من نفسها، أو كارهاها، شعرها يقصف أو يقشر.. لما تكون غضبانه، محبطة، مكتئبة.. شعرها يدبل وينكمش ويفقد بريقه.. ولما تبقى منشرحة ومقبلة وعندها أمل.. شعرها يطاوعها ويلين في أيديها ويكتسي بلمعان الحياة.

ولما تحب تقول (لأ) وتشور وتعترض.. تغير التسريحة اللي مامتها
عودتها عليها، بتسريحة غريبة شوية، أو شويتين.

ولما تحس إنها كبرت، وإنه من حقها مختلف وتختار وتقرر.. تعيد
تشكيله من تاني، مع تشكيل نفسها الجديدة.

لما تتجوز، بتحس في علاقتها بشعرها إنها ملكة متوجة، مليانة أنوثة
وجمال.

ولما تحمل وتختلف وهرموناتها تلعب بيها.. شعرها يلعب بيها هو
كمان، وتتغير طبيعته زي ما بتتغير طبيعتها.

ومع أول شعرة بيضا تظهر في راسها.. تختلف نبضات قلبها إلى
الأبد.

- ٤ -

البنات بتغير قَصَّة شعرها، كأنها بتغير هويتها.

ماتستغربش..

قَصَّة شعر البنات بتغير في أوقات كتير.. فعلاً عن هويتها.

فيه قَصَّة متمرّدة.. فيه قَصَّة حادة قاطعة..

فيه قَصَّة مُتَقَصِّة هاجمة.

فيه قِصَّة مالهش ملامح ولا حدود.. تعبر عن حيرة وتيه وأسئلة،
وقِصَّة غاوية مغوية.. تقربك وتبعدك وتلاعب بيك زي تلاعبها
بإسهات الهوا.

فيه قِصَّة تخفي جزء كبير من وجه صاحبته.. اللي مش عاوزه
لشوف العالم، ولا عاوزه العالم يشوفها..

وقِصَّة تبرز وجه صاحبته، كأنها بتتحدى بيه الدنيا كلها.

فيه قِصَّة طفولية، فيها من طفولة صاحبته وقربها منها..

وقِصَّة عجوز حزينة، فيها من حزن صاحبته ووحدتها.

فيه قِصَّة أميرة حاسة جمالها وبتحبه..

وقِصَّة فتاة بائسة على حافة الانتحار.

فيه قِصَّة محافظة تقليدية منظمة مرتبة، زي الوسواس القهري..

وقِصَّة ثائرة خارقة للقواعد، زي الشخصية الحديدية.

فيه قصة بتدفن الأنوثة، وقصة بتحييها وترويبها وتزهرها.

فيه قِصَّة معاها قرار بالحياة، وقِصَّة معاها قرار بالموت.

الشعر نفسه، كجزء من الجسم، سواء عند الولد أو عند البنت ممكن
يمثل حاجات كثير جدًا.

ممكن يمثل علاقته بأبوه، أو علاقتها بأمها.. نفس القصة، نفس
التسريحة، نفس سن الصلع أحيانًا.

تغيير شكل وطول الشعر ممكن يمثل رغبة في التفرد والخصوصية..
بعيدًا عن سلسال الآباء والأمهات والأجداد والجدات، بكل ما نقلوه
وورثوه للابن أو الابنة، ممكن يكون (خروج عن النص).

وصبغ الشعر قد يعني الخوف من الموت، وخداع النفس والمرأة
بصغر السن.

إطلاق الشعر وتطويله وعدم قصه لفترة طويلة، قد يعني الرغبة
في الحرية والانطلاق، أو التمرد ورفض المؤلف.. أو - أحيانًا - الكسل
والإهمال والرغبة في الانفصال عن الواقع.

الاهتمام الزائد بالشعر ربما يشي بنرجسية زائدة، أو العكس تمامًا..
ضعف شديد في الثقة بالنفس.

وحلق الشعر عند الإحرام، رمز للتخلص من الذنوب واجتزاز
الخطايا من جذورها، وفتح صفحة جديدة مع نفسنا ومع خالقنا.

هذا ما كتبه (حياة)، في درس جديد من دروس علم النفس،
وفصل باهر في كتاب الطب النفسي، القائم كله على وصف المرضى
لمشاعرهم واعتمالات أنفسهم وحركة عوالمهم الداخلية:

«النهارده قررت يا (حياة) إني أحلق شعرك..
يعني أقص عنك أيام من الاستغلال والبكا والخرقة والوجع..
أنا مسؤولة عنك يا (حياة).
أنا قررت أعالج شعري بياني أقصه من أوله، وابدأ الحكاية من
الجدور.

وابدأ أرعى الجدور واحد واحد.
أبدأ أوصل لكل جدر من شعري (حب) مش (إحساس بالذنب).
أنا قررت أكون موجودة.
قررت ما اسمحش لأي حد، ولا حتى لنفسى، إني أعيش حاجة
أقل من اللي أستاهلها.
أنا محتاجة أصدق وأعيش وأشوف وأمارس، إني أستاهل أتشاف
وأتقبل وأحترم.
أنا هابدأ أسكن جسمي من تاني.
It is my space».

اللي بتوصفه (حياة) مش غضب ولا اكتئاب ولا انتقام.. حياة بتوصف
عملية تحول نفسي واصلة لأعمق طبقات وجودها.. انتقال حقيقي من
موقف هو أقرب للموت والفناء.. إلى موقف هو أقرب للحياة والبقاء..
إعلان صادم عن حقها في الوجود.. صرخة عالية في وجه كل من آذاها
وشوها وحاول كسرها.

الشعرة التي تبت بعد قصها.. تكون أقوى وأصلب.. وكذلك الأنتى.

بافتكر دلوقت المشهد الشهير في فيلم V for Vendetta، اللي كان فيه بطل الفيلم بيقص شعر (إيفي)، كمرحلة من مراحل تدريبها النفسي وانسلاخها الروحي.. ويبجي بعده المشهد العبقري الخالد، اللي بينهمر فيه المطر بشدة، وهي رافعة إيديها الاتنين للسما، وحاسة بكل نقطة مياه بتلمس جلد راسها.. كأنها طفل مولود جديد.

يبدو إن فيه قصّة شعر..
بتعبر عن ولادة جديدة.. وعمر جديد.. وأمل جديد.
بتعبر عن انتهاء عهد.. وبداية عهد.
عن استعادة النفس.. واسترجاع الروح.
عن التحكم من جديد في مقاليد الأمور.
عن الرجوع خطوتين للخلف قبل انطلاق سباق الألف ميل.

شعر البنت مش بس مرايتها..
شعر البنت صاحبها.. ولسانها.. وصوتها.
هو طريقة إعلانها عن نفسها.. وموقفها من الحياة.
شعر البنت فيه قصة حياتها.

قصّة (شعر حياة)..
هي (قصّة شعر) حياة.
هي قصة (حياة)..
وممكن تكون في يوم من الأيام..
قصّة حياتك.

ثمن الوعي

العلاج النفسي له أشكال وألوان وأنواع.. بعض أنواع العلاج النفسي يتعامل مع الأعراض المرضية وبتهدف إلى إزالتها واختفائها.. أنواع ثانية يتعامل مع المنظومة المعرفية والسلوكية للمريض ويتحاول تعديلها وتغييرها للأفضل والأنسب.. أنواع تالته بتقدم الدعم النفسي وبتهتم بتقوية دفاعات المريض الموجودة بالفعل.

فيه بقى أنواع مهمة من العلاج النفسي مش بتقف عند اختفاء الأعراض المرضية.. ومش كل همها تعديل المنظومة المعرفية والسلوكية للمريض.. ومش بتحاول بشكل مباشر- تقوية دفاعات المريض النفسية.. لا.. يتحالص.

العلاج هنا بيكون هدفه تفكيك البناء النفسي المرضي بكامله.. وإعادة تكوينه من جديد.. هدم ذلك الهرم المنخور بسوس الصدمات النفسية المتتالية.. ثم رفعه على أسس أقوى وأقوم.

بتهدف العلاجات دي -بتعبيرات أوضح- لتغيير شخصية المريض بكاملها.. أيوه.. يعني المريض يدخل العلاج بنبي آدم.. يخرج من العلاج بنبي آدم تاني خالص.

إزاي..

إحدى أهم وسائل (وفي نفس الوقت أهداف) العلاج النفسي اللي بالشكل ده، هو (الوعي).. يعني المريض ببدا يوعى بحاجات ماكانش واعي بيها قبل كده.. يوعى باحتياجاته اللي كان ناكرها على نفسه.. يعرف مخاوفه اللي كانت مانعاه من المطالبة بالاحتياجات دي.. يتعلم حقوقه النفسية.. ويكتشف القرارات المرضية اللي كان واخدها في حياته.. ويبدأ يغيرها.. تمامًا.

يعني يوعى إنه محتاج يتشاف ويتقبل ويتحب بدون شروط.. ويعرف انه بطل يطالب بالحاجات دي من زمان، علشان كان خايف من عقاب اللي حو اليه، أو زعلهم منه أو هجرهم ليه.. يتعلم إنه من حقه يتصدق ويحترم ويهتم بيه.. ويكتشف إنه قرر يدفن نفسه الحقيقية اللي كانت بتطالب بكل ده، وطلع مكانها نفس مزيفة كل هدفها انها تتأقلم مع الظروف اللي اتخط فيها.. وتتكيف مع القليل من المتاح.

ومع العلاج.. يبدأ يحس تاني باحتياجاته القديمة.. ويقبل مخاوفه اللي كانت مانعاه.. ويطالب بحقوقه اللي نسيها من زمان.. ويقرر -أخيرًا- إنه يخرج المارد من القمقم.. ويقول بأعلى صوته (لااااااااااا).

وبعدين..

توعى صاحبنا إنه محتاج يتقبل .. وإنه عمره ما اتقبل بجد من أهله
اللي كانوا إما رافضين أو مشغولين أو مُعاقين .. ويكتشف ان القبول
حله .. وإنه قرر ياخذ الحق ده بطريقة مَرضية لما اختار يشتغل شغلانة
بهاك فيها نفسه، ويجرقها ليل ونهار، من أجل نظرة رضا قد يراها على
أحد الوجوه.

بتعالج .. ويتحسن .. ويتغير .. وما يقاش عنده نفس الجوع المرضي
للقبول .. ولا نفس النهم الحثيث للاهتمام .. فيعمل إيه؟ يقرر يسبب
مهنته .. ويغير وظيفته .. ويختار مهنة تاني أنسب لرؤيته الجديدة ..
ووظيفة مختلفة تتماشى مع الإنسان الذي أصبح عليه.

توعى صاحبنا انها محتاجة تتحب زي ما هي .. وتعرف إنها بطلت
تطالب بده علشان ماشافتهوش حوالها .. وتكتشف انه من حقها تشاف
وتقبل دون قيد أو شرط .. وتقرر تصدق إنها تستاهل .. وإنها ماتقبلش
أي معاملة من أي حد يوصل ليها إنها ماتستاهلش .. وأول حد طبعًا
هيكون مين؟ جوزها .. اللي ولا شاف .. ولا سمع .. ولا وعى .. ولا
اكتشف .. ولسه عايش في عصور الجاهلية النفسية اللي اتربى فيها ..
ولسه ساكن في جحور ما قبل التاريخ .. هي بتكبر نفسياً .. وهو متحجر
قدامها .. هي بتنضج روحياً .. وهو متقوقع حوالين نفسه .. مغمض
عينيه عن أي اختلاف .. وصامم أذنيه عن أي تغيير .. ومش مستعد
يرافقها في رحلتها الجديدة نحو الحياة .. فيحصل إيه .. يتطلقوا .. لأنهم
خلاص مابقوش مناسبين لبعض .. البني آدمة اللي اتجوزت غير البني آدمة
الموجودة دلوقت .. اللي اتجوزت كانت دافنة نفسها بالحياة .. والموجودة
دلوقت قررت تحيا .. اللي اتجوزت كانت ناكرة على نفسها احتياجاتها ..
والموجودة دلوقت مش هتنكر احتياجاتها تاني .. اللي اتجوزت ماكانتش
عارفة حقوقها .. والموجودة دلوقت عارفة حقوقها ومش ناوية تفرط
فيها .. اللي اتجوزت كانت خايفة .. الموجودة دلوقت بطلت تخاف.

قيس على ده اللي بدأ يقول (لأ) لأبوه وأمه، بعد ما عرف إن البر الحقيقي بيهم هو إنه يكون نفسه، مش إنه يسلمهم نفسه.. واللي غيرت طريقة لبسها بعد ما غيرت اختياراتها في الحياة.. واللي بدأ يراجع علاقته بربنا بعد ما اكتشف إنه كان يعبد أصنام نفسية خاوية رغم ضخامتها.. ده غير اللي بدأ يسأل ويدور وما يقتنعش بالإجابات التقليدية المصمتة الجاهزة.. واللي بدأ يختبر ويراجع كل المسلمات مهما كانت درجة ثباتها.

زلزال نفسي يهز الكيان، بمتهى الرحمة.. انفجار روحي مليء بالأحزان، وبالورود معاً.. بركان هائل من الاحتياجات والمطالب والحقوق والقرارات.. جسد موؤود تبعث فيه الحياة من جديد.

بس التمن.. غالي.

ثمن الوعي هو المراجعة بلا هوادة.. ثمن الرؤية هو إعادة النظر في كل شيء.. ثمن النور هو الخروج من كهوف الظلام (اللي بيسموها ساعات مناطق الراحة).

ثمن العلاج النفسي العميق قد يكون الانفصال.. أو تغيير الوظيفة.. أو اعتزال بعض الناس.. لما يكتشف الشخص إن بعض اختيارات حياته السابقة كانت خاطئة.. ومتسرعة.. ومرضية.

طيب أنا كاتب الكلام ده ليه؟
بخوفكم من العلاج النفسي مثلاً؟ مش عاوز اشتغل أنا يعني؟

..لا

أنا كاتب الكلام ده علشان أقول لك إني مش باتكلم عن العلاج النفسي أصلاً.. هو فيه كام واحد خضع واللا هيخضع للعلاج النفسي العميق بالشكل ده؟ عدد قليل جداً.. جداً.

أمال أنا باتكلم عن إيه؟

أنا باتكلم عن الوعي.. اللي العلاج النفسي هو فقط أحد الطرق إليه.. لكن فيه طرق أكثر وأكبر.. طرق متاحة بشكل أوسع.. منها اللي حضرتك بتعمله دلوقت.. واللي حضرتك بتعمله دلوقت: القراءة.. الإنترنت.. الفيس بوك.. البوستات.. السفر.. الكورسات.. الكتب.. الفضفضة الإلكترونية.. المعلومات اللي موجودة في كل حته.. الخبرات الإنسانية المتبادلة بين ناس على بعد قارات كاملة.. ناس ما يعرفوش بعض ولا عمرهم شافوا ولا هيشفوا بعض.. بيقدموا خلاصة خبرات وتجارب حياتية عميقة جداً.

المعرفة الإنسانية بتتضاعف كل عدة سنوات بشكل لم يسبق له مثيل في التاريخ.. المعلومات المتاحة لأبنائك أضعاف أضعاف المعلومات اللي كانت متاحة ليك وانت في سنهم.. الخبرات المتاحة لزوجتك هي خلاصة خبرات مئات بل آلاف الزوجات عبر العالم.. شلالات يومية من الاكتشافات تنهال على العقول والقلوب والأنفس.

البنات والستات بتعرف حقوقها.. الأبناء بيتعلموا عن احتياجاتهم ويقررُوا يطالبوا بيها.. الكل في حركة كونية تصاعدية من الوعي.. لكن لسه فيه ناس (معظمهم من الذكور للأسف) بيشاوروا نفسهم.. لأنهم في تصورهم.. الطرف الأقوى في المعادلة.. اللي مش محتاج يعرف.. ومش محتاج يتعلم.. ومش محتاج يوعى.. ويقاوم التغيير بكل طريقة..

ويبعاند سنة الحياة نفسها.. وقوانين الطبيعة منذ الأزل.. ومُصِرَّ يمشي
عكس التيار.. لغاية ما تنهار كل المعابد.. على رؤوس قاطنيها.

الوعي الإنساني يتمدد.. ويوسع.. ويتعمق.
ومع كل نبضة ووعي.. فيه احتياج مدفون بيكتشف.
مع كل رؤية جديدة.. فيه خوف قديم بينزاح.
مع كل لمعة عين كانت مطفية.. فيه حق أصيل يُطالب بيه.
مع كل ضربة قلب كانت خافتة.. فيه قرار جديد يُعلن بالحياة.

ومع كل دول فيه تمن بيتدفع.. إنت بتتحول من بني آدم لبني آدم
تاني.. إنتي بتشوفي عالم جديد ماكتيش تعرفي إنه موجود أصلاً.. إنتو
بتفوقوا على الحقيقة.. بعد سبات طويل.. وكل ده مش ببلاش.

يا تكونوا قد التمن.. يا بلاش تبدأوا الرحلة.

إلى كل النائمين والمتفوقين والمتحجرين.
إلى كل صامّي الآذان.. مغمضي العينين.
إلى قلوب اهترأت عليها أقفالها.

الحقوا نفسكم.. قبل ما تنقرضوا.
اتحركوا واسمحووا لأبنائكم بالحركة.
انضجوا واسمحووا لزوجاتكم بالنضج.
اتغيروا واسمحووا لأنفسكم وغيركم بالتغيير.
علشان ماتعضوش على نواجذكم..
حينما يطرق الوعي أبواب بيوتكم..
فهو آتٍ لا محالة.

استنى..
سامع صوته؟

بيخبط أهو..
قوم ياللا..
افتح للوعي الباب.

إنتي جاية تشتغلي إيه؟

فيه بيوت وعائلات بيكون فيها تبادل للأدوار بين أفرادها بشكل غريب جداً.

يعني فيه أم بتبقى كل هوايتها إنها تحب بنتها الصغيرة، وتقعده تشتكي لها من معاملة أبوها ليها.. وتنتقده قدامها.. وتحكي لها على تفاصيل الخلافات اللي بينهم.. للدرجة اللي تخلي البنت تحس بالمسؤولية عن أمها، وتاخذ موقف من أبوها.. وتبدأ تقف قصاده.. وتحمل همّ الدفاع عن أمها.. وحمايتها.. وأخذ حقها.. مع إن دي مش شغلتها.. وده مش مطلوب منها أصلاً.

ابن تاني.. بيتعامل معاه أهله بشكل يخليه يحس إنه الشخص اللي لازم يتدخل دايماً، علشان يحل المشكلات بينهم.. ويصلح المواقف المتأزمة في علاقتهم.. يكلم أمه.. يروح لأبوه.. يهديهم.. يفهمهم.. يفك الاشتباك ما بينهم.. كأنه هو القشة اللي ساندت البيت ومانعاه من الانهيار.. وكأنه هو الشخص اللي شايل على عاتقه استمرار هذا الزواج.. ونجاح هذه الأسرة.. حتى لو على حساب نفسه.

ابن آخر في أول كام سنة من عمره.. يتعمد أبوه بكل إصرار وترصد
إنه يوصل له إنه راجل البيت.. اللي مسؤول عن أمه واخواته في غيابه..
يشمخط وينظر بداله.. ويتحكم في سير الأمور مكانه.. مش بس كده..
ده بخلية يعمل كده في حضوره وأمام ناظريه.

ظهرت المشكلة؟

وضحت الصورة؟

لسه؟

طيب اقرا الكلام تاني كده.

هتلاحظ إن البنت الأولى بتعمل في البيت وظيفة (الأم) بالنسبة
(لأمها).. هي المسؤولة عنها.. هي اللي مفروض تحمي وتدافع.. هي
اللي تتخانق وتثور وتزعل.. هي بطلت تشتغل (ابنة).. واشتغلت (أم)..

الابن الثاني أهله بيخلوه يلعب دور الوالد أو الجد (الحكيم).. طوق
النجاة.. اللي من غير وجوده تخرب الدنيا.. ومن غير تدخله تتفاقم
المشكلات.. ويتحمل هو عبء حلها.. هو هنا بطل يشتغل (ابن)..
واشتغل (أب) لأبوه ولأمه.

أما الابن الثالث، فأبوه قرر كده بكل بساطة إنه يشغله (زوج)
وأحياناً (أب).. بصرف النظر عن سنه.. وعن حقه في إنه يعيشه..
ويستمتع بيه.

تبادل الأدوار والوظائف والمهام في البيوت بالشكل ده، مؤذي
بشكل مزعج جداً.. بشكل يشيب الشعر أحياناً.

أنا شفت بنت عندها تسع سنين.. أمها بتجيبها كل يوم، وتقعده تحكي لها عن تفاصيل علاقتها الجنسية مع أبوها.. وازاي هي بترفضه وبتقرف منه ومش عايزاه.. وازاي هو في نظرها شهواني وعنيف.. وتوصف لها حاجات أستحي إني أكتبها هنا.. تفتكروا! البنت دي هتحس بإيه؟ للأسف هتحس بالذنب والتقصير وقلة الحيلة.. لأنها مصدقة إن أمها بتتأذي وهي مش قادرة تعمل لها حاجة.. فتضطر المسكينة إنها تشتغل (أم) ل(أمها).. وتنيّمها كل ليلة عندها في أوضتها.. وتمنع أبوها إنه يوصل لها.. وتتخانق معاه لو قرب منها.. وتكرهه.. وتكره صنف الرجاله كلهم.. وتكره الجواز واللي بيتجوزوه.

شفت كمان البنت اللي عندها سبع سنين.. اللي أول ما مامتها تخلف طفل جديد.. ترمي عليها مسؤوليته.. تشيله وتخطه.. ترعاه وتاخذ بالها منه.. تشتغل (أم) لأخوها أو أختها.. تأكله وتشربه وتحميه (وهي نفسها محتاجة اللي يأكلها ويشربها ويحميها).. ولولا إنه ماينفعش.. كانت أمها طلبت منها ترضعه.

شفت البنت أو الولد اللي عمره عشر سنين.. وطول الوقت أهله محسسينه إنه عمود البيت.. وميزان العيلة.. الناجح.. العاقل.. الدرع الواقى لأسرة كاملة وسط عواصف الحياة.

حرام عليكم..

بتكبروا الأطفال قبل أوانهم.. بتحرموهم من طفولتهم وحقهم فيها.. بتخلوهم يلعبوا أدوار غير أدوارهم.. ووظائف حياتية غير وظائفهم، بتاعة سنهم وعقلهم وظروفهم.. بتكلفوهم بمهام مستحيلة لأي عاقل.. أو حتى مجنون.

كلنا بشكل طبيعي- بنؤدي أدوار مختلفة ومتشابكة في الحياة.. بس
امتى؟ وازاي؟ وفين؟ ومع مين؟ وليه؟ وكام مرة؟

مافيش مشكلة إن البنت تساعد أمها.. بس بما يتناسب مع سنها
وقدرتها ودورها الحقيقي في البيت.

جميل جدًا إن الولد يبقى جدع وشجاع وحسن التصرف.. بس في
حدود سنه وإمكاناته وظروفه.

مطلوب طبعًا لما الأب والأم يتعبوا أو يكبروا وتضعف قواهم، إننا
لساندهم ونساعدهم ونعولهم ونتكفل بيهم.. لكن مانعملش ده واحنا
لسه أطفال وهم في عز عنفوانهم وقوتهم.. ومانعملش ده تحت ضغط
وابتزاز عاطفي.. ومانعملش ده واحنا لابسين دور الآباء وهم لابسين
دور الأبناء.

غير كده.. يبقى خلط مُخل للأوراق.. وتبادل مُربك للأدوار.

فيه طبعًا مثل أوضح وأشهر وأقرب من كل الأمثلة اللي فاتت.. ويكاد
يكون موجود في كثير من بيوتنا العريقة العامرة: الزوجة اللي بتشتغل
(أم) لجوزها.. تطبخ له وتغسل له وتكوي له وترتب له دولابه وتلمع
له جزمته.. تأكله وتشربه وتنصف له المواعين وتروق له البيت.. تنيمه
وتصحيه وتجهز له الحمام وتحميه وتنشفه.. (أم) مثالية (لطفل) يبلغ من
العمر عدة شهور.

وعلى الجانب الآخر.. نلاقى هذا الزوج لاعتماده النكوصي، يلعب
دورين مالهومش أي علاقة ببعض.. وملهومش علاقة بدوره الأصلي
(كزوج).

شوية يلعب دور (الابن- الطفل) اللي بيستمع بكل الخدمات المجانية السابقة.. ويرتع في هذا النعيم الأمومي اللذيذ.

وشوية يلعب دور (الأب) اللي بيعول زوجته، ويعاملها على إنها (بنته).. يشتغل وهي تقعد في البيت.. يديها مصروف يومي أو شهري محسوب.. يتحكم بكل عنجهية في لبسها ومواعيد خروجها ودخولها.. يوافق أو يرفض انها تشتغل.. يختار أو يعترض على أصحابها ومعارفها.. يستبيح خصوصياتها ويضيق دوايرها.. ويخلي ليه الكلمة الأولى والأخيرة في كل شؤونها.. علسان هو ولي أمرها.

والله العظيم شفت اتنين بيحبوا بعض.. هو بيقول لها: (يا حبيبتي اعتبريني بابا).. وهي بتقول له: (أنا بادور فيك على اللي ماليقتهوش في بابا.. إنت بابا الجديد).. نية واضحة لعلاقة (تبني).. مش علاقة حب وزواج.

كلام غريب؟

كلام صادم؟

اتفاجئت؟

معلش.

دائماً الرؤية صعبة، بس مفيدة..

والحقيقة مؤلمة، بس مُغيّرة.

أنا عارف دلوقت إنك بتراجع نفسك وتساألها بكل صراحة: هو أنا باشتغل إيه في البيت ده؟

ابن رغم إني أب؟ أب رغم إني ابن؟ ابنة رغم إني زوجة؟ أم رغم
إني ابنة؟ زوج رغم إني ابن؟ زوجة رغم إني ابنة؟

أنا لما قرّيت السطر اللي فات ده اتوجعت .. منتهى اللخبطة والحيرة
والهم.

بنحرم نفسنا (أو نُحرم) من وجودنا الأصيل ودورنا الحقيقي ..
ونُضطر (أو نُضطر إلى) وجود آخر باهت ودور آخر مصطنع.

يادي الوجع ياربي.

من النهارده لو سمحت ..

من دلوقت لو سمحتي ..

مانتستغلش في بيتكم أي شغلانة غير شغلتك الأصلية .. ومانتطلبش
من أي حد في البيت يؤدي وظيفة غير وظيفته.

ابن يعني ابن وبس .. ابنة يعني ابنة وبس .. الكبار يتصرفوا مع بعض
أو يجيبوا حد كبير يتصرف معاهم.

زوج يعني زوج وبس .. زوجة يعني زوجة وبس .. ماحدث وصي
هل حد .. ولا حد ولي أمر حد.

فيه مشهد شهير من مسرحية قديمة اسمها (الإخمسة) .. بتسأل فيه
الراحلة (ماري منيب)، الفنان الجميل (عادل خيري) بشكل كوميدي
مشكرر، وتقول له كل شوية: إنتي جاية تشتغلي إيه؟

خلي المشهد ده في بالك.. وكرره بينك وبين نفسك أول وآخر كل
يوم.. بنفس خفة الروح ونفس السخرية اللاذعة: إنتي جاية تشتغلي
إيه؟

تاني..

إنتي جاية تشتغلي إيه؟

الكومفورت زون

يقول لك يا سيدي إن (الكومفورت زون) هي المساحة النفسية، التي يكون فيها الواحد مرتاح ومتطمئن وحاسس بالأمان، بعيداً عن أي قلق وتوتر.

لكني شايف إن حكاية (الكومفورت زون) دي، هي من كبرى المذاع النفسية التي عرفها التاريخ.

ليه؟

لأنها مش أكثر من قوقعة نفسية، مابتعملش أي حاجة غير إنها تقفل عليك.. وتحرمك من التجربة.. وتبعدك عن الناس.. ويبقى ده اسمه (باحمي نفسي).. و(باخذ بالي منها).

الفكرة الأساسية في (الكومفورت زون) هي (وهم السيطرة).. بمعنى إنك ماتعملش غير اللي تعرفه.. وماتعرفش غير اللي تألفه.. وماتحسش غير اللي انت متعود عليه.

الفكرة إنك تقلل كل الاحتمالات إلى أدناها.. وتحسب حسابات
قاصرة للغاية.. وتكون متصور إن دي الراحة.

قال يعني إنت كده متحكم في نفسك، ومخارجها ومداخلها..
ومسيطر على حياتك، بأبعادها وتفصيلها.

وفي الحقيقة، إنت بتحاول بكل طريقة إنك تتجنب المخاطرة..
وتتجنب الفقد.. وتتجنب الخسارة.. لكن اللي بتكون مش واخذ
بالك منه.. هو إنك بكده برضه، بتتجنب الحياة.. وتتجنب القرب..
وتتجنب المكسب.

في رأيي إن (الكومفورت زون) ما هي إلا سجن صغير.. به مكيف
للهواء.

طبعا مقدر جدا اختيار بعض الناس إنهم يعيشوا في هذه الفقاعة
الهشة.. عشان اللي شافوه قبل كده كان ألم شديد.. أو جرح عميق..
أو أذى بشع.. لكن كل ده مش معناه أبداً إنني أعيش في سجن.. معلق
عليه لافتة (منطقة الراحة).

يعني هو أنا مش من حقني إنني أحمي نفسي من حد، أو من حاجة
بتؤذيني؟

لا طبعا.. من حقك تحمي نفسك جدا.. بس مش تحمي نفسك
من الحد ده، ومن اللي جنبه، واللي حواليه، واللي معدين بالصدفة في
الطريق.

علماء التحليل التفاعلاتي Transactional Analysis، يقسموا مواقف الناس في الحياة لأربع مواقف:

- I'm Not OK, You are OK:

يعني أنا إنسان سيئ، وانت زي الفل.. وده عند كثير من الناس المكتئبين أو اللي حاسين بالدونية.

- I'm Not OK, You are Not OK:

يعني إحنا الاتنين سيئين.. والدنيا كلها سودا.. وما فيش أمل.. ودي الناس المتشائمة واليائسة.

- I'm OK, You are Not OK:

يعني إنت وحش وأقل مني.. وأنا حلو وتمام وأحسن منك (كثير من النرجسيين والمتعاليين).

- I'm OK, You are OK:

يعني أنا شايف نفسي وحاببها وقابلها.. وشايفك برضه وقابلك، ومعنديش مشكلة معاك، حتى لو كنت مختلف عني.

بيتقال إن الموقف الأخير هو أكثر موقف صحي فيهم.. علشان بيعني إنك مبسوط وان غيرك برضه مبسوط، وماحدث فيكم عنده مشكلة في ده.

لكن فيه طريقة تانية بيتشاف بيها الموقف ده.. وهي إنكم باينين من بره مبسوطين، علشان كل واحد فيكم في حاله.. كل واحد في جزيرة منعزلة عن الآخر.. كل واحد في فقاعة نفسية منفصلة.. وأنا تمام OK، وانت تمام OK.. وماحدث فينا ليه دعوة بالتاني.. ويكون الظاهر سعادة وسلامة نفسية.. والباطن عزلة.. وتوقع.. وكومفورت زون.

خدعة بالمعنى الحرفي يعني.

وكان الكومفرت زون دي زي (الرحم)..
الي الطفل عاوز يفضل فيه للأبد، من غير ما يتولد..
لأنه لو اتولد.. وخرج.. هيصرخ.. ويعيط.. ويتألم..
ويخاطر.. ويجرب.. ويقرب.. وينجح.. ويفشل.. ويحيا.. ويموت.

بس وبكل أسف.. مش هينفع نعيش في الرحم طول العمر..
مضطرين نتولد..
محتاجين نجرب..
محتاجين نقرب.

محتاجين ننزل على الأرض..
ونخطو خطواتنا الأولى..
خارج (الكومفورت زون).

اخرج بقى برجلك اليمين..
أو خليك جوه لو حدك.

الولاء الخفي

فيه مصطلح نفسي مهم بنستخدمه أحياناً، اسمه (الولاء الخفي Invisible Loyalty).. بمعنى إننا بيكون جوانا -بشكل غير واعى- إخلاص وولاء لحكايات آباتنا وأمهاتنا وأجدادنا.. وبنحاول من غير ما ناخذ بالننا نكرر الحكايات دي بطرق مختلفة، كأننا بنؤكد ليهم من داخلنا إننا أوفياء ومخلصين.. وإننا ما زلنا وسنظل -على عهدنا معاهم.

أنا اتكلمت قبل كده في كتاب (الخروج عن النص) عن التكرار الفهري.. وازاي ممكن واحد يعدي بتجربة صعبة، أو خبرة مؤلمة، أو الاختيار خاطئ، وييجي بعدها -وبشكل غير واعى أيضاً- يكرر نفس التجربة الصعبة بتفاصيلها، ويعدي بنفس الخبرة المؤلمة بحذافيرها، ويختار نفس الاختيار الخاطئ كما هو (مع نفس الشخص أو شخص زيته).. كأن الواحد عاوز يصلح اللي فات من خلال تكراره (يمكن المرة دي أقدر أغيره)، أو ينتقم من اللي أذاه في حد تاني شبيهه (ما هو كلهم زي بعض)، أو ينتقم من نفسه بتكرار تعريضها للأذى (أنا ما استاهلش غير كده)، أو يضحك على نفسه ويصور لها إنه مسيطر ومتحكم في الأمور (أنا بتأذي بس بمزاجي).

(الولاء الخفي) بقى هو (التكرار القهري) بس على مستوى العائلات والأجيال.. يعني البنات تكرر نفس تجربة الأم.. والأم تكون مكررة نفس تجربة الجدة.. الابن يكرر نفس تجربة الأب.. والأب يكون مكرر نفس تجربة الجد.. وهكذا.. لأجيال كثير سابقة ولاحقة.

ويبقى فيه سيناريوهات عائلية متكررة عبر الأجيال.. لمجرد إن (شخص ما) في (جيل ما)، تعرض لصدمة نفسية معينة، أثرت عليه بشكل كبير.. خلاله ينقل الأثر ده من جيل لآخر بطرق بعضها واضح وبعضها خفي.. بيسموا الصدمة دي (صدمة عابرة للأجيال) . Transgenerational Trauma

خليني أوريك بعض صور الولاء الخفي وسيناريوهات المتوارثة.

سيناريو الزواج الفاشل:

ده من أشهر صور (الولاء الخفي) وأكثرها شيوعاً.. ويبدأ بإن الأم كان زواجها فاشل.. ومليان مشكلات وصراعات.. وكانت مظلومة ومقهورة وعاشية في جحيم يومي لا ينتهي.. تكبر بنتها وهي خايفة ومتربعة من الزواج.. وفي نفس الوقت جواها (ولاء خفي) لوالدها، اللي «ماينفحش تفشل لو حدها».. و«ماينفحش هي تفشل في جوازها وأنا أنجح في جوازي».. و«مستحيل هي تتظلم وتتقهر وأنا أفرح وأتبسط».. فتعمل إيه؟ إما إنها تختار (بعقلها الباطن) اختيار سيئ وترتبط بيه، فيطلع عينها ويكفر سيئاتها، ويظلمها ويقهرها ويذيقها الأمرين، وإما إنها تفتعل الصراعات وتؤجج المشكلات مع جوزها، لغاية ما تطلع منه أسوأ ما فيه، وتُفشل حياتها الزوجية بالفعل.. وتبقى كده مشيت على الصراط.. وأوفت بالعهد.. اللي عاهدت بيه أمها في يوم من الأيام دون وعي أو تفكير.

الولد اللي بيتربى في بيت عليه يافطة الجواز من بره، لكنه مليون طلاق نفسي من جوه.. وفاؤه وولاؤه لأبوه وأمه ممكن يخلوه يكرر نفس حكايتهم بكل تفاصيلها.. ويعيش نفسه ومراته وأولاده حياة قائمة بائسة، محاطة باليأس من كل جانب.

السيناريو ده ممكن ياخذ صور كثير تانية.. يعني البنت دي بدل ما تعيش في سلبية أمها، ممكن تحاول تاخذ (من جوزها) حق أمها اللي ماعرفتش تاخده (من أبوها).. فهي اللي تطلع عينه وتكفر سيئاته وتكرهه في نفسه.. ممكن كمان تقود حياتها الزوجية نحو الطلاق، عاشان تعمل اللي أمها ماعرفتش تعمله.. وممكن طبعاً ماتتجوزش أصلاً.. وكل ما يتقدم لها عريس، تلبسها كل عفاريت الأرض.. وهكذا.

الولد ده كمان بدل ما يكرر حكاية والديه بحذافيرها، ممكن يغير لها بعض التفاصيل، أو يبدل بعض الأدوار.. لكن داخل نفس الحلقة المفرغة.

ويورثوا لأولادهم وأحفادهم نفس السيناريو.. ويمرروه لأجيال كثيرة مقبلة.

سيناريو نفس الوظيفة:

هنا.. بيكون فيه أب أو أم في أحد أجيال العائلة، حصلت له صدمة نفسية، أو مر بتجربة حياتية وصلت له رسالة إن «أحسن شغلانة ممكن حد يشتغلها هي كذا...»، أو «لو كنت اشتغلت الشغلانة دي، ماكانش حصل ده كله».. سواء اشتغلها فعلاً، أو حاول وماعرفش.. وبدأ هذا الأب (أو الأم) بدوره يوصل نفس الرسالة لأبنائه وبناته.. لغاية ما صدقوها.. ومشىوا على نفس التراك اللي هو حطهم عليه..

وقعدوا يجروا.. ويهرولوا.. ويحققوا أهداف.. ويعملوا إنجازات..
من غير ما يقفوا ولا حتى يراجعوا أنفسهم.. كأن حد بيجري وراهم
بالكرباج.. علشان يوصلوا الحاجة هما مش عارفينها.. كأن فيه بينهم
وبين أبوهم أو أمهم (عهد خفي) إنهم يبقوا نسخ منهم.. أو إنهم
يحققوا لهم اللي ما عرفوش يحققوه.

أنا شفت أم مُصرّة إن كل أولادها وبناتها يبقوا دكاترة.. مش بس
كده.. ده كمان لازم يتجوزوا دكاترة.. وبسبب (الولاء الخفي) اللي جوه
الأولاد ناحية أمهم.. ده اللي حصل فعلاً.. وللأسف كلهم جوازاتهم
فشلت.

سيناريو الوزن:

في الحالة دي، بيكون فيه عند أحد أجيال العائلة هوس بشكل
الجسم المثالي.. ووزن الجسم المثالي.. وقوام الجسم المثالي.. وبدأ هذا
الهوس بفعل الولاء الخفي- يسري في الأبناء والأحفاد، لغاية ما
يوصل للجيل الحالي.. ونلاقي بنت في مقتبل العمر، شايقة نفسها تخينة
وهي أخف من الريشة.. وبنت تانية داخلية في نظام غذائي قاسي جداً
رغم إنها لا تحتاجه على الإطلاق.. وبنت تالثة بتاكل وترجع الأكل
اللي أكلته علشان وزنها ما يزيدش.. لدرجة إنني قابلت مرة شابة صغيرة
بتحكي لي إن أهلها كانوا حاطين ميزان في كل حجرة من حجرات
البيت.. يوزنوا أنفسهم عليه كل كام ساعة.. الشابة دي نفسها دلوقت
مش بتقول لبنتها غير يا «تخينة».

سيناريو التحرش:

ده بقى سيناريو صعب جداً.. بتكون فيه الأم اتعرضت وهي صغيرة
لشكل من أشكال التحرش الجنسي.. أو اتعرضت وهي كبيرة لما يسمى
بالاغتصاب الزوجي.. اللي بتجبر فيه على ممارسة العلاقة الجنسية مع

ووجهار غمًا عنها وعلى غير رضاها.. وده سبب لها صدمة نفسية شديدة،
سابت فيها أثر عميق وطويل الأمد.. تبدأ الأم بث رسائل الرعب لبتتها،
زأخدها بشكل مبالغ فيه جدًا: «خلي بالك.. إوعى حد يلمسك»..
الاش حد يقرب منك».. «المنطقة دي خطر».. وده يسبب عند البنت
خوف شديد من كل حد وأي حد.. وللأسف، وبكل أسف، المتحرش
يعرف يلقط البنت الخيفة.. من نظرات عينها، وتعبيرات وشها، وتردد
كلماتها، فيهجم عليها، ويتحرش بيها فعلاً، ويسبب لها نفس الصدمة،
ويسبب جواها نفس الأثر.. اللي تورثه هي كمان لبتتها.. ولكل سلسال
بناتها المقبل.

فيه طبعا سيناريوهات موروثه تاني كثير.. زي (سيناريو الإحساس
بالذنب).. واللي فيه السمة الأساسية المتكررة في أفراد وأجيال عائلة
عيلة، هي إنهم ييلوموا نفسهم كثير، ويحسسوها بالذنب، أو ييلوموا
غيرهم كثير، ويزرعوا فيه الذنب زرعًا.

فيه كمان (سيناريو القلق والخوف).. واللي فيه تلاقي عيلة كاملة
بشكل أجيالها عايشين على بركان من الإحساس بالقلق من كل شيء،
والخوف غير المبرر من كل حاجة.. والجيل ده يورث للجيل ده..
والجيل ده يستلم من الجيل ده.. وهكذا.

فيه سيناريو (راجل يعني سي السيد)، اللي ورثه معظم الرجال (أقصد
الذكور) في بعض المجتمعات، واللي بيوصل ولاءهم الخفي لأبائهم
وأجدادهم إنهم يكرروه بشكل قهري رافض لأي تغيير أو تعديل.

وفيه سيناريو باشوفه كثير في الوقت الحالي، باسميه (سيناريو
البيد الأب)، واللي بتحاول فيه الأم -بناء على خبرة أمها وأجدادها-
إيها تقصر دور الأب في البيت على المصاريف والمتطلبات اليومية،

وتبعد أولاده وتفاصيل حياتهم عنه بطريقة أو بأخرى، وتختص هي بحبهم وقربهم لوحدها، ويبقى هو (وحش) وهي (حلوة).. ويبقى هو اللي مُقصر، وهي اللي ماسكة زمام الأمور.. وتشوف بنتها الصغيرة ده.. وتتعلمه.. وتورثه.. وتعمله مع زوج المستقبل.. طبعاً ده لا يمنع إن فيه رجاله مش محتاجين السيناريو ده علشان يعملوا كده.. لأنهم شخصياً ورثوا (سيناريو تكبير الدماغ).

ولاؤنا الخفي لأبائنا وأمهاتنا بيخلينا نكرر نفس حكاياتهم، ونعيش نفس سيناريوهاتهم، وتبنى نفس قضاياهم.. كما هي.. أو بالعكس أحياناً.. والحالتين مايفرقوش عن بعض.. علشان ده سجن.. وده سجن.. ده سجن التكرار.. وده سجن التكرار العكسي.. وفي الحالتين.. أنا مش موجود ومش حاضر ومش فاعل.. علشان هم بس الموجودين.. وهم بس الحاضرين.. وهم بس الفاعلين.. بإيديا، وعن طريقي.

وكان فيه ميراث بيتم توزيعه ساعة الولادة.. زي ما فيه ميراث بيتم توزيعه بعد الوفاة.

وكانك بمجرد ما تتولد.. بتبدأ في استلام تركة ثقيلة وممتدة من كل أجيال أسرتك، اللي فاتت.. والحالية.. دول يسلموك مخاوفهم، ودول يسلموك عقدهم.. ودول يسلموك سيناريوهات حياتية مُعد سلفاً.. وجاهزة للتنفيذ فوراً.

سيناريوهات حب.. سيناريوهات جواز.. سيناريوهات نجاح.. وسيناريوهات فشل.

وتحمل بداية من الساعات الأولى في عمرك حمل ثقيل جداً.. وتشيا شيلة طويلة عريضة.. ربما تتأصل جذورها لمئات السنين للخلف.

لسه ..
فيه أصعب ..

اللي أنا ذكرتهم دول أمثلة قليلة وبسيطة من سيناريوهات (الولاء الخفي) .. لكن فيه كتير ألعن .. وأخفى .

فيه ناس عندهم ولاء ووفاء خفي على مستوى الأمراض والإصابات الجسدية .. يعني يصابوا أحياناً بنفس الأمراض الجسدية اللي أصيب بيها أبائهم وأمهاتهم وأجدادهم، (والسرطان الساري في بعض العائلات مثال شهير) .. ممكن ده يحصل في نفس السن .. وممكن في سن صغرى أو كبرى .. طبعاً فيه عوامل وراثية جينية .. بس في الحقيقة إن أحد طرق وأدوات الولاء الخفي هو السريان عبر الجينات . وفيه أبحاث وكتب علمية كتير قدرت توصل لده وتؤكدده، (منها كتاب Genes on the Couch الصادر سنة ٢٠١٤ .

فيه أكثر؟
أه .. فيه أكثر .

بعض الناس بيحصل ليهم أحداث كبيرة في حياتهم، في نفس السن اللي حصلت فيه أحداث كبيرة في حياة والديهم أو أجدادهم .. يعني حد يحصل له حادثة وهو عنده أربعين سنة .. تلاقي أبوه في نفس السن عدى بتجربة صعبة وعنيفة (ممكن تكون حادثة برضه) .. أو واحدة تصاب بمرض خطير في سن خمسين سنة .. تكتشف إن والدتها في السن ده أصابها برضه مرض خطير (نفسه أو مشابه ليه) .. وهكذا .. الولاء الخفي يصل إلى الكروموسومات والجينات وخطوط العمر .. ومصطلحات زي متلازمة الأسلاف Ancestor Syndrome، والذاكرة الجينية Genetic Memory، أصبحت معروفة ومتداولة .

وزي ما فيه عندنا (ولاء خفي) لآبائنا وأمهاتنا وأجدادنا.. هم كما
عندهم (ولاء خفي) لآبائهم وأمهاتهم وأجدادهم.. لغاية عشرات
وربما مئات الأجيال للخلف.. وتبقى حضرتك ورثت سيناريو حياتي
معين، جاي من سبع أجيال ورا.. وانت ماتعرفش أصله إيه.. وجاي
مين.. وتنقله للي بعدك بشكل يثير الدهشة والعجب.

الولاء الخفي قد يحمل في طياته قنابل نفسية موقوتة وجاهزة
للافتجار.. منها «أنا لو فرحت، أبقى خنت أمي.. لأنها ماكانتش
بتفرح».. «أنا لو حبيت نفسي، أبقى خذلت أبويا.. لأنه ماكانش بيحب
نفسه».. «ماينفعش أنجح في حياتي وهم فشلوا».. «ماينفعش أكسب
صحتي، وهما خسروا صحتهم».. «لازم أختار نفس اختياراتهم في
الحياة، وإلا أبقى خذلتهم».. «ماينفعش أعيش وأحس بطعم الحياة..
وإلا أبقى خليت بيهم».

ولاء أعمى.. وفاء غير مبرر.. إخلاص مالهوش أي معنى.. ومن
دون أي وعي بالطبع.

عايشين واحنا شايلين شيلة حد تاني غيرنا.. وماشين وبتتحرك
بيها فوق ضهرنا.. من غير حتى ما ناخذ بالنا.
شايلين الشيلة لغاية ما بقينا شبهها.. وبقيت شبهنا.
شايلنها لغاية ما حسينا إننا أغراب تايين من غيرها.

نقف بقى لحظة كده..

ونسأل نفسنا: هي الشيلة دي شيلة مين؟ هي القضية دي قضية
مين؟ هو أنا عايش لحساب مين؟
ونفرق ما بين شيلتنا، وكل الشيل اللي اترمت علينا..

وناخذ قرار حاسم وشجاع..
بأننا نرجع لكل واحد شيلته..
بأننا نوقف ظلم لنفسنا ولغيرنا..
ونوقف استهلاكنا الشديد لطاقتنا النفسية والجسدية ضدنا..
ونوقف دوراننا المستمر المحموم زي الثور الأعمى حوالين ساقية
(الولاء الخفي).

من النهارده.. كل واحد يشيل شيلته.

وعلى فكرة.. ده ماهوش أي علاقة ببر الوالدين.. بالعكس.. ده قد
يكون هو البر الحقيقي بالوالدين.. زي ما هنشوف بعد شوية.

* * *

الألماني (فردريك بيرلز) مبتكر نظرية العلاج النفسي الجيشتالتي
عمل نص جميل جدًا، سموه تلامذته بعد كده (قسم الجيشتالت)، أو
(مسلة الجيشتالت).. وفي مؤتمرات العلاج الجيشتالتي اللي حضرتها،
قالوا بببدا أو ادايمًا بهذا القسم.

أنا شايف إن كل كلمة في النص ده ليها معنى، وإننا محتاجين نحفظه
من ظهر قلب، ونرده كل يوم.. كل يوم:

I do my thing and you do your thing,
I am not in this world
to live up to your expectations,
And you are not in this world
To live up to mine
You are you,
And I am I,
And if by chance we find each other,
it's beautiful.
If not,
It can't be helped.

الترجمة العربية (بتصرف):
أنا أعمل الي عليا وانت تعمل الي عليك.
أنا مش موجود في الدنيا..
علشان أكون عند توقعاتك.
وانت مش موجود في الدنيا..
علشان تكون عند توقعاتي.
أنت هو أنت..
وأنا هو أنا.
لو تصادف واتفقنا..
جميل جداً.
ولو ماحصلش..
مش هاشوه نفسي علشانك..
مش هاشوه نفسي علشانك.

* * *

أخيراً.. اقرأ معايا الكلام الي كتبتة إحدى من سلكن طريق الرجوع
عن ولائهن الخفي:
- أنا محتاجة وعاززة ومن حقي وقررت، أتحرر من كل، ومن
أي سيناريو مرضي موروث.
- أنا محتاجة وعاززة ومن حقي وقررت، إني أمسح وأتحرر من أي
نمط / نص / موروث مش بتاعي، وأفضي مكان للسيناريو بتاعي، ودي
مسؤوليتي لوحدي.
- أنا لوحدي المسؤولة عن كتابة السيناريو الجديد بتاعي.
- أنا قررت إني أنهي وأخرج من كل العلاقات المرضية الي في حياتي،
كفاية بقى، وأنا لوحدي المسؤولة.

.. أنا محتاجة قوي وعاززة ومن حقي وقررت وأنا لوحدي المسؤولة،
من التحرر من أي نصوص سابقة التحضير، من أي موروث مرضي،
وأي، غير مفيد.

.. أنا محتاجة قوي وعاززة ومن حقي وقررت وأنا لوحدي المسؤولة،
من بدء كتابة نص حياتي أنا، أنا وبس، نقطة ومن أول السطر.

.. أنا محتاجة قوي وعاززة ومن حقي وقررت وأنا لوحدي المسؤولة،
إني أرجع لكل واحد حاجته، أنا مش امتداد لمشكلات أهلي.

.. أنا في كامل قواي العقلية، بتنازل تمامًا وكلياً وعلى جميع المستويات
الظاهرة والباطنة، وعلى الإطلاق عن هذا الإرث.

.. أنا برجع بكل الحب والاحترام والتقدير لكل واحد حاجته..
إل واحد يشيل شيلته.

.. أنا محتاجة قوي وعاززة ومن حقي وقررت وأنا لوحدي مسؤولة،
من إني أوقف كل مجهوداتي ووقتي ومحاولاتي المستميتة، علشان أثبت
الغسي سيناريو مش بتاعي.

.. كفاية بقي.. كفاية بقي.. كفاية بقي».

أهلك انت آخر نقطة في هذا الخط الممتد عبر الأجيال..

أهلك آخر مستلم لهذه التركة الباهظة..

أهلك آخر متبني لهذه القضية الخاسرة..

واهي نفسك وأولادك وأحفادك وأحفادهم..

من ولاء خفي آخر..

قد يمتد..

إلى ما لا نهاية.

صباح الخير: أنا إنسان طيب..

فيه مشهد مؤلم جدًّا في فيلم War for the Planet of the Apes، لما أبطال الفيلم قابلوا في رحلتهم قرد كبير في السن، هربان من سجون الجنود الأمريكان، وعایش لوحده في أحد الكهوف من سنين.

استنى..

المؤلم في المشهد مش إنه كبير في السن أو إنه عایش لوحده فترة طويلة جدًّا في كهف مظلم.

المؤلم إنه لما جه يعرفهم بنفسه قالم إن اسمه: باد إيب Bad Ape (قرد سيئ).

كان غريب جدًّا إن حد يعرف نفسه بالاسم ده.. بس بعدها فورًا تقدر تفهم إن ده اللقب اللي كانوا بينادوه بيه الجنود الأمريكان.. كانوا كل ما يشوفوه يقولوا له (باد إيب).. كل ما يندهوا عليه يقولوا له (باد إيب).. كل ما يطاردوه أو يعاقبوه يقولوا له (باد إيب).

طلب إيه برضه المؤلم في ده..

المؤلم في ده إنه صدق إن ده اسمه فعلاً.. واقتنع إن دي صفته.. وبدأ
يعزف الناس بيه على إنه (باد إيب).

صعب جداً.. ومؤلم جداً.
بس ده البعد الأول فقط من الألم اللي أنا أقصده.

البعد الثاني من الألم ده هو إن احنا نفسنا ساعات بنعمل كده..
بنعمل كده مع الناس اللي بنحبهم.. مع أقرب الناس لينا.. مع
والدنا.. مع أزواجنا وزوجاتنا.. مع إخواننا.. مع زميلنا في الشغل..
مع أصحابنا..

وزي ما احنا ساعات بنعمل كده.. إحنا كمان ياما اتعمل فينا ده.

يعني الزوجة اللي جوزها طول الوقت يقول لها انتي مقصرة.. إنتي
دايفهميش.. إنتي نكدية.. إنتي جايباني لورا.. إنتي فاشلة.. إنتي
أفلسي حياتي.. هي بعد شوية بتصدق ده عن نفسها، وتتهز ثقتها بيها،
وتتكون عندها صورة ذاتية سيئة جداً.. وتبدأ تتعامل مع نفسها ومع
جوزها ومع كل الناس على إنها فعلاً مقصرة، ومش بتفهم، ونكدية،
وفاشلة.. هي بتبدأ -حرفياً- تشك في نفسها.

الولد اللي أهله بيوصلوا له دايمًا إنه وحش.. مش كويس.. سيئ..
اللي بيستمع الكلام.. دايمًا غلط.. أقل من فلان وعلان.. هو برضه بعد
شوية بيصدق ده عن نفسه.. ويتعامل بيه معاهم ومع كل اللي حواليه.

البت اللي بيوصل لها من أهلها وناسها ومجتمعها إن جسمها ذنبا
وان وجودها إثم، وإنها قليلة وصغيرة وماتستهاهلش .. شوية شوية
هتصدق ده، وهتتعامل بيه، ومش هتشفو غيره، وممكن تدافع عنه
وكمان تهاجم أي حد يحاول يعرفها حقوقها ويفتح عينها.

يااااه.. قد إيه احنا مصدقين عن نفسنا حاجات كتير قوي.. وهس
في الحقيقة.. مش حقيقة.

لسه.. فيه بُعد تالت للألم..

البعد التالت هو إني بعد ما أصدق عن نفسي الحاجات اللي
وصلتني.. واتعامل بيه مع الناس على إنها فعلاً (أنا).. ده يوصل ليه
مني.. ويصدقوه عني.. ويتعاملوا معايا على إني كده فعلاً.
يعني إيه؟

يعني وصلني زمان إني ما استاهلش.. وأنا صدقت ده.. قوم آجر
أتعامل مع جوزي على إني ما استاهلش.. وأعيش خانعة مقهور
مطفية.. فهو يشوف ده فيا.. ويديني فوق دماغي أكثر.

وصلني زمان إني فاشل.. وأنا صدقت ده.. قوم كل ما أبدأ شغل
جديد.. أتعامل مع زمايلي على إني فاشل.. وهم يشوفوا ده فيا
ويتعاملوا معايا على أساسه.. يتعاملوا معايا على إني فاشل.

وصلني إني قليل وماليش لازمة.. وصلني إني طاووس زمان
وصلني إني عاجز وقليل الحيلة.. وأنا صدقت ده.. وبتعامل بيه
الناس.. فالناس هتعاملني طبعا على أساسه.

دائرة مغلقة من الوجد.. ألم ذو ثلاثة أبعاد.. مجموعة متقابلة
المرآيات العاكسة لنفسها.

يعني لما أكون أنا مش باحب نفسي.. الناس هتجيني ليه يعني؟ ما
هو هيوصل لهم (من غير ما أنطق ولا كلمة) إني مش باحب نفسي.

لما أكون مش باسامح نفسي.. غيري هيسامحني ليه إن شاء الله.

لما أكون رافض نفسي.. إنت هتقبلني ليه؟

ما تصدقه عن نفسك.. يصل إلى الناس.. ويعاملونك به.

والله لو كنت من جواك مصدق إنك تستاهل.. ده هيوصل للناس..
وهيعاملوك على أساسه.

لو كتتي مصدقة إنك ذنب وإثم وخطيئة من خطايا الزمن.. ده
هو يصل للناس.. وهيعاملوكي بيه.

لو كتتم مصدقين إن فيه أمل.. لن يكون هناك أي شيء غير الأمل.

كأنك كل يوم بتقول للعالم: صباح الخير.. أنا إنسان سيء.. أو أنا
إنسان طيب.. أو أنا إنسان حائر أو... أو... أو... إلخ.
ولن تتلقى من العالم سوى ما ترسله له.

أعتقد كده ممكن نفهم عبارات زي «ما تبحت عنه يبحت عنك»
الرومي، و«إنك لا تقابل إلا نفسك في طريق القدر» لمصطفى محمود،
وغيرها وغيرها.

طبعاً ده مش معناه إطلاقاً نفى مسؤوليتك عن أفعالك وتصرفاتك
ونوعية وجودك (بحجة إن ده اللي وصلني عن نفسي وصدقته).. لكنه
فقط علامة على الطريق.. اللي مليون علامات تانية كتير.

إزاي بقى اللي جوانا بيوصل للناس من غير حتى ما نتكلم ولا
كلمة؟ إزاي علاقتنا بنفسنا بتتحس من اللي معانا، من غير حتى ما
ياخدوا بالهم.. دي حكاية كبيرة قوي.. هنتكلم عنها بعد شوية.

...

بطل تعامل نفسك على إنك (باد إيب).. علشان العالم يبطل يعاملك
على إنك (باد إيب).

وقول معايا كل يوم الصبح:
صباح الخير أيها العالم.. أنا إنسان طيب.

يو دونت هاف توبي سو نايس

طبقاً لما تقول: «صباح الخير أيها العالم.. أنا إنسان طيب»، ده مش
عندها خالص إنك تسمح لحد يستغلك أو يؤذيك أو يستبيح حدودك..
وعلى معناه إنه مش من حقتك تغضب.. وتزعل.. وتبعد أحياناً.
الطيبة غير السداجة.. وغير البلاهة.. وغير التهاون في الحقوق.

أول تدريب في السيكدراما حضرته كان في روما، وكانت المدربة
تعالينا حاجة مهمة جداً.. طلبت منا (كنا مجموعة من ٣٠ شخص
أفريقيين) إننا نتحرك في المكان بشكل عشوائي، ونمشي نبص في وش
بعض، وكل واحد فينا يرسم على وشه تعبيرات تلقائية.. ماكانش فيه
أي شروط أو تعليقات بخصوص تعبيرات الوجه اللي بنعبر عنها.

المدربة لاحظت إن كل الناس كانت بتضحك في وش بعض، أو
بعض الأقل كنا بنرسم تعبيرات وجه (لطيفة).. حد بيضحك.. حد
بيترسم.. حد بيرفع حواجبه.. وهكذا.

الست طلبت منا طلب غريب شوية: قالت لنا من فضلكم
You don't have to be so nice.. يعني مش لازم تكونوا لطفاء للغاية.
وطلبت إننا نبدأ نظهر على وشنا تعبيرات مختلفة خالص.. مش لازم
نضحك.. ممكن نكشر، ممكن ننفخ ونفش.. ممكن نعبر عن زهق.. عن
غضب.. عن استياء.. عن اشمئزاز.. عن حزن.. عن ضجر.. وبداننا
فعالاً نعمل كده.. اللي قطب حاجيه.. واللي نفخ خدوده وفشها.. اللي
عوج بقه.. واللي طلع لسانه.. واللي عمل أي حاجة.. أي حاجة.

وصلتني من التمرين ده رسالة مهمة جداً.. رغم إنها بدئية جداً.
الرسالة دي فكرتني بحاجة درستها في التحليل النفسي قبلها بشوية.
وهي إن فيه نوع من الناس بيتصرف مع اللي حو اليه طول الوقت على إنه
شخص لطيف جداً.. بيرضي كل الناس، مش عاوز يزعل حد، ممكن
يتكسف إنه يقول (لا).. أو يخاف إنه يعترض أو يغضب أو يزهق.
وإن ده بيان عليه.. دايمًا بيحاول يتجنب المشكلات، ويرضي جميع
الأطراف.. وساعات كتير بيقدم احتياجات الآخرين على احتياجاته
هو شخصيًا.. مهما كان جواه من مشاعر إنسانية عادية، واحتياجات
بشرية لا جدال فيها.. بيسموه People-Pleaser (مُرضي الناس).

الشخص ده اتعود من صغره إنه يفضل دايمًا الطفل اللطيف الظريف
الهادي المسالم، الضاحك المبتسم، اللي مش بيشتكي، ولا بيهش ولا
بينش.. ورغم إن دي حاجة شكلها جميل وشيك وحلو من بره
لكن الطفل ده بيعمل كده علي حساب نفسه، وبيكتم جواه لسنوات
طويلة مشاعر إنسانية كتير جداً، هي من حقه، بس وصل له إنه مش
مسموح ليه يعبر عنها، مشاعر زي الكره والغضب والملل والاشمئزاز
والرفض.. الطفل ده اتعلم انه مايعبرش عن مشاعره الحقيقية علشان
يتجنب المشكلات اللي ممكن تحصل ليه أو تحصل بسببه (كما صَوَّرَ له
حواله).. الطفل ده أهله حملوه مسؤولية هو أصلاً مالهوش علاقة بيها

وهي إن اللي حو اليه (ابتداء بيهم طبعًا) يبقر اراضيين ومبسوطين.. وإذا
باحصلش ده.. يتحمل هو المسئولية، والعقاب طبعًا.

صديقي العزيز.. صديقتي الغالية..

من حَقَّك تعبر عن اللي جواك كما هو.. من حَقَّك تُظهري ما بداخلك
أيا هو.. من حَقَّك تحب أو تكره، من حَقَّك تفرحي أو تحزني، من حَقَّك
أرسل أو تمل، من حَقَّك توافقني أو ترفضني.. من حَقَّك ترسموا على
اليدوشكم نفس اللي محفور جواك.

من حَقَّك (بكل بساطة وبديهية) إنك تكون حقيقي..

من حَقَّك (بكل بساطة وبديهية) إنك تكوني حقيقية..

هو دونت هاف توبي سونايس.

بر الوالدين .. وبر الأبناء

من أكثر المناطق الشائكة في العلاقات الإنسانية.. علاقة الشخص بوالديه.. وفي العلاج النفسي، المنطقة دي بيكون حوالها طبقات كتير جداً من الوجدع أحياناً.. واللخبطة أحياناً.. والشعور بالذنب أحياناً أخرى..

كل الأديان بتدعو لطاعة الوالدين.. وبرّهما.. وخفض جناح الذل من الرحمة لهما.. وده طبعا حقهم بلا جدال.

بس لو حد من الوالدين دول قاسي.. مؤذي.. مشوّه نفسياً لأولاده؟

لو حد منهم مضطرب.. مش متزن.. مختل؟

لو أب بيصَبِّح ولاده بعلاقة، ويمسِّيهم بشتيمة.. أو أم بتعامل مع أولادها على إنهم ما زالوا داخل رحمها، ومش عاوزاهام يطلعوا يشتموا نفسهم ويكبروا ويعيشوا حياتهم.

أو أب عاوز ابنه يكون مشروعه الخاص.. ويحقق أحلامه الشخصية
بنه.. أو أم مش بتحس باحتياجات أولادها النفسية وبتكرها
عليهم، زي ما بتكرها على نفسها.

بلاش كده.. دا فيه أب كل علاقته بالأبوة هي خانة الزواج اللي في
الطاقة.. وأم من كتر كرهها لنفسها كرهت أولادها في نفسها.

والأب اللي بيحرم بناته من التعليم، واللي بيدخل ولاده كلية
بغضب عنهم، واللي بيدفن أنوثة بناته من سن ثلاث سنين.

والأم اللي بتبلع ولادها وتخوفهم من كل العالم علشان يفضلوا
عندها، واللي بتسمح لأولادها إنهم يتناولوا على بناتها فقط لأنهم
اللي تعلم بناتها إن وظيفتها في الحياة هي فقط خدمة زوجها
له باغتصابها كل ليلة باسم الزواج.. وان ده أهم من شغلها
وواجبها ووجودها نفسه.

طلب والأب اللي بيعتدي على بناته جنسيًا.. والأم اللي مش بتحمي
بناتها وتصدقهم وتدافع عنهم، لو البنت جت وقالت لها إن حد لمس
بعضها.. بالعكس.. دي تلومها وتضربها وتقول لها «اخترسي بلاش
تصايح».

طلب واللي ييربوا أولادهم على الإحساس بالذنب، ويزرعوه
لهم ويسقوه ويكبروه لغاية ما يلتهمهم.. واللي يتفتنوا في استفزاز
أولادهم لغاية ما يقربوا يكفروا بنفسهم وبالحياة وبربنا.. واللي يقولوا
لأولادهم كل يوم إنهم جم غلطة، أو إنها جت بنت وكانوا عاوزين
اللي يمجروا أولادهم قدام الناس.. واللي يقارنوا بينهم وبين
بعض، أو بينهم وبين زميلهم وقرايبهم وجيرانهم.

طبعًا مش هاكلمكم عن الضرب والتكتيف والحبس والسع بالنار
وشد الشعر، وغيره من العقاب النفسي والجسدي اللي أقل ما يوصف
به إنه غير آدمي.. واللي وصل مؤخرًا إلى إن أب يموت ابنه الشاب بعد
ضربه بسير غسالة مربوط فيه مفك (الوطن - ٢٢ يوليو ٢٠١٨).. وأم
تحرق ابنها الصغير بالمياه الساخنة (اليوم السابع - ١٣ مارس ٢٠١٨)..
وغيرهم.. وغيرهم.

وقبل كل دول، الأب والأم اللي عاوزين يفصلوا أولادهم
على مقاسهم.. ويخلوهم نسخ مشوهة مزيفة من أنفسهم.. يكتبوا
صوتهم.. ويحرموهم من تلقائيتهم.. ويطفوهم ويطبقوهم وينسرقوا
أرواحهم منهم.

وبعد كل دول، الأب والأم اللي بيختاروا لابنهم مراته، ولبتتهم جوزها
على غير رغبتهم.. واللي بيوظوا جوازات ولادهم.. واللي بيجبروا بنتهم
إنها تكمل في جوازة مليانة أذى وذلل وإهانة.

وقصاد أي اعتراض أو رفض من جانب الابن أو البنت، يُشهر
الوالدين على طول في وشهم سلاح (بر الوالدين)، و«لو ماسمعتش
كلامي أنا مش راضي عنك»، و«شوف هيجرى لك إيه في حياتك لما
اغضب عليك»، و«أنت ابن عاق علشان بتقول لي لأ».. فيحس الأبناء
بالذنب.. ويتكسروا من جواهرهم.. ويضطروا المزيد من الانحناء
والانطفاء.. والنزيف النفسي البطيء.

وأصعب ما في ده كله.. إنه بيتم - أحيانًا بصبغة دينية، وباستخدام
نصوص دينية مقدسة، وتحت لافتة كبيرة عنوانها التربية والتقويم
ومين يقدر يستحمل غضب ربنا المرتبط بعدم رضا الوالدين؟

أنا سمعت بوداني الولد اللي يقول: «أنا مش عايز أي حاجة من أبوي غير إنه يعاملني على إني بني آدم».. والبنت اللي بتقول: «أنا لما بالمشوف بنت مش خايفة من أبوها، ومش حاسة منه بالتهديد، أنا باحسدها».

نعمل إيه بقى في ده كله؟
نقول لهم اسمعوا الكلام؟
قولي لبابا حاضر يا حبيتي.. اعتدي عليا يا بابا كمان وكمان؟
قول لماما حاضر يا بني.. مش هاكون نفسي وهاكون زي ما انتي
عاوزة يا ماما؟

نسيبهم يدفنوا أنفسهم؟
نشجعهم على التشويه والوآد وسرقة الروح؟
هو ده يرضى ربنا؟ هو ربنا عاوز كده؟
في الحقيقة لأ.. وألف لأ.. بل مليون لأ.

بر الوالدين مش معناه أبداً إني أسمح لهم يشوهوني ويؤذوني نفسياً
أو جسدياً.. ومش المقصود بيه خالص إني ألغي نفسي وأكون نسخة
سالي من حد غيري. ومش هو إطلاقاً إني اغمض عيني عن إحساسي
وفهمي وتقديري الخاص للأمر، على حسب ظروفي وواقعي.

بر الوالدين مايكونش بإن الأبناء والبنات يدفنوا أنفسهم، أو يكرهوا
أولادهم، أو يشوهوا رجولتهم، أو يفسدوا علاقتهم بجسمهم.

بر الوالدين ماينفعش يسحق وجودي.. ويسليني إرادتي.. ويحرمني
من نفسي الحقيقية الفطرية.. ويعيشني طول حياتي بنفس مزيفة، كل
وظائفها التأقلم مع هذا الكبت وذاك السواد.

البر الحقيقي للوالدين هو إني أكون نفسي .. وماكونش مسخ بشري
يمشي على الأرض بسببهم، أو بسبب غيرهم.
البر الحقيقي للوالدين هو إني يكون ليا اختياري في الحياة، اللي ممكن
جدًا تكون مختلفة عن اختياراتهم في الحياة .. وده حقي.

وبالمناسبة .. النجاح الحقيقي للتربية .. هو إن أبنائي يطلعوا مختلفين
عني .. مش نسخة مكررة باهتة مني.

البر الحقيقي للوالدين هو إني أقول لهم (لأ) عند اللزوم .. (لأ) عند
الأذى .. (لأ) عند الظلم والتشويه والافتراء.

الوالدين بشر .. والبشر يخطئ، ويصيب .. ويقوى ويضعف .. وينجح
ويفشل .. ويعدل ويظلم.

الوالدين ممكن ذكاؤهم يخونهم .. وتفكيرهم يستهويهم .. ورؤيتهم
تكون قاصرة في بعض الأحيان.

الوالدين ليهم طاقة .. وقدرة .. وحدود.

الوالدين مش آلهة .. الوالدين بني آدمين .. ويسري عليهم كل ما
يسري على النبي آدمين.

وإذا كان أي حد يبسيء استخدام الدين زورًا وهتانًا، علشان
يدي تصریح لنفسه أو لغيره بفرض سطوته على أبنائه وحرمانهم من
آدميتهم .. فالرد والدفاع برضه موجود في الدين، بشكل لا يقبل أي
لبس أو خلط.

طيب.. و«ولا تقل لهما أفّ ولا تنهرهما»؟
طبعاً.. من دون جدال.. ما حدش قال كده.. إني أقول (لا) بكل
أدب واحترام، غير إني أقل أدبي وأتأفف وأطول لساني وأنهرهما.

طيب.. «وبالوالدين إحساناً»؟
جداً جداً.. بس الإحسان مش معناه الطاعة العمياء والسماح
بالشويه والظلم والأذى.. بالعكس.. قمة الإحسان هي إني أكف
الظالم عن ظلمه: «انصر أخاك ظالماً أو مظلوماً، قالوا يا رسول الله
كيف أنصره ظالماً؟ قال: تحجزه عن الظلم، فذلك نصرك إياه».. وأنا
بهداه.. باكون في صفه، وباعمل لصالحه.

والأوضح والأكثر مباشرة من كل ده، هو قوله تعالى: «وإن جاهدك
عل أن تشرك بي ما ليس لك به علم فلا تطعهما وصاحبهما في الدنيا
«مروفاً». والتفسير مستحيل يكون قاصر على إن الدعوة للشرك معناها
إن حد في القرن الواحد وعشرين يطلب من ابنه إنه يعبد النار مثلاً..
لا.. المعنى أوسع من كده بكثير. وأرى إن أهم تفاسيره إن الأب والأم
دايفعش يطلبوا من أولادهم إنهم يتعاملوا معاهم هم شخصياً، على
إهم آلهة مقدسة.. لا تخطئ ولا تذلل ولا تنسى.

هو فيه شرك أكثر من أب عاوز يخلي نفسه إله يأمر فيطاع.

هو فيه شرك أكثر من أم تتعامل مع أبنائها على إنها إلهة تعلم ما لا
يعلمه أحد.

هو فيه شرك أكثر من أب وأم، بيتصوروا إنهم ملكوا أولادهم ومن
عندهم يعملوا فيهم اللي هم عاوزينه.

أنا مصدق إن ده أحد مستويات (ما ليس لك به علم) .. مش بس
عبادة الأوثان والأصنام والنار والحجارة.

ومانساش أبدًا إنه «لا طاعة لمخلوق في معصية الخالق» .. وما فيش
معصية أكبر من تشويه النفس واستباحة حرمتها وأدها بالحياة.

ومانساش كمان الراجل اللي راح لسيدنا عمر بن الخطاب يشتكي
له من عقوق ابنه، وبعد ما سيدنا عمر سمعه وسمع ابنه قاله: «جئت
إليّ تشكو عقوق ابنك، وقد عققته قبل أن يعقك، وأسأت إليه قبل أن
يسيء إليك».

نحطهم جوه عيننا .. لكن عند التشويه .. نقول لهم (لا).
نرفعهم فوق راسنا .. لكن عند الظلم .. نوقفهم.

نشيلهم من على الأرض شيل .. لكن عند الأذى .. من حقنا نحس
أنفسنا.

تقديس البشر في البيت .. يؤدي إلى تقديس البشر في الشغل
يؤدي إلى تقديس البشر في الشارع والجامع والكنيسة، وكل مكان نرى
فيه صورة (الأب) أو (الأم) .. وده مش بس بيظلمنا .. ده بيظلمهم
هم كمان .. لأنه بيحرمهم من إنسانيتهم وحقهم الطبيعى
والخطأ والفشل.

والتعامل معاهم ومع غيرهم على إنهم بشر، هو أول وأهم خطوة
في مساعدتهم على الرؤية .. ومنحهم حق المساعدة .. ووضع أقدامهم
الكريمة على طريق التغيير .. اللي هم أحق وأولى الناس بيه .. لأنهم غالبًا
قاسوا في حياتهم أكثر مما قاسينا .. واتأذوا في نفوسهم أكثر مما اتأذينا
واتشوهوا أكثر ما اتشوهنا.

إزاي بقى أقول (لأ)؟
إزاي أنتصر لهم وأنصرهم بجد؟
إزاي أحمي نفسي لو لزم الأمر؟

هنعرف بعد شوية..

ماتتجوزوش .. ماتخلفوش ..

بناء على ما سبق ..
ومن قلب حجرة العلاج النفسي ..
من وسط جبال الحكايات ..
ومن على شطآن الآلام ..
عاوز أقول لك:

ماتتجوزوش ..

ماتتجوزش لمجرد إنك خلصت تعليم وجيش واستغلت، وآن أو ان
الجواز بقى .. لأنك كده بتعتبر الجواز مجرد قطعة دو مينوز بتكمل بيها
اللعبة .. وهتيجي في يوم وتزهق .. وتمل .. وتحب تغير الدور .

ماتتجوزش لمجرد إن سنك كبير، ومعظم زميلك وأصدقائك
اتجوزوا .. الحكاية مش كماله عدد .. الجواز علاقة إنسانية مالهش أي
دعوة بالسن .

ماتجوزش لمجرد إنك عاوز تظفي وهج غريزتك.. أو تلاقي
مخرج لشهوتك.. إنت كده بتشتري فقط وعاء بشري أنثوي، ترمي
فيه بعض سوائل جسمك.

ماتجوزش علشان أبوك وأمك قالوا لك اتجوز.. أو المجتمع
قال لك اتجوز.. إنت كده بتتجوز لحساب أبوك وأمك.. ولحساب
المجتمع.. مش لحساب نفسك.. والفرق هنا كبير قوي.

وبالمناسبة.. مافيش حاجة اسمها تتجوز علشان تكمل نص دينك..
هالة دينك (كله) هتيجي بعد الجواز كنتيجة لحسن الاختيار وحسن
المعاملة وطيب العشرة.. لكنها أبداً مش مبرر للتسرع والاندفاع..
وباللا بينا نتجوز.

ماتجوزش وانت عندك تحفظات أو ملاحظات على اللي
هتتجوزها، وتقول: أنا هاغيرها بعد الجواز.. وتبدأ بعد كده تتأمر
عليها وتضغط أعصابها.. يا تقبلها زي ما هي بكل تفاصيلها.. يا
بلاش تفصل الناس على مقاسك.

ماتجوزش واحدة صغيرة وتقول إنك هتربيهها على إيدك (من
كل لفك ودورانك طبعاً).. الجواز مش تبنى.. ولا تربية.. ولا وضع
نهاية أمانة للصياغة واللف والدوران.

ماتجوزش وانت ناوي تقعد مراتك من الشغل.. وتحبسها في
البيت.. وتقطع عنها الهواء والمياه.. وتحببها وتداريها عن الحياة.. ده
ماهر قس أي شيء عن وأد البنات في الجاهلية.. ظلم وجور ودفن ما
بعده دفن.

ماتتجوزش وانت شايف ان الست أقل منك .. وأنقص منك ..
وأقل حكمة وحسن تصرف منك .. وانها المفروض تركع لك وتؤدي
لك فروض الولاء ليل نهار .. وانك لازم تكون بالنسبة لها نصف إله ..
ده مش بييجيب غير التسلط والافتراء وسوء المعاملة .. كثير جداً من
الستات أحكم وأحسن تصرفاً من رجالتهن.

ماتتجوزش لمجرد إنك عاوز تحيب عيال قبل ما تكبر .. إنت كده
بتستأجر (رحم) .. مش بتعاشر بني آدمة.

ماتتجوزش وفي مخيلتك صورة شهريار اللي قاعد على ريش النعام
بيتفرج على التليفزيون .. ومراته مسحولة في المطبخ والمواعين والغسيل
والتنظيف والعيال طول النهار .. وعاوزها آخر الليل تتحول إلى غانية
محترفة، توفر له كل وسائل المتعة .. بعدها يلف وشه الناحية الثانية
وينام.

ماتتجوزش لمجرد إن فلانة عجبك جسمها .. وفلانة عجبك
شكلها .. وفلانة تقاسيمها حلوة، وخسارة تضيع منك ..

ماتبقاش عامل زي الصياد النرجسي الأناني اللي بيقتنص الفريسة
اللي تعجبه .. وبعد ما يمتلكها .. يموتها .. ويدور على غيرها.

ماتتجوزش وبعدين تحس انك اتخطفت بدري .. وانك لسه
ماعشتش شبابك .. وان مراتك مش كفاية .. فتفتح الإشارة الخضراء
لكل المعجبات والمطاردات وبنات عائلات محترمات .. وتقول:

«أنا راجل ومن حقني أعمل اللي أنا عايزه».

وانتي كمان..

ماتجوزيش..

ماتجوزيش لمجرد إنك عاوزة تلبسي فستان الفرح.. بصرف النظر
عن الشخص اللي هيكون واقف جنبك.. إنتي كده بتتجوزي هيكل
بإرادي خارجي.. ممكن تتفاجئي باللي جواه بعد كده.

ماتجوزيش لمجرد إنك عاوزة تخرجي من بيت أهلك، وتحسي
بهرتك، وتشمي نفسك.. اختاري انتي رايحة فين ومع مين الأول.

ماتجوزيش لمجرد إن معظم أصحابك اتجوزوا.. وشكلك
لداهم إيه.. ونظراتهم ليكي عاملة ازاي.. بعد عشر سنين.. نصهم
غالبًا هيكون اتطلق (حاليًا النسبة حوالي ٤٠٪).

ماتجوزيش لمجرد إن سنك كبر.. وأهلك بدأوا يقلقوا.. وقطر
الجواز اللي بيقتوت.. والمجتمع اللي بيدبح.. ماحدثش في كل دول
هاتلمعك وانتي دمعتك على خدك كل ليلة نتيجة سوء الاختيار.

ماتجوزيش وانتي متصورة إن جوزك هو المخلص والمنقذ ومحقق
الأحلام.. أحلامك انتي اللي بتصنعها.. وانتي اللي بتجري وراها..
واللي اللي بتحققها.. هو فقط رفيق في الرحلة.

ماتجوزيش وانتي ناوية تتنازلي عن أي حاجة.. أو تضحي بأي
حاجة.. أو تدفعي أي تمن.. ماتصدقش اللي يقول لك الحياة الزوجية
النازل، وتضحية (بترسي على الزوجة في الآخر).. الحياة الزوجية
مشاركة ومسؤولية.. والفرق بين التنازل والمشاركة كبير.. وبين
الضحية والمسؤولية أكبر.

ماتتجوزيش حد ناوي يفصلك على مقاسه .. هيطبقك ويطفيكي
ويدفنك بالحياة .. اللي قابلك زي ما انتي أهلاً وسهلاً .. اللي عاوز
مواصفات تانية .. يدور عليها في حد غيرك .

وفي نفس الوقت .. ماتتجوزيش واحد فيه حاجات مش عاجباكي
وتقولي: هاغيره بعد الجواز ..

إحنا مش بنتجوز علشان نغير بعض .. مش بنتجوز علشان نعالج
بعض .. مش بنتجوز علشان نربي بعض .

ماتتجوزيش واحد تدوري فيه على (أب) .. ده أكبر ظلم بتظلميه
لنفسك ولجوزك .. إنتي كده هتحمليه فوق طاقته .. وهتطلبي منه حاجات
مش بتاعته .. وهتلبسيه دور مش دوره .. ولما مايقدرش يلعب الدور ده ..
هتطلعي عينه وعين اللي خلفوه .

وطبعاً ماتتجوزيش حد بيدور على (أم) تتبناه، مش (زوجة) تعيش
معاه .. اللي عاوز خدامة يدور على خدامة .. اللي عاوز مربية يدور على
مربية .. اللي عاوز شريكة حياة أهلاً وسهلاً .

وبالمناسبة .. أقل من (شريكة حياة) ماينفعش .. شريكة في القرارات ..
شريكة في المسؤوليات .. شريكة (مش قائمة بمفردك) بأعمال البيت ..
شريكة (مش قائمة بمفردك) بتربية الأطفال .. شراكة تامة .. ندية مطلقاً
(دي أكثر كلمة بيعترض عليها بعض الذكور .. بيعحسوا إن فيها تهديداً
لوجودهم كأنصاف آلهة لا تقبل الندية) .. تكافؤ ومساواة لأقصى درجة .

لأقصى درجة ..

لكل المتجوزين واللي عاوزين يتجوزوا..

الجواز علاقة إنسانية بين اتنين قرروا يحيا (مش بس يعيشوا) مع بعض.. يكبروا مع بعض.. يفرحوا مع بعض.. يتألوا مع بعض.

الجواز قرار محتاج وعي.. ومحتاج مسؤولية.. مش شروعة وبيعة..
ويكشف بعض بعد ما يتقفل علينا الباب.

الجوزوا وقت ما تحسوا إن ده الوقت المناسب.. بصرف النظر عن السن والعمر والرقم.

الجوزوا وقت ما تلاقوا الشخص المناسب.. المنااااسب..
المناااااسب.

الجوزوا وانتو ناويين تحترموا بعض.. وتساعدوا بعض.. وتسمحوا
لبعض بالحياة.. مش بالموت.

الجوزوا وانتو قابلين احتمالات الطلاق.. علشان تتحرروا من
العبودية لبعض.. والذل لبعض.. وتحمل الإساءة والمهانة خوفاً من
الانفصال والوحدة.

غير كده..

ما تتجوزوش.

وكمان.. ماتخلفوش.

ما تخلفوش لو مش بتعرفوا تعبّروا عن مشاعركم .. هتطلعوا أطفال
قاسيين، جافين، جامدي القلوب.

ما تخلفوش لو مش بتعرفوا تحضنوا .. لو شايفين إن حضن الأب
لبته عيب .. أو حرام .. أو حاجة تكسف .. لأنها هتفضل طول عمرها
تدور على الحضن ده عند أي راجل.

ما تخلفوش لو شايفين إن أولادكم هيكونوا ملككم .. أو امتداد
ليكم .. أو مشاريع حياتكم .. إنتو كده بتدفنوهم بالحياة.

ما تخلفوش لو مش بتعرفوا تتحكموا في أعصابكم وانفعالاتكم
وردود أفعالكم .. هتخلوا نفوس أولادكم هشة ضعيفة، قابلة للكسر
في أي لحظة.

ما تخلفوش لمجرد رغبتكم الأنانية انكم يكون عندكم عيال زي
باقي الناس، وبعدين نبقى نشوف هنعمل فيهم إيه .. هيكروا أنفسهم
واليوم الي اتولدوا فيه.

ما تخلفوش لمجرد إن النتيجة الطبيعية للجواز والجنس هي الخلفاء
وربنا يسهل بعد كده .. هتخذلوا أولادكم .. وهيخذلوكم.

ما تخلفوش وانتو مليونين كلاكيع وعقد نفسية دون حل ولا علاج
هتدفعوا أولادكم تمنها من حياتهم وعمرهم.

ما تخلفوش لو مش بتقبلوا الضعف .. لو مش بتعذروا التقصير
لو مش بتقدروا المنحة الي ورا الفشل .. لو مش بتساعوا على الخطأ.

ما تخلفوش لو لسانكم طويل .. وإيديكم طويلة .. وعقلكم صغير ..
إبراهيم عليكم .

ما تخلفوش علشان تجيوا أطفال تلعبوا بيهم .. أو بهدف إنهم
يولسوكم .. أو يسندوكم لما تكبروا .. دي نتايج مش أسباب للخلفة ..
والله لو همش فوق طاقتهم من قبل حتى ما يتولدوا .

ما تخلفوش لو كان قرار جوازكم خاضع لضغوط عائلية، أو مدفوع
بالرأب مجتمعية، أو محموم برغبات تبحت عن أي منفذ للشبع .

ما تخلفوش وتسافروا وتسيبوا عيالكم في إيدين غير إيديكم .

ما تخلفوش وتوصلوا لى خلفتوهم إن وجودهم مرفوض .

وأهم من كل دول ..

ما تخلفوش .. وبعد كده تدفعوا أولادكم تمن اختياركم تكملوا في
حياة زوجية فاشلة .. وتقولوا علشان خاطر العيال .

حبوا نفسكم وبعدين خلفوا ..

حبوا بعض وبعدين خلفوا ..

حبوا الحياة وبعدين خلفوا .

لأ... بطعم الفلامنكو

في أواخر القرن الخامس عشر.. وصل الجيبسيز Gypsies (العجبر) إلى مشارف أيبيريا.. على حدود إسبانيا.. بعد تنقلهم وهجرتهم من وإلى دول كثير.. منها الهند، وإيران، ومصر القديمة.

عاش الجيبسيز على أطراف البلاد، وكان دايمًا يواصل لهم من اللى حوالهم إنهم غرباء معزولين ومنبوذين من المجتمع.

قرر (الجيبسيز) إنهم يوصلوا رسالة قوية ومسموعة لكل الناس.. فقاموا بتصميم رقصة تكون الحركة الأساسية فيها هي الضرب على الأرض بالقدم بشكل إيقاعي متتابع وباهر.

الرقصة اشتهرت، وانتشرت.. وذاع صيتها في كل أوروبا ابتداءً من القرن الثامن عشر.. لتصبح الفلامنكو في القرن العشرين هي الرقصة الرسمية لدولة إسبانيا.

ضربات الفلامنكو بتبدأ من عضلات الحوض والفخذ.. اللي بتنقبض ثم تنبسط بشكل قوى وسريع ومفاجئ، لغاية ما تنتهي بنزول الساق والقدم على الأرض بكل قوتها.

وزي ما منطقة الحوض في جسم الإنسان هي منبع الحياة.. وموضع الحمل والولادة.. ومكان صرخة الإعلان الأول عن الوجود.. فهي كمان (منطقة الحوض) منبع رقصة الفلامنكو.. اللي بتقول بصوت عالي «لا».. وتصرخ على الأرض: «أنا موجود».

راقصو الفلامنكو يضرّبوا الأرض بأقدامهم بالظبط زي الأطفال الصغيرين وهم بيدبدبوا عليها برجليهم ويقولوا: «لا».. إحنا هنا.. إحنا موجودين.. شوفونا.. اسمعونا.. احترمونا.

* * *

كلمة (لا) من أوائل الكلمات اللي بينطقها الأطفال.. وأحيانًا بتكون هي أول كلمة بينطقوها (ابتداء من سن ١٠ إلى ١٢ شهر).. كلمة قصيرة وسهلة ومكونة من حرفين فقط.. لكنها بالنسبة ليهم، ليها وظائف وعالي كثير.

تلاقي الطفل بيحاول يتعلم الحبو أو الوقوف أو المشي.. تحاول يستده.. يبعد إيدك ويقول لك (لا).. يبجي يجرب يلبس لوحده.. يقرب عليه علشان تساعده.. يبص لك بصة ناربة.. ويقول لك (لا).. ده ساعات تسأل الطفل اسمك إيه؟ يقول لك (لا).

كلمة (لا) بتساعد الطفل في رسم حدوده النفسية والجسدية.. ويتحسسها بالاستقلالية.. وتؤكد له قدرته على الاعتماد على نفسه.. وده يخليه يكبر وينمو بشكل صحي وسليم.

طلبًا إحنا بنعرف نكتم (لا) دي عند أطفالنا بمجرد ما بينطقوها.. والفولش (لا).. كلمة (لا) عيب.. اسمع الكلام.. ماتناقشنش.. بيلاش جدال.. هي كده.. وده لأن (لا) بتحسسنا أحيانًا بالخوف الشديد والتهديد من فقد تحكمننا.. ونزع سيطرتنا على هذه الكائنات الصغيرة الوليدة.

لكن الأطفال بتعافر.. وتقاوم.. وتصارع بكل ما تملك من قوة.. لأن كلمة «لا».. تمثل احتياج طبيعي فطري عند أي بني آدم.

إحنا بنحتاج «لأ» واحنا صغيرين علشان نوسع لنا طريق نكبر فيه
وسط سيقان البشر الضخمة..

وبنحتاج «لأ» واحنا كبار علشان نحافظ بيها على نفسنا.. وحدودنا..
وكمان حقوقنا.

كلمة (لأ) أداة من أدوات الحياة..

وأصل من أصول الإنسانية.

كلمة (لأ) بتؤكد حقتك في الوجود..

وحقتك في الدفاع عنه.

كلمة (لأ)..

هي ضربة أقدامنا على مسرح الحياة..

وهي رقصتنا المبدعة بين فصولها المكررة.

* * *

أنا اتكلمت كثير قبل كده عن العلاقات المؤذية.. والعلاقات الخطرة..

ووصفت التشويه اللي ممكن يصيبنا أثناء التربية.. والضرر اللي ممكن

يقع علينا في علاقة حب.. أو علاقة صداقة.. أو علاقة زواج.. وطول

الوقت بأكد على حقنا في إننا نقول: «لأ».. ونحمي حدودنا.. ونوقف

الأذى.. وندفع الضرر.

اللي هنعمله دلوقت بقى، هو إننا نعرف إمتى نقول «لأ».. وازاي

نقول «لأ».. ولين نقول «لأ».

* * *

اللي بيحصل أحياناً إننا لما بنبدأ نقول «لأ».. بنقولها بشكل غشيم

شويتين.. بنقولها بخبط ورزع وتكسير.. بنقولها بدون حسابات أو

موازن.. بنقولها بشكل فيه (استغناء) مش (استقلال).

ممكن ده يبقى مفهوم في الأول.. لأنك بتبقى زي المخنوق اللي ما

صدق لقي شوية هوا.. أو زي اللي اكتشف فجأة إنه كان عايش في

قمقم ولقي طريق للخروج.. أو اللي زهق من كتر الصمت والتحمل..

وقرر يصرخ بصوت عالي.. فيروح من أقصى اليسار لأقصى اليمين مرة

واحدة. بس بعد شوية.. إحنا بنبقى محتاجين ناخذ نفسنا.. ونعيد

تقييم الأمور.. والنظر ليها بشكل مختلف.

فنهدي وتروى.. ونستقر عند نقطة مناسبة ومحسوبة.. على الخط
البياني الطويل بين الصمت التام.. وال«لأ» المدوية.. وطبعاً يساعد
عمل ده جداً إن الطرف الثاني يكون بدأ يسمع.. ويراجع.. ويسعى نحو
التغيير.

من هنا.. وعلشان نتعلم إزاي نقول «لأ».. من غير ما نوذي نفسنا..
أو نوذي غيرنا (بقدر الإمكان).. مهم نعرف إن فيه نوعين أساسيين من
«لأ».. ونوعين استثنائيين هاقولهم في الآخر.

أولاً.. فيه «لأ» زي «ترفيص» الأطفال.. «لأ» عمال على بطل..
«لأ» على كل حاجة وأي حاجة.
«لأ» بتاعة العندد.. والقمص.. والغبن..
«لأ» من أجل «لأ».

النوع ده من «لأ» يهدم العلاقات مش بينها.. يفسدها مش
يصلحها.. ويخسرنا مش بيكسبنا.

تعرفها لما تلاقي نفسك بطلت تسمع الطرف الثاني.. سواء كان
أسوك أو أمك أو شريك حياتك.. وعاوزه هو اللي يسمعك وبس..
لما تفكيرك يتحجر ودماغك تقفل على اللي انت مقتنع بيه فقط.. لما
دانشوفش اللي قدامك وتبقى مش شايف غير نفسك.. لما غضبك،
يطلب حكمتك.. لما تقعد تلوم اللي قدامك وتحسسه بالذنب والتقصير،
من غير ما تشوف دورك ومسؤوليتك في الوضع اللي وصلت له.

«لأ» دي بتضيع الحقوق.. وتزود المسافات.. وتعمق الشروخ.

وفيه بقى «لأ» تانية خالص..

«لأ» اللي تكبرك.. وفي نفس الوقت توصل رسالة إيجابية لى قدامك.. «لأ» اللي بتشوف فيها نفسك وغيرك في نفس الوقت.. واللى بتسمع فيها صوته زي ما بتسمع صوتك.. وبتقدر ظروفه زي ما بتقدر ظروفك.

«لأ» اللي تبني.. وتصلح.. وتكسب.

«لأ» اللي تجيب الحقوق.. وتقرب المسافات.. وتجبر الكسور.

«لأ» اللي تغلب فيها الحكمة على الغضب.

يعني يا دكتور لما يوصلني من أبويا أو أمي رسائل سلبية ماقولش
«لأ» علشان مايقاش «ترفيص»؟

مين قال كده؟

تقول «لأ» طبعًا..

بس قبل ما تقولها، إنت محتاج تعمل شوية حاجات مهمة:

أولاً.. إنك تشوفهم على إنهم بني آدمين.. بشر.. بيغلطوا..

ويقصر وا.. ويفشلوا.. زيهم زي أي بشر..

ثانياً.. هم مش بس بني آدمين.. هم كمان أمك وأبوك.. اللي ليهم

عليك حق الاحترام والتقدير والعرفان..

ثالثاً.. وده مهم جداً.. تحاول تحط نفسك مكانهم ولو لمدة

دقايق.. مكانهم يعني بنفس ظروفهم وإمكانياتهم.. بنفس صعوباتهم

ومشكلاتهم.. بنفس درجة ذكائهم وتفكيرهم وقدراتهم.. وبعدين

ترجع مكانك تاني.. وتبص عليهم من جديد.

رابعاً.. تعرف وتتأكد إن اللي عملوه معاك.. حتى لو كان غلط..

فهو ده كل اللي عرفوه.. واللى اتعلموه.. واللى شافوه بيتعمل معاهم..

وانهم عملوه عن جهل وسوء تقدير وليس عند قصد وسوء نية.. إلا

في حالات مرضية نادرة.

هامسًا وأخيرًا.. خلي في اعتبارك إنهم ماجاتلهومش الفرصة الي
مالك.. إنت قاعد دلوقت بتقرا وبتكتشف وبتزود وعيك.. بتحضر
النهيرات وتشوف فيديوهات وتسمع خبرات.. العالم مفتوح عليك
والث مفتوح عليه، من خلال نافذة صغيرة في متناول أناملك.. وهم
ياقائش عندهم كل ده.

«أ» الي هتقولها بعد ما تعمل الخمس حاجات دول، هتكون مختلفة
إنا عن «أ» الي هتقولها قبل ما تعملهم.
هتكون «أ» رحيمة.. حكيمة.. فيها تواصل.. مش «أ» قاسية..
نهورة.. فيها قطع للتواصل.
هتكون «أ» طيبة.. حنون.. فيها ود ومحبة.. مش «أ» لائمة..
عاقبة.. منتقمة.

هتكون عاملة زي المراية الي هتفردها قدام الطرف الثاني علشان
ياحرف فيها نفسه.. وتأثيره عليك..
هتخليه يراجع.. ويكتشف.. ويمكن يتغير.. ويمكن يطلب
العلاج..

ولو ده ماحصلش من أول «أ».. هيجصل من ثاني «أ».. أو
الث «أ».

ماهي «أ» دي معاها صبر وتروي.
و«أ» الثانية معاها استعجال وتسرع.

طيب.. ولما حبيبي أو خطيبي أو جوزي يوصل لي هو كمان رسايل
ساية.. أعمل نفس الخمس حاجات؟

آه طبعًا.

أشوف إنه بشر ممكن يغلط زي أي بشر.. وإنه شريك حياتي اللي أنا اخترته.. وأحط نفسي مكانه شوية وأتوقع هو ممكن يكون شاف الأمور من ناحيته إزاي.. وأعرف إن اللي عمله ده هو اللي اتربى عليه ووصل له من أهله وناسه ومجتمعه.. وإنه يمكن ماجاتلهوش نفس الفرصة اللي جاتي في العلم والمعرفة والوعي.. ومع كل دول.. أقول «لأ» اللي تكبرني.. وتوصل له رسالة إيجابية.. تخليه يوقف أذاه ليا.. وتساعده هو كمان إنه يتغير.

ولكن..

خلي بالك.. كل شيء له حدود.

فيه حد معين من الأذى والضرر نقدر نستحمله، ونصبر عليه، ونحاول فيه.. حفاظاً على العلاقة.. وتجنباً للخسائر.. بس لما الأمور توصل لسلامتك النفسية والجسدية.. يبقى فيه كلام تاني.

يعني لما جوزي يختلف معايا في الرأي.. أقول له: لأ.. أنا مش موافقة على ده.. لما يطلب مني حاجة وأنا مش عاوزاها أو مش حاباها.. أقول له: لأ.. ده مش مناسب ليا.. لما يحاول يحمّلني فوق طاقتي.. أقول له: لأ.. أنا مش مستعدة لده.. وأصبر وأجرب مرة واتنين وتلاتة.

لكن لما ده كله ما يجيش نتيجة.. وألاقيه بيحاول يلغي وجودي ويهضم حقي، أو يتناول عليا بالكلام أو بالفعل.. أو يفرض عليا حاجة غصيب عني ورجماً عن إرادتي.. ساعتها «لأ» هتكون محتاجة تاخذ صور تانية.

لما أبويا وأمي يكون عندهم وجهة نظر غيري.. أقول لهم بكل أدب: بعد إذنكم.. أنا مش شايف كده.. لما يشكوا فيا أو يكذبوني.. أقول لهم بكل احترام: حضراتكم غلطانين.. لما يأمروني بحاجات صعبة أو يتحكموا فيا بشكل مجحف.. أقول لهم بكل ذوق: من فضلكم.. ده مش مناسب ليا.. وأنا مش هاعمله.

لكن لما يهينوني أو يضر بوني أو يجسوني.. لما يستبيحوا جسمي ونفسي وروحي.. لما يضغطوا عليا علشان أدخل كلية غير اللي أنا بايزها.. أو أشتغل شغلانة أنا مش حاببها.. أو أوافق على عريس أنا مش مقتنعة بيه.. أو أكمل في جوازة أنا باخسر فيها حته من نفسي كل يوم.. يبقى ساعتها برضه «لأ» محتاجة تاخذ صور تانية.

الصور التانية دي تتراوح بين إني أطلب تدخل طرف تالت موثوق فيه، لرؤية الأمور من الخارج والحكم فيها بشكل حكيم وعادل.. لغاية إني أبدأ للقانون علشان أحمي نفسي.. وارفع عنها الأذى.. أو إني أقطع العلاقة وأبعد بشكل مؤقت لغاية ما الطرف التاني يفوق ويتعالج وينغير.. أو إني أقطعها تماماً وأبعد بشكل دائم.. لو الطرف التاني أصر على موقفه.. ورفض الرؤية.. ورفض المساعدة.. ورفض التغيير.

بقي فيه نوعين من «لأ».. «لأ» اللي تصغري.. و«لأ» اللي تكبرني.. «لأ» اللي توصل رسالة سلبية.. و«لأ» اللي توصل رسالة إيجابية.. «لأ» اللي تقطع.. و«لأ» اللي توصل.

فيه بقى نوع ثالث بنستخدمه عند اللزوم.. اسمه «لأ» الحادة الحاسمة، اللي هدفها إيقاف الأذى فوراً، ومنع الاستغلال حالاً.. وده في المواقف اللي مش هينفع فيها الصبر أو الانتظار تانية واحدة كمان.. واللي فيها (يو دونت هاف توبي سو نايس) خالص.

وفيه «لأ» رابعة وأخيرة.. وهي «لأ» اللي مهم تقولها لنفسك أحياناً.. «لأ» اللي تخرج بيها من (الكومفورت زون) بتاعتك، وتنطلق للحياة.. «لأ» اللي تخليك تراجع نفسك وتعيد اختياراتك.. «لأ» اللي توقفك انت بنفسك عن أذى نفسك أو أذى الآخرين.. والنوع ده من «لأ» محتاج بصيرة وشجاعة وصدق مع النفس.

احتمال يكون فيه أنواع تانية من «لأ» أنا لسه ماعرفهاش.

إذَا..

«لأ».. احتياج عام عند كل البشر.
المبدعين قالوا: «لأ» لكل ما هو تقليدي ومألوف.
المكتشفين والمخترعين قالوا: «لأ» للأبواب المعتادة المتكررة.
الأنبياء قالوا: «لأ» لظلم الإنسان لنفسه ولغيره.

وانت..

آخر مرة قلت «لأ» إمتى؟ وقتها مين؟ وقتها إزاي؟
كانت «لأ» اللي بتبني، واللا «لأ» اللي بتهدم؟
كانت «لأ» اللي بتجرح، واللا «لأ» اللي بتداوي؟
«لأ» اللي فيها وصل.. واللا «لأ» اللي فيها قطع؟
«لأ» علشان تستقل.. واللا «لأ» علشان تستغني؟
واللا كنت مضطر تقول «لأ» الحادة الحاسمة؟
طيب آخر مرة قلت «لأ» لنفسك كانت إمتى؟

خد وقتك.. وفكر براحتك.

بس قبل ما تجاوب..

اقرأ الفصل الجاي..

علشان تعرف كويس الفرق بين (الاستقلال) و(الاستغناء).

بين (الوصل) و(الفصل)..

بين (الجبر) و(الكسر)..

وبعد ما تعرف..
ألف على الأرض بكل هدوء..
وارفع رجلك من عليها بكل ثقة..
ونزلنا بكل ما تملك من قوة..
في ضربات إيقاعية متتابعة..
واسمع من جواك..
الصوت المبهر..
لأول (لأ)..
بطلعهم الفلامنكو..

الاستقلال .. والاستغناء

فيه فرق كبير جدًا بين إني أكون مستقل .. وإني أكون مستغني .

مهم إنك تكون مستقل .. حاسس بوجودك، وبقيمتك، وبكيانك .
بس ده مش معناه إن وجودك يبقى زي الزرعة الشيطاني، اللي طالعا
في صحراء جرداء لا زرع فيها ولا ماء .. مش معناه إنك تستغني عن
وجود الآخرين في حياتك .

مهم إنك تحط لنفسك حدود .. وتحمي حدودك ضد أي أذى نفسي
أو معنوي أو عاطفي (أو بدني طبعًا) .. لكن ده يختلف تمامًا عن إنك
تعيش لوحدك في جزيرة منعزلة منفصلة تمامًا عما حولها .

أنا باشجع الاستقلال النفسي والمادي والمعنوي .. لكني أرفض
تمامًا الاستغناء والإلغاء .. إلا في حالات نادرة جدًا .

الاستقلال هو إنك تحس بنفسك وبأهميتك وبنجاحك في شغلك وفي
حياتك.. لكن الاستغناء هو إن ده يخليك تنسى إنك متجوز ومسؤول
عن علاقتك بمراتك، فتبعد عنها، وماتهتمش بيها، وبعد شوية تخونها.

الاستقلال هو إنه من حقت يكون ليك رأي مختلف عن رأي والدك
والدتك.. وإنك تصر على رأيك.. وتنفذه لو حبيت.. لكن الاستغناء
هو إنك تعتبر وجودهم زي عدمه.. وتلغيهم من حساباتك إلى الأبد.

الاستقلال هو إنك تشتغلي، وتقبضي، وتصرفي على نفسك، ويبقى
ليكي ميزانية منفصلة بيكي، ودواير خاصة في علاقاتك.. إنها الاستغناء
هو إنك تبدأي تحتقري جوزك، وتستصغريه، وتقللي من شأنه.. لغاية
ما علاقتكم تفتت.. وتموت.

فيه احتياجات نفسية جوانا نحو الآخرين.. احتياجات من الناس..
احتياجات من الأب والأم.. احتياجات من الزوج والزوجة، والأصحاب
والخيران وزملاء العمل.. فيه حتى احتياجات من المجتمع.. ما ينفعش
لديهن احتياجاتنا من اللي حوالينا ونعيش في فقاعة ملساء مغلقة.. لأن
الاحتياجات دي هتقب وهتطلع وهتدور على أي طريقة تعبر عن نفسها
بيها.. ولو حتى سرقة.

أيوه..

المستغني يبحث بشكل واعى أو غير واعى عن بديل يسرق منه ما
لغس من احتياجاته، ويقوم (بتليسه) الدور المفقود في حياته.

اللي بتستغني عن أبوها.. بتفضل تدور على أب.. في حضن أي
راجل.

واللي بيستغني عن مراته .. بيعيش تحت رحمة نظرة واحدة، ولو من طفلة صغيرة.

واللي بيستغني عن البشر وعن الناس .. بيستبدلهم - أحيانًا - بالقطط والكلاب والعصافير.

الاستغناء هو إلغاء تام لوجود الآخر.
إنما الاستقلال لا ينفى وجود الآخر.

الاستغناء عن حد مهم في حياتك، معناه إنك فقدت فيه الأمل ..
إنك رميت طوبته .. إنك أطلقت عليه الرصاصة الأخيرة القاتلة.
أما الاستقلال عنه، فمعناه إنه ما زال موجود .. فيه شد وجذب ..
فيه احتمال .. فيه أمل .. فيه محاولات ودؤوبة رغم كل الصعوبات.

الاستغناء .. هو حكم بالنفي .. والعزل .. والتخلي.
إنما الاستقلال هو الإبقاء على الآخر .. حتى لو كانت هناك خصومة
(لبعض الوقت).

الاستغناء ما فيهوش علاقة ..
لكن الاستقلال هو إحدى صور العلاقة.

ينفع تستقل عن أبوك وأمك .. لكن ما ينفعش تستغني عنهم ..
ما ينفعش تفقد فيهم الأمل .. مهما كان موقفك منهم.

ينفع طبعًا تستقلي عن جوزك .. لكن في اللحظة اللي هتحيي فيها
انك مستغنية عنه .. يبقى تطلقي أحسن .. بدل ما تظلميه وتظلم
نفسك وأولادك معاه، بممارسة هذا الاستغناء بشكل يومي مؤلم لكل
الأطراف.

ينفع تستقل عن الناس .. لكن ما ينفعش تستغني عن وجود ناس في
مهاالك .. عن النظر في عيونهم .. عن مبادلتهم بعض الكلام والحديث ..
من الهزار والنكت والحب والكره والغضب والشكر والامتنان.

الاستغناء هو الاختيار الأخير .. والأخير فقط .. عندما تفشل كل
الحلول والمحاولات.

فيه شعرة رفيعة جدًا بين الاستقلال والاستغناء ..

لكنها حادة كالسيف ..

احذرهما جيدًا ..

لأنها ..

تخرج .. من الناحيتين.

ده أنا.. وأنا مش عار

عن فيلم:

The Greatest Showman

- ١ -

(فينياس) كان طفل صغير مليون طموح.. ومليان تلقائية
وتلقائيته خلته يتجرأ في يوم من الأيام، ويهزر مع بنت أحد كبار أعيان
المدينة، بالرغم من إن والده كان بيشتغل خياط (ترزى).. الراجل تمهم
وكشر وانتفخت أوداجه.. وضرب الطفل فجأة بالقلم على وشه..
رسالة نفسية كلها إهانة واحتقار.

(فينياس) ماتخلاش عن أحلامه وطموحاته.. وعمل كل اللي يقدر
عليه علشان يتجوز حبيبته (بنت هذا الرجل).. وينجب منها طفله
زي الملايكة.. ويعيشوا كلهم في بيت صغير على قد الحال.. في انتظار
تحقيق الحلم القديم.

(فينياس) اشتغل شغلانات كثير.. ودخل مشاريع أكثر.. وكلها
باعت بالفشل.. لغاية ما جات له الفكرة السحرية بإلهام من إحدى
الآله.

(فينياس) قرر يجمع كل حد مختلف.. كل حد فيه حاجة
فرسية.. حتى ولو كانت عاهة.. وكوّن مجموعة صغيرة متفردة: قزم
صغير يهوى لعب دور الجنرال المحارب.. بنت صوتها جميل بس عندها
شعر كثيف في وشها.. أخ وأخته بيحيدوا ألعاب القفز في الهوا.. راجل
زوله زيادة جداً.. واحد تاني طويل قوي.. وثالث جسمه مليون وشوم،
وطرفهم.. وعمل (فينياس) بالمجموعة دي أول متحف حي في تاريخ
البشرية.. وبعد شوية سماه Circus (السيرك).

لجحت فكرته.. والناس بقت بتيجي من كل حته للسيرك، علشان
تخرج على غرائب وعجائب البشر، ويشوفوا استعراضاتهم اللي مليانة
حال وإبداع.

بس (فينياس) ماشبعش.. ماشبعش من الشهرة والفلوس..
الشيء من البيت الجديد والغرف الواسعة.. ماشبعش من النجاح..
ومن تحقيق الأحلام.. وقرر يبدأ فصل جديد من الوصول، مع
الغنية الأوبرا ذات الصوت الساحر (جينى ليند).. وسافر وبعد عن
السيرك وعن أفراد اللي جمعهم وحبوه واتعلقوا بيه..

(ليند) خلته يلف بلاد كثير، بنجاحات أكثر، وجابت له العالم على
تعبيرها.. تحت رجليه.. لغاية ما نسي نفسه.. ونسي بيته.. وبناته..
السيرك.. وعند اللحظة اللي (جينى) حاولت تقرب منه فيها أكثر..
انكر كل اللي نسيهم.. بس بعد فوات الأوان.

(جيني) استقالت من الشغل معاه لأنها اكتشفت إنه مش بيحبها..
وإنها كانت بالنسبة ليه مجرد لعبة باهرة زي ألعاب السيرك الخادعة..
ومراته سابته لأنها كمان حست إنه مش بيحبها، وإنه مش ناوي يبطل
يثبت لنفسه ولأبوها إنه أحسن منه.. والسيرك كمان اتحرق واتحطم من
أهل البلد اللي نبذوا أفراداه علشان مختلفين عنهم.

(فينياس) خسر كل حاجة.. حتى نفسه.

وهنا.. ورغم إن فينياس اتخلي عن فريق السيرك.. لكن الفريق ده
ما تخلاش عنه.. ورجع له.. ووقف جنبه.. علشان يفوقه.. ويصحح
مساره.. ويرجعه لنفسه ولييته وبناته وسيركه من جديد.. بعد ما أعاد
ترتيب أولوياته في الحياة.. في نهاية جميلة تليق بهذه القصة الحقيقية.

- ٢ -

This is me

من طفولته.. (فينياس) كان بتوصل له رسايل مستمرة تزرع جروح
إحساس قوي (بالعار).. من أول الفرق الواضح في مستوى عياله
الاجتماعي.. ووظيفة والده البسيطة.. لغاية قلم السيد (هوليت) ال
وشه اللي أكد له الإحساس ده.. وخلاه جزء لا يتجزأ من تكوينه.

الضرب على الوجه هو أحد أبشع أشكال الإهانة.. فالوجه هو رمز
التفرد والاختلاف.. هو علامة الحضور والوجود.. وإهانته هي سبب
لكل ذلك.. ممكن الطفل ينسى كل أنواع وألوان الأذى النفسي ال
اتعرض له وهو صغير.. إلا الضرب على الوجه.. بيسبب جرح نفس
غائر.. يصعب جداً وقد يستحيل - التئامه.

(فينياس) بقرار جزء منه واعى، وجزء أكبر غير واعى، جمع الناس
الي زييه.. الناس الي من بره بيبدووا مختلفين.. لكنهم من جواهرهم
بصار عوا إحساس داخلي عميق بـ(الخزي) و(العار)، لدرجة إن
بعضهم كان عايش حياته هربان من عيون الناس.. الي مليانة سخرية
إهانة.

كانوا مخبيين أنفسهم.. مخبيين حقيقتهم.. أو مخبيين أجزاء منها.

إيه؟

إنت قلت إيه؟

مخبيين أجزاء من أنفسهم؟

ليه؟

إحساس داخلي بالعار؟

ده الكلام ده شهي..

ده فكرني بنفسي..

فكرني باللي مخبيه من نفسي..

فكرني بلحظات السكوت.. والنظر في الأرض..

بإحساسي بالإحراج.. وأحيانًا الخزي.. ويمكن العار في بعض

الواقف.. أو مع بعض الناس.

فكرني باللي اترفض فيا من اللي حواليا.. زمان أو دلوقت..

بالتردد في إني أكون نفسي.. وإني أبقى على حقيقتي..

بالخوف من الحكم أو الشرط أو الرفض..

بالرعب من الإهانة أو السخرية أو العقاب..

أو ربها.. الفراق.

المجموعة اللي جمعها (فنياس) كان فيهم اختلافات جسمانية عن باقي الناس.. علشان كده كانوا منبوذين ومُستهجنين.. المشكلة بقى اللي اللي بيكون عنده اختلافات نفسية عن اللي حواليه.. ومش المقصود هنا إنه مريض نفسي.. لأ.. ده إنسان عادي جداً.. بس مختلف.. واحد بيقول (لأ) في مكان معظم الناس فيه بتقول (آه).. طفل بيرفض تشويه فطرته.. بنت بتعترض على القهر والتحكم والسيطرة.. فنسمي الأول متمرد.. والثاني عنيد.. والثالثة ناشز.. ونزرع فيهم كلهم الإحساس (بالعار).. لغاية ما يصدقوا.. ويمسوا بيه فعلاً.. خوفاً من مجرمة الاختلاف.. وسط ناس لا تقبل.. أو بالأحرى.. لا تعترف أصلاً.. بأى اختلاف.

- ٣ -

عالم النفس الكبير (إريك إريكسون) يقسم حياة الإنسان إلى ثمان مراحل.. كل مرحلة منهم بيكون فيها صراع داخلي مختلف.. وبيكون مطلوب -بشكل أو بآخر- حل هذا الصراع.. والوصول إلى معنى نفسي معين.. وقيمة حياتية مهمة.. ثم الانتقال إلى المرحلة اللي بعدها.

المرحلة الأولى عنوانها Trust Vs. Mistrust (الثقة في مقابل عدم الثقة)، وبتبدأ منذ الولادة لغاية سنة ونصف من العمر.. في المرحلة دي، الطفل بيختبر العالم (من خلال أمه).. وبيكوّن عن الحياة فكرة مبدئية أساسية، احتمال يكمل بيها عمره كله.

بيكون مطلوب من الأم في المرحلة دي (مرحلة الرضاعة)، إنها توصل للطفل رسالة نفسية بسيطة جداً، بس هتفرق معاه طول حياته، الرسالة دي مفادها (أنا متاحة وقت ما تحتاجني)..

يعني لما الطفل يكون محتاج يرضع مثلاً.. يلاقي أمه متاحة (معظم الوقت مش لازم طول الوقت).. لما يكون محتاج حضنها يلاقيه.. لما يكون محتاج ينام بين أيديها.. تعمل ده.. لما يكون محتاج إنها تحس بيه وبألمه أو فرحته أو غضبه.. يلاقيها حاسة بيه ومتفاعلة معا.. لوده وصل.. هتبقى دي رسالة طمأنينة من كل العالم (مثل في شخص الأم)، للطفل ده بتقول له: (العالم مكان آمن.. تقدر تثق في الناس بدرجة جيدة.. تقدر تعتمد على أهلك وأصحابك وحبايبك.. تقدر تحس بالأمان.. تقدر تتفاءل.. لأنك لما محتاج.. هتلاقي).. إنها لو كانت الأم مهملة.. مشغولة عن ابنها كثير.. غير مهمة.. غير متاحة.. أو قاسية.. مؤذية.. مضطربة.. فده هو وصل الرسالة العكسية عن العالم والناس تماماً.. واللي تقول للطفل (العالم مش مكان آمن.. ماتتقش في حد.. دي أمك نفسها ماكانتش قد اتفك.. ماينفعش تعتمد على حد.. كلهم هيهخونوك.. إوعى تظمن.. إوعى تحس بالأمان.. الدنيا سواد وظلم وتشاؤم).

المرحلة الثانية -ودي اللي تمنا هنا- بتكون ما بين سنة ونص إلى ٢ سنوات من عمرنا.. عنوانها Autonomy Vs Shame (الاستقلالية في مقابل الشعور بالعار).. في المرحلة دي.. بيحاول الطفل إنه يثبت وجوده.. يعتمد على نفسه.. يقول (لأ).. يستقل بذاته.. تلاقيه لما حد يحاول يساعده في حاجة، يقول له: لأ.. سيني.. أنا هاعملها.. لو حد حاول يسنده وهو بيقع على الأرض، بيعد إيدو ويقف لوحده.. بيدأ يفك الحاجات ويركبها.. يلبس نفسه الهدوم ويقلعها.. وهكذا.

في المرحلة دي كمان بيتعلم الطفل التحكم في جسمه وأعصابه وعضلاته.. اللي منها (عضلات الإخراج.. التبول والتبرز).. وتعامل الآباء والأمهات مع أطفالهم في التوقيت ده.. بيكون مهم ومؤثر للغاية.. لأنه إما بيساعدهم على الإحساس بالاستقلالية والثقة والقدرة على التحكم الذاتي.. وإما على الإحساس بالتردد والخزي والعار..

يعني لو كان الأب والأم متساعحين.. وصبورين.. وساعحين لأولادهم
بمساحة من التجربة والخطأ (في الإخراج وغيره).. فده هيربي في الأولاد
شعور بالتلقائية، والقوة.. والاعتماد على النفس.. أما لو كانوا واقفين
لأولادهم على الواحدة.. وييشككوهم في نفسهم.. ومش بيسامحوهم على
أخطائهم.. وأحياناً يعايروهم على المرات اللي ماقدروش يمسكوا نفسهم
فيها.. وأحياناً أخرى يهددوهم باللسع والقرص والضرب والحبس.. فده
هيزرع في الأولاد الشك.. والتردد.. والخوف.. والاعتمادية.. ويخليهم هم كبار
مايسامحوش نفسهم.. ولا يفارقهم الإحساس بالدونية.. والخزي.. والعار

أنا شفت بنات وأولاد وصل لهم من اللي حوالِيهم إن وجودهم
خزي.. وإن كيانهم عار (صوتهم عار.. أو جسمهم عار.. أو أنوثتهم
عار.. أو طبييتهم عار.. أو تلقائيتهم عار).. وإنهم مضطرين للاعتذار
يوميًا عن مجرد وجودهم في هذه الحياة.

-- ٤ --

اللي عمله (فينياس بارنوم) هو إنه جمع كل المختلفين.. المختبئين
الترددين.. الخائفين.. وقرر إنه يُظهرهم.. ويحررهم.. ويتحدى بيهم
الناس.. دون خجل.. دون كسوف.. دون خزي.. دون أي إحساس
بالعار.. وليكن ما يكون.

لحظة..

هو انت تقدر تعمل كده؟

تقدر تُحبي ما دفتته من نفسك دون خوف؟

تقدري تحرري ما سجتته من نفسك دون أي إحساس بالعار؟

تقدروا تتحدوا كل رافض لوجودكم ولحقيقتكم ولاختلافكم؟

«اللي عمله كل واحد في مجموعة (بارنوم) بشجاعة وكبرياء.. وده
اللي بتعبر عنه كلمات أغنيتهم الجميلة اللي صرخوا بيها في كل مكان، لما
(بارنوم) نفسه حاول يجيبهم من ضيوفه في إحدى الحفلات.

قالوها بأعلى صوتهم:

This is Me أنا..

ماهمش «هذا ما وجدنا عليه آباءنا».
ماخافوش من الاستغراب والاستهجان والرفض.

هم مش بس قرروا يكونوا أنفسهم..

دول قرروا يعلنوا عن أنفسهم..

ويشتوا وجودهم..

ويوقعوا بالحضور.. في دفتر غياب الحياة.

في الكتابين اللي فاتوا (الخروج عن النص، وعلاقات خطيرة)، كنت
بالقول لك: كن نفسك.. حسي بوجودك.. خليكو حقيقيين.

دلوقت أن أوان الخطوة الجديدة..

وباقول لك هنا ودلوقت:

من حقت تعلن عن وجودك الجديد..

من حقت ماتحسش بالخجل من نفسك..

ماتحسش بالدونية..

ماتحسش بالخزي..

ماتحسش بالعار..

ردد معايا كلمات أغنية This is me ، بكل ما أوتيت من طاقة ..
وصوت .. وحركة داخلية:

I am not a stranger to the dark
Hide away, they say
Cause we don't want your broken parts
I've learned to be ashamed of all my scars
Run away, they say
No one'll love you as you are.

لست غريبًا على الظلام
يقولون لي اختبئ
لأننا لا نريد أجزاءك المكسورة
لقد تعلمت أن أشعر بالعار من كل ندوبي
يقولون لي اهرب
فلن يحبك أحد كما أنت

But I won't let them break me down to dust
I know that there's a place for us
For we are glorious.

لن أسمح لهم بسحقي حتى أصير ترابًا
فأنا أعلم أن هناك مكانًا لنا؛
لأننا رائعون

When the sharpest words wanna cut me down
I'm gonna send a flood, gonna drown them out
I am brave, I am bruised
I am who I'm meant to be, this is me
Look out 'cause here I come
And I'm marching on to the beat I drum
I'm not scared to be seen
I make no apologies, this is me-

لو أرادت أشد الكلمات تمزيقي
فسوف أرسل عليها فيضاً يغرقها
أنا شجاع.. أنا مليء بالكدمات
أنا كما مقدر لي أن أكون.. هذا أنا
انتبهوا لأنني ها قد أتيت
وأنا أسير على إيقاعي الخاص
أنا لست خائفاً أن تروني
أنا لن أعتذر عن وجودي.. هذا أنا

Oh_oh_oh_oh
Oh_oh_oh_oh
Oh_oh_oh_oh
Oh_oh_oh_oh

Oh_oh_oh, oh_oh_oh, oh_oh_oh, oh, oh
Another round of bullets hits my skin
Well, fire away 'cause today, I won't let the shame sink in
We are bursting through the barricades and
Reaching for the sun (we are warriors)
Yeah, that's what we've become (yeah, that's what we've
become).

جولة أخرى من الصدمات تصيبني
حسناً.. توجهوا بعيداً.. لأنني اليوم لن أسمح للعار بأن يملكني
ساخترق كل الموانع
حتى أصل إلى الشمس ذاتها.. فنحن مكافحون
وهذا ما أصبحنا عليه

I won't let them break me down to dust
I know that there's a place for us
For we are glorious.

لن أسمح لهم بسحقي حتى أصير ترابًا
فأنا أعلم أن هناك مكانًا لنا؛
لأننا رائعون

When the sharpest words wanna cut me down
I'm gonna send a flood, gonna drown them out
I am brave, I am bruised
I am who I'm meant to be, this is me
Look out 'cause here I come
And I'm marching on to the beat I drum
I'm not scared to be seen
I make no apologies, this is me.

لو أرادت أشد الكلمات تمزيقي
فسوف أرسل عليها فيضانًا يغرقها
أنا شجاع.. أنا مليء بالكدمات
أنا كما مقدر لي أن أكون.. هذا أنا
انتبهوا لأنني ها قد أتيت
وأنا أسير على إيقاعي الخاص
أنا لست خائفًا أن تروني
أنا لن أعتذر عن وجودي.. هذا أنا

Oh_oh_oh_oh

Oh_oh_oh_oh

Oh_oh_oh_oh

Oh_oh_oh_oh

Oh_oh_oh, oh_oh_oh, oh_oh_oh, oh, oh

This is me

and I know that I deserve your love

(Oh_oh_oh_oh) 'cause there's nothing I'm not worthy of

(Oh_oh_oh, oh_oh_oh, oh_oh_oh, oh, oh)

When the sharpest words wanna cut me down

I'm gonna send a flood, gonna drown them out

This is brave, this is bruise

This is who I'm meant to be, this is me.

وأعلم أنني أستحق حبكم
لأنه لا يوجد شيء أنا لا أستحقه
لو أرادت أشد الكلمات تمزيقي
فسوف أرسل عليها فيضاً يغرقها
هذه شجاعتني .. هذه كدماتي
أنا كما هو مقدر لي أن أكون .. هذا أنا

Look out 'cause here I come (look out 'cause here I come)
And I'm marching on to the beat I drum (marching on,
marching, marching on)
I'm not scared to be seen
I make no apologies, this is me

انتبهوا لأنني ها قد أتيت
وأنا أسير على إيقاعي الخاص
أنا لست خائفاً أن تروني
أنا لن أعتذر عن وجودي .. هذا أنا

When the sharpest words wanna cut me down
I'm gonna send a flood, gonna drown them out
I'm gonna send a flood
Gonna drown them out
Oh
This is me.

لو أرادت أشد الكلمات تمزيقي
فسوف أرسل عليها فيضاً يغرقها
هذا أنا.

بص بقى ..
من اليوم والساعة واللحظة ..
إوعى تتكسف من نفسك ..
إوعى تعتذري عن وجودك ..

دي حياتك ..
وتجربتك ..
وكدماتك ..
وجروحك .

ده شرف ..
واعتراز ..
وفخر .

أخيراً ..
اكتب معايا الكلمتين دول ..
احفظهم ..
علقهم في أوضتك ..
حطهم في شنطتك ..
على تليفونك ..
في كتابك ..
في جيبك .

وقولهم بكل ما فيك :
« ده أنا .. »
وأنا مش عار .

جذور القلب

في الثانوية العامة اتعرفت على (علاء).. الشاب الأسمر الي مليون
عالم ورومانسية وخيال وأحلام وطموح.. وأيضًا حزن.. خليط
من روائح من البساطة والقرب وروح الدعابة، لا تملك أمامه
إلا التصديق والاحترام والحب.. أصبحنا أنا وعلاء صديقين في يوم
واحدة.. كنت باعدي عليه في البيت كل يوم الساعة ٧ الصبح علشان
روح المدرسة.. نسمع أغنية (علمي) لإيهاب توفيق، في طقس يومي
تكرر ومتجدد في نفس الوقت.. ونشوف في طريقنا الجميلة (٦٥) الي
كان علاء ييحبها ومتيم بيها.. وأنا أعدي من تحت بيت (٦٦) يمكن
نكون واقفة في البلكونة.

أه.. كنا عاملين شفرة كودية مُرَقَّمة للبنات ☺

عشت مع علاء في بلدتنا الصغيرة (مغاغة) أجمل أيام عمري..
فروس الثانوية العامة.. الكُتَّاب.. أغاني وألبومات محمد فؤاد وعمرو
فيساب وحيد الشعاري وعاشق الساكس.. الي كنا بنشترها أول
ما بنزل، ونسمعها فوق سطح بيت (علاء) على ضوء الأباجورة
الصغيرة، الي جابها لي هدية في عيد ميلادي..

كنا بنسافر أحياناً لبلدة محبوبته الجميلة (٦٥)، ونلف حوالين بيتها شوية
وبعد ما نخلص.. نجمع شوية رمل من تحت البيت.. ونحطهم في كيس
بلاستيك شفاف.. علشان يحتفظ بيه علاء جنب قصصه ومذاكراته
علاء كان بيكتب قصص قصيرة حزينة.. لم تختلف كثيرًا عن سيناريو
حياته.. اللي افترق فيه عن حبيبته.. وبلده.. وأيضًا صديقه.

تنسيق الثانوية العامة خلى علاء يروح كلية (دار العلوم) بالقاهرة،
وأنا رُحت كلية (الطب) بالمنيا.. وبدأنا مرحلة جديدة في علاقتنا.
بدل ما كنا بنتقابل كل يوم لساعات طويلة.. بقينا بنتقابل دقائق
كل أسبوع في محطة القطار.. هو واقف على رصيف قطار القاهرة
وأنا واقف على رصيف قطار المنيا.. نعدي لبعض بسرعة.. نتكلم
نحكي.. ونودع بعض.. ونمشي.

ماكانش فيه تليفون محمول.. كنا بنكتب لبعض جوابات ورقية
ونبعثها في البوسطة.. أكتب له كل اللي حصل معايا طول الأسبوع
يخص الدراسة، والبيت، والحب.. وهو نفس الكلام.. لغاية ما نتقابل
الأسبوع اللي بعده.. مئات الخطابات خلال عشرات الشهور.. كل
جواب فيهم عبارة عن مجموعة دروس في العشق، والعلم، والبلاغة
والطب، والأحلام.. ما زالت كلها محفوظة في صندوق صغير
بيتي.. وفي قلبي.

* * *

زي أي علاقة صداقة بين اتنين.. أنا وعلاء لما كنا بنتقابل كنا بنسلم
على بعض بحرارة شديدة واحتضان قوي.. كنا بنعبر عن الوحشة
والغربة والاشتياق لأيامنا وحكاياتنا.. كنا بنعد الأيام والليالي علشان
نتقابل في الإجازات.
لكن..

اللي لاحظته بعد شوية، هو إننا مابقيناش نشتاق لبعض زي الأول
مابقيناش نعد الأيام والليالي.. مابقيناش نحضن بعض لما نتقابل.

أنا عارف انت بتفكر في إيه دلوقت .
أبيد بتقول في سرك : طبعًا علاقتكم أصابها الفتور .. وغيرها
.. وتحولتم إلى أغراب .
في الحقيقة (لأ) .. مش ده اللي حصل ..
والعكس هو الصحيح تمامًا .
لما ما هتشوف بعد شوية .

* * *

كل العلاقات الإنسانية على اختلافها بتمر بنفس (أو بعض)
أصل العلاقة الأولى والأهم في حياتنا: علاقة الطفل بأمه .. واللي
المادة الخام لكل العلاقات الجيدة (أو غير الجيدة) التالية لها ..
بمعنى علاقتنا الحالية مع الآخرين في حياتنا، فيها شبه كبير ببعض
العلاقة الأصلية القديمة بالأم .
الطمأنينة والأمان والراحة اللي بنحسهم في علاقة طيبة .. يفكرون
في عائلنا الباطن - بالأوقات اللي كنا بنحس فيها بالقرب والاحتواء
والطمع من الأم .
الوتر والخوف والوجع اللي بنحسهم في علاقة صعبة .. يبصحو
بورا القلق والرعب والألم، اللي كنا بنحس بيهم لما الأم تبعد أو تزعل
أو تقسو .

المعلمة النفسية (مارجريت ماهلر) قسمت مراحل علاقة الطفل
بأمه لثلاث مراحل .. وكثير من الناس - وأنا منهم - يبشوفوا إن نفس
الثلاث مراحل دول، ممكن يتكرروا في معظم علاقات حياتنا .. سواء
السليمة .. أو المريضة .

هاستعرض هنا المراحل دي ببعض التفاصيل .. وهاوضح الشبه
بينها وبين بعض علاقاتنا واحنا كبار .. وعلشان ذكريات الألبومات
والأغاني اللي بدأنا بيها الفصل، وجوابات الفن والعلم المحفوظة في
ذلك الصندوق الصغير .. هاستعين بأمثلة من بعض الأغنيات، والأعمال
الفنية، والتجارب الحياتية .. وبعدين نرجع لحكايتي مع (علاء) ثاني .

المرحلة الأولى اسمها مرحلة (التوحد) Normal Autistic Phase
- من الولادة حتى شهرين:

الطفل هنا مش بيكون عامل علاقة غير مع نفسه.. تلاقيه في الفناء
دي بيقتي معظم وقته نايم، مالهوش دعوة بحد، كل علاقته بأمه هي
الحصول على احتياجاته الغذائية منها وبس، (بيستخدمها) علشان يرضع
ويشبع، وبعدين يتبسط وينام.. وهكذا. هو عايش مع نفسه، جوه نفسه،
نفسه وبس.

المرحلة دي مهمة جداً في النمو النفسي، لأن الطفل فيها بيكون جواد
كمية خوف ورعب مالهمش حدود من العالم، ومن الناس، ومن كل وأبي
حاجة حوالية، بعد ما نزل من جنة عدن اللي كان فيها لمدة تسع شهور
قبل الولادة.. بيكون محتاج يفصل وينعزل ويحمي وجوده.. يفصل نفسه
عن هذا العالم المخيف المرعب، المهدد لو جوده الضئيل الضعيف، ينعزل
عن هؤلاء الأشخاص العالقة اللي بيثيلوه ويخطوه دون أي إرادة أو
مقاومة منه.. يحمي نفسه حتى من مشاعر الجوع والعطش المؤلمة، اللي
عمره ما عرفها قبل كده.

في المرحلة دي من النمو، طبيعي يكون الطفل مخلوق نرجسي وأناشي
جداً، مش مهتم غير بنفسه، متوحد ومتحوصل حول ذاته، علاقته باللي
حواليه هي علاقة استخدام واستغلال وشبع فقط.

لو لاحظت.. هتلاقي إن نفس التفاصيل دي ممكن تكون موجودة
في بعض العلاقات.. لما يكون طرف من الطرفين مش بي فكر غير في
نفسه.. مش مهتم غير بأحواله.. غير مراعي لمشاعر ولا احتياجات
الطرف الثاني.. غير مبالي بإصابته أو بجرحه.. كأنه مش شايفه أصلاً..
أو -بمعنى أدق- مش شايف منه غير اللي يبسطه، ويسعده، ويرضيه..
ويستغله ويستخدمه لمصلحته طول الوقت.

الدمع ده من العلاقات نمط طفولي.. ماينفesch حد كبير يكون ده
لكل علاقاته مع الناس..

ماينفesch يبقى عندي خمسة وعشرين سنة وباعمل علاقة مع حد
دمع طفل عنده شهرين، شايف نفسي بس، أنا الوحيد اللي ليا حقوق،
أنا الوحيد اللي مهم يرضى ويتبسط وينام قرير العين، أنا أولى وأهم من
أى حد وأي حاجة.. والطرف الثاني ماهوش لازمة، ماهوش وجود،
ماهوش فائدة غير إنه يُستهلك، ويتحرق، ويُستنفد لآخر قطرة، وآخر
اللس.

ده يبقى مرض.. وللأسف موجود كثير.. ووصفته (شيرين) في
كلمات أحد أغانيها:

ما بتفرحش غير لفرحك..
ما بتحزنش غير لجرحك..
ما بتتعبش غير لصالحك..
إنت عايش ليك وبس.

علاقة نكوصية توحديّة، ما فيش فيها غير (أنا).. أنا ومن بعدي
الطوفان.

علاقة ممكن تكون مفهومة ومبررة واحنا أطفال.. لكنها -بالتأكيد-
قائمة وقاتلة واحنا كبار..

وانت عارف الباقي..

المرحلة الثانية اسمها مرحلة (التكافل) Normal Symbiotic Phase

— من سن شهرين لغاية ست شهور:

هنا الطفل يبدأ يقرب شوية من العالم، ويخرج بره حويصلة نفسه، ويفتح عينيه للخارج، مش للدخل زي ما كان.. ساعتها ما بيصدق (يلزق) في أول كائن يلاقه قدامه (أمه).. يلزق يعني يحس إنه هو وهي حاجة واحدة، مافيش أي حدود نفسية أو حتى جسدية بينهم.. يجوع.. ترضعه فورًا كأنها هي اللي جاعت.. بطنه توجعه.. تحس بيه وتداويه كأنه حته منها.. يبرد.. تدفيه كأنها ساكنة تحت جلده.. وهكذا.

هو طبعًا بيكون معذور، لأن دي الحاجة الوحيدة اللي ممكن تطمنه، وسط الرعب والخوف الرهيب من العالم اللي براه.. أو بمعنى أدق دلوقت.. اللي براه هو وأمه.. دي الحاجة الوحيدة اللي ممكن تحسسه بكيانه الوليد.. تحسسه إنه موجود، بس كجزء من وجود أكبر مع الأم، جوه فقاعة صغيرة فاصلاهم هما الاتنين عن كل العالم خارجهما.. بدل ما كان مفصول عن العالم في فقاعة خاصة بيه وحده.

المرحلة دي طبيعية ومهمة جدًا عند الأطفال في السن ده.. بس برضه ماينفحش تستمر أكثر من كده.. وماينفحش تكمل طول العمر، وماينفحش ثبت عندها، ويكون هو ده نمط علاقاتنا مع الآخرين.. خاصة اللي بنحبهم.

لكن للأسف.. بنلاقي كثير من العلاقات بيحصل فيها كده بالظبط.. وبيتكرر فيها نفس اللي بيعمله طفل عنده ست شهور في علاقته بأمه.. والمثل الأشهر على ده هو علاقة (الحبل السري)، اللي وصفتها في كتاب علاقات خطيرة.. واللي بيقرر فيها اتنين انهم يلزقوا في بعض، ويكتفوا ببعض عن الناس، وينعزلوا ببعض عن العالم.. ويقطعوا كل أوامر الصلة بينهم وبين أي حد غيرهم.. ويلعبوا مع بعض لعبة (أنا وانت ولا حد تالتنا).. لغاية ما يلقوا حوالين بعض حبل المشنقة.. مشنقة التحكم والسيطرة والغيرة والخوف وذوبان الحدود.. وفي الحقيقة.. كل واحد فيهم جواه طفل صغير مرعوب من الوحدة.

شوف أصالة بتقول إيه في أغنيتها (ملهمته الوحيدة):

باحب أحس بجد..

إنه وانا جنبه دايماً مستعد..

يستغنى بيا عن الدنيا باللي فيها.

باحب أحس بجد..

لو قال يوم كلمة حلوة لأي حد..

الكلمة دي يبقى قاصدني بيها..

باحب أحس..

إنه وانا في غيبي عامل ليا خاطر..

وانه عشاني بحياته وعمره خاطر..

وماشفهوش مرة قادر

إن انا ابقى في يوم بعيدة.

واما يفتح دفاتره..

عشان يكتب خواطره..

باحب احس..

إني بس..

ملهمته الوحيدة.

طبعا أنا مش هاعلق.. علق انت.

المشكلة إن الأغاني اللي من النوع ده منتشرة جداً.. ومشهورة جداً..
وبتعيش الناس في حالة هلامية من الرومانسية الخبز عبلية الزائفة.

المرحلة الثالثة اسمها مرحلة (الافتراق والتفرد Separation-Individuation Phase) - من سن ست شهور إلى سنتين ودي فيها أربع لقطات (أو مراحل فرعية):

• في اللقطة الأولى (من سن ست شهور لعشر شهور)، يكتشف الطفل إن أمه كائن منفصل بذاته، وإنها مش جزء منه زي ما كان متصور في المرحلة اللي فاتت.. يكتشف إنها ممكن تبعد، وتبقى غير متاحة.. وإنه ممكن - أحياناً - يحتاجها وما يلاقىهاش.. يكتشف إنها ممكن تتعب، وتقصر، وتعوز ترتاح.. وإن ليها احتياجات زي ما هو له احتياجات بالظبط.

يكتشف إنه هو وهي اتنين مش واحد.. زي بالظبط وصف (عمرو دياب) وهو يقول:

تقدر تتكلم عن روحك يا حبيبي خلاص
ما بقينا اتنين..

طول عمرنا عايشين روح واحدة..
دلوقتي خلاص بقينا روحين.

الاكتشاف ده بيصدم الطفل، ويلخبطه، لكنه بعد شوية بيستوعبه ويقبل وجود حدود بينه وبين أمه، ويبدأ يستحمل بعدها.. ويساعده على ده وجود حاجة (من ريحتها)، تفكره بيها وتصبره على غيابها، يعني تسبب جنبه شنطتها.. لعبة بتلعبها معاه.. البطانية اللي بتغلف بيها.. وهكذا.

يسموا ده Transitional Object (آخر انتقالي).. زي الصورة اللي بيطلبها الحبيب من حبيبته علشان يبص لها كل شوية.. وزى الورد اللي بتحتفظ بيها الحبيبة من حبيبها.. وزى المنديل اللي في أغنية (عبد العزيز محمود) اللي سابتهوله حبيبته قبل ما تغيب:

منديل الحلو..
يا منديله..
على دقة قلبي..
بغني له..
والنبي لاحكيه يا منديله..
في عنيا هاشيله يا منديله.

• بعدها بشوية، في اللقطة الثانية (من عشر شهور لسته عشر شهراً)، يبدأ الطفل يكبر ويتحرك ويلعب بعيد عن أمه، بس يرجع كل لسهوية يصص عليها ويظمن إنها موجودة.. بتبقى بالنسبة له زي الوطن لحد متغرب.. مهما بعد يشتاق له.. مهما سافر يرجع له.. مهما راح.. يصيره يعود إليه.

وهنا، كلمات أغنية علاء عبد الخالق (راجع لك)، بتعبر عن ده الوضوح شديد:

راجع لك.. مدوب في قلبي الحنين..
وجايب معايا غرام السنين..
وبا حلم.. ألاقي.. في يوم التلاقي..
شفافيك بتضحك لقلبي الحزين.

الفن بيعبر عن العلم بشكل غريب.

• بعد كده.. انفصل الطفل عن أمه نفسياً تماماً، في اللقطة الثالثة (اللي هي من ستاشر شهر لستين)، ويبدأ يتعامل مع نفسه ومعها على إنها كائن مستقل.

ورغم إن ده بيسبب له بعض القلق والألم، لكنه بيساعده جداً في التفرج والنمو النفسي السليم.. ويساعده كمان في قبول الفقد لما يكبر.. فقد الأحبة.. فقد الأشياء.. فقد الأماكن.

فيه علاقات تانية.. بتثبت عند لقطة إني بأتحرك وأروح وأجي
من ما ينفعش تبعدني عني قوي.. أو إني أتصل بيكي كل شوية أتظمن
عليكي.. أو إني أبدأ أخاف عليكي بزيادة.
برضه دي حاجة لطيفة.. وبتمر بيها علاقات كتير.. بس اللي يقف
هنا.. هيكتف الطرف الثاني ويحبسه في قمقم.

فيه بقى علاقات ثالثة -ودي صعبة جدًا- بتقف عند لقطة القلق
الطبيد من البعد.. والخوف الكبير من الهجر.. والألم الساحق من الانفصال..
وده يغلي طرف متشعبط في الطرف الثاني.. لدرجة إنه ممكن يسمح له
إنه يؤذيه.. في مقابل إنه ما يسيبهوش.. أو -على الجانب الآخر- واحدة
تدع نفسها إنها تقرب من أي حد، وتعمل معاه أي علاقة، خوفًا من إنه
يسببها أو يتخلى عنها في يوم من الأيام.

كل ده بقى كوم..
واللقطة الرابعة دي كوم تاني لو حدها.
وهي دي اللي أنا كاتب الفصل ده علشانها..
لأنها أنضج مرحلة من مراحل العلاقات..
وآخر سلمة في سلم النمو النفسي..
وأعلى درجة من درجات الصحة العلاقاتية.

اللقطة اللي بيصبح فيها الوجود الداخلي للآخر (الي أنا في علاقة
معاه) ثابت وقوي ومتجذر، للدرجة اللي تخليني متونس بيه وهو مش
موجود.. ومتظمن بيه حتى في غيابه.. وعاش مع حضوره النفسي
الداخلي كأني عايش مع حضوره الجسدي الخارجي.. واسمها العلمي
Object Constancy (الثبات الداخلي للآخر).

طيب وإيه اللي يخلي حد وجوده جوايا ثابت وقوي ومتجذر للدر...
دي؟

أقول لك..

فاكر السبع حاجات اللي موجودين في (العلاقة الحقيقية)، اللي
وصفتها في كتاب (علاقات خطيرة)؟
هم دول اللي يعملوا كده.

إن الطرف الثاني يجيد سماعك والإصغاء إليك.. إنه يقبلك ويعجبك
ويحترمك دون شروط.. إنه مايحكمش عليك.. إنه يقدر يحط نفسه
مكانك.. إنه يكون صادق ومخلص ومايمثلش عليك.. إنه يهتم بك
في غيابك عنه.. وإن العلاقة بينكم ماتكونش مقفولة عليكم وبس.

السبع حاجات دول لو موجودين في علاقتك بحد لفترة كافية،
هيزرعوه جواك زرعاً.. ويقوموا بريّ وجوده داخلك بشكل يومي لا
ينضب.

طيب.. وإيه فائدة وجود حد جوايا بهذا الشكل الثابت المتجذر؟
يعني أنا كـ(فلان) استفدت إيه؟

في الحقيقة.. إنت استفدت كتير قوي..

علشان الثبات الداخلي للآخر ماهوش علاقة بالآخر ده بس..
يعني النسخة الداخلية من صديقك.. مش وظيفتها تخفف عنك غياب
هذا الصديق فقط.. لا.. هي وظيفتها تخفف عنك غياب أي حد
وتهون عليك أي بُعد.. وتربت على قلبك وقت أي أزمة.

الآخر الموجود داخلك بشكل طيب وقوي وثابت، هو بمثابة
مرهم مُلطف يوضع على قلبك من الداخل.. وكبسولة نفسية ممتدة
المفعول، تنطلق في شرايينك كلما احتجت إليها.

يعني لما يعدي عليك وقت صعب.. وجود آخر طيب داخلك، ممكن يكون صعوبته.

لما تكون متوتر ومشدود وأعصابك بتتحرق.. وجود آخر حقيقي براك، ممكن يطفى نارها.

لما الدنيا تضيق بيبك وتبدأ بالتهاوي.. جذور الآخر في قلبك، تسندك وأحميك وتشد من أزرعك.

وجود حد جواك بالشكل ده.. ممكن يساعدك في تجاوز مشكلة مع حد تاني.

شوف (شيرين) وهي بتقول:

بكلمة منك..

لاقيت كل اللي مش لاقياه..

ولو فيه حد زعلني.. أنا مسامحاه..

ولو فيه جرح.. أنا هانساه.

هي دي الفكرة في العلاقة الشافية اللي دايمًا أتكلم عنها: وجود آخر طيب داخلك.. يغير لون العالم في عينيك.

وهو ده السر في كل العلاقات الطيبة المغيرة: جذور الآخرين الطيبة المعتدة في القلوب.

علمونا في العلاج النفسي.. إن مريضك مش هيفخف.. غير لما تبقى موجود جواه.. ويبقى موجود جواك.

ده بالضبط اللي حصل - والي ما زال حاصل - في علاقتي بد(علاء).

(علاء) هو أعز أصدقاء عمري.. وأعلى رفقاء حياتي.. باشوفه دلوا
تقريباً في السنة مرة.. لكنني باشوفه جوايا كل لحظة.
باسلم عليه سلام هادئ رصين مليون سكينه.. لأنه عايش
في بيتي النفسي.

باتصل بيه في الشهر مرة أو مرتين.. علشان احنا بنتواصل يومياً
أثير الوعي والروح.

دي مش حكايتي مع (علاء) بس.. دي حكايتي مع ناس كثير.. أمي
وأمي وإخواني.. زوجتي وأولادي.. أساتذتي وتلاميذي.. أصحاب
وأصدقاء.. مرضى ومتعافين.. أحياء وأموات.

وهي حكايتك إنت كمان مع كل اللي بتحبهم وعايشين جوار
أهلك وأصحابك وأحبابك.. وكل الناس والكائنات والأشياء
الموجودة جوانا بشكل ثابت ومستقر.. وجود جميل وهادئ ولطيف
يهون علينا البعد.. يخفف عننا الوحدة.. يؤنسنا وقت الوحشة
ويمسح دموع قلوبنا عند الفراق.

والله لولا نعمة الثبات الداخلي للآخرين جوانا.. ما كناش استعجابنا
موت حد.. ولا كملنا بعد فراق حد.

إحساسنا بوجود آخر داخلنا، واطمئناننا به.. دون أن نراه..
بيساعدنا نصدق في وجود ربنا.. ونطمئن به.. دون أن نراه..
وطوبى لمن آمن.. ولم ير.

شُفت قد إيه علاقتنا الأولى بالأم، بتساهم في تشكيل علاقتنا
التالية بالآخرين؟

شُفت قد إيه العلاقة دي بتفرق حتى في علاقتنا بربنا؟
شُفت؟ عرفت؟ عرفت فالزم..

آه لو يعلم الآباء والأمهات..
آه لو يعلمون.

مَرَايا الروح

الساعة تجاوزت الثانية عشرة ظهر يوم يبدو استثنائياً منذ بدايته.. الشمس ما زالت تتوسط سماء مدينة بارما الإيطالية، كأنها لا تنوي المغادرة.. بل إنها نجحت في تسريب بعض من أشعتها الذهبية عبر السحب المتكاثفة أمامها، لتخرق في هدوء وثقة نافذة معمل جامعة بارما) العتيقة.. وتستقر على زجاج العدسة اليسرى لنظارة ذلك الرجل الوسيم رمادي الشعر.. المكتوب على جيب قميصه بخيوط رفاء اللون (ج. ريتزولاتي).

أوجه الرجل نحو النافذة ليسدل ستائرهما كما يفعل كل يوم.. للمرة الأولى منذ سنين- قرر أن يترك أشعة الشمس تنساب المكان.. ربما تحمل جديداً.. يأتي على غير موعد.

مام (ريتزولاتي) وزملاؤه بتثبيت المجسات الكهربائية على رأس الفرد (م)، وجلسوا يراقبون نشاط مخه وهو يلتقط حبة الموز، من على المنضدة المثبتة في أحد أركان الحجره.. ثم يعيدها مكانها مرة أخرى.

وبعد عدة ساعات متواصلة من الملاحظة والتسجيل.. ظهرت إشارات التعب والإجهاد على فريق الباحثين، وقرروا إنهاء تجارب اليوم، الذي كان مجهداً بالفعل.

خرج الجميع من الغرفة واحدًا تلو الآخر.. قبل أن يرمق (ريتزولا) المكان بنظرة خاطفة، وهو يوصد الباب خلفه.. لكنه.. تردد قليلاً أن ينزع مفتاحه من ثقب الباب.. يبدو أنه تذكر شيئاً.. نعم.. المجسم الكهربائي ما زالت مثبتة في رأس القرد.. وحة الموز ما زالت على المنضدة يا لضعف التركيز وهشاشة الذاكرة.

عاد الرجل أدراجه للدخول، ومد يده ليأخذ حبة الموز من أمام القرد.. لكنه تسمر مكانه فجأة.. واتسعت حدقاته في ذهول.. لقد رأى بعينه ما لم يكن يتوقع رؤيته أبداً.

إنه اكتشف للتو اكتشافاً سيغير تاريخ العلم.. إلى الأبد.

* * *

من المعروف علمياً أن (المنطقة رقم ٤) في القشرة المخية، هي المسؤولة عن تنبيه الأعصاب لتقوم بدورها بتحفيز العضلات.. ومن ثم الحركة. بمعنى أنك لو أردت أن تقلب صفحة هذا الكتاب الآن، فستقوم (المنطقة ٤) ببدء مجموعة من النبضات العصبية المتلاحقة، تصل من مخك إلى أعصاب ذراعك ويدك، لتؤدي أخيراً إلى تحريك إصبعيك السبابة والإبهام، وضمهما على ورقة كتابك في الاتجاه من اليسار إلى اليمين.

لكن ما اكتشفه (ريتزولا) في هذا اليوم كان شيئاً مختلفاً تماماً. فبعد أن مد يده ليرفع حبة الموز من أمام القرد.. فوجئ بأن المجسم المثبتة على رأس (م) تلتقط نبضات عصبية من (المنطقة ٤) داخل مخه رغم أن القرد لم يفعل شيئاً.. لم يتحرك مطلقاً.. فقط كان يراقب ما يفعله الرجل.

فرك (ريتزولا) عينيه في دهشة بالغة.. كأنه يُفقق نفسه من حلم غريب.. وكرر ما فعله مرة أخرى.. لتزداد دهشته بأن يحصل على النتيجة نفسها: Monkey see, Monkey do.. أو «حينما يرى القرد حركة من شخص ما، يتعامل معها نحوه كأنه هو صاحب الحركة».

ماذا يحدث ذلك؟ كيف يحدث ذلك؟ ما تفسيره؟ هل يحدث في مخ الإنسان أيضًا؟

عشرات.. بل مئات الأسئلة تفجرت في عقل صاحبنا.. الذي هو ومئات الباحثين الآخرين في نهايات القرن العشرين، سلسلة من التجارب العلمية في جميع أنحاء العالم.. انتهت إلى وجود ما يعرف (بالخلايا العصبية المرآتية) Mirror Neurons.. وهي مجموعة من الخلايا المخية الدقيقة جدًا تستطيع أن تراقب مخ الشخص الذي انبعاثها، وتقلد نبضاته وإشارات وتقلها إلى مخ صاحبها كما هي.. تمامًا كما يفعل المرآة..

يحرك الشخص (أ) قدمه مثلاً.. تنبض (المنطقة ٤) بمخه بإشارات عصبية معينة.. تلتقطها الخلايا المرآتية في الشخص (ب).. لتنبض المنطقة ٤ بمخه هو الآخر أيضًا.. رغم أنه لم يحرك ساكنًا.

ما معنى ذلك؟

وما علاقته بك؟

هل أنت مستعد للإجابة؟

* * *

عارف حضرتك لما تتأوب (تشاءب) في وسط ناس بيحصل إيه؟
بلاقيهم كلهم أو على الأقل معظمهم بيتأوب زيك! سألت نفسك
هل كده ليه ده بيحصل؟

طوب عارف لما تبقى مع مجموعة من أصحابك ويكون معاكم
واحد مكتتب وحزين شويتين، تلاقي اثنين تلاتة من المجموعة بدأوا
يربوا، ويتضايقوا، ويكتبوا زيه.. ويروحو بيوتهم شايلين الهم.. من
أي سبب!

بلاش كده.. لما تكون راكب عربية جنب حد.. ويظهر فجأة على
الحد واحد متهور قرر يعدي الشارع.. فالسواق يدوس فرامل بسرعة..
واللهي رجلك انت اليمين بحركة تلقائية تدوس فرامل هي كمان.. رغم
أنها فيش تحتك فرامل ولا حاجة.. ولا انت اللي سايق أصلاً!

خذ المفاجأة بقي..

سُفّت الطفل الرضيع لما يعيط فأمه تقول ده جعان، يعيط لما
بعدها بشوية تقول ده عنده مغص.. يعيط ثالث تقول لك ده عا
ينام.. طيب هي عرفت منين؟ رغم إنه نفس العياط.. ونفس الطفل
إيه ده؟ هو فيه إيه؟ وازاي ماسألتش نفسي الأسئلة دي قبل كده؟

* * *

(ريتزولاتي) وفريقه قدروا يلاقوا باكتشافهم العظيم إجابة لكل
الأسئلة دي، وأكثر منها بكثير.. هم اكتشفوا ببساطة إن بعض خلايا
مخ حضرتك بتعكس بالظبط اللي بتشوفه في مخ الشخص اللي قدامك
وهو بيتحرك أو بيتكلم أو يفرح أو بيحزن.. كأنك انت اللي بتعمل
شخصياً.. والحكاية دي مش موجودة في البني آدمين بس، دي كلها
موجودة في كثير من الحيوانات.

طيب وإيه يعني؟

لا.. ده يعني كثير قوي.

على مستوى بعض الحيوانات مثلاً.. لما نمر مفترس يبدأ يتحرك
ناحية غزال مسالم.. خلايا الحركة في مخ الغزال ده هتقرا اللي حاصل
في مخ النمر، كأن الغزال نفسه هو صاحب الحركة.. فتقدر تتوقع
الحركة الجاية من النمر هتكون إيه.. وتتفادها، وتهرب، أو تدافع عن
نفسها.. ويسموا ده (التنبؤ بالحركة).. اللي هو مهم جداً في التعامل مع
الخطر.. واستمرار الحياة.

لما ابنك اللي عنده كام شهر يتابع حركة شفائيك ولسانك في أثناء
الكلام، تبدأ خلايا مخه (المرآتية) تقرا خلايا مخك، وتبتع إشارات
لفمه وشفائيفه ولسانه زيك بالظبط.. فيتعلم النطق.. وإخراج
الحروف.. والكلام.. ويسموا ده (التقليد).. اللي ليه دور كبير جداً في
تطور اللغة، والتعلم.

اللعدي قصاد صاحبك وهي متألمة، وحزينة.. وتبصي في وشها..
الجزن والألم جوا مخك هتفاعل مع اللي انتي شايفاه كأنه تبعك،
فتبدي تتألبي زيها، وتحزني معاها.. كأنك انتي الموجهة..
اللي انتي المجروحة.. ويسموا ده (المواجدة) أو (التعاطف).. اللي
علاقة طيبة.

العلفل - اللي لسه مش بيتكلم - يعيط من الجوع، خلايا الجوع اللي
الده تحس بيه كأنها هي، فتعرف إنه بيعيط علشان جعان، لما
من المغص تلقطه خلايا المغص عندها.. لما يكون زهقان، تتفاعل
الزهاق بتاعتها.. ويسموا ده (التناغم).. اللي هو أصل كل
بين اتنين.

بمعنى الخلايا المرآتية هي اللي بتخلينا نحس ببعض، ونقلد بعض،
بالخطوة الجاية من بعض، وتناغم ونسجم مع بعض.

هي اللي بتخلينا نحط نفسنا مكان بعض.. هي اللي بتقرب لنا
الاسافات من بعض.. هي اللي بتساعدنا نفهم بعض، ونشوف جوه
بعض.. ونعذر بعض.

هي اللي بتخلينا نتواصل مع بعض من دون كلام، ونعرف اللي
بعض بمجرد ما نتقابل. هي همس القلوب.. ولغة العيون.. ومرايا
الأرواح.

الخلايا المرآتية هي اللي بتخليني باكتب لك كأني قاعد معاك..
وحسك إني دخلت جوه مخك، وقرت اللي في نفسك، وكلمتك بلغة
روحك.

هي اللي بتقدم تفسير علمي ومنطقي لعلاقة (التقمص الإسقاطي
كتاب علاقات خطرة)، و(مشاعرك اللي هي مش مشاعرك- كتاب
الخروج عن النص).. اللي يُسقط فيها حد مشاعره أو أفكاره أو
سلوكه عليك، (يقول لك مالك زهقان ليه؟ متضايق من إيه؟ شوية
انت مكشرازي؟)، وانت ما عندكش أي حاجة من دول، وبعدين
تصدقه، وتبدأ تحس بالحاجات دي فعلاً، وتزهق أو تتضايق أو تغضب
أو حتى تخون.. وتتحول بعد شوية لبنني آدم ثاني خالص.

الموضوع ما طلعش كلام أو تشبيهات أو أوصاف نفسية بس...
حضرتك بيحصل لك تغير بيولوجي حقيقي في المخ نفسه.

إذا كان اكتشاف (الدي إن إيه DNA) هو أهم اكتشافات العلم
على مستوى الأفراد.. فالخلايا المرآتية هي أهم اكتشافات العلم على
مستوى العلاقات.

* * *

طبعاً.. هيكون منطقي جداً.. إن كل ما يقل عدد الخلايا المرآتية
في مخك، كل ما إحساسك بالناس يكون أقل، وعلاقتك بيهم تكون
أضيق.. كأنك عايش لو حدك.. علشان كده مرضى (التوحد) عندهم
أقل عدد من الخلايا دي.

وكل ما زاد عدد الخلايا المرآتية في مخك، كل ما إحساسك بالناس
يكون أكبر، وعلاقتك بيهم تكون أقوى.. علشان كده الناس اللي بيطلق
عليهم (المتعاطفين) Empath، عندهم أكبر عدد من الخلايا دي
بس للأسف ده بيخليهم عرضة لكثير من الصدمات، والمشكلات
والخداع، والألعاب النفسية في علاقاتهم.

أوه..

لأنك بتحط نفسك مكان الشخص اللي بتعامل معاه (بزيادة)..
بتفرح معاه (بزيادة).. ويصعب عليك (بزيادة)..
بتديله حته منك (بزيادة).. بتروح لغاية عنده (بزيادة).
بتحس بيه أكثر ما بيحس بيك..
بتفهمه أكثر ما يفهمك..
بتتالم ليه أكثر..
وبتتالم منه أكثر.

أنا عارف السؤال اللي في ذهنك دلوقت: طيب وده حله إيه إن شاء
الله؟ أعمل إيه علشان مايحصلش فيا كده؟ هو ده كويس واللا وحش
أسلام؟
أقول لك..

ده كويس أحياناً.. ووحش أحياناً أخرى.. كويس لما تستخدمه في
صالحك.. ووحش لما حد يستخدمه ضدك.. يعني سلاح ذو حدين.

ما تتضايقش من إن حساسيتك النفسية زيادة شوية.. وان ده جزء
من تركيبك وتكوينك العقلي.. علشان ده زي ما هو بيوجع وبيخليك
أكثر تأثراً بالصددمات النفسية من الناس.. هو كمان بيخليك تحس
أكثر بالجمال اللي في الناس.. وتفرح أكثر بالخير اللي في قلوب الناس..
وللفظ أكثر الطيبة في نفوس الناس.

بس مهم تقرا وتدرس وتتعلم كويس قوي عن (الألعاب النفسية)
اللي ممكن تحصل في العلاقات دون وعي منك، (ومن اللي بيعملها
أحياناً)، فتخلي بالك، ومتبقاش جزء منها.. وما تسمحش لحد يلعبها
معاك.. علشان ده أكثر فسخ يقع فيه الأشخاص ذوو الحساسية المفرطة،
اللي عندهم (خلايا مرآتية) كثير.. وعلشان كده برضه أنا عامل باب
قاسم في الكتاب ده عن (الألعاب النفسية).. بيشرحهم واحدة
واحدة.. وبالتفصيل.

مهم كمان ..
تقرأ حكاية (سالي) و(آن)..
ماتعرفش مين (سالي) ومين (آن)؟
دول اتنين أصحابي ماتعرفهمش..
تعال نقابلهم في الفصل الجاي..

حكاية (سالي) و(آن)

في حكاية شهيرة في العلم الحديث اسمها حكاية سالي وآن..
الحكاية دي بتقول إن (سالي) كان عندها سلة، و(آن) عندها صندوق..
(سالي) حطت الكورة بتاعتها في السلة ومشيت.. قامت (آن) واخدة
الكورة من سلة (سالي) وحطتها في الصندوق بتاعها..
الفكر وا (سالي) لما ترجع هتدور على الكورة فين؟

طبعا الإجابة المنطقية والصحيحة هي إن (سالي) هتدور على الكورة
لأن ما سابقتها.. يعني في السلة.. رغم إنها مش في السلة.. ورغم إن
سابتها (آن) عارفة ومتأكدة إن الكورة مش في السلة.. ورغم إن
ظهرتلك شخصياً كمان متأكد من كده.

الكلام ده فايدته إيه ومعناه إيه؟

بالنسبة لفايدته.. فده اختبار بسيط لكمية ووظيفة (الخلايا المرآتية)
اللي في مخك..

يعني لو حضرتك قلت إن (سالي) هتدور على الكورة في السلة، بيتر
انت قدرت تحط نفسك مكانها، وتفكر زي ما هي هتفكر بالطبط، بناء على
المعلومات والمعطيات اللي عندها مش اللي عندك انت.. وده يقول إن
شاء الله خلايا مخك المرآتية موجودة بشكل جيد وشغالة تمام وزى الفل

أما لو حضرتك قلت إن (سالي) هتدور على الكورة في الصندوق
فيبقى حضرتك ماقدرتش تخرج بره مخك، ومقدرتش تحط نفسك
مكانها، وفكرت زي ما انت شايف، مش زي ما هي شايفة، بناء على
المعلومات والمعطيات اللي عندك انت، مش اللي عندها هي.. وده يقول
إن خلايا مخك المرآتية مش موجودة كتير، أو مش شغالة كويس.

أما بالنسبة لمعناه.. فده موضوع تاني خالص.. وربما يحمل للمعنى
بعض المفاجآت.

معناه بكل بساطة.. إن مش لازم اللي حضرتك تكون شايف ومنا
إنه صح مية في المية، يكون من وجهة نظر حد تاني صح بنفس الدرجة
لأن المعلومات والمعطيات اللي عند حضرتك ممكن تكون مختلفة تماماً
عن المعلومات والمعطيات اللي عند غيرك.

معناه إنه مش لازم اللي انت عارفه ومصدقه يكون هو
اللي لازم يتعرف ويتصدق.. وإنه مش شرط اللي حضرتك تكون
مقتنع بيه ومتأكد منه، يكون هو نفسه اللي لازم كل الناس تقتنع
وتتأكد منه.

معناه إنه ماينفعش تكون لو حدك انت اللي صح.. وغيرك
غلط.. مهما كان عندك حجج وبراهين.

معناه إن غيرك من حقه يفكر.. ويجهد.. ويوصل.. بطريقته المناسبة
ليه.. ومن خلال السكة اللي هو شايفها أفضل.. من غير ما يؤذيك أو
الإذيه طبعًا.

معناه إننا محتاجين نتعامل بالراحة شوية مع نفسنا..
وبالراحة شويتين مع بعض..

بلاش نصادر على رأي غيرنا.
بلاش نحتقر المختلف معانا في الرأي، أو الفكر، أو المعتقد، أو اللبس،
أو أي حاجة.

حكاية سالي وأن جزء من نظرية علمية حديثة مهمة جدًا.. اسمها
Theory of Mind.. وهي إحدى الحاجات الفارقة اللي فسرنا اكتشاف
(اللايا المرآتية).. الاكتشاف اللي غير مسار العلم بشكل غير مسبوق..
وغير في فهمنا لنفسنا ولغيرنا ولعلاقتنا ببعض.

اسأل نفسك بقى..

قد إيه تقدر تحط نفسك مكان غيرك؟
قد إيه تقدر تفهم طريقة تفكيره، اللي مبنية على عوامل كتير قوي،
مختلفة تمامًا عنك؟

قد إيه تقدر تروح لغاية عنده، وترجع عندك تاني؟

زي ما انت شايف إن غيرك غلط.. هو برضه شايف إنك غلط.
وزي ما انت متأكد إنك صح.. هو برضه متأكد إنه صح.

المتاح ليه غير متاح لك.. اللي يعرفه غير اللي تعرفه.. اللي اترى عليه غير اللي اترى عليه.. مستوى ذكائه غير مستوى ذكائك.. مرونة تفكيره غير مرونة تفكيرك.. عقله غير عقلك.. جيناته غير جيناتك.. ظروفه غير ظروفك.. اهتماماته واحتياجاته وقدراته.. مئات بل آلاف المتغيرات والمحددات.

اللي يستوعب ده.. هيقدر يفهم.. ويعذر.. ويسامح.
هيقدر يحبط نفسه مكان غيره.
هيطل يحكم على الناس أحكام سريعة وقاسية.
هيقبل الاختلاف.. ويستحمل التناقض.

هيكبر عقلياً..
وينمو نفسياً..
وينضج إنسانياً.

هو ده الدين الحقيقي..
وهو ده السعي الحقيقي..
وهو ده.. الحب الحقيقي..
بجد.

القيامه النفسية

(ي ما كل واحد فينا ليه عيون (خارجية).. بيشوف بيها العالم والناس.. ويراقب بيها الحياة والأحداث.. ويسجل من خلالها المواقف والذكريات.. برضه كل واحد فينا جواه عيون (داخلية).

العين الداخلية بتبص على صاحبها من جوه.. بتشوف نواياها ودهو اخله.. بتراقب تصرفاته وأفعاله.. وتسجل علاقته بنفسه وعلاقته بالآخرين، سواء أعلن عنها أو لم يعلن.. تصرف على أساسها أو لم تصرف.. تحكم فيها أو اتحكمت فيه.

العين دي بتفضل تراقب وتتابع من غير ما تنطق ولا كلمة.. صمت وعلق.. هدوء تام.. سنين وسنين.. قد تطول وقد تقصر.. عمالة تشوف وتسجل وتخزن.. على قرص إلكتروني حيوي شاسع المساحة.. موقف من هنا.. تصرف من هناك.. خير من هنا.. شر من هناك.. حب على كره.. حقد على حسد.. معروف على منكر.. وفاء على نذالة.. أمانة على خيانة.. وغيرهم وغيرهم.

وبعد ما تعدي السنين.. ويقطع الواحد من رحلة عمره شوي
أشواط.. يقرر عقلنا إنه يقف معنا وقفة.. وقفة مفاجئة دون أي
سابق إنذار.. يفتح فيها الدفاتر القديمة.. ويفرغ فيها محتويات عيوننا
الداخلية بمنتهى الدقة.. يراجع المواقف.. يحسب الحسابات.. و
تقوم (القيامة).. مش قصدي طبعًا بالقيامة (اليوم الآخر) اللي رها
هيحاسبنا فيه.. لكن قصدي تقوم (القيامة النفسية).. اللي هيحاسبنا
فيها عقلنا ونفسنا وجسمنا.. وياخدوا فيها أحكام صارمة وقاسية
جدًا.. إما بمكافأة ذاتية لا تقدر بثمان.. وإما بتدمير ذاتي باهظ الثمن.

هاقول لك حاجة غريبة جدًا.

ساعات اللي فينا بيكون عامل عملة.. أو مرتكب خطأ معين
بيخلق (بشكل غير واعى) كل الملابس.. ويبدأ (بترتيب من عقله
الباطن) كل الظروف.. عشان يتكشف.. ويتفصح أمره.

معقول؟

آه معقول.

يعني بدل ما يوقف غلطاته.. ويرجع فيها.. لا.. ده يكررها هي
هي مرة واثنين وتلاتة.. وكل مرة تكون أخطر من اللي قبلها.. وأسهل
اكتشافًا من اللي قبلها.. كأنه بيقول: اكشفوني.. أنا أهو.. وبدل ما يسأل
نفسه ويداري عليها.. بيسعى بشكل دؤوب ومستمر إنه يفضحها
كأن عقله الباطن قرر في لحظة ما، إنه يعاقبه.. ويجلده.. ويحاسبه على
الفواتير القديمة.

حاجة تانية ..

بعض الناس يبيجوا عند نقطة معينة في حياتهم .. وجسمهم يقرر
يقع ويتهد وينهار .. جلطة مفاجئة في المخ دون أي سبب مفهوم ..
سقط في يوم وليلة من غير أي مقدمات .. سكر غير متوقع ولا متظر ..
والأصعب والأشد هو ما يسمى بأمراض (المناعة الذاتية) .. اللي بيتحول
فيها جهاز المناعة من صديق إلى عدو .. وبدل ما يحارب للخارج ويدافع
عن الجسم .. يحارب للداخل ويهاجم الجسم .. وتنتج مجموعة هائلة
من الأمراض ، لغاية النهارده الطب مش عارف لها سبب ولا عارف
لها علاج .. وطبعاً كل ده كوم .. والسرطان كوم تاني .. اللي برضه لغاية
النهارده الطب مش عارف له سبب ومش عارف له علاج .. وكأن
الجسم بيقرر - أحياناً - إنه يعاقب صاحبه .. ويوجعه .. وكان الجسد
استدار على ساكنه .

حاجة تالته ..

كثير من المرضى النفسيين بيكون جزء كبير من مرضهم عبارة عن
إحساس عميق بالذنب .. الاكتئاب أحد أهم أعراضه هو الشعور
بالذنب .. الهوس (عكس الاكتئاب) بيُفسر على إنه طريقة نفسية ذكية
للهرب من الإحساس بالذنب .. الفصام في أعتى صوره (الكتاتونيا)
بيكون وراه كتلة ضخمة من الإحساس بالذنب .. الإحساس بالذنب
هو إحدى القوى الكونية الهائلة القادرة على تفتيت النفس وتفسيح
أواصرها .

كل ده بشكل غير واعى .. ويتدبير خفى .. وتخطيط محكم .

إحنا زي ما عقلنا بيشتغل لصالحنا .. ممكن ساعات يشتغل ضدنا .
وزي ما جسمنا يبساعدنا ويسندنا .. ممكن أحياناً يقاومنا ويحاربنا .
وزي ما فيه قيامة وحساب إلهي في الآخرة .. ساعات بيكون فيه
لهامة وحساب نفسي في الدنيا .

هل دي قاعدة؟ هل ده يسري على كل الناس؟ هل ده يمنع حساب
ربنا وعقابه لينا سواء في الدنيا أو في الآخرة؟
طبعاً لأ.

فيه حاجة اسمها ابتلاء.. وفيه حاجة اسمها مصائب.. وكثير من
الأمراض العضوية والنفسية بتحصل لأي حد.. حتى للأطفال.

لكن كل ده عبارة عن مجموعة من الملاحظات والتفسيرات (ل
بعض الناس).. سهاها صديقي الطبيب النفسي العبقرى د. محمد أيمن
(نظرية العقاب الذاتي)، وأنا باسميها (القيامه النفسية).

اللي كانت رحلته مع نفسه فيها تركية.. ومع الآخرين فيها احترام
وتراحم.. هتفتح من جواه أبواب (الجنة النفسية الداخلية)..
اللي مليانة سكينه ونور ورضا عن نفسه وعن حياته، مهما كان فيها
مصاعب.. واللي كانت رحلته مع نفسه فيها تشويه.. ومع الآخرين
فيها ضرر وأذى.. هيشور عليه عقله، ويوقعه في شر أعماله، بتدبير
محكم من أعماق أعماقه.. وهيتمرد عليه جسمه ويعاند فيه بكل إصرار
وترصد.. وهتفتح عليه نفسه أبواب (الجحيم النفسي الداخلي).

فيه جوانا جزء مُراقب.. ساعات بيكون مُكافئ.. وساعات بيكون
مُعاقب.
الجزء ده جاهز.. ومستعد للعمل في أي وقت.. من دون ساهل
إنذار.

مش عارف إيه ممكن يمنعه أو يوقفه.
مش عارف إيه علاقته بالضمير والأنا الأعلى.
مش عارف هو خير واللا شر.. ملاك واللا شيطان.

لكن اللي عارفه كويس ..
إن الجزء ده موجود ..
ومستني .. ومتربص ..
جوه عقلك .. وداخل جسمك .. وفي أعماق نفسك .

وإنه يمكن تكون إحدى وسائل الحماية منه ..
إنك تحب نفسك ..
وتحترم غيرك ..
وتراعي ربنا .

ساعتها ..
تقدر بجد .. تتقي شر نفسك ..
وتملك زمام جسمك ..
وتأمن مكر عقلك .

وخلي بالك ..
ده جزء واحد .. من أجزاء كثيرة جدًا موجودة جواك ..
هاعرفك عليهم بالتفصيل .. خلال دقائق .

والآن من فضلك ..
أرجع مقعدك للخلف ..
واربط حزام الأمان .

واحد صحيح

- ١ -

أرجعت مقعدك للخلف؟
ربطت حزام الأمان؟
طيب..

إنت ليك كام شخصية؟
فيه منك كام صورة؟
عندك كام نسخة؟

كام مرة بتكون في مكان ما بشخصية.. وفي مكان تاني بشخصية
مختلفة تمامًا.. بتكون مع ناس معينين بصورة.. ومع ناس تانيين بصورة
غيرها خالص.. في موقف ما، بتطلع نسخة منك.. وفي موقف آخر،
تطلع منك نسخة قد تكون عكسها في كل شيء.

بلاش انت.. مين من الناس اللي تعرفهم بتحس إنه عايش بكدا
وش.. بيتلون بأكثر من لون.. بيغير جلده كل شوية.

في أحد مشاهد فيلم Split، يجلس بطل الفيلم (دينيس) أمام
معالجته النفسية المخزومة، في لحظة صدق وبصيرة نادرة.. ويقرر إنه
يفتح لها بير أسراره، ويقول لها:

- دينيس: أريد أن أحدثك عن (كيفين)، وماذا فعلت به أمه..
أنا أنذكر كل ذلك.

- المعالجة: أنا سعيدة لأنك أصبحت منفتحًا فجأة.

- دينيس: كانت أمه تمتلك العديد من الطرق المؤذية في العقاب منذ
أن كانت سنه ثلاث سنوات.

- المعالجة: هل كان هذا وقت أول ظهور لك؟

- دينيس: نعم، الطريقة الوحيدة لتجنب عقابها كانت جعل كل
شيء مثاليًا.

في الحقيقة (دينيس) كان هو (كيفين).. اللي نتيجة معاملة أمه
الغاسية، قرر -بشكل غير واعى- إنه يصنع لنفسه شخصية جديدة..
لنصف بالجمود، والدقة، والمثالية الشديدة.. علشان يحمي نفسه من
أذاها.

(كيفين) ما تحولش لشخصية جديدة.. كيفين (صنع) شخصية
جديدة غيره.. بتظهر أحيانًا، وتختفي أحيانًا أخرى.. بتتوجد في
مواقف.. وماتوجدش في مواقف غيرها.. هو أصبح مصابًا بما نسميه
(اضطراب الشخصية المتعددة).. أو بلغة أبسط (انقسام الشخصية).

كيفين بقى فيه منه نسختين: (كيفين) الطفل المأذى المجروح.. و(دينيس)
الشخص الجامد المثالي.

وعلشان الجرح كان عميق.. والأذى كان كبير.. هو ماكانش عنده شخصيتين بس.. (كيفين) كان عنده أربعة وعشرين شخصية غير بعض.. كل واحدة منهم بتطلع في وقت من الأوقات، علشان تدافع عن (كيفين) الصغير الجريح.. كان فيه منهم (هيدويك)، الشاب المراهق المتهور.. كان فيه منهم (باتريشا)، السيدة الحازمة الصارمة. وكان فيه (الرجل الوحش)، اللي ظهر في نهاية الأحداث، علشان يتنقم من الجميع بأبشع الطرق.

- ٣ -

مرض (اضطراب الشخصية المتعددة) Multiple Personality Disorder من الأمراض النفسية الغريبة والمثيرة للاهتمام.. واللي تناولتها كثير من الأعمال الأدبية والفنية.. من أول (دكتور جيكل ومستر هايد)، لغاية (Fight Club، Split، Black Swan، و Hide and Seek، مرورًا طبعًا بـ (بئر الحرمان).

هنا المريض بيكون عنده أكثر من شخصية، في العادة شخصيتين واحدة منهم بتكون غالبًا عكس الثانية بالظبط.. يعني شخصية خجولة، وشخصية جريئة.. شخصية ضعيفة، وشخصية قوية.. شخصية منظمة، وشخصية عبثية.. شخصية مؤدبة، وشخصية غير مؤدبة على الإطلاق.. وهكذا.

مش بس كده..

ده ممكن كل شخصية فيهم يكون ليها سن غير الثانية.. يعني المريض وهو في الشخصية الأولى يتكلم بلسان وصوت وحركة لفلان عنده ست سنين، وفي الشخصية الثانية يتكلم بلسان وصوت وحركة واحد عنده ثلاثين سنة.

ارضه مش بس كده..

ده بيحصل كتير إنه يكون فيه تغيرات بيولوجية (جسدية) بين الشخصيتين.. يعني شخصية فيهم يكون مقاس نظرها ستة على ستة، والشخصية الثانية مقاس نظرها ستة على ستة وتلاتين.. شخصية فيهم يكون عندها حساسية صدر.. والشخصية الثانية ماعندهاش.. شخصية فيهم يكون ضهرها عني أثناء المشي.. والشخصية الثانية ضهرها مفروء، وده يديها طول وعرض أكثر.. إحنا بتتكلم عن اتنين آدميين غير بعض.. عايشين في نفس الجسم.. وطبعاً ممكن شخصية فيهم تكون متجوزة ومخلقة.. والشخصية الثانية عزباء ومُضربة عن الزواج.

شخصيتين مايعرفوش أي حاجة عن بعض.. كل شخصية فيهم ليها حياة منفصلة.. ودواير مختلفة.. وأصدقاء وأماكن وحكايات وتاريخ غير الثانية.. علشان كده بيكون عند كل واحدة فيهم فترات زمنية منسية لأممًا، وأحداث تندesh لما حد يحكي لها عليها، كأنها ماكانتش موجودة.. لأنها بالفعل ماكانتش موجودة.. واللي كان موجود حد تاني.

ده مختلف تمامًا عن تركيبة (الطفل والراشد والوالد) الطبيعية، اللي موجودة داخل كل واحد فينا، واللي اتكلمت عنها بالتفصيل في كتاب علاقات خطرة.

المفاجأة بقى.. إنه زي ما فيه مرضى عندهم شخصيتين.. فيه مرضى عندهم ثلاث أو أربع أو خمس شخصيات.. لدرجة إن فيه حالة مشهورة لشخص اسمه (كاميرون ويست)، كان عنده أربعة وعشرين شخصية غير بعض.. منهم ولد صغير اسمه (كلاي) سنه تسع سنوات.. (كاميرون ويست) ومراته ظهروا في برنامج أوبرا وينفري سنة ١٩٩٩، وظهروا معاها تاني في ٢٠١٤.

اضطراب الشخصية المتعددة.. موجود في نسبة ١ إلى ٣ في المية من البشر، تبعاً لآخر بحث عمله (سبيجل) سنة ٢٠١١.
لكن..

في الحقيقة.. وبشكل ما.. كل واحد فينا جواه شوية شخصيات غير بعض.. أي نعم ماوصلتش لدرجة مرض واضطراب وانفصام.. أنت نفسك تقدر تشوف بوضوح إزاي بتكون مع فلان غير مع فلان في المكان ده غير في المكان ده.. وسط الناس دول غير وسط الناس دول.. في الموقف ده غير في الموقف ده.

بافتكر (شيرين) لما وصفت الحكاية دي بكل بساطة، وهي بتقول أنا كثير..

أنا أَلْف حاجة على بعضها..

في حاجة واحدة..

أنا واحدة عايشة لوحدها.. مش حاسة وحدة..

في ضحكي حزن غريب قوي.. وفي حزني ضحكة.

طيب هو إيه اللي ممكن يعمل فينا كده؟

إيه اللي ممكن يخلي حد مننا (كثير)؟

إيه اللي يضطرنى إني أعمل نسخ تانية غيري أواجه بيها العالم، وأتعامل بيها مع الناس؟

الكلام بيقترب منك شوية..

مش كده؟

طيب.. تعالى نشوف علم (السيكوباتولوجي) بيقول لنا إيه؟

* * *

فدام أي صدمة نفسية بتعرض لها، سيكون عندنا عدة فرص واحتمالات.

الاحتمال الأول.. إن مقاومتنا النفسية تقدر تتصدى لها، ومناعتنا الذاتية تقف قصادها، ونقدر نواجه الصدمة، ونتجاوزها.

الاحتمال الثاني.. هو إننا نفضل في حالة خناقة داخلية مستمرة مع الصدمة دي.. ندخل حرب نفسية شعواء، فيها أسلحة وهجوم ودفاع وكر وفر.. وده يظهر علينا في شكل أعراض وأمراض (عُصابية) زي الاكتئاب والتوتر والأمراض النفس-جسدية، وغيرها.

الاحتمال الثالث.. هو إننا نراجع (ننكص) عدة خطوات للخلف، ونفهم في تاريخ نمونا النفسي، لغاية ما نوصل لأكثر فترة كنا حاسين فيها بأمان وراحة استقرار، ونقف عندها.. وده ينتج عنه أعراض (ذهانية) زي الفصام والضلالات والكتاتونيا، وغيرها.

فيه بقى احتمال رابع عجيب جداً.. وهو إننا نحاصر الصدمة دي بـهوه عقلنا، ونحتجز الجزء المصدوم المجروح فينا، ونخفيه داخل أعماق مكان داخلنا.. علشان نحمي نفسنا من الألم وشدته. خليني أديك أمثلة..

واحد شاف حادثة على الطريق.. شاف مناظر الموت والدم والجثث، ما قدرش يستحمل، فعقله قرر -دون قصد منه- إنه ينسى كل اللي شافه، ويعتبر اللي حصل كأنه ما حصلش، ويركن هذه الخبرة على أحد أرفف نفسه، وتتعامل معها ذاكرته كأنها لم تحدث.. بنسمي ده (فقدان الذاكرة الانشقاقي) Dissociative Amnesia.. بمعنى إن جزء من عقله انشق عن باقي الأجزاء، وانفصل عنها، علشان يحمي صاحبه من الألم الشديد، والصدمة الموجهة، اللي ممكن تؤدي بيه إلى الاكتئاب أو الجنون أو حتى الانتحار.

فيه بقى شكل تاني من أشكال الانشقاق.. وهو إن الشخصية دي كلها، اللي شافت الحادث واتألمت فيه، تنفصل جزئياً عن وعي صاحبها وتنزوي في ركن ما داخله.. ويطلع (جنبها) شخصية تانية مختلفة، ليها اسم وتاريخ وذكريات أخرى، ليها صفات وخصائص جديدة، أموري وأجدد، وربما أقسى.. وده يبقى اسمه Dissociative Identity Disorder، أو اضطراب الهوية الانشقاقي.. اللي هو الاسم التاني لاضطراب تعدد الشخصية.

ده برضه بيحصل أحياناً مع بعض البنات اللي بتعرض للإساءة الجنسية أو الاغتصاب في سن صغيرة.. فيضطر وعيها إنه يتقسم نصفين.. نصف فيه شخصية الطفلة الصغيرة اللي استغلت أو اغتُصبت.. ونصف فيه شخصية تانية غيرها.. قد يكون هدف وجودها هو الانتقام من كل رجال العالم.. وتتبادل الشخصيتين الحياة بشكل لا تعلم عنه صاحبتة نفسها شيئاً.

طريقة صعبة جداً.. وذكية جداً.. بيستخدمها العقل للحفاظ على صاحبه من الانهيار النفسي التام، بإنه يفكك بعض أجزائه.

تمام كده؟

وضحت الصورة؟

تمام..

تعالى بقى، بعد ما شفنا إزاي صدمة نفسية ممكن تخلق داخل حد شخصية (أو شخصيات) مختلفة، يتقمص إحداها من حين لآخر بشكل مرضي وغير طبيعي.. تعالى نرجع مع بعض، عندك وعندي.. ونشوف (العيلة) اللي جوا كل واحد فينا.. أيوه.. العيلة اللي جوا كل واحد فينا.. أو ما يعرف حديثاً بـ(نظام العائلة الداخلية).

* * *

نظام العائلة الداخلية (Internal Family System)، هي نظرية
تشرحها عالم النفس الأمريكي (ريتشارد شوارتز) في أواخر القرن
الـ ٢٠، وقدم من خلالها طريقة جديدة لفهم النفس البشرية.. عند
الأصحاء وغير الأصحاء.
وهنا بقي هنبدأ أنا وانت نبص جوانا شوية..

كل بني آدم يتولد بتكوين نفسي فطري طبيعي.. سبيكة خام نقيه
من أي شوائب (عدا طبعا بعد الفروقات والاستعدادات الجينية..
التي بتسمى التكوين ده (الفطرة).. ناس تسميه (النفس الحقيقية)..
ناس تسميه (الطفل الحر).. وكلهم بيوصفوا نفس التركيبة الأساسية
الأصلية الموجودة فينا كلنا.

التركيبة دي لما تبدأ تحتك بالعالم.. وتواجه الحياة.. ممكن تتعرض
لبعض الصعوبات والصدمات النفسية.. اللي ممكن تجرحها.. أو
السبب في أذاها.. لكننا بنحاول نتعامل مع ده وتنصدي ليه بطرق
مختلفة.

بس اللي بيحصل في بعض الأحيان.. هو إن الجرح يكون عميق..
والألم يكون شديد.. بدرجة قد تفوق قدرتنا على الاحتمال والمقاومة..
ساعتها بيضطر عقلنا إنه يتدخل بطريقة مختلفة، علشان يحفظ التركيبة
دي من الانهيار.

عقلنا بيقرر إنه ينقذ الجزء المجروح جوانا، ويمنعه من التعرض
لمزيد من الخطر والألم، بإنه بيعده عن بؤرة الأحداث شوية.. ويعزله
في مكان آمن لوحده.. ويحيطه بمجموعة من الحراس الأشداء،
والمدافعين الشجعان.. اللي يقدروا يتولوا مهمة حمايته والذود عنه.

يسموا الجزء المجروح اللي بيتتم عزله Exile .. أو (الجزء المنفصل)
ويسيما مجموعة الحراس والمدافعين دول Mangers و Firefighters
أو (المديرين) و (الإطفائيين) .. اللي مهمتهم يكونوا Protectors
(حماة).

(المديرين) و (الإطفائيين) دول فيهم شوية شبة من الشخصيات
البديلة اللي بتطلع لما الشخصية الأصلية تكون في خطر .. بس دول
مش شخصيات بديلة .. دول أجزاء داخلية موجودة جوانا كلنا.

يعني الجزء الغاضب اللي بيطلع منك في بعض المواقف .. هو أحد
(الإطفائيين) اللي مهمتهم الحفاظ عليك من أي إساءة أو إهانة.

الجزء الخايف والقلقان .. هو أحد (المديرين) اللي بيتولوا قيادة
نفسك أحياناً، علشان يجنبوها أي سوء أو مكروه.

الجزء الدقيق المهتم بالتفاصيل .. هو برضه أحد (المديرين) اللي بيقدروا
شخصيتك تحت بعض الظروف، علشان يبعدوا عنك أي مفاجأة
محبوبة، أو عقاب غير مأمون.

مافيش حد فينا ما فيش جواه جزء مجروح ..
مافيش حد فينا ماتصدمش أو ماتخذلش أو ماتخانش ..
مافيش حد سليم وقويم ومعافى بنسبة مئة في المئة ..
كل واحد مننا وبشكل طبيعي - عنده (المديرين) بتوعه
و (الإطفائيين) خاصته .. والجزء (أو الأجزاء) الجريحة داخله.

أمال إمتي تحصل مشكلة؟

الحصل مشكلة لما أحد (المديرين) أو (الإطفائيين) دول يلعب دوره
في وقت غير مناسب.. أو لفترة أطول من اللازم.. أو بشكل مرضي
غير صحي.

يعني (الجزء الغاضب) منك يبقى هو المسيطر عليك.. والظاهر في
عظم تعاملاتك.. سواء عن حق أو عن غير حق.
أو إن (الجزء الخايف) يتولى قيادة أمورك بمفرده.. في الوقت
المناسب وغير المناسب.

(الجزء الدقيق المثالي) يتحول إلى جزء مهووس بالدقة، وموسوس
بالمثالية.. بشكل مُعيق ومُعطل.

(الجزء المُسكن) يستخدم المخدرات لتسكين الألم.

(الجزء اللطيف) يستخدم الإغواء للحصول على القبول.

(الجزء المسالم) يصبح مستسلم على طول الخط.

وهكذا..

نفقد نفسك السيطرة على أحد (أو بعض) أجزائها.. اللي بيقفز على
مقعدها الأمامي.. وينطلق بيها بكل سرعة.. نحو هاوية المرض النفسي.

طيب وبعدين؟ نعمل إيه؟

نتخلص ازاي من المديرين والإطفائيين دول علشان ماننجرش
لنحو هاوية المرض النفسي؟

تصور بقى إن إجابة السؤال ده.. هي السبب في إني كتبت الفصل
ده من أوله!

وإن كل الشرح والتفصيل والإحاطة اللي فاتوا.. كانوا بمثابة البوابة
اللي حبيت أدخل منها وأدخلك معايا.. للكلام اللي جاي.. واللي أنا
شايفه أهم حاجة.. وأول خطوة.. في سكة أي تغيير حقيقي.
خد نفسك شوية..

وياللا نكمل.

* * *

الخطأ الأول اللي بيرتكبه أي حد قصاد أي جزء مش عاجبه من نفسه.. هو إنه يرفض هذا الجزء.. ويقرر التخلص منه.. ويبدأ يتخاف (مع حته منه) خناقة صعبة جداً.. تستنزفه وتنهكه على كل المستويات. - آه ما احنا عارفين ده يا دكتور.. إنت قلت في كتاب علاقات خطيرة، إننا مهم نقبل الحزن والضعف والخوف.. وما نرفضهمش.. لأنهم مشاعر طبيعية موجودة عند كل البشر.

لا.. مش هو ده اللي أقصده.. أنا هنا مش باتكلم عن المشاعر والأجزاء (الطبيعية) اللي جوانا.. اللي طبعاً مهم نقبلها وما نرفضهاش.. أنا باتكلم عن الأجزاء (المریضة) اللي جوانا.

- إيه ده؟ يعني عاوزني أقبل الجزء المكتئب فيا؟ عاوزني أرفض بالجزء الجبان مني؟ عاوزني أستسلم للجزء العصبي أو الموسوس أو الاعتمادي أو المدمن؟

في الحقيقة - وبالضم المليون - آه.

نقبل كل حاجة، وأي حاجة، لو عاوزين نتغير بجد.. بس خلي بالك..

نقبل مش معناها نوافق.. ونقبل مش معناها نرضى.. ونقبل مش معناها نستسلم.

نقبل معناها نفهم: هو الجزء ده جه ليه.. وعاوز إيه.

نقبل معناها نشوف: هو الجزء ده ظهر إمتى.. وظهر ازاي.

نقبل معناها نعرف: إيه وظيفته.. وليه قرر يؤديها بالشكل ده.

نقبل يعني تقرب.. ونتكلم.. ونتفاهم.. ونتفاوض.

تقرب من الجزء المتمرد فينا..

نتكلم مع الجزء المعطوب داخلنا..

نتفاهم مع الجزء غير المتزن منا.

وتفاوض مع الجزء اللي قرر - عنوة - إنه يتولى دفة القيادة.. لأنه لما

ظهر.. ظهر لسبب.. هو شايفه منطقي.. ولهدف.. هو شايفه مهم..

ولو وظيفة.. هو شافها حتمية.

الجزء المكتتب ظهر علشان يقلل سقف توقعاتك من الدنيا ومن الناس.. فماتستناش حاجة من حد.. وماتتوجعش تاني.

الجزء الجبان ظهر علشان يبعدك عن أي مصدر خطر.. حتى ولو كان بسيط.. لأنك مش هتستحمل مزيد من التهديد اللي دقت منه كثير.
الجزء الاعتمادي ظهر علشان شاف ان دي الطريقة الوحيدة اللي كان يجنّبك بيها الرفض.

الجزء المدمن ظهر علشان الألم كان شديد.. وكان محتاج مسكن قوي لدرجة التخدير.

والجزء الموسوس المثالي ظهر علشان دي الطريقة الوحيدة اللي كانت هتجيب لك الرضا من اللي حواليك.

كلهم ظهوروا علشان يحموا الجزء المجرّوح جواك.

كلهم طلّعوا علشان يدافعوا عن الحتة المكسورة منك.

كلهم اتوجدوا علشان يجرسوا ما تبقى من نفسك.

أول بقى ما تفهم ده.. وتعرفه.. وتتأكد منه.. وأول ما يحس هذا السائق المتهور، والقائد الأرعن، إنك سمعته، وصدقته، وتعاطفت معه، وبطلت تحكم عليه.. هتحصل المفاجأة.. اللي بتؤكد بكل دقة ان كل ما هو داخلك.. هو جزء لا يتجزأ من عائلتك النفسية.. وقطعة مهمة من بازل حياتك.. حتى لو ضلت طريقها لبعض الوقت.

اللي هيحصل هو إن هؤلاء الحراس والمدافعين هيحسوا إنهم مش مضطرين يفضلوا في نفس حالة التأهب القصوى، ما انت خلاص لهمتهم.. وإن المديرين والإطفائيين هيكتشفوا إن دورهم ما عايش مناسب زي الأول.. ما انت خلاص حسيت بيهم.. وإن هذا الوحش الكاسر.. والغول الضخم.. أن له أن تخور قواه.. ويسلم أسلحته.. ويترجع عن القيادة قليلاً.

هيحصل كمان إن كل دول يفكوا الحصار عن الجزء المجرور
اللي جواك.. واللي كان مستخبي وراهم.. ومتبادري بيهم.. وعم
عن طريقهم.. ويا سلام لما يلاقيك مستنيه.. ومهتم بيه.. وفاتح
حضنك.

فاتح حضنك لنفسك.. حاببها ومقدرها ومسامحها.. شايفها وحاسسها
وراحها.. معاها وليها، مش ضدها ولا عليها.

وهنا.. وعند النقطة دي.. تحصل عملية التئام طبيعية.. زي الالتئام
اللي بيحصل بعد العمليات الجراحية.. اللي بيكون دور الجراح فيها
فقط الفتح، والاستكشاف، ثم تقرب طرفي الجلد من بعضهم
وترك الباقي لجسد صاحبه.

تاني..

يعني أقبل الجزء الشكاك اللي فيا؟
آه.. أقبله.. بس ما وافقش عليه.. أعرف أصله إيه وظهره
وامتى.. وأستخدمه في وقته وفي مكانه.

طيب أقبل الجزء العصبي المتهور اللي مني؟
آه.. أقبله.. بس ما اسلمش له.. أحاوره.. أفهم وظيفته اللي طلع
يؤديها.. وأقرر إنني أوديها بالجرعة المناسبة لو احتجتها في يوم من الأيام

وبرضه أقبل الجزء المدمن بتاعي؟
طبعًا أقبله.. مش أرضى بيه.. أسأله انت موجود ليه وعاوز إيه
وأقول له كتر خيرك شكرًا.. أنا هاعلمك طريقة تانية نتعامل بيها مع
ألنا العميق.

في إحدى الجلسات العلاجية.. قدرنا أنا والعمل الي كنت شغال
بمناه نوصل للجزء اللي جواه الي بيقلل منه.. ويهز ثقته في نفسه..
وبالمه ويحسسه بالذنب على أي حاجة بيعملها.. وقررنا إننا نتحاور
مع الجزء ده.. ونسأله انت موجود ليه؟ (في إطار تمثيلي درامي).. وده
كان رده:

- أنا باضغط عليه علشان أنا متصور إنه مش قد المسؤولية.
- أنا متصور إنه ضعيف.
- أنا شايف إني كده باحميه.
- لو خرج هيتأذى.
- هو ما عندوش خبرة.
- أنا مش عاوز الي حصل له قبل كده يتكرر تاني.
- أنا متصور إنه حتى لو بدأ، مش هيكمل.. هيقف في نص الطريق.

في جلسة تانية مع عميلة أخرى.. شفنا الجزء العصبي الغاضب
المدفع.. ولما كلمناه، قال لنا:

- أنا جيت علشان آخذ لك حقك.
- أنا اللي باحميكي.
- من غيري إنتي عاجزة.
- من غيري إنتي خايفة.
- إنتي طيبة وهبلة وأنا الدرع بتاعك.

وبعد ما فهمنا الأجزاء دي.. وقبلناها.. وحسينا بيها.. واكتشفنا
وظيفتها اللي كانت بتؤديها ببعض من الرعونة.. شكرناها.. وقدرناها..
وامتنينا ليها.. واستأذناها في الإفراج عن الجزء الجريح المختبئ تحتها..
والخروج به إلى النور.

وأول ما طلع.. وأول ما شم نفسه.. اتكلم وقال:
أنا فعلاً أتأذيت.. بس مش هينفع أستخبي على طول.
أنا فعلاً أتجرحت.. بس مش الحل إني أفضل في الضلمة.
إنتو فعلاً حاولتو تحموني وتحافظوا عليا.. بس كفاية لغاية كده.
أنا محتاج أعيش.
أنا محتاج أحيأ.

* * *

حل المشكلات والصعوبات والأمراض النفسية.. من وجهة نظر
نظام العائلة الداخلي.. مش هو التخلص، والاستئصال، والرفض..
الحل هو الاقتراب، والفهم، والتصالح.
أقرب من أجزاء نفسي.. واقبلها كلها على بعضها.. فكل جزء ياخذ
حجمه.. ويرجع مكانه.

أفهم كل حنة مني.. وأحتويها وأستوعبها.. فتحميني بجد.. بدل
ما كانت بتؤذيني، وهي متصورة إنها بتحميني.
أتصالح مع نفسي.. أتراضى معايا.. أتراحم بيا.
أقبل الجزء العنيد اللي جوايا.. ما هو حماني من الاضطرار إلى الاستسلام.
أقبل الجزء الفاشل مني.. ما هو كان إعلان لرفض الواقع الضاغط.
أقبل الجزء المكتئب.. ما هو حاش عني صخب الحياة وخذلان
الناس.

أقبل الجزء الجبان.. والجزء المقصر.. والجزء الغبي.. والجزء
الغشيم.. والجزء الغلطان.. والجزء المجنون.. والجزء المعاقب.
أقبلهم.. مش أوافق عليهم.. ولا أرضى بيهم.
أقبلهم..

لأنهم كانوا جنود رحلتي.. وحراس مشواري.
لأنهم كانوا كدماتي.. اللي منعت عني كثير من الجروح.
لأنهم كانوا خدوشي.. اللي أنقذتني من مزيد من الكسور.

لما تكلمنا في كتاب الخروج عن النص، عن (النفس الحقيقية) الي
بولد بيها، و(النفس المزيفة) الي بنضطر نتحول ليها علشان نلاقي
أروان وقبول وحب الي حوالينا.. قلنا إنه مهم نستعيد نفسنا الحقيقية..
وأرفض التحول إلى نفس مزيفة هدفها إرضاء أي حد بأي شروط.

ولما تكلمنا عن (الطفل الحر)، و(الطفل المتكيف) في كتاب علاقات
الطرفة.. قلنا برضه إنه مهم نسمح للطفل الحر الي جوانا إنه يعيش
ويخرج ويعبر عن نفسه، ونبطل نكون (طفل متكيف) تحت الضغوط
والظروف المشوهة الي اتعرضنا لها.

هنا بقى.. أنا باقول لك إزاي ده ممكن يحصل.. من غير ما تخسر أي
جزء من نفسك في الطريق.. أو تكسر أي حته من روحك في السكة.
من غير ما تبقى زي (نيننا).. بطله فيلم Black Swan (البجعة
السوداء).. وبطله آخر فقرة في هذا الفصل.

* * *

(نيننا) كانت راقصة باليه.. مطلوب منها تلعب دور البجعة البيضاء
والبجعة السوداء في أحد العروض.. نينا عاشت طول حياتها بجعة بيضا..
طيبة.. مهذبة.. خجولة.. بتسعى إلى المثالية والكمال.. بس دايبًا كان
فيه حاجة ناقصة في شغلها وفي حياتها، على الرغم من قدرتها الكبيرة
على الدقة والإتقان والتحكم في كل التفاصيل.. كان ناقصها التلقائية،
والمرونة.. كان ناقصها عبق الجنون، وروح المخاطرة، وعنصر المفاجأة..
كان ناقصها إنها تسبب نفسها في بعض الأوقات لأحاسيسها ومشاعرها.
وعلشان تلعب (نيننا) دور البجعة السوداء في العرض، كان مهم الأول
إنها تشوف البجعة السوداء الي جواها.. وتقرب منها.. وتلتحم بيها.
وخلال رحلتها شافت (نيننا) خوفها المرعب، ورغباتها الدفينة، وجنونها
المستخبي.. ومع كل خطوة كانت بتخطيها، كان بيظهر إبداعها أحلى،
وتبان تلقائيتها أكثر، وتحرر نفسها من قيود قديمة كثير، ساهمت فيها
تربيتها القاسية. بس (نيننا) ما استحملتش الرؤية، وماقدرتش تقبل أو
تستوعب الي شافته وعاشته.. علشان كده كانت نهايتها المأساوية.

إنت بقى .. وأنا .. وكل واحد فينا .. محتاج يشوف البجعة السوداء
اللي جواه، ويستحمل اللي هيشوفه .. ويقبله .. ماينكروش ولا يخاف
أو يهرب منه .

يمكن نكتشف عن نفسنا حاجة جديدة ..
يمكن نكمل اللي ناقص منها .. بيها ..
يمكن نلحم الطيبة بشوية دهاء ..
يمكن نضيف للتهديب شوية جرأة ..
يمكن نخلط مع الخجل شوية إقدام .

يمكن نكتشف إن المثالية الحقيقية بتبدأ من قبول الأجزاء اللي مش
قابليتها في نفسنا، وجمع الأجزاء دي في كل واحد متكامل .
وإن الجمال الحقيقي هو شوية من الأبيض على شوية من الأسود،
بينهم كل ألوان الطيف .
شوية من الوهج على شوية من الضلمة .. بينهم كل درجات النور .

وإن الكمال الحقيقي هو التحام فجورها .. بتقواها ..
وتكاملهم ..

والتحامهم ..

ثم التتامهم ..

وإن هو ده أصل الطريق ..

وإن هو ده شرف الرحلة ..

رحلتك إنك تكون: «واحد صحيح» .

...

تقدر دلوقت تُعيد مقعدك للأمام ..

وتفك حزام الأمان .

وتقول لنفسك:

حمد الله على السلامة .

إنت عبقرى

فیه معالجه سیکودراما شهیره اسمها (مارشا کارب).
مارشا تتلمذت فی آمریکا علی إید الراجل الی اخترع السیکودراما
للمسه.. اسمه (جاکوب مورینو).. وبعدها انتقلت إلی بریطانیا..
وساهمت فی انتشار هذا النوع من العلاج هناك (و فی العالم كله) حتی
الآن.

مارشا حکت لی إنها فی یوم من الأيام كانت بتباشر مرضاها فی أحد
مستشفيات نیویورک الساعة السابعة صباحًا.. وجاها تلیفون عاجل
من جاکوب مورینو.. بیطلب منها إنها تسیب الی فی إیدیها، وتتوجه
إلی بیته فورًا.

مارشا اتخضت واتلخبطت، ودار فی مخها کل الاحتمالات السيئة
الممكنة و غیر الممكنة.. یا ترى أنا عملت إیه غلط؟ إیه المصيبة الی ممکن
للحلی أستاذی یطلبني بالشکل ده الساعة ٧ الصبح؟ طیب هیقول لی إیه
وماقول له إیه؟

مارشا قطعت الشك باليقين، وراحت لمورينو البيت.. فتحت لها الباب زوجته الجميلة الوفية (زيريك)، وقالت لها إنه منتظرها في مكتبه. دخلت مارشا المكتب.. وقعدت على الكرسي المواجه لمورينو.. وهي في انتظار نزول الصاعقة.

مورينو بص لها في هدوء، وعلت وجهه ابتسامة مشجعة.. وقال لها: مارشا.. You are a genius (إنتي عبقرية).

مارشا استغربت.. وضربت أخماس في أسداس.. وما فهمتتش الراجل يقول لها كده ليه.. وإيه اللي حصل علشان يهديها هذا الإطراء الاستثنائي.. وقبل ما تسأله إيه السبب؟ وإيه المعنى؟ وإيه المطلوب؟ أشار لها مورينو بالانصراف.

رجعت مارشا المستشفى.. وهي في حالة ذهول وتعجب.. وأول ما زمايلها شافوها، اتجمعوا حواليتها وبدأوا يسألوها: فيه إيه؟ قال لك إيه؟ إيه الحكاية؟ جاوبتهم مارشا باللي حصل.. علشان تُفاجأ بأحد زمايلها بيقول لها: ياه.. معقول.. ده من يومين، مورينو اتصل بها وطلب يقابلني في نفس المعاد، رخت له وأنا مخضوض.. وقال لي نفس الجملة: «إنت عبقري».. وزادت المفاجأة لما زميلة أخرى ضحككت بصوت عالي وقالت لهم: ده نفس اللي حصل معايا الأسبوع اللي فات بالظبط.. وزميل تالت.. وزميلة رابعة.. بصوا كلهم لبعض.. وفهموا الرسالة اللي مورينو كان عاوز يبلغها لهم:

(كل حد فيكم عنده القدرة إنه يكون عبقري.. أي حد منكم جواه الاستعداد إنه يكون مبدع).

طبعا الكلام ده لا يسري على مارشال ومايلها فقط.. الكلام دي يسري عليك وعليا.. وعلى كل الناس.

سيجموند فرويد بيفسر الإبداع والعبقرية على إنهم طريقة لحل صراعات نفسية داخلية، بدلا من مواجهتها.. بس الكلام ده مختزل ومسيق الأفق جدا.. لأنه بيدي أبعاد مرضية للعملية الإبداعية.. وده مش بيكون صحيح في كل الأحوال.

على الجانب الآخر، علماء مدرسة الجيشتالت في العلاج النفسي يشوفوا إن الإنسان بطبعه مبدع.. وإن العبقرية صفة طبيعية وصحية موجودة فينا من وقت ولادتنا.. وموجودة في كائنات غيرنا كمان.. بس بسببت وتندثر بمروونا ببعض الخبرات السيئة.

الإبداع مش لازم يكون معناه إنك تؤلف رواية، أو ترسم لوحة، أو تكتب شعر.. ولا العبقرية معناها إنك تحل معادلة.. أو تكتشف الدرة.. أو قانون الجاذبية.. دي فقط إحدى صور الإبداع.. اللي بيكون فيها الناتج الإبداعي (ناتج خارجي).. يعنى خارج الشخص المبدع.. ومنفصل عنه.

إنما فيه صورة أعقد وأهم للإبداع.. وهي إنك تبدع في نفسك.. لغيرها للأحسن.. تسلك بها مسالك جديدة.. تمشي بها في طرق مختلفة.. لزيكها وتطهرها وتسمو بها في رحاب الحياة.

ده (الإبداع الداخلي).. اللي مش منفصل عن صاحبه.. ومش بعيد

عنه.

بعض المبدعين (إبداع خارجي) سيكون عندهم بالفعل مشكلات نفسية.. يحاولوا يتغلبوا عليها عن طريق انفصالهم عن الواقع، والتحليق في سماء إبداعهم.

لكن معظم المبدعين (إبداع داخلي) يقربوا من أنفسهم، ويعيدوا اكتشافها، ويعيدوا صياغتها وصلتها، علشان تكون هي الناتج الحقيقي لإبداعهم.. والشكل الأصيل لعبقريتهم.

وفي رأيي.. هو ده الإبداع الحقيقي والأكثر أصالة.

يعني لما تقرر تلعب دورك وبس.. وماتلعبش أي دور غيره.. ده إبداع.

لما تقطع كل أوامر ولائك الخفي لحكايات الماضي.. دي عبقرية. لما تخرج بره الكومفورت زون.. ده إبداع.

لما تقول «لأ» المناسبة في الوقت المناسب.. دي عبقرية.

لما تلملم أجزاء نفسك.. وتتصالح عليها.. ده إبداع.

ولما تبقى واحد صحيح.. دا منتهى الإبداع.. وقمة العبقرية.

فيه نوع ثالث من الإبداع بيجمع بين النوعين السابقين.. لكنه أندر وأقل وجودًا.

يعني تكتب شعر أو قصة أو رواية.. وده في نفس الوقت يقربك من نفسك.. ترسم لوحة.. وده جنبًا إلى جنب يصالحك عليها.. تكتشف فكرة أو اكتشاف جديد.. وتكتشف معاه في التو والحين حته جديدة منك.. وهكذا.

بالمناسبة.. معظم أصحاب الإبداع الخارجي، أول ما يتعالجوا
من مشكلاتهم وصعوباتهم النفسية، يبتطلوا يدعوا.. علشان الصراع
الداخلي المحفز للإبداع بيكون خلاص انتهى.. والعقدة النفسية المثيرة
العقريّة بتكون خلاص اتحلّت.. فيتحوّل إبداعهم الخارجي إلى إبداع
داخلي في أنفسهم وفي أرواحهم.. علشان كده فيه جدال علمي عنيف
هو السين المفاضلة بين علاج بعض المبدعين من ناحية.. واحتمالات
أولفهم عن إبداعهم (اللي هو من حق الإنسانية) بعد العلاج، من
ناحية أخرى.

كلنا مبدعين بدرجة أو بأخرى..
كلنا عندنا استعداد للعقريّة..

يبقى فقط..
إنك تصدق ده.
تصدق.. إنك مبدع..
وإنك عقري.

باللا صدق.
مستني إيه؟

هنا ودلوقت

عارف إيه أصعب سجن في الدنيا؟
سجن «خايف من بكره».
عارف إيه السجن اللي أصعب منه؟
سجن «زعلان على امبارح».
عارف إيه أصعب حاجة فيهم هما الاتنين؟
إن احنا اللي بنسجن نفسنا فيهم بإيدينا.

ما فيش سجن يبهدل صاحبه، ويعذبه، وما ينيمهوش الليل.. زي
سجن «خايف من بكره».. وما فيش زنزانة ضيقة ومظلمة وموحشة..
زي زنزانة «زعلان على امبارح».

كل يوم باسمع مئات الشكاوى.. من عشرات الأشخاص..
تتلخص معظمها في الندم على اللي فات.. أو الرعب مما هو آت..
إما واحد غرقان في امبارح ومش قادر يفلت من شباكه.. وإما واحد
مشنوق من بكره ومش عارف يفك حبل المشنقة.
مع إن اللي بيعوز بيقدر.. واللي بيعوز بيعرف.

ده مشعبط في علاقة قديمة.. أو زعلان على فشل سابق.. أو ندمان
على فرصة ضائعة.

وده خايف من فقد الموجود.. أو ضياع المحسوب.. أو خسارة المكتسب.
ولاده عايش.. ولاده عايش.
لا..

لي الحقيقة.. هما الاتنين عايشين..
بس مافيش حد فيهم على قيد الحياة.
الاتنين بياكلوا ويشربوا ويتنفسوا..
بس ما حدش فيهم حاسس بطعم الأكل أو الشرب أو النفس.

ده عايش في حزن.. وده عايش في هم.. والاتنين عايشين في غم.
فالحزن هو الانشغال بما مضى.. والهم هو الانشغال بما هو آت..
والغم هو الانشغال بما هو حاضر.

يعني واقع الحال.. إن الانشغال بامبارح وبيكره.. بيضيع علينا
النهارده.

بيضيع علينا فرحة النهارده.. خوفاً من حزن (قد) يأتي بكره.
بيحرمنا من حب النهارده.. تعلقاً بحب امبارح.
بيخطف منا جمال النهارده.. فجأة ومن دون إنذار.

مش بس كده..

ده الانشغال بدقيقة فاتت.. أو دقيقة جاية.. بيضيع علينا الدقيقة
اللي احنا فيها حالياً.

والانشغال بلحظة فاتت.. أو لحظة جاية.. بيحرمنا من هنا
ودلوقت.

هنا ودلوقت.

إحنا في الحقيقة لا نملك في حياتنا غير (هنا ودلوقت).. ما فيش في
إيدنا غير اللحظة دي، في المكان ده.
اللي فات انتهى.. حتى لو كان ساب أثر أو كدمة أو جرح.
واللي جاي.. ما زال بيأيد ربنا.. مانعرفش هنشوفه أصلاً واللا لأ.

ما فيش غير (هنا ودلوقت).

كل حياتك مُركزة في هذه الثانية.. اللي هتروح ومش هترجع تاني.
هي فعلاً راحت بعد قرابتك للسطر اللي فات.
واللي بعدها راحت أول ما وصلت للسطر ده.
سُفت؟

في بعض تدريبات الوعي اليقظ «Mindfulness»، بيحطوا قدام
الناس أكل.. ويطلبوا منهم ياكلوا على مهلهم جداً.. ويوجهوهم
إنهم يعملوا كل خطوة في عملية الأكل ببطء شديد.. يمضغ اللقمة
براحته.. ياخذ وقته في إنه يتذوقها.. يحس بطعمها. وبعدين يبلعها
دون أي استعجال.. ويبدأ اللي بعدها.. وهكذا.

في بعض التدريبات الأخرى، بيخلوا الناس يغمضوا أعينهم..
ويتنفسوا بهدوء.. ويحسوا بالهوا وهو داخل وخارج من صدرهم..
ويحسوا بعضلات الصدر والبطن وهي بتقبض وتنبسط..
وما يفكروا في أي حاجة غير النفس اللي بيتنفسوه.

كل ده علشان يورونا قيمة اللحظة الحالية.. ويعلمونا إزاي نركز
فيها.. ونمسكها.. ونقتنصها.. ونحسها.. ومانسيبهاش تضيع هباء.

باقول لك..

هو انت إمتى آخر مرة حسيت بطعم الأكل في بقلك؟
أو آخر مرة غمضت عينيك وسيت نفسك يدخل ويخرج في هدوء؟
من زمان قوي.. مش كده؟
واللا ما حصلش أصلاً؟
طيب.

علشان كل ده.. اتعملت قاعدة مهمة جداً في جلسات العلاج
النفسي الجمعي الحديثة.. اسمها (أنا وانت، وهنا ودلوقت).
يعني لما أحب أتكلم.. أتكلم بصيغة (أنا).. مش صيغة الواحد.. أو
الإنسان.. أو النبي آدم.. ما ينفعش أقول: «والله الواحد تعبان النهارده»،
أو «الإنسان طول عمره ضعيف». لكن ينفع أقول: «أنا تعبان النهارده»،
و«أنا حاسس بضعفي».

ولما أحب أكلم حد.. أكلمه في وشه وأقول له: «إنت».. ماتكلمش
من حد غايب.. وماتكلمش مع حد عن حد موجود بالفعل بصيغة
الغائب.

وفي كل ده.. إحنا عايشين هنا ودلوقت.. وحاسين هنا ودلوقت..
وماسكين في هنا ودلوقت.

أنا شايف إن القاعدة دي مش بس تنفع في العلاج.. دي ممكن تكون
قاعدة حياة.

ليه أخفف عن نفسي مسؤولية كلامي ومشاعري وتصرفاتي.. وأقول
(الواحد عمل).. بدل (أنا عملت).

ليه أهرب من مواجهة حد موجود أو غايب.. في حين إني أقدر
أكلمه مباشرة.

ليه أهرب من هنا ودلوقت.. في امبارح وبكره.

يعني مانفتكرش اللي فات؟
لا طبعًا نفتكره.. بس نتعلم منه.. من غير ما نسجن نفسنا فيه.
يعني مانعملش حساب اللي جاي؟
مين قال كده؟ نعمل حساب طبعًا.. ونخطط له.. بس برضه.. من
غير ما نسجن نفسنا فيه.

عاوزك دلوقت بقى تغمض عينيك..
وتاخذ نَفْسك على مهلك..
حس بالهوا وهو داخل وخارج صدرك..
حس بجسمك..
بعضلاتك..
بأطراف إيديك..
حاسس؟

جرب تاني..
وبعدها..
هتعرف يعني إيه (هنا).. ويعني إيه (دلوقت)..
وهتكون جاهز تمامًا..
لدخول الفصل المقبل من أوسع أبوابه:
باب الوعي.
باب.. وعيك.

وفيك انطوى العالم الأكبر

عاوزك تشغل موسيقى هادية وانت بتقرا الفصل ده ..
لأنه هيخترق روحك ويوصل لأعمق نقطة فيها ..
كما لم يحدث معك أبداً من قبل .

أقترح عليك تسمع مقطوعة None of them are you من فيلم
The Adjustment Bureau .. شغلها في الخلفية بصوت منخفض ..
واطلبها تعيد نفسها تلقائياً لغاية ما تخلص الفصل .

- ١ -

إنت دلوقت شايف كلامي وبتقراه ومركز فيه .. وبتسمع صوت
موسيقى هادية في الخلفية .. وبتقلب بإيديك الصفحات واحدة ورا
التانية .

إنت صاحي .. وواعي .. وحاسس .
شايف .. وسامع .. وفاهم .

إنت دلوقت في مستوى يَقِظ من وعيك .. المستوى ده اسمه (الوعي
الظاهر) Conscious Mind .

في مستوى (الوعي الظاهر)، إحنا بنشوف، ونسمع، ونحس ..
بنبقى مركزين وفاهمين وعارفين .. بتكون فيه أفكار معينة في دماغك
ومشاعر معينة في قلبك، وسلوك محدد في تصرفاتك .

ببساطة شديدة .. بتبقى مش نايم .. علشان النوم ده مستوى تالي
من الوعي .

تصور بقى إن فيه سبع مستويات من وعيك .. وسبع حالات
لوجودك .. وان (الوعي الظاهر) هو فقط .. أولها وأكثرها سطحية ..
وان اللي بعده أعمق .. واللي بعده أعمق .. وهكذا .

إحنا دلوقت هنقوم برحلة داخل وعيك ..

هنخترق طبقاته .. ونتجاوز مستوياته ..

لغاية ما نوصل لأبعد نقطة ممكنة .

ومش هتصدق هنلاقي إيه هناك .

جاهز؟

ياللا بينا .

المستوى اللي فات، كان المستوى الأول من الوعي.. اللي اسمه (الوعي الظاهر).. أو (العقل الظاهر).

المستوى الثاني من وعيك اسمه (العقل الباطن الشخصي) Individual Unconscious، وده بقى حكاية لو حده.. قضى فيها (سجيموند فرويد) عمره كله علشان يكتشف أسرارها.

المستوى ده عامل زي الكهف المظلم، اللي شايل جواه ذكريات قديمة من أيام طفولتك.. ومواقف مؤلمة عدت عليك في حياتك.. موجود فيه غرائزك ودوافعك الخفية.. الجنس والعنف والعدوان.. البخل والشح والأنانية.. الرغبات الغريبة والأمانى الخيالية.. وكل الحاجات اللي ماينفعش تبقى موجودة وحاضرة في وعيك الظاهر.. وإلا هتتجنن أو تتحرر.

يعني ماينفعش مثلاً يكون حاضر في وعيك بمعدل أربعة وعشرين ساعة في اليوم، تفاصيل المرة اللي أبوك هزأك فيها قدام أصحابك.. وكمية غضبك منه وقتها.. ماينفعش كمان تلح عليك أمينتك الدفينة في الطيران كل شوية (الأمنية دي موجودة في العقل الباطن بتاع كل البشر)، لأن ده لو حصل، هتطلع فوق سور بلكونة بيتكم.. وتقفز عاليًا في الهواء الطلق.. وأكد برضه ماينفعش تحضر في وعيك كل دقيقة رغباتك الجنسية العارمة، وإلا هتتحول لحيوان هائج هائم على وجهه.. مهم كل ده يكون مدفون في بير عميق تحت سطح وعيك، ويكون متغطي بقشرة نفسية سميقة اسمها (الميكانيزمات الدفاعية)، كل هدفها منع وصول حمم عقلك الباطن الملتهبة إلى طبقات وعيك الأعلى، علشان ده مُقلق.. ومُؤلم.. وخطير.

لكن ده مايمنعش إن بعض محتويات عقلك الباطن، بتلاقي طريقها
لفوق من خلال شوية شقوق صغيرة في هذه القشرة النفسية.. زي الأحلام
مثلاً.. اللي سهاها فرويد (الطريق الملكي للعقل الباطن).. كل حاجة أو
حد أو حدث في الحلم، بيرمز لحاجة أو حد أو حدث مخزون في عقلك
الباطن.. الكرسي ليه معنى.. القميص ليه معنى.. الضلعة ليه معنى
الحصان ليه معنى.. وهكذا.

مممكن كمان بعض محتويات عقلك الباطن تظهر من خلال زلات
لسانك وانت بتتكلم.. يعني لما تغلط وتقول «أنا فرحان فيك» بدل
«أنا فرحان بيك»، يبقى عقلك الباطن فيه شئاته فعلاً ناحية الشخص
ده.. ولما تقولي «أنا عاجزة» بدل «أنا عايزة»، يبقى جواكي خوف شديد
و حقيقي من العجز وقلة الحيلة.. لما تنده اسم مكان اسم.. لما تكتب
كلمة مكان كلمة.. كل ده ليه معنى ومدلول خفي.

شفت حد وهو خارج من أوضة العمليات بعد عملية (اللوز)؟ هو
بيكون واخد بنج (مخدر) قبل العملية.. بس المخدر ده خفيف لدرجة
إنه مش بينيمه بشكل عميق قوي.. كأنه بيوارب باب العقل الباطن
شوية.. واسمع بقى يا سيدي منه (أو منها) قبل ما يفوق حكايات
وروايات.. وأسامي ناس غريبة.. وشتايم أحياناً.. ورغبات ساعات
مع إنه مؤدب جداً ومش بتطلع منه العيبة.. بس عقلنا الباطن للأسف
مش مؤدب.. ومليان بلاوي.. بس ربنا بيستر.

طبعا اللي يشرب ويشكر، باب عقله الباطن بيتفتح، واللي بيدع
باب عقله الباطن برضه بيتفتح، واللي بيتجنن يبطلع كل محتويات عقله
الباطن، من صور وأشكال وأصوات ومخاوف، ويحطها قدامك على
الترابيزة.

صندوق أسود مغلق.. ما حدش يعرف يفتحه.. ولا حد يقدر
يعرف اللي فيه.. غير بطرق صعبة جداً.. زي التنويم المغناطيسي.. أو
التداعي الحر.. أو بتحليل نفسي طويل ومجهد لظواهر وصدف نفسية،
زي اللي ذكرناها فوق.

خلينا نفتح الصندوق بالراحة..
وتعالى ننزل للمستوى اللي جاي.

المستوى الثالث.. والطبقة الأعمق من طبقات وعيك اسمها Peri-natal Unconscious، أو (لا وعي الحمل والولادة).. وده المستوى اللي متخزن فيه كل ذكريات حضرتك من بداية حياتك الجينية (في الرحم)، لغاية ولادتك ونزولك أرض الدنيا بسلام. وهو أنا كان عندي وعي أو ذاكرة وأنا في بطن أمي؟ أه.. تصور.

النجارب اللي أجراها الطبيب النفسي والعالم التشيكي الشهير (مانيسلاف جروف) أثبتت، إن عقلنا يبسجل ويخزن خبراتنا في الرحم ويحتفظ بيها طول العمر.. وإننا نقدر ببعض التقنيات العلمية المفكر الخبرات دي ونحسها، كأننا عايشينها بالظبط.

جروف في تجاربه بالسبعينات.. كان بيحقن الناس بزيادة كيميائية اسمها (إل إس دي - LSD)، تخليهم يدخلوا في حالة من الوعي بين النوم والصحيان.. واكتشف انهم وهما في الحالة دي بيقدروا يسترجعوا ذكريات حياتهم الجينية بشكل مذهل.. بعضهم كان بيوصف تفاصيل دقيقة وغريبة، زي المرة اللي حس فيها باختناق شديد (بسبب بعض الغلصات الرحم)، أو المرة اللي حس بخبطة جامدة على بطن الأم (اللي ممكن تكون اتسبكت ووقعت مثلاً)، أو المرة اللي حصل له فيه دوار وعدم اتزان، بسبب وصول مادة غريبة لدمه عبر المشيمة (لما الأم كانت بتعصب مثلاً).. وكثير منهم وصفوا لحظات ولادتهم، وخوفهم والمهم أثنائها بالتفصيل.

بعض الناس كانوا بيرسموا اللي شافوه في أثناء التجربة.. بعضهم رسم نفسه ملفوف بحبل حوالين رقبته (الحبل السري).. بعضهم رسم نفسه في مكان مظلم وبابه بيتفتح ويدخل نور (انقباضات وانبساطات عنق الرحم).. بعضهم رسم نفسه زي سمكة في بحر مياه كبير (السائل الأمنيوسي حول الجنين).

بعض الناس كما ان كانوا يياخذوا وضع الجنين تلقائياً في التجربة (وهم بين النوم والصحيان)، كأنهم يبعثوا بعض مشاهد حياتهم الجنينية فعلاً.. وعدد منهم كان بتظهر على جسمه علامات زرقا، زي اللي أحياناً حد بيلاقيها على جسمه بعد ما يصحى من حلم مزعج.

أنا كنت على تواصل مع (جروف) من فترة.. وبعث لي الرسومات اللي رسمها بعض من خضعوا لطريقته.. الرسومات تتخطى قدرة أي حد على الوصف أو التخيل فعلاً.

مادة الـ «LSD» أصبحت محرمة دولياً لخطورتها على الجهاز العصبي.. واستبدالها جروف وتلاميذه باستخدام موسيقى ليها إيقاع معين، مع بعض الحركات الجسدية المنتظمة، اللي بتساعد على الاسترخاء النفسي، والدخول في هذه الحالة من الوعي.

إنت مش محتاج تعمل أي حاجة علشان تستكشف الطبقة دي من وعيك.. لأنها ممكن تعبر عن نفسها ومحتوياتها بشكل تلقائي يومي من غير ما تاخذ بالك.. النوم في وضع الجنين هو تعبير واضح عن نشاط هذا المستوى من الوعي.. الحلم المتكرر بالمياه أو الشاطئ أو السباحة أو الغرق، برضه تعبير عن ذكريات (أو مخاوف) مُسجلة في عقلك وجسدك من هذه المرحلة.. حلم إنك في غرفة مظلمة أو مغلقة لوحدهك هو مثال آخر.. وكذلك حلم الخروج من مكان ضيق إلى مكان واسع، أو القفز من مكان عالٍ إلى مكان منخفض.

إحنا أحلامنا بتعبر عن مستويات وعينا.. وكل حلم بنحلّمه نقدر نشوف هو طالع من أي مستوى.. وده يقول لنا حاجة عن معناه.. مش بس كده.. ده ممكن حلم واحد يكون طالع من أكثر من مستوى.. ممكن منهم كلهم.. ويكون ليه أكثر من تفسير وأكثر من معنى على حسب إنت بتشوفه من أي زاوية.

إحنا وعينا كبير جداً.. وواسع جداً.. ومتجاوز جداً. وابتداء من طبقة الوعي الآتية.. وعيك هيبدأ يتجاوزك انت شخصياً.

خليك معايا..

وتعالى نشوف.

انت ومراتك اتفرجتو بالليل قبل ما تناموا على حلقة من مسلسل
الغناء، اللي فيه ناس مفقودين على جزيرة في عرض البحر.. وبعد ما
انتهوا انت حلمت انك على جزيرة.. ولقيت مراتك الصبح بتحكي لك
انها قبان حلمت انها كانت على جزيرة.. مع اختلاف تفاصيل الحلمين.
عملية مكونة من أب وأم وابن وابنة.. مرّوا بأزمة مادية طاحنة..
بعد ما عدوا منها بسلام.. بقي كل واحد فيهم يحسب ألف حسبة قبل
ما يصرف أي مبلغ معاه.. خوفا من تكرار ما حدث.
فريق كرة قدم.. اتدربوا مع بعض.. عاشوا مع بعض شهور وسنين..
اناموا وشربوا وناموا.. لدرجة إنهم بقوا ييفكروا زي بعض.. وييفهموا
بعض من غير كلام.. ويقرّوا خطط خصومهم بنفس الطريقة.. كأن
جزء من عقلمهم الباطن بقى شبه بعض.

في الجزء دا من الوعي.. بتكون محتويات عقلك مشتركة مع عقل
الآخر.. لأنكم بتكونوا اتعرضتو لنفس الخبرات.. وخزنتوا
نفس الذكريات.. وده بينعكس على تصرفاتكم وسلوككم.. ويظهر في
أفعالكم وردود أفعالكم.. وأحيانا أحلامكم.. كأنكم شخص واحد.
عقلك الباطن في المستوى دا بيكون مفتوح على العقل الباطن بتاع
الآخر.. مراتك.. صاحبك.. شلتك.. زميلك في الشغل.. كأن
عقولكم متوصلة ببعض، بمعابر وكباري وقنوات اتصال.

المستوى ده اسمه (اللا وعي المشترك) Co-Unconscious، وهو أعمق
وأوسع من اللا وعي الشخصي.. وأول واحد اتكلم عنه ووصفه كان
العالم النفسي الروماني جاكوب مورينو (اللي ابتكر طريقة السيكودراما
العلاجية)، اللي لاحظ إن ما يحدث في جلسات السيكودراما من مشاهد
ومشاعر وتفاعلات عميقة، بيتم تخزينه بشكل كامل ومتشابه في عقول
ال موجودين.. كأن ليهم عقل واحد.

استنى ماتستعجلش.. وماتستتجش استتجات سريعة..

خلي ده بعد شوية..

علشان اللي جاي أوضح..

وأغرب.

خلفتنا نوسع الدائرة شوية ..

المستوى اللي فات كان بداية خروج وعيك من حيز عقلك وجسدك،
وتواصله مع وعي آخر معاك .. بس في حدود اتنين .. ثلاثة .. مجموعها
صغيرة.

المستوى دا بقى، واللي هو أعمق من اللي فات كله .. اسمه اللا وعي
المجتمعي «Social Unconscious»، وفيه كل حاجة مشتركة ومتشابهة
نفسياً .. بينك وبين كل الناس اللي من ثقافتك ومجتمعك.

الجزء ده من وعيك فيه ذاكرة بلدك وتاريخها .. اللي هي محفورة جوالك
وجوه أهللك وعيلتك وجيرانك وأصحابك وأحبابك .. فيه الحروب
والانتصارات والهزائم .. وأثرها عليك وعليهم .. فيه كل الأساطير والحكايات
القديمة .. كل الخيالات والتوقعات .. فيه مخاوف مجتمعك، ودفاعاته ..
فيه عقده، وأمراضه .. فيه تفاصيل تركيبته النفسية .. اللي أصبحت جزء
لا يتجزأ من تركيبتك النفسية.

يعني مثلاً .. المصريين مشهورين بأنهم معتزين بنفسهم جداً في كل
الأماكن والمواقف .. أو كما يقال عنهم (فراعة) .. أهوده جزء من التركيبة
النفسية لينا كمجتمع، والمتخزنة في طبقة (اللا وعي المجتمعي) الخاصة
بكل واحد فينا .. واللي بتظهر فعلاً في تصرفات معظمنا في بعض المواقف ..
كلنا -تقريباً- بنخاف من الحسد .. كلنا -تقريباً- عاطفين ومشاعرنا
تسبق كلامنا .. سهل جداً نقدس حد معين ونشوفه بني آدم ما حصلش ..
وبعد شوية ننزل بيه تحت الأرض .. كلنا -تقريباً- نميل إلى الشجن ..
بنعيط لما نفرح .. ونتخض لما نضحك، فنقول اللهم اجعله خير.

كل ما هو مشترك في وعيك ووعي معظم الناس اللي من ثقافتك
ومجتمعك، موجود ومتخزن في هذا الجزء وهذه الطبقة من الوعي ..
كأن فيه عقل كبير جداً حوالينا، وكلنا متوصلين بيه بشكل ما.

أول واحد وصف المستوى دا من الوعي هو العالم الإنجليزي ذو الأصل الألماني «S.H.Foulkes» في الستينات، ومؤخرًا بدأت تظهر سلسلة كتب جبارة عن اللاوعي المجتمعي لكل شعوب الأرض.

الطرق بقى اللي بنعرف بيها محتويات (اللاوعي المجتمعي) لشعب بعين مذهلة فعلاً.

أولها وأبسطها الأمثال الشعبية.. يعني هات مجموعة الأمثال الشعبية المنتشرة في مجتمع معين، في حقبة معينة من الزمن.. تقدر تعرف العقل الباطن بتاع المجتمع ده فيه إيه ويفكر إزاي.. لما تكون الأمثال المنتشرة من عينة (اللي ليه زهر مايتضربش على بطنه)، و(اللي مالهوش كبير يسترى له كبير).. غير لما تكون من عينة (من جد وجد)، و(من زرع حسد).. لما تكون من قبيل (اللي اختشوا ماتوا)، و(خدوهم بالصوت ليلغوكم).. غير لما تكون من قبيل (نواية تسند الزير)، و(بصلة الحب خسوف).. كل مجموعة أمثال منتشرة في فترة ما من عمر مجتمع ما، بالغول لك حاجة عن اللاوعي بتاع المجتمع ده.

الطريقة الثانية هي إنك تشوف إيه الأغاني والأفلام والأعمال الفنية والدرامية الموجودة على الساحة، واللي عليها إقبال جماهيري كبير، وتشوف إيه المشترك بينها.. فتقدر تعرف بكل بساطة المجتمع ده في اللحظة دي من التاريخ، عقله الباطن فيه إيه.. فيه هدوء واللاغضب.. فيه سعار جنسي واللائضج وتروى وحكمة.. فيه عنف واللاإبداع.. فيه قبول للآخر واللائرفض للآخر.. فيه تحمل للاختلاف واللائنكار ورفض للاختلاف.. وهكذا.

الطريقة الثالثة.. وهي أعجبهم.. هي إنك تسمع مجموعة من أحلام الناس في هذا المجتمع.. وتحاول تشوف إيه الحاجات المشتركة فيها.. وده يقول لك بمنتهى الصدق والعمق إيه الموجود في العقل الجمعي لهذا المجتمع.. اللي فيه حته منه داخل عقل كل فرد فيه.. يعني لما تسمع عشر أحلام من ناس مختلفين، وتلاقي فيهم كلهم أو معظمهم عنف ودم وقتل، تعرف إن فيه كمية لا بأس بيها من الخوف في هذا المجتمع في الوقت ده.. نتيجة حروب أو إرهاب أو ما شابه.. لما تلاقي أحلام كثير من الناس مشترك فيها وجود أطفال صغيرين أو حمل أو ولادة، تعرف إن المجتمع ده في الوقت ده مليان أمل وحب للحياة.

وحدثنا طبعًا تحول الفيس بوك إلى بيئة خصبة جدًا لدراسة العائل
الباطن لأي مجتمع، بمتهى البساطة.

سنة ٢٠١٤ عملنا دراسة في قسم الطب النفسي بجامعة المنيا
وزميلي العزيز د. محمد أيمن عبد الحميد. جمعنا فيها أكثر من ألف جملة
من اللي مكتوبين على ظهر عربات التوكتوك والميكرو باص.. وعملنا
تحليل كيفي Qualitative Analysis لنصوص الجمل دي، علشان
نشوف إيه المشترك فيها.. وهتقول لنا إيه عن (لا وعينا المجتمعي)
لقينا فيه أربع محاور أساسية بيتكرروا في الجمل دي:

المحور الأول هو الشعور الشديد (بالعظمة).. يعني كلام زي (أ)
بابا يالا).. (الساحر حضر).. (شاب خريف ودمه خفيف).. (الصفير)
(المعلم).. (الزعيم)..

المحور الثاني هو بعض الميل للعنف والتهديد.. بجمل زي (دراكولا)
(العقرب).. (السفاح).. (هافر مك).. (هُس ياد انت).. (ماتت حدانيش)
(عاوز تعيش ماتت حدانيش)..

المحور الثالث هو سهولة تقسيم الناس لطيب وشرير.. بأمثلة زي
(من كُتر الناس الشمال قلوا ولاد الحلال).. (مش كتر مال، ده عندك)
(الأندال).. (إحنا كبار.. بطلنا نلعب مع العيال)..

والمحور الرابع والأخير هو الخوف من الآخر.. مرة بدعوى الحسد
مرة بدعوى الخيانة، وهكذا.. بجمل زي (ما فيش صحاب).. (لا أمان
للشهر).. (من عيون الناس يا رب سلم).. طبعًا أنا مش محتاج أقول
معناه إيه بالنسبة لعقلنا الباطن المجتمعي.

في بحث عمله (آدم كلوسين وآخرون) وانشى في مجلة (ساينس) سنة ٢٠١٧، أثبت إن محتويات اللا وعي المجتمعي بتتنقل من جيل إلى جيل عبر الجينات (وحتى ١٤ جيل) ..

عاشان كده أولادك وأولادي مولودين وفيهم نفس التركيبة النفسية المجتمعية بتاعتي وبتاعتك .. حتى لو اتولدوا برة وطنهم ..

وما فيش مانع طبعًا إن التركيبة دي ممكن تتغير مع التعرض لخبرات جديدة.

أحد نفْسك بقى شوية ..

لأننا هنوسع الدائرة قوي ..

وهنزل لتحت أكثر ..

وهنكتشف مع بعض ..

طبقة رائعة جديدة ..

من طبقات وعيك.

المعجز حقًا.

الموسيقى لسه شغالة؟
طيب.. كويس.

غمض عينيك..

قول لي إيه الصورة اللي هتخطر في بالك أول ما تسمع كلمة «الرجل
الحكيم الكبير».. تاني: الرجل.. الحكيم.. الكبير.. غمض عينيك ثوانية
وقول لي شايف إيه.

أيوه.. بالظبط.

راجل كبير في السن.. شعره أبيض.. ودقنه بيضا.. ولا بس جلابية
ناصعة البياض.. شبه شخصية (جاندا الف) في فيلم (مملكة الخواتم)
كده.

دي الصورة الغالبة طبعًا.. علشان هيكون فيه استثناءات بسيطة.

طيب.. إيه الصورة اللي هتخطر في بالك أول ما تسمع كلمة
(شيطان)..

أيوه.

كائن قبيح، مختلط فيه اللون الأسود باللون الأحمر.

طيب كلمة (فارس).. أو كلمة (بطل).. أو كلمة (جوكر).
نفس الصور.. عند كل الناس.. أو على الأقل معظمهم.
طيب أنا عرفت منين؟

عاشان نفس الصور دي متخزنة عندي.. زي ما هي متخزنة
.. زي ما هي متخزنة عند واحد سعودي.. أو واحد أمريكي..
.. أو إسرائيلي.. أو ياباني.. أو أي حد في أي حته.
إحنا هنا بنتكلم عن طبقة من وعيك مشتركة و متصلة بكل وعي
البشرية.. من زبد الخليقة.. لغاية النهارده.. كل الأجيال وكل الأشخاص..
الإناس بالمعنى الحرفي.. عبر كل القرون.

المستوى ده من الوعي اكتشفه العالم السويسري العبقري كارل
جوستاف يونج.. وسماه (اللا وعي الجمعي) Collective Unconscious..
يقال إن معظم محتوياته عبارة عن صور ونماذج وأطر أولية بيتناقلها
البشر عبر الزمن والحضارات من جيل إلى آخر.. من خلال الأساطير
والحكايات.. من خلال الخبرات المنقولة والموروثة.. وبرضه من خلال
الطبقات، زي ما أثبتت الدراسات الحديثة.

يعني كل البشر في كل مكان في العالم عندهم خوف من التعابين..
خوف عام موروث.. موجود في الأطفال بفطرتهم.. زي ما هو موجود
في الكبار بخبرتهم.. لدرجة إن يونج سجل بعض الأحلام بالتعابين
عند ناس عايشة في أماكن نائية، عمرهم ما شافوا تعابين أصلاً.

معظم البشر في كل أنحاء المعمورة بيخافوا من الضلمة.. من
العسارب.. بصرف النظر عن جنسيتهم ولونهم ودينهم وثقافتهم..
أي غريب فعلاً.. مش كده؟

هو مش هيكون غريب قوي.. لو تخيلت إن فيه أرشيف كبير.. متخزن
فيه كل خبرات البشرية.. كل رموزها.. كل أساطيرها.. كل أحلامها
وخواصها.. وكل واحد فينا جواه باب صغير مفتوح على الأرشيف ده في
إحدى طبقات وعيه.. بمعنى إنك موصول بكل تاريخ البشرية ومحتوياته
بشكل ما.. وأنا موصول بيه زيك.. وكل البشر موصولين بيه زينا.

مش بس كده..

ده الخبرات اليومية والحياتية المهمة اللي بنعدي بيها أنا وغيرنا.. بتتخزن هي كمان في الأرشيف ده.. وتُورث بشكل ما.. لكن الأجيال المقبلة.. حتى آخر الزمان.

شيء لا يصدقه عقل.. بس حقيقي.

(يونسج) كان ليه نظرية معينة في الأحلام بناء على الكلام ده.. كان يقول إن بعض الأحلام بتكون عبارة عن نصائح وحكم وعلامات على الطريق، موجهة ليك من آبائك وجدودك وجدود جدودك.. علشان تساعدك في موقف معين انت بتمريه دلوقت.. أو في قرار معين في حاجة انت محتاجها حاليًا.

مرة واحدة من عميلاتي (ف) حكمت لي حلم: إنها رايحة شغلها كل يوم الصبح.. بس لقيت قدامها طريقين، على غير العادة.. طريق أسفلتي ممهد وسهل (ده الطريق اللي بتمشي فيه كل يوم).. وطريق تاني عبارة عن ألواح خشبية مرصوفة قدام بعض ومعلقة بحبال في الهواء كوبري خشبي بدائي جدًا، من النوع المعلق، زي اللي بنشوفه في الأفلام (ف) في الحلم كانت خائفة ومتردة.. واختارت أخيرًا إنها تمشي على الكوبري الخشب، رغم خطورته.. وقدرت توصل لشغلها بسلام (ف) في الحقيقة كان عندها امتحان قريب.. ليه علاقة بشغلها وكانت بتفكر تستسهل وماتدخلش الامتحان.. حتى لو اقتضى الأمر إنها تسبب الشغل خالص.. الاختيار الأسهل فعلاً كان هو تأجيل الامتحان.. لأنها هتريح دماغها وماتضغطش نفسها.. لكن الأشغال الأصبغ كان المخاطرة بالدخول.. والمثابرة وعدم الاستسلام والمواجهة وعدم الهروب.

الحلم كان بيقدم ليها النصيحة.. المستخلصة من خبرة آبائها وأجدادها عبر العصور.. والمنقولة ليها منهم.. عبر الحلم.. ورموزه الواضحة.

بعد ما وصلت الرسالة.. وقدرنا نفك شفرتها.. قررت (ف) دخول
الامتحان.. وكان ده الاختيار الأفيد على كل المستويات.
بالمناسبة.. يونج كان بيربط كتير بين الرموز في الأحلام.. وبين
التيها في الحضارات والأساطير القديمة.. يعني السمكة في الحلم رمز
صوبة.. المياه رمز المشاعر المدفونة.. الموت رمز لإعادة الولادة..
عمل في الحكاية دي كتاب مهم جدا اسمه Man and His Symbols.
ال ده بقى كوم.. والمفاجأة دي كوم تاني.

المفاجأة هي إنه في نفس الوقت اللي العميلة (ف) حلمت الحلم ده
مجهولي.. أنا شخصياً كنت على أبواب ترقية في شغلي.. وده كان محتاج
جهود شاق وتحضير صعب جداً.. وأيضاً دخول امتحان أمام لجنة من
اساتذة الطب النفسي في مصر.. وكان قدامي طريق من اتنين.. إما
لي استسهل وأجل الترقية وما دخلش الامتحان.. وإما إني أتعب نفسي
وأبذل هذا المجهود الشاق.. وأقوم بذلك التحضير الصعب..
وأعرض التجربة.. اللي كانت تشبه عبور كوبري خشبي معلق في الهواء.
أنا شفت وقتها حلم (ف) على إنه رسالة موجهة ليها.. وليا أنا
مجان.. وإن فيه نصيحة جاية من مكان ما.. وتوجيه صادر من أحد ما..
أول يشاور على نفس الاختيار ليها وليا.. في نفس الوقت.. الاختيار
الصعب.. اللي فيه مخاطرة.. وده اللي حصل.. واجتزت الامتحان..
ولت الترقية فعلاً.

حلم (ف) بيورينا حاجة خطيرة جداً..
وهي إننا مش بس متصلين بآباءنا وأجدادنا وكل الأجيال والخبرات
الطرية السابقة..

لا.. إحنا كمان متصلين ببعض.
ووعينا.. على أحد مستوياته.. مفتوح بينا وبين بعض.
امسك بقى أعصابك كويس..
علشان ده اللي هنشوفه في الطبقة المقبلة من وعيك..
الطبقة الأعمق.. والأغرب.. والأكثر إعجازاً.
واللي هي كمان..
الطبقة الأخيرة.

سنة ١٩٦٩، وفي أثناء رحلة عودته من القمر - كأول إنسان يطأ
بقدميه - تفوه رائد الفضاء الأمريكي (نيل أرمسترونج) بجملة شهيرة
جداً: «حظ موفق يا سيد جرونسكي». حاول كثير من الصحفيين
والمراسلين بعد هبوطه على الأرض إنهم يسألوه عن المقصود بالجملة
دي، لكنه ما قدمش أي إجابة واضحة على الإطلاق.. لدرجة إن
البعض تصور إن دي شفرة سرية هدفها توصيل رسالة معينة للروس
بعدها بعدة سنوات (١٩٩٧)، وفي حفلة أقامها سترونج في منزله
بفلوريدا.. حدثت معاه الموضوع ده تاني.. وسأله مين هو السيد
جرونسكي وإيه حكايته.. وكانت الإجابة مفاجأة من العيار الثقيل.
(نيل) حكى إنه في مرة لما كان طفل صغير، كان يلعب مع أصحابه
كورة في الحديقة الخلفية بتاعة بيتهم، وإن الكورة وصلت بالخطأ لمساحة
نافذة جارهم السيد (جرونسكي).. (نيل) راح علشان يرجع الكورة
وسمع بالصدفة زوجة الرجل بتتخانق معاه وتقول له بعصية شديدة
«مستحيل.. إيه اللي انت بتطلبه ده؟ لو الولد الصغير ابن جيرانك
مشى برجليه على القمر، هابقي اعمل لك اللي انت عاوزه».. (كتاب
The Cosmic Game - صفحة ٩٤ و ٩٥، ستانيسلاف جروف - ١٩٩٨)

الدكتور مصطفى محمود - الله يرحمه - حكى في إحدى حلقات برنامج
الشهر (العلم والإيمان)، عن نقطة البداية في رحلته الطويلة للبحث عن
الحقيقة.. حكى إنه كان نايم في ليلة واتصل بيه أحد أصدقائه (الناقد
الفني جلال العشري)، ولما عرف إنه كان نايم اعتذر له وسأبه يكمل
نوم.. نام الدكتور مصطفى محمود تاني وحلم بالأستاذ (جلال العشري)
ماشي في شارع سليمان باشا مع زميل آخر (الكاتب شوقي عبد الحكيم)،
وبيتكلما في موضوع جاد فيه سيرة كتب وألفاظ بالإنجليزية..

بعد ما صحي الدكتور مصطفى من النوم اتصل بصديقه، وقال
لصديقته: إني لسه كنت باحلم بيك إنت وفلان، ماشيين في شارع كذا
واللهوا في موضوع كذا.. الراجل على الطرف الثاني من الخط أسقط
لديه، ووقعت منه سماعة التليفون.. وصرخ في دهشة وفزع: ده مش
تمام.. ده اللي حصل فعلاً.. بنفس المكان والكلام والألفاظ. من وقتها
حصل الدكتور مصطفى محمود -الله يرحمه- في دوامة من إعادة النظر
في كل شيء.

المقالين دول.. وأمثلة أكثر جاية.. بتقول إنه في إحدى طبقات
الكون.. كلنا متصلين ببعض.

وايه يعني؟

ما احنا في مستوى الوعي اللي فات (اللاوعي الجمعي) كنا متصلين
بعضنا بعضاً..

هنا فيه حاجتين زيادة.

الحاجة الأولى هي إننا مش بس متصلين ببعض (البنى آدميين اللي
بناهم).. لا.. إحنا كمان متصلين بباقي المخلوقات.. متصلين بالحيوانات..
والنباتات.. والجمادات.. والسما.. والأرض.. والملايكة.. والشياطين..
والله حاجة.. إحنا هنا متصلين بالكون حرفياً.

والحاجة الثانية هي إن وعينا في المستوى دا مش بيعترف بحدود
الزمان ولا المكان ولا الجسد.. يعني يقدر يشوف الماضي.. ويقدر
يشوف المستقبل.. يقدر يتواصل مع حد في أمريكا.. ويقدر يحس بحد
في حد في عالم البرزخ.

اهدى بس كده وماتتخضش..

عشان الدهول كله جاي.

كأ مرة كنت بتتكلم أنت وواحد صاحبك عن حد ثالث
وبصيتوا لقيتوه جاي قدامكم؟
كأ مرة حلمتي حلم، وصحيتي الصبح لقيتيه بيتحقق.. أو بعد
يومين.. أو شهرين.. أو حتى سنين؟
كأ مرة حسيتي إنك عشتي الموقف اللي أنتي فيه ده قبل كده؟
بيتكرر هو هو بالظبط؟

بلاش كده.

كأ مرة حسيت بحاجة قبل ما تحصل، وحصلت كما هي؟
كأ مرة حصل توارد خواطر بينك وبين حد تاني.. كأن علق
مفتوح على بعض؟
كأ مرة شفت في الحلم حد متوقف، بيوصل لك رسالة معينة؟

إحنا وعينا في المستوى دا بيكون في أكمل حالاته.. وأجل حالاته
بيقدر يتخطى كل الحدود.. ويتجاوز كل الحواجز.. ويتجاوز الوقت
ويتجاوز الجدران.. ويتجاوزك أنت شخصياً.. علشان كده المستوى
دا اسمه Transpersonal Level of Consciousness، الوعي
الشخصي.. الوعي المتجاوز للأشخاص.

أنا هنا مش هاسميه مستوى من الوعي.. أنا هاسميه حالة من
الوعي.. بيطلق عليها (جروف) اسم (حالة الوعي الكاملة).. أو
Holotropic State of Consciousness.

الحالة دي من الوعي بتكون نشطة أحياناً عندك.. وعندي.. وعند
أي حد.. لما نحس بحاجة وتحصل.. أو نفكر في حد ونلاقيه قدامنا
أو أي مثل من اللي ذكرتهم فوق.. وده بيحصل بشكل تلقائي وطبيعي

وهو نشطة بقدر أكبر جداً عند فئة معينة من البشر.. ربنا
هو هذا القدر من التواصل والوصل والاتصال.. هم الأنبياء
الذين.. اللي وعيهم تمدد واتسع.. ليكون على جاهزية واستعداد
لحال الوحي والرسالة.

ربنا سليمان عليه السلام كان على تواصل مع النمل والطير ويفهم

ربنا محمد صلى الله عليه وسلم سمع أنين جذع النخلة وتجاوب

ربنا عيسى عليه السلام كان يخبر الناس بما يأكلون وما يحتفظون

بهم وباقي الأنبياء والرسل كانوا يرون الملائكة ويكلمونها.

الوحي هنا مخترق ونافذ إلى أقصى درجة.

وفي الوقت نفسه- ربنا بيعرفنا ويعلمنا إنه مش لازم علشان

نكون في الحالة دي، إننا نكون أنبياء.

في حكاية شهيرة عن سيدنا علي بن أبي طالب مذكورة في كتاب

الناص النضرة في مناقب العشرة) كما يلي:

أرى الإمام علي بن أبي طالب في المنام أنه في أثناء ذهابه إلى المسجد،

في الصباح مع النبي صلى الله عليه وسلم، وجد امرأة على باب المسجد

تأكل به تمرات، وقالت له: أعط هذا للنبي صلى الله عليه وسلم،

فأعطاه للنبي صلى الله عليه وسلم، أعطاه الرسول صلى الله عليه

عليه تمر، فلما ذاق حلاوتها قال: زدني يا رسول الله. وهنا استيقظ

الإمام علي وسمع أذان الصباح، فذهب إلى الصلاة، وبعد الصلاة وجد

على باب المسجد امرأة معها طبق به تمرات، فقالت له: أعط هذا لعمر،

فأعطاه لعمر، ناوله تمر، فلما ذاق حلاوتها، قال: زدني يا عمر، فقال

عمر: لو زادك النبي صلى الله عليه وسلم لزدناك».

وحكاية سيدنا الخضر مع سيدنا موسى عليه السلام، بتورينا له
إيه بني آدم عادي طبيعي قدر يشوف مستقبل السفينة والغلام والكلب
رغم إنه ماكانش نبي.

وكلنا كمان بنسمع عن زرقاء اليمامة.. اللي كان عندها القدرة إياها
تشوف على بعد مسيرة ثلاثة أيام.. زرقاء اليمامة ماكانتش موهبتها
الأساسية قوة البصر.. إنها كانت قوة البصيرة.. قوة الوعي.

(ستانيسلاف جروف) وصف في تجارب الوعي عبر الشخصي، إن
بعض الناس في أثناء الجلسات، شافوا حد متوفى عزيز عليهم، وكلموه
وقال لهم يروحوا المكان الفلاني علشان يلاقوا فيه حاجة معينة هو كان
شايلها.. وراحوا ولقيوها فعلاً اللي هو قال لهم عليه.

(جروف) وصف كمان واحد اسمه (كارل) شاف في أثناء تجربته، إنه
موجود مع بعض الجنود الإسبان في كنيسة محاصرة من الجيش الإنجليزي
وشاف نفسه لابس خاتم عليه حروف معينة.. بعد الجلسة حاول (كارل)
البحث والاستقصاء لغاية ما وصل لاسم ومكان الكنيسة تفصيلاً.. راح
إسبانيا ودور في أرشيف المكتبة العامة وعرف اسم وتاريخ المعركة اللي
شافها.. وفوجئ إن اسم كاهن الكنيسة المذكور في إحدى الوثائق، هو
بالظبط الاسم المكتوب على الخاتم اللي شاف نفسه لابس.

فيه حاجة أعجب..

البروفيسور (إيان ستيفينسون) بجامعة فيرجينيا، عمل مجموعة من
الأبحاث على أكثر من ثلاثة آلاف من الأطفال اللي بيعجوا عند سن
معين ويبقى عندهم (صديق خيالي) له اسم وسن وأوصاف معينة.
كان بيدور ويبحث ويستقصي، لغاية ما يوصل في بعض الأحيان لناس
حقيقيين، ليهم نفس الأسماء والسنين والأوصاف اللي الأطفال دول
أدلوا بيها، رغم إنهم عمرهم ما شافوهم في حياتهم. (ستيفينسون) نشر
نتائج أبحاثه سنة ١٩٦٦ و١٩٨٤ و١٩٨٧.

كل ده بيقول إيه؟
يقول إن وعيك مفتوح على العالم.. على الكون.. على الزمان
المكان.. بلا أي حدود..
يقول إن وعينا مفتوح على بعضه.. ومُتصل ببعضه.. ومتواصل
بعضه..

يقول إن روحك أوسع مما تتصور.
احتمال روحك تكون ساكنة هذه الطبقة من طبقات وعيك..
واحتمال الوعي في الطبقة دي يكون هو الروح..
واحتمال مايكونش أصلاً فيه فرق كبير بين (الوعي).. والروح.
فقد يكون الوعي.. هو أحد وظائف الروح.
والله أعلم.

المهم..
لسه مش مصدق إن ده موجود عندك؟
لسه مش متأكد إنك تقدر على كل ده؟
طيب.. خليني أحكي لك حاجات حصلت معايا أنا شخصياً.

أول ما بدأت أقرأ وأبحث في الموضوع ده كان سنة ٢٠٠٦، ووقتها
بهرت زيك كده، وبدأت أدور وأسأل وأراسل، لغاية ما وصلت
إلى (ستانيسلاف جروف) نفسه.. تواصلنا وبعث لي كل كتبه ومقالاته،
والصور واللوحات اللي رسمها مرضاه، وسيديهات وأفلام..
وحاجات تانية كثير.

حصل لي في الوقت ده حاجات في منتهى الغرابة.. منها إني في ليلة
أحلمت، وحلمت إن فيه تعبان قرصني في صباعي السبابة اليمين.. وقمت
من النوم مذعور وخايف.. ثاني يوم وأنا باركن العربية، قفلت بابها جامد
هدا من غير ما أخذ بالي إن صباعي على حافته الداخلية.. وحصلت لي
إصابة شديدة، في نفس الصباغ ونفس مكان الألم.

حاجة ثانية..

من أربع سنين، حلمت إنني في إسكندرية باتعشى مع مجموعة من الأصدقاء.. بعد ما صحيت كلمت واحد فيهم وقلت له على الحلم رد عليا بثقة شديدة: «ده مش حلم.. إحنا كنا لسه قاعدين وبالحلم نعزمك عندنا في إسكندرية قريب».. طبعاً أنا ماكدبتش خبر ورحت لهم.. واخترنا مطعم جميل قدام مسرح سيد درويش علشان نتعشى فيه.. وإذا بالصدفة الغربية اللي مش لاقني لها أي تفسير لغاية دلوقت لقيت المنيو (قائمة الطعام) اللي جاية لي مكتوب أعلى إحدى صفحاتها بالقلم الرصاص، ويخط يبدو إنه مر عليه شهر: M Taha. الليلة اللي أنا مانمتش.. ومن ساعتها والحاجات اللي زي دي بتحصل معاها تقريباً كل ما اروح إسكندرية.

حاجة أخيرة..

إحدى زميلاتي الغاليات عليا جداً واللي عايشة في محافظة أخرى حلمت بيا من عدة سنوات إنني نايم في وضع الجنين.. ولا بس أبيض.. وبانزف من راسي بشكل مؤلم جداً.. رغم إنها ماكانتش تعرف إلا -على أرض الواقع- كنت بامر في الوقت ده فعلاً بتجربة نفسية صعبة وقاسية.. وكنت أتأرجح فيها بين الموت والحياة -نفسياً- دون مبالغة.

أنا لو كملت في سرد الأحلام مش هاخلص.
بس خيليني أحكي آخر ثلاث أحلام.

زميلتي (د.) في مستشفى المنيا الجامعي حكيت لي الآتي: «وانا عندني ٤ سنين حلمت إن عمي بيموت، وكان بيتعذب كثير وهو بيموت.. حكيت الحلم ده لوالدي وماكانش وقتها شايف له أي تفسير.. مرت الأيام والسنين، ورأيت عمي بعينيا وهو بيموت، وكان بيتألم كثير جداً في أثناء موته».

نفس الزميلة حكّت لي حلم آخر: «رأيت نفسي في مكان مظلم
ورأيت أمامي الناس مجتمعين في مكان يشبه السرادق، وأنا واقفة
أمامه، وفجأة رأيت نورًا يمشي بينهم، وسمعت صوتًا ينادي يشبه
صوت أبي، يقول لي أقبل يا... ولا تخافي، فهذا رسول الله (ص)،
فركبت وأقبلت عليه شيئًا فشيئًا، وتلاشى الناس من حولنا».

وأخيرًا.. حكّت لي هي نفسها هذا الحلم الأغرّب: «أنا كنت واقفة
لدام ربنا ما فيش بيني وبينه حجاب، ضوء رهيب وجميل جدًا حواليا..
وربنا كان بيكلمني وأنا كنت واقفة على جبل عالي. لما صحيت من النوم
عمل الفجر كنت مرعوبة جدًا، وطلبت من ربنا إني أنسى الرؤيا.. فلما
لمت وصحيت تاني ما فكترتش كلام ربنا ليا».. الزميلة دي قعدت ١٢
يوم بعد حلمها ده تعاني من التهاب شديد بالعين، تم علاجه بصعوبة.

الأحلام دي بتقول إن وعيك يقدر يسبق الزمن.. أو بكلمات
أخرى.. مع وعيك، يتلاشى الزمن.. وبالمناسبة.. فيه نوعين للزمن:
الزمن الخطّي Linear Time (امبارح يسبق النهارده، والنهارده يسبق
بكره، وهكذا).. والزمن غير الخطّي Non-Linear Time (امبارح
والنهارده وبكرة موجودين في نفس الوقت).. وده الزمن المتحكم في
هذه الحالة من الوعي.

ماستغريش..

لأن ده هو برضه الزمن اللي ربنا بيتكلم بيه في القرآن عن
المستقبل بصيغة الماضي: ﴿وَوَضِعَ الْكِتَابَ فَتَرَى الْمَجْرِمِينَ مُشْفِقِينَ مِمَّا
فِيهِ وَيَقُولُونَ يَا وَيْلَتَنَا مَالِ هَذَا الْكِتَابِ لَا يُغَادِرُ صَغِيرَةً وَلَا كَبِيرَةً إِلَّا
أَخْبَرْنَا بِهَا وَجَدُوا مَا عَمِلُوا حَاضِرًا وَلَا يَظْلِمُ رَبُّكَ أَحَدًا﴾ (الكهف: ٤٩).

وهو ده الزمن اللي بيوصفه كتير من الناس اللي بتعدي بمواقف (الاقتراب من الموت) Near-Death Experience، زي الناجين من الحوادث والعائدين من غيبوبة طويلة. واللي بيعكوا إنهم في لحظات معينة كانوا بيشفوا كل تاريخ حياتهم بيمر من قدام عينيهم زي شريط السينما في ثواني معدودة.

في الحالة دي من الوعي مافيش زمن.. فيه أحداث موجودة كلها على نفس الخط الزمني جنبًا إلى جنب.. علشان كده تقدر تشوف امبارح وبكرة وعشر سنين جاية في نفس اللحظة.. وده جزء من علم كبير جدًا وحديث جدًا اسمه الفيزياء الكمية Quantum Physics، مش وقت الكلام عنه بالتفصيل.

الأحلام دي كمان بتقول إننا على تواصل مع بعض.. وكمان مع من عاشوا في أزمنة وأمكنته مختلفة عنا.. ومنهم الأنبياء.. علشان كده ممكن نشوف ونتواصل مع حد من أهلنا أو أصدقائنا أو أقاربنا أو أحبائنا أو معارفنا المتوفين في المنام.. وده معناه إن الوعي يستمر بعد الموت وده برضه يؤكد علاقته بالروح، اللي بتكتمل في حياة البرزخ، بعد ما جسد صاحبها.

أما الحلم الأخير فيقول حاجة أهم من كل اللي فات: إننا في هذه الحالة من الوعي.. بنكون في حالة وصل مع ربنا سبحانه وتعالى.. بتكون قنوات القرب بيننا وبينه مفتوحة على مصراعها بتتكشف فيها الحجب عنا (بدرجة ما).. وتنصهر فيها طبقات النفس حتى الذوبان بين يديه.

(جروف) ذكر إن بعض مرضاه شافوا في جلساتهم نور (لا يشبه النور المعتاد).. ليه خصائص فيزيائية ماشافوهاش قبل كده في حياتهم.. شديد السطوع.. شديد الجمال.. ماهوش حدود.. ولما أنا أرسلت له الآية من سورة النور اللي بتوصف نور ربنا، الراجل قال لي: هو ده بالبطبط اللي الناس حكوا لي عليه.

الكلام بدأ يشبه الصوفية شوية؟
آه... بالظبط.

مش بس الصوفية.. دي الرهينة.. والبوذية.. وكل مال له علاقة
بالصفية الفلسفية والأخلاقية، ممكن يؤدي لهذه الحالة بشكل من
الأشكال.

الصوفية بتتكلم عن الحالة دي من الوعي بشكل دقيق ومفصل..
وبتفرق بين إنها تكون (حال) مؤقت، أو تكون (مقام) دائم.

بيوصفها الدكتور مصطفى محمود على لسان ابن عربي في كتاب
(السر الأعظم)، بإنها: «حالة تنمحي فيها الصفات المتقابلة، وتنمحي
الجهات، ويكون الجمع بين الضدين. حالة تختفي فيها حدود الزمان
والمكان.. ويصبح الإنسان وعياً مطلقاً، متصلاً بالسر الإلهي الساري
في الوجود.. وقد يختلط الأمر على بعض الصوفية فيصرخ (أنا الله)».

وبيوصفها جروف (اللي اتكلم برضه عن الصوفية) بمعاني شبيهة
هدا في كتابه Psychology of the Future:

– Experiencing the “Mystical moment, which is called” “a
time out-of-time within time, bringing the eschatological
afterworld into the present”.

خوض اللحظة الروحانية.. التي توصف بأنها: «زمن.. منفصل
عن الزمن.. بداخل الزمن»، حيث تأتي الحياة الآخرة من المستقبل إلى
الحاضر.

– A sense of time as pulse, including all times, rather than as
objectified points on a line or circle. At this point, the classical
Western notions of the strict separation of past, present and
future do not adhere.

إحساس بالزمن (كنبضة) تحوي داخلها كل الأزمنة.. وليس
كنقاط متتالية على خط أو في دائرة.. وقتها، لا تنطبق المفاهيم الغربية
المعتادة عن الفصل الحاد بين الماضي والحاضر والمستقبل.

.. A sense of divine Love.

إحساس بالحب الإلهي.

.. Infinity and eternity are experienced in the same time.

الشعور باللا نهاية وبالخلود في الوقت نفسه.

.. Transcendence: reaching very highest and most inclusive or holistic levels of human consciousness.

التجاوز: الوصول لأعلى وأشمل وأكمل مستوى من الوعي

الإنساني.

.. Feeling of union with God

الشعور بالقرب الشديد من الله.

وكان كل هذه الأوصاف من الوصل والقرب والذنو... هي المذكورة في الحديث القدسي: «... وَمَا يَزَالُ عَبْدِي يَتَقَرَّبُ إِلَيَّ بِالنَّوَائِلِ حَتَّىٰ أَحِبَّهُ، فَإِذَا أَحَبَّهُ: كُنْتُ سَمْعَهُ الَّذِي يَسْمَعُ بِهِ، وَبَصَرَهُ الَّذِي يُبْصِرُ بِهِ، وَيَدَهُ الَّتِي يَبْطِشُ بِهَا، وَرِجْلَهُ الَّتِي يَمْشِي بِهَا، وَإِن سَأَلَنِي لِأَعْطِيَنَّاهُ، وَلَئِنِ اسْتَعَاذَنِي لِأَعِيذَنَّهُ...».

اللي ييوصل للحالة دي من الوعي، بتنتفتح عليه أبواب المعرفة بشكل مكثف وغير مسبوق..

ويتنهمر عليه الدلائل والمشاهدات من كل حذب و صوب..
ويكتسب رؤية وبصيرة تعادل قرون من الزمان.

أعتقد مافيش كلام تاني.

ناخذ بقى نَفَسنا شوية.

ونسأل السؤال المهم:

هو أنا أقدر أوصل لكل ده إزاي؟

إزاي أبقى في حالة الوعي الكاملة؟

إزاي أفتح قنوات التواصل بيني وبين كل المخلوقات بالشكل ده؟

إزاي أقرب من ربنا للدرجة دي؟

إزاي أعمل كل ده بشكل دائم من غير ما يكون صدفة، أو حادث

عارض، بيحصل مع آلاف البشر كل يوم؟

والإجابة في الحقيقة أبسط ما يكون، لكنها أعمق ما يكون،

وأصعب ما يكون.

تقدر توصل لكل ده بشكل مستمر غير منقطع.. بإنك تقرب من

نفسك.. وبإنك تصفي روحك.. وبإنك تهذب جسدك.

أبحاث علم النفس عبر الشخصي Transpersonal Psychology،

قالت إن فيه بعض الوسائل اللي ممكن من خلالها، يوصل وعينا للحالة

دي من السمو والكمال:

زي الصيام..

والسفر..

وسماع بعض أنواع الموسيقى..

والبقاء لفترة ما في مكان هادئ معزول عن ضوضاء العالم

وتشويشه..

والسمو الروحي والأخلاقي..

وأخيراً.. العلاج النفسي العميق..

اللي بيقوم بتفكيك نفسك، وإعادة تركيبها من أول وجديد..

واللي هو عبارة عن سلسلة متصلة من الولادات النفسية الجديدة

على كل مستويات الوعي.

وكل ده، في تناول إيدك..

وفي حدود قدرتك..

وفي كامل استطاعتك..

إذَا.. وأخيراً..

جواك سبع طبقات من الوعي (على الأقل)..
جواك مكتبة فيها ذكرياتك وتاريخك وتاريخ عيلتك،
وجيرانك وأصحابك ومجتمعك وبلدك وثقافتك.

جواك أرشيف كبير، فيه كل تاريخ وحضارة بشرية.
جواك موصول بكل الخلق، والمخلوقات، والخالق نفسه.
جواك الأرض والسما.
جواك الكون كله.

شفت نفسك كبيرة قد إيه؟

شفت روحك واسعة قد إيه؟

شفت وعيك متصل قد إيه؟

شفت إن النبات ليه وعي.. والجماهد ليه وعي.. والسما والأرض
والجبال ليهم وعي؟ ومن وعيهم رفضوا الأمانة اللي حضرتك شلتها
بكامل إرادتك.. أمانة الحرية والاختيار.

الكتاب اللي انت ماسكه ليه وعي..

والكرسي اللي انت قاعد عليه ليه وعي..

ده حتى جسمك وأجزاؤه وخلاياه ليهم وعي.. وعندهم ذاكرة..
وهيتكلموا يوم القيامة ويشهدوا بحياتك معاهم.. وعلاقتك بيهم..
واحترامك.. أو عدم احترامك.. ليهم.

أنا دلوقت مش عارف أقول إيه..
كلامي خلص..
وحاسس إن وعيي أنا شخصياً بيتمدد ويوصل لغاية عندك..
ويحوم حوليك..
ويحس بيك..
ويطمنك..
ويقول لك:
دواؤك فيك وما تُبصرُ
وداؤك منك وما تُشعرُ
وتُحسبُ أنك جرمٌ صغيرٌ،
وفيك انطوى العالم الأكبر.

* * *

الموسيقى لسه شغالة؟
طيب غمض عينك.. وسيبها شغالة خمس دقائق كمان..
وسيب نفسك تسرح في الملكوت الواسع..
وتقرب منك..
ومني..
ومن النور..
اللي بيغمرنا كلنا.
...
خلاص..
وقف الموسيقى..
وفتح عينيك..
واحضن نفسك..
واحضن معاك الكون كله..

الباب الثاني

ألعاب نفسية

في معاملاتنا اليومية مع بعض.. وطبعًا في علاقتنا.. بنستخدم -غالبًا- مجموعة هائلة من (الألعاب النفسية).. أحيانًا بوعي وعن قصد.. وأحيانًا من دون وعي أو قصد.

بنستخدم الألعاب دي علشان نوصل لغرض معين.. أو نحس بشعور معين.. أو نوصل للي قدامنا رسالة معينة.

الطبيب النفسي العبقري إيريك بيرن، نشر عام ١٩٦٤ كتاب مهم جدًا اسمه Games People Play أو «الألعاب التي يلعبها الناس». الكتاب ده انتشر واشتهر وأصبح واحد من أفضل الكتب مبيعًا في العالم، وتمت ترجمته للغات عديدة، منها العربية، على يد المرحوم الأستاذ الدكتور عادل صادق، تحت عنوان «مباريات نفسية».

(بيرن) قدر يوصف مجموعة من التفاعلات المتكررة بين كثير من الناس في سياقات مختلفة، زي الحب، والجواز، والشغل، والأفراح، والمآتم، وغيرها.. وسمى التفاعلات دي «ألعاب». وقال إننا بنستخدم الألعاب دي -أحيانًا- مع بعض، علشان نثبت لنفسنا أو لغيرنا شيء، يؤدي لتجنب القرب الحقيقي، والتخلي عن المسؤولية الجادة، وأخيرًا.. إصابة أحد الطرفين (على الأقل) بالإحباط.

(بيرن) عمل تشريح مفصل لمجموعة من الألعاب النفسية، ووضح خطوات كل لعبة من أول (رمي الطعام)، وحتى (إحباط أحد الطرفين)، وأطلق على كل لعبة فيهم اسم معين من عدة حروف هجائية رمزية.

(إيريك بيرن) كان راجل كندي، اتربى وعاش في مجتمعه، اللي ليه عاداته وتقاليده.. وفيه مفاهيمه ومصطلحاته.. وتتبعه ظروفه وسياقاته.

ورغم تشابهه البني آدميين نفسيًا على مستوى معين.. لكنهم حتمًا بيتباينوا على مستويات أخرى.

إحنا في ثقافتنا ومجتمعنا- لينا تركيبة تانية.. وعلم داخلي مغاير..
ونوعيات مختلفة من التفاعلات والعلاقات.. وأيضًا الألعاب النفسية
اللي بنلعبها مع (أو على) بعض.
إحنا في الحقيقة، مالناش زي.

من خلال ملاحظتي العملية، وخبرتي الإكلينيكية، وحياتي اليومية،
لقت إن عندنا- باسم الله ما شاء الله- ألعاب نفسية جديدة تمامًا،
ومتفاوتة كليًا عن اللي وصفه (إيريك بيرن).

إحنا من أول ما بنصحى من النوم ونقول «صباح الخير»، بنبدأ
سلسلة لا حصر لها من المحاورات، والمناورات، والتسديدات، ومخالفات
التسلل، وضربات الجزاء.

إحنا بييجري في دمننا كرات دم بيضا.. وكرات دم حمرا.. وألعاب
نفسية.

علشان كده أنا جمعت عدد لا بأس به من الألعاب النفسية الخاصة
بينا، وهاشرحها هنا بالتوضيح والتفصيل.. وهاعرضها بشكل متدرج،
بنفس تدرج معظم علاقاتنا في الحياة: تعارف.. قرب.. حب.. زواج..
انفصال.. بالإضافة إلى نوعين آخرين من الألعاب المجتمعية.

بعض الألعاب دي بنلعبها مع نفسنا،
وبعضها بنلعبها مع الآخرين في حياتنا،
وبعضها بتلعب معانا من غير ما ناخذ بالنا.

أولى هذه الألعاب مذكورة بالفعل في كتاب (بيرن)،
والباقى كله من صياغتي وتحليلي.

الألعاب دي هي اللي بتخلينا نلف حوالين نفسنا في علاقة ما.. وهي اللي بتخلينا ننسى نفسنا في علاقة أخرى.. وهي اللي بتخلي (العلاقات المظلمة) خطيرة فعلاً.. وبكل أسف.. أكثر ناس بتؤذى من هذه الألعاب هم أكثر ناس مرهفي الحس.. رقيقي القلب.. شفافي الروح.

قبل ما تقول: «طب أعمل إيه لو لقيت نفسي في لعبة منهم؟»
أنا باقول لك:

الألعاب دي مافيهش هزار.. ماينفعش تستمر لحظة واحدة بعد ما تكتشفها. لو لقيت نفسك بتلعب لعبة منهم، أو حد يلعب معاك لعبة فيهم.. تقف، وتقول «لا» بكل قوتك، وتمنع نفسك وغيرك من الاستمرار في اللعبة دي تماماً. وعندك أربع أنواع من «لا» مكتوبين في الباب السابق، اختار منهم زي ما انت عايز، حسب ظروفك وقدراتك وسياق الأمور.. إلى جانب بعض المقترحات اللي انا كاتبها في كل لعبة على حدة.

طبعا فيه عشرات ومئات الألعاب الأخرى غير المذكورين هنا.. كل واحد فينا عنده بروفايله الخاص من الألعاب النفسية.. اللي ممكن بعضها تكون من ابتكاره.. وبراءة اختراعه.

مطلوب منك دلوقت إنك تقرا الفصول المقبلة بعناية شديدة.. وتحفظها عن ظهر قلب.. وتذاكرها كأنك داخل امتحان.. لأنها في الحقيقة هتساعدك في نجاح أو فشل معظم علاقاتك.
ولو اكتشفت ان عندك (أو عند غيرك) لعبة مش موصوفة هنا.. سجلها.. واكتب تفاصيليها.. واديبها اسم أو عنوان.. وضيفها للقائمة.. ويمكن لو حبيت تبعتها لي، علشان ننزلها في الطبقات الجاية من الكتاب.

جاهز؟

فلتطلق صافرة البداية..

لعبة (مالهاش حل)

في اللعبة دي .. بيكون عندك حد مش بيبطل يشتكي .. طول الوقت بيشتكي .. لا يكف عن الشكوى .. ولا يكل ولا يمل منها .. أنا تعبان .. أنا مظلومة .. أنا مش عارفة أعمل إيه .. أنا جربت كل حاجة .. ماحدث حاسس بيا .. ليه كده يا رب؟

بس كده؟
لأ طبعًا.

دا هو بيتعمد يشتكي قدامك علشان حضرتك بكل طيبة تحس بيه .. وتتعاطف معاه .. وتحط نفسك مكانه أو مكانها .. وتبدأ تساعد .. أو على الأقل تبدأ تقترح حلول للمساعدة .. جربت تعمل كذا؟ طيب ليه ما عملتيش كيت؟ طيب إيه رأيك في كذا؟ طيب أساعدك ازاى؟ قول لي بس ازاى وأنا تحت أمرك ..

بس كده؟

برضه لأ .. لغاية هنا مافيش أي لعبة ولا حاجة .. ولغاية هنا دي حاجة عادية جدًا، ممكن تحصل لأي حد فينا كل يوم، ونتجاوب معاهما بشكل طبيعي وجميل ومفيد.

لكن اللعبة تبقى في الخطورة الحاية.

بعد ما حضرتك تندمج في الدور، وتجتهد في التفكير والاقتراح..
والسجيم في عرض وسائل المساعدة.. تلاقي صاحبنا بيقفل كل باب
الذي يفتحه قدامه بالضبة والمفتاح.. ويسد عليك كل طريق انت بترسمه
المحل.. ويحرق لك كل كارت ترميه على الترابيزة.. ويخلي المحصلة دايماً
(سفر).

يعني مثلاً:

- جربت كذا؟

- أنا فعلاً جربت ده ومانفعلش.

- طيب إيه رأيك في كيت؟

- الله.. فكرة حلوة جداً، بس مش هتنتفع علشان كيت وكيت.

- طيب ماتيجي نكلم فلان وعلان؟

- لا مالوش لازمة.. مش هيعملوا حاجة.

- طيب ماتيجي مع بعض نعمل كذا وكذا.

- أنا عارف/ عارفة إنك عاوز تساعدني، بس للأسف الطريقة دي

برهه مش هتناسبني علشان (أي حاجة).

قوم تحتار حضرتك، وتتضايق، وتحس بالعجز وقلة الحيلة.. بعدهم
الزهق.. والخنقة.. والحزن.. وأخيراً تحس.. باليأس.. والذنب.
وتحول في نظر الشاكي- لواحد من الناس العزاز، اللي لما احتجنا
لهم طلغوا أندال بامتياز.

أخطبوط هائل من المشاعر السلبية يتلف حوالين رقبتك في دقائق..
أو ساعات.. أو أحياناً سنين.. لأنك مش قادر تساعد حد هو في
الحقيقة مش عاوز يساعد نفسه.

إيريك بيرن بيسمي اللعبة دي (نعم.. ولكن)، وبيضرب مثال
الست اللي في حجرة انتظار عيادة التخسيس وعمالة تشتكي لي جنبها،
فتلقب صاحبتنا الطعم وتبدأ تقترح عليها شوية اقتراحات.. وتكون
دائمًا إجابة الشاكية (أه.. اقتراح جميل جدًا.. بس مش هينفع علشان
كذا وكذا وكذا). فتأس من كانت تقدم المساعدة وتحس إنه مافيش
أمل.. وتؤكد الشاكية لنفسها نفس الرسالة: مافيش أمل.

ساعات بيسموا النوع ده من الناس Help rejecting complainers
أو الناس اللي مايطلوش شكوى، وفي نفس الوقت يرفضوا المساعدة..
وأنا عارف إنكم بتشفوهم كثير.

طبعا التفسيرات النفسية اللي ورا ده كثير جدًا.. أهمها إنهم عاوزين
يعيشوا دور (الضحية)، ويلبسوا حضرتك دور (المنقذ)، اللي في
الحقيقة مش هيسمحوا له ينقذهم، لأنهم بيعملوا ده علشان يفضلو
زي ما هم.. حاسين باليأس.. والظلم.. والعجز. وده مريح جدًا
مقارنة بإحساسهم بمسؤوليتهم عن اختياراتهم في الحياة.

واللي أعمق من ده هو إنهم خلال رحلة حياتهم (خاصة في طفولتهم)،
تعرضوا لفترات صعبة من الاحتياج الفطري البسيط للاهتمام والشوفان
والدعم النفسي، لكنهم مالمقيوهوش من أقرب الناس ليهم.. فاتعودوا
على السيناريو ده، ومن غلبهم بيكرروه (دون وعي أو قصد).. لأن ده
الشكل الوحيد للعلاقات الإنسانية اللي يعرفوه.. وماعرفوش غيره
أنا محتاج.. والطرف الثاني مش يساعد.

إلى جانب إنهم قرروا يحسبوا أي حد يحاول يساعدهم بالذنب
والتقصير. كأنهم بيقلوا له بعقلهم الباطن: كنت فين من زمان..
خلاص ما عايش ينفع.

أكثر غلطة ممكن تغلطها هنا هي إنك تبلى الطعم، وتدخل اللعبة،
وتبقى طرف فيها.. لأنها هتستهلك طاقتك، وتستنزف فكرك، وتحرق
إحساسك.

دي طبعا مش دعوة لعدم مساعدة الناس، أو عدم التعاطف معاهم
أو الاستجابة لشكواهم.. بالعكس هي دعوة للتعرف على نوعية خاصة
من الناس (لا تكف عن الشكوى). وهي كمان دعوة لتقديم مساعدة
من نوع خاص ومختلف.. لأنهم في الحقيقة مش محتاجين مساعدتك
التي.. هم محتاجين مساعدة متخصصة من حد محترف.. فقط ولا غير.

طيب تعمل إيه لما تقع في أحد هؤلاء (الشاكين رافضي المساعدة):

أولاً.. إوعى تلقط طرف الخيط.. وتبقى طرف في اللعبة. وطبعاً
كل ما تفهم اللعبة دي بدري، كل ما بتوفر على نفسك كتبيير قوي.

ثانياً.. مافيش مانع تعبير له عن إحساسك بيه، وإهتمامك لأمره..
لكن بعدها على طول تحمله المسؤولية وتقول له: أنا فعلاً حاسس
بيك.. أنا بجد مهتم لأمرك.. هتعمل إيه بقى؟

ثالثاً.. النصيحة الوحيدة المطلوبة هنا.. هي إنك تطلب منه التوجه
إلى حد موثوق.. للمساعدة المتخصصة.. بس.. وخلص الكلام..
علشان لو ماخلصش الكلام في نفس ذات اللحظة.

هيعمل إيه؟

أيوه بالظبط.

هيقول لك: ما انا رحت.. وما نفعش.

لعبة (القرب والبعد)

اللعبة دي من أكثر الألعاب النفسية المنهكة جدًا.
تلاقي حد يقرب منك، ويقرب أكثر.. ويعشمك بمزيد من القرب
والود والدفاء.. وأول ما تظمن. وتقرب انت كمان، تلاقيه اتغير من دون
أي سبب واضح.. والمسافة بينه وبينك بعدت فجأة.. وراح الود..
وراح القرب.. وراح الدفا.. ومابقاش فاضل غير العشم.
تمام؟

لا مش تمام..

علشان الحكاية كده ماخلصتش..

دي الحكاية لسه بتبدأ.

لأنك أول ما تبدأ تيأس، وتقول خلاص ما فيش رجا، وتأخذ أول
خطوتين في البعد.. تلاقيه برضه من غير أي مبرر مفهوم. بدأ يقرب
تاني، وياخذ بدل الخطوتين ثلاثة.. والعشم يزيد، والود يرجع.. وتحس
بالدفا والأمان جاي هناك أهو.. وتسبب نفسك.. وتسلم مفاتيحك..
و.. استنى.. استنى.. إنت رايع فين؟

هو عند اللحظة دي بالظبط.. اللحظة اللي تطمّن فيها وتأمّن
بسبب نفسك تقرب منه تاني.. هيلعب نفس اللعبة.. ويبعد فجأة..
أو بالتدريج.. أو أي حاجة.. المهم إنه هيبعد.. ويسيبك لوحك من
جانبه.. زي اللي تايه في الصحرا.. مش طایل موت، ولا حياة.

فيه ناس (بوعي أو من غير وعي) بتحترف اللعبة دي.. لعبة (القرب
والبعد).. لعبة (العشم والصد).. لعبة (الحياة والموت).. وبيمارسوها في
كل وأي نوع من العلاقات.. علاقة حب.. علاقة صداقة.. علاقة عمل..
علاقة زواج.. علاقة تربية.. وغيرها وغيرها. وبيستمتعوا بممارستها
بشكل هو أقرب للإدمان.

اللعبة دي في منتهى الخطورة؛ لأنها بتلخبط الطرف الثاني، وتحيره،
وتملأه أسئلة من النوع الحاد المسنون الجارح، اللي ماهوش إجابة: يا ترى
هو بيحبني واللا مش بيحبني؟ يا ترى هو عاوزني واللا مش عاوزني؟
طيب أنا عملت إيه؟ هو أنا زعلته في حاجة؟ طيب هو بيعمل كده
إيه؟ هو فيه إيه؟ لغاية ما يشك في نفسه أو تشك في نفسها، وتتردد في
أفعالها.. القرب مؤذي.. والبعد برضه مؤذي.. ويتتهي الأمر إما بشلل
السي وانطفاء روجي.. وإما بالتحول إلى قطعة صغيرة من الشطرنج في
يد ذلك اللاعب المحترف.

على الجانب الآخر.. اللي بيلعب اللعبة دي بيكون غالبًا اتعرض في
حياته لصدمة نفسية بشعة من حد كان قريب منه جدًا (من أول أبوه
وأمه لغاية أي حد تاني).

الصدمة دي خلته مقسوم نصين من جواه..
نص عاوز يقرب.. ونص خايف من القرب.

نص يقرب علشان يشبع احتياجاته النفسية ..
ونص يبعد علشان خايف من تكرار الصدمة ..

نص نفسه يقرب لغاية ما يدوب في الطرف الثاني ..
ونص نفسه يبعد أحسن يدوب فعلاً وما يلاقيش نفسه بعد كده ..

نص عاوز يقرب لغاية ما ييلع ..
ونص عاوز يبعد أحسن يتبلع ..

خناقة نفسية داخلية عنيفة .. بيدفع تمنها كل حد يعدي جنب هذا
الشخص المسكين، المحتاج جداً .. واللي خايف من احتياجه في الوقت
نفسه . محتاج جداً للناس ، وخايف منهم بنفس الدرجة . محتاج جداً
لأي حد ، وخايف جداً من كل حد .

اللعبة دي صعبة ومتعبة ومرهقة .. عاملة زي الجبل .. اللي يرخس
شوية لغاية ما تتظمن انه ساب .. بعدها يتشد شوية لغاية ما تخاف إنه
يتقطع .. ويتكرر ده تاني وتالت وعاشر .

علشان كل ده ..
من هنا ورايح ..
اتعلم إنك ماتسمحش لحد يلعب اللعبة دي تاني معاك ..

لأن التمن هنا ..
هو انت .

لعبة (الحبيب الشبح)

طبعًا فيه أنواع وأشكال كثير من الندالة في بعض علاقات الحب.. اللعبة دي بتمثل أحد أنواع الندالة اللي شفته كثير مؤخرًا.. ممكن نسميه (الحبيب الشبح).. وهافترض - مجرد فرض - إنه رجل.. رغم إنه ممكن يكون بنت في بعض الأحيان.

واحد لطيف وظريف.. يتعامل معاكي بشكل مختلف عن باقي البنات.. يبص لك كثير لو كتتي في وسط أصحابك أو حتى لو حدك.. يسلم على كل زمايلكم في المكان بطريقة، لكنه يسلم عليك انتي بطريقة تانية.. يحاول يتكلم معاكي بزيادة حبتين.. فيه من ناحيته اهتمام واضح لكن من غير ما يصرح بأي مشاعر.

مش بس كده..

ده يتابعك على الفيس بوك.. ويبعت لك فريند ريكويست.. ويعلق على كلامك وبوستاتك بمنتهى اللطف.. ويبدأ يكتب كلام موجه ليكي من بعيد لبعيد.. أو يحط أغاني تحسي إنها ليكي.. ولايكات وشير للصبح.

برضه مش بس كده..

ده يبدأ يقرب.. ويقرب.. ويسألك عن حياتك الشخصية باهتمام
وبعدين يكلمك عن حياته وظروفه.. ويشاركك مشكلاته ومواقفه
واتصالات.. ورسائل.. لغاية ما تصدقي بما لا يدع أي مجال للشك
الراجل ده بيحبك.. وعاوز يرتبط بيكي النهارده قبل بكرة.

بس يا ستي.. خلاص.

خلاص إيه؟

خلاص.. خلصت الحكاية.

صاحبنا ده أول ما يلاحظ إنك أخذتي الموضوع جد.. وبدأتي تطلعي
منه بشكل واضح إنه يقول.. ويعبر عن مشاعره ويسميها.. ويكلف
خاطره وياخد خطوة لقدام.. تلاقيه زجع خطوتين لورا.. وقال لك
لا.. الظاهر إنك فهمتيني غلط.. أنا باعاملك عادي جداً.. إحنا قرييين
آه، بس مش بالشكل اللي وصل لك. أنا باحب أتكلم معاكي كأصحاب
أو إخوان.

- طيب والكلام والأغاني والتعليقات واللايكات؟

- عادي.

- والنظرات والهمسات والمكالمات؟

- إيه المشكلة؟

طبعا لو كانت الحدود بينكم دابت شوية ووصلت للخروج
والفسح ويمكن أكثر.. يبقى هيقول لك آه أنا باحبك فعلاً، وباحب
أكون معاكي، وباتبسط في وجودك، بس مش هينفع أكثر من كده.. مش
هينفع نتجوز.. الجواز هيبوظ اللي بينا.. خرينا كده أحسن. أو أنا عندي
مرض خطير يمنعني من الجواز.. أو «إنتي تستاهلي حد أحسن مني».

فيه نوع أخطر وأخطر.. اللي هو يحب ويتقدم ويخطب.. وقبل الفرح
بشوية أيام (وأحياناً ساعات).. يخلع.. يختفي.. بنخ!

ده مش حد يقرب ويبعد زي اللي في اللعبة اللي فاتت.. ده حد
يهدوب ويختفي.

باختصار شديد.. الراجل اللي زي ده مكتوب على جبينه (بالخبر
السري) يافطة كبيرة جداً: (أنا مش بتاع مسؤولية).

واحد بيوصل رسايل نفسية وعاطفية بالحب والاهتمام، لكن من
أعت لتحت؛ علشان مايقاش مسؤول عنها عند اللزوم.

بيتعهد إنه يمشي على الحبل في علاقته بيكي علشان يتجنب الوحدة
من ناحية، والارتباط من ناحية ثانية.. ومايقاش مسؤول عن مصير
العلاقة دي.

تصرفاته بتقول كلام.. ولسانه بيتبرأ منه بكل جبن.. علشان حتى
مايقاش مسؤول عن كلامه.

البنسي آدم اللي زي ده عامل زي الطفل الصغير.. عاوز يرضع
ويشبع ويتبسط وبس.. من غير ما يدفع أي تمن.

عاوز شوية تدليك عاطفي بالليل.. ومساج نفسي بالنهار.. وكل
واحد يروح لحاله بعد كده.

يحرك فيكي أحلى مشاعر.. ويعيشك في أروع أحلام.. لكن دوره
ينتهي لغاية هنا.. لأنه مش قد اللي بعد كده.

الراجل ده عمره ما هيتحمل مسؤولية علاقة حقيقية .. وده واضح
من الأول .. بس انتي ماكتيش واخدة بالك .. واحتمال لما أخذتي بالك
عملتي نفسك مش واخدة بالك .. وتبقي كده شاركتي في اللعبة .

الراجل اللي زي ده ماينفعش تأتمنيه على نفسك .. وماينفعش
ترتبطي بيه .. وماينفعش تتجوزيه؛ لأنه شخص غير مسؤول .

الرسالة اللي باوصلها لحد من خلال تصرفاتي .. مسؤولية .
المشاعر اللي باحركها جوه حد .. مسؤولية .
الكلمة والنظرة والتعليق واللايك .. مسؤولية .
لأن ليهم معنى .. ووراهم هدف .

طبعا فيه أسامي حلوة وأوصاف شيك للراجل ده .. زي إنه عنده
فير اوف كومتمنت (Fear of commitment)، أو عنده كوميتمنت
إيشوز (Commitment issues) .. بس أنا أفضل تسميته (الحبيب
الشبح) .

هاتي بقى كشاف نور قوي ..
وافتحيه على الآخر ..
ووجهيه لعنيه مباشرة ..
وقولي له:
لأ ..

كفاية ضباب لغاية كده ..
يا نطلع للنور سوا ..
يا تحليك في الضلمة لو حدك .

لعبة (الحب المستحيل)

اللعبة دي بيلعبها اتنين في منتهى الذكاء.. وفي منتهى الغباء في نفس الوقت.

هنا فيه اتنين بيحبوا بعض.. بيدوبوا في بغض.. مش قادرين يستغنوا عن بعض.. لكنهم في نفس الوقت مستحيل ياخدوا خطوة واحدة لقدام في علاقتهم (في ثقافتنا ومجتمعنا اسمها مستحيل يتجوزوا).

يعني فيه صعوبات وعوائق كثيرة جداً واقفة في طريقهم، وهم بيحاولوا يتغلبوا عليها دون أي جدوى.. وخلي بالك من (دون أي جدوى دي).

طيب ودي فيها إيه؟
فين اللعبة؟

أقول لك أنا فين اللعبة.

الأول مهم نعرف إن أي لعبة سيكون فيها مستويين .. مستوى واعى (في العقل الظاهر) .. ومستوى غير واعى (في العقل الباطن) .. تصور بقى إن الاتنين دول على مستوى (عقلهم الواعى) عاوزين يتخطوا ويتجوزوا وكل حاجة .. بس من تحت لتحت . وعلى مستوى عميل جداً من (عقلهم الباطن) .. هم مستعدين يعملوا أي حاجة علشان مايتجوزوش .. وأول حاجة عملوها علشان مايتجوزوش هي (اختاروا بعض .. تصور!

أنا شايف دلوقت حواجبك المرفوعة .. وعيونك المبرقة .. ومقدر جداً حجم غرابة ودهشة الكلام .. بس خليك معايا .

تحيل واحدة مرعوبة من الجواز .. عندها تخوفات كثيرة جداً منه .. شافت علاقات زواجية فاشلة جداً (واحتمال علاقة أبوها وأمها تكون منهم) . سمعت عن بلاوي وبلاوي في البيوت .. كرهت الجواز والمتجوزين وسيرتهم .. لغاية ما قررت في أعماق أعماقها إنها مش ممكن تتجوز .. وبدأت تنفذ قرارها ده فعلاً .. بس بشكل غير واعى .. أو غير واعى قوي يعني .. تمام؟ تمام .

إيه بقى هي أذكى وأمهر طريقة تقدر تمارس بيها قرار عدم الزواج؟

الطريقة دي هي لعبة (الحب المستحيل) .. يعني تختار واحد تحبه وتقرب منه وتدي له قلبها .. بس الواحد ده عنده ظروف معينة تمنعه من إنه يتجوزها .. منها مثلاً إنه يكون متجوز ومخلف وعنده عيال .. أو (في ثقافتنا) يكون من دين غير دينها .. أو يكون فيه فرق سن شاسع بينهم وبين بعض .. أو يكون مش مستعد للجواز دلوقت .. أو عنده أي حاجة تخلي زواجه بيها مستحيل .. أو تخلي أهلها يرفضوه .. أو أهله يرفضوها .. أو الاتنين مع بعض .

طلب هي تعمل كده في نفسها ليه؟

علشان هي مش قادرة تواجه نفسها بقرار عدم الزواج اللي جواها..
اللي عملت اللي عليها قدام نفسها.. أهوه.. أديني حبيت وسلمت
اللي بس الموضوع صعب. أديني قاومت وحاربت علشان اللي
ياهيه.. بس المشكلات أكبر من قدرتي.. أديني صبرت واستحملت
واستحييت.. بس ما نلتش أي حاجة.

طبعا أنا ما عنديش أي مشكلة مع فرق السن أو الثقافة أو المستوى
الاجتماعي أو غيره.. بس أنا هنا باتكلم عن اختيار ده كجزء من قرار
الاحتمالي (بعدم الزواج)، مش اختياره الواعي والمسؤول (من أجل
الزواج).

واحد تاني عنده عقدة من الجواز.. أو خوف من الالتزام والتقييد
والمسؤولية.. أو زي ما قولنا Fear Of Commitment.. بس عنده
احتياجات نفسية وعاطفية للحب والود والاهتمام.. فيقرر برضه من
جواه إنه ما يتجوزش.. وتكون طريقته الذكية جداً (والغبية جداً في
الوقت نفسه) هي إنه يختار واحدة مستحيل ينفع إنه يتجوزها.. أو إنها
الجوزه.. ويا سلام لو كانت هي كمان واخدة نفس القرار.. وبتلعب
المس اللعبة.. يبقى كده كملت.. واتظبطت.. وياللا بينا نحب بعض
من فوق.. ونموت الحب ده من تحت. نحارب ونقاوم من فوق..
ونسدور على صعوبات أكثر من تحت.. نتقطع ونتعذب من فوق..
ونمزج ونعمل (دماغ عذاب) من تحت.

اللعبة دي عاملة بالظبط زي أعراض الهستيريا.. اللي بتكون عند حد
مليان حزن وقهر وغضب.. فيقرر عقله إنه يشل إيده مؤقتاً.. فيبقى قدام
نفسه اتعصب وغضب وعمل اللي عليه.. بس عدم قدرته على تحريك
إيده هو اللي منعه من أخذ حقه..

أو اللي عاوز يصرخ بصوت عالي ويعبر عن غيظ وحنق.. فيقرر عمله
إنه يكتم صوته ويوقف لسانه شوية.. فيبقى برضه حاول قدام نفسه يطلع
الي جواه.. بس صوته راح.. وماقدرش يقول كلمة واحدة.. معذور..
مش بإيده.. وسيلة نفسية دفاعية مفيدة جدا.. بس في وقتها.. ومناسبتها.

لكن اللي مش مفيد أبداً هو إننا نعمل ده مع بعض.. باتفاق خلف
غير معلن.. هدفه تعطيل الحياة.. ووقف الحال. ونقول لنفسنا إننا
بنحب بعض.. وهنموت على بعض.. ونعمل كل اللي علينا.. واحنا
من جوانا مش عاوزين نتحرك من مكاننا.

أصعب ما في اللعبة دي هو إن اللي يلعبوها بيتمسكوا ببعض
جداً.. بيكونوا ما صدقوا لقيوا بعض.. وده طبعاً لأنهم بيحققوا
قرارات بعض.. ويكملوا الأجزاء الناقصة من سيناريوهات بعض
المكتوبة داخلهم من سنين..

والأصعب والأصعب إن هم الاتنين بيعملوا ده وهم مش واخدين
بالهم.. ومش واعين بيه على الإطلاق.. وهنا الغلب الحقيقي.

الغلب الحقيقي هو إنهم بيضيعوا سنين طويلة من عمرهم.. وهم
فاكرين إنهم ضحايا لظروف قاسية..

وانهم بيحاربوا ويقاوموا ويتحاليوا ويلفوا ويدوروا.. وهم
بالظبط زي اللي بيضرب دماغه في الحيط.. وانهم متوهمين إن قصتهم
هي إحدى أصعب قصص الحب والرومانسية في التاريخ. وفي الحقيقة
كل ده سراب.

لعبة (أمل حياتي)

معقول؟

هو الأمل ممكن يكون لعبة؟

آه طبعًا.. كل حاجة ممكن تكون لعبة.. لما تتعمل في غير مكاهم
وفي غير وقتها.

الأمل شيء جميل ومطلوب ومهم.. الأمل بيهدئ من وطأه
الأيام.. ويخفف من حدة الليالي.. الأمل بيعث على الحياة.. بس لما
يكون في توقيته وموضعه.

لما يكون عندك أمل إنك تنجح السنة دي.. رغم الصعوبات
والتحديات.. غير لما يكون عندك أمل إنك تصحى بكره الصبح تلاقى
نفسك صغرت عشر سنين..

لما يكون عندك أمل إن زميلتك في الجامعة تعجب بيبك وتحبك..
غير لما يكون عندك أمل إن سكارليت جوهانسون تتصل بيبك دلوقت
علشان تتعرف عليك. إنت تستاهل طبعًا ماقلناش حاجة.. بس ده
مش هيحصل.

الأمل لا يعني الانفصال عن الواقع.. ولا يعني رفع قدميك بعيداً عن الأرض، والتحليق في السماء بلا أجنحة.. لأنه ساعتها مايقاش أمل.. يبقى وهم.. يبقى هراء.. يبقى لعبة نفسية بالغة التعقيد.. لا للهوى إلا بإحباط بالغ.. وشعور عارم بالعجز.

من أصعب الأمثلة اللي شفت فيها اللعبة دي، هي الفتاة المرتبطة بشخص سيكوباتي (مؤذي جداً).. هي بتدوق المر حرفياً كل يوم.. وتتعذب بكل أصناف العذاب النفسي والبدني بلا انقطاع.. مرة يتلاعب بمشاعرها.. مرة يوحى لها بصفات سيئة وغير حقيقية عن نفسها (وهي تصدقها).. مرة يحسسها بالذنب علشان يملكها.. مرة يقلل من شأنها علشان يسيطر عليها.. مرة يبكي ويوس إيديها ورجليها علشان يصعب عليها ويخليها تتعاطف معاه.. ومرات يهددها بالمهجر أو الانفصال.. وأحياناً بالقتل أو الانتحار.

تيجي هي رغم كل ده.. يبقى عندها أمل فيه.. وتبقى مستنية إنه يتغير.. ويتحسن.. ويتصلح حاله.. وهو ما لم يحدث في التاريخ من قبل.. ولن يحدث أبداً.

جلين جابرد العالم النفسي المعروف، يحذر في كتابه (Psychodynamic Psychiatry in Clinical Practice - الطبعة الخامسة، ٢٠١٤) الأطباء والمعالجين النفسيين من هذا النوع من السيكوباتيين.. يقول لنا إوعوا تستعملوا معاه طرق العلاج التقليدية؛ لأنه ممكن يتلاعب بيكم ويغيركم أنتم شخصياً للأسوأ.. إوعوا تدخلوه مجموعة علاجية.. هيبوظها ويفر كسها ويؤذي أعضاءها.. إوعوا تاخذكم الحماسة والجلالة وتلعبوا معاه دور المنقذ.. مش هتلاقوا اللي ينقذكم منه بعد كده.. السيكوباتي علاجه هو استئصاله من المجتمع.. وحجزه في قسم نفسي بمؤسسة خاصة بتأهيل المجرمين.. فقط.. ولا غير.

تيجي صاحبتنا المسكينة بقى، وتقول لك ده هيتغير.. أنا عندى أمل.. أنا هاقف جنبه وأساعده.. أنا معاه للآخر.. مش انت يا دكتور قلت إن ممكن علاقة واحدة في حياة البنى آدم تشفيه وتعالجه وتغيره؟ آه يا ستي قلت.. بس جيت عند ده بالذات، وقلت: «يا إما تاخدي على الدكتور النفسي فوراً.. أو.. مش هاقول لك خدي ديلك فى سنانك واجري.. لا.. سيىبي ديلك.. واجري بكل سرعتك». وال أنتي ماتعرفيهوش.. إن الدكتور النفسي مش هيعرف يعالجه.. وكلكم هتصابوا بالإحباط.

نفس الكلام مع اللي حاطة أمل في الارتباط بشخص عنده مشكلة في تحمل المسؤولية، ومش عاوز يتعالج، ومش بيسعى للتغير، أو اللي كل شوية يبعد ويقرب.. أو اللي بيعت رسايل مزدوجة.. وهي ما زالت مصرة إنه لسه فيه أمل.

الأمل المبالغ فيه يؤدي إلى الإحباط.

من الأمثلة الثانية الصعبة جداً هي إنك تحط أمل إن وضعك المادي أو الاجتماعي يتغير.. وانت مش بتسعى لكده.. ومعدكش خطط واضحا لكده.. ومافيش أي مؤشرات حقيقية ولا واقعية عليه.. وتفضل قاعد مكانك مستني جنب الحيط.. وباصص في الفراغ.. والمشكلة تبقى أنك لو فيه معاك عيلة أو ناس مسؤولين منك.. عندهم حلم متوقف على حلمك.. وأمل مبني على أملك.. وكلكم في انتظار المعجزة.. اللي مش هتحصل أبداً.

الأمل غير المبني على قواعد ثابتة، يؤدي إلى العجز.

إنت عارف كام واحد في مصر كان عنده أمل إننا نفوز بكاس العالم بعد صعودنا إليه بطلوع الروح، مش إننا بس نطلع الدور الثاني، ويقول لك: أدينا بنحلم.. خلي عندك أمل؟ هو فيه حاجة بعيدة على ربنا؟ لا طبعاً.. مافيش حاجة بعيدة على ربنا.. بس ربنا عمل لكل حاجة مقادير وأسباب.. حتى الأمل.. حتى الحلم.

الأمل في غير موضعه وهم..

الأمل في غير توقيتته حماقة..

الأمل في غير جرعته.. قد يكون ساماً.

لعبة (مين هيمسك الكونترول؟)

أقدر أقول -وبكل أسف- إن معظم العلاقات اللي بندخلها في حياتنا،
تكون اللعبة دي جزء منها.. وهي لعبة قائمة على سؤال بسيط جدًا:
مين اللي هيمسك في إيدك الكونترول؟
مين اللي هيتحكم في الثاني؟
مين اللي هيمشي الثاني على مزاجه؟

فيه أشكال ظاهرة وواضحة لممارسة اللعبة دي، وفي مجتمعنا تكاد
تكون -بكل أسف برضه- بديهية، بمجرد ما واحد يرتبط بواحدة..
بدأ يقول لها اسمعي كلامي.. البسي كذا وماتلبس كذا.. كلمي
دي وماتكلميش ده.. غيري صورة بروفايلك على الفيس بوك وحطي
النور.. ماتأخريش بعد الساعة عشرة الصبح.. أقصد عشرة بالليل..
عندك ماتشوفش إلا النور.. وطبعًا لو هي تجرات واعترضت أو حتى
بالت.. يقول لها أنا مش باحب المناقشة.. ماتتعاملش معايا الند للند.
أو اختلفت معاه.. يبقى المركب اللي ليها ريسين تغرق.. ولازم نتفق
في دلوقت إنه من حقت تقولي رأيك لكن كلامي أنا اللي يمشي في
الأمر.. مش أنا الراجل؟

طبعًا لو راجل (أقصد ذكر) حويط شويتين، يقول لك أنا آخذها صغيرة، ماعندهاش خبرة، علشان أربيها وأشكلها على إيدي.
فيه طرق تانية للممارسة لعبة الكونترول.. بس أخفى وأكثر دهاء.

زي إنك تحسس شريكك في العلاقة بالذنب.. فيبقى مضطر طول الوقت إنه يعمل اللي يرضيك.. دي بيستخدمها أحيانًا الآباء والأمهات مع أولادهم.. ويستخدمها بعض النرجسيين والسيكوباتيين في علاقتهم.

وزي إنك تهدد الطرف التاني إنك هتهجره وتسيبه.. أو هتؤذي نفسك أو هتؤذيه.. فيقلق ويخاف.. ويمشي على العجين مايلخبطهوش.

وفيه طريقة عجيبة غريبة، وخبيثة جدًا في نفس الوقت:

- قولي لي الباسوورد بتاع تليفونك!
- ليه.. هو أنا أفدر أطلب الباسوورد بتاع تليفونك؟
- آه طبعًا.. أهى خديها.
- ماتكلميش فلان وفلان علشان مش مستريح لهم.
- إيه ده.. ولو أنا طلبت منك الطلب ده هتعمل إيه؟
- هاعمل كده طبعًا.. ده حقك زي ما هو حقي.

الطريقة دي هي إني علشان أحترق خصوصيتك، أكشف لك (بعض) أسراري.. وعلشان أتحكم فيك، أسبيك تتحكم في (قليل) مما يخصني.. يعني أرمي لك الطعم.. علشان أملكك.. بتحصل كلام بين المخطوبين واللي بيعجبوا بعض جديد.. إطار خارجي من المسار والمراعاة.. داخله انقضااض والتهام شديدين.

بعض البنات بمجرد ما تتجوز.. تصاب بهوس الكونترول.. ويبقى
بها صراع نفسي محتدم حوالين (مين هيتحكم في الثاني؟).. وتختار
الذكي طريقة على الإطلاق في كسب هذا الصراع.. وهي إنها توحى
لموزها إنها بتسمع كلامه.. اللي هو أصلاً كلامها، واللي هي مرتباه،
وراسها، ومخططة له، بينها هو يتباهى بذكورته.

طبعا الدلع.. واللعب على وتر العلاقة الحميمة (كمكافأة).. والنكد
اليومي الأزلي (كعقاب).. بينهم الصراع ده تمامًا، بالضربة القاضية.

أما عن استخدام الأطفال في التحكم في أبوهم، وإقصائه هو شخصياً
عن تربيتهم، وحصر دوره في الإنفاق والمتابعة عن بعد.. فحدث ولا حرج.

الستات اضطرت إنها تبتكر وتطور لنفسها عدد هائل من الألعاب
الفسيية، لمجرد العيش بسلام في هذا المجتمع العظيم.

بيوحوا للرجالة إن الكونترول في أيديهم.. في حين إنهم بيحركوهم
زي الماريونيت.. والاتنين في الآخر ضحايا.

العلاقات مش خناقة..

مش صراع..

مش حرب.

سيبوا الكونترول..

وامسكوا إيد بعض.

لعبة (خُد وخُد)

هنا.. إنت قدام حد بيدي وبس.. بيدي طول الوقت.. بيدي على
الفاضية والمليانة.. ومش بس بيدي للناس اللي بيعجبهم ويحبوه.. لا..
ده بيدي أكثر للناس اللي هو واثق انهم مش بيعبوه.. الناس اللي بيده
وبينهم خلاف.. اللي كل شوية يتخانقوا معاه ويتخانق معاهم.

طيب وفيها إيه؟

فيها إيه لما الراجل يدي ويصرف على مراته وولاده بكرم وسخاء؟

فيها إيه لما الست تدي وتتعب نفسها في شغل البيت، وتضحى في

سبيل جوزها وعيالها؟

فيها إيه لما أتصل بحد فيه بيني وبينه مشكلة واسأل عليه باهتمام شديد؟

فيها إيه لما اضحك في وش صاحبتى اللي أنا لسه متخانقة معاها امبارح؟

طبعا ما فيهاش أي حاجة.. بالعكس.. كل ده كويس جدا

ومليان طيبة وكرم وحسن معاملة وأخلاق.. بس لو وقف لغاية هنا..

وماكانش هو الخطوة الأولى للعبة نفسية خطيرة جدا.

إزاي؟

لما الرجل اللي بيصرف على مراته وولاده بكرم وسخاء يبدأ يقول
«طالما أنا باصرف عليكى، يبقى تسمعي كلامي»، أو «ما تطليش
أنا أساعدك في البيت.. أنا باشتغل أهو وباجيب فلوس»، أو
«أنا اللي باصرف عليكى». وبعدها
يقول لأولاده: «طول ما انت في بيتي وباصرف عليك يبقى تسمع
الكلام»، أو «لما تشتغل وتصرف على نفسك ابقى اعترض على
كلامي»، أو «لما تتجوزي وتلاقي حد يصرف عليكى، ساعتها يبقى
رأى».

لما يقول ويعمل كل ده.. تبقى الحكاية مش عطاء ولا كرم ولا
سخاء.. الحكاية تبقى «مَنْ» يتبعه أذى، ويكون كل الصرف والكرم
والسخاء (ده لو كانوا بيصرفوا أصلاً)، هو الخطوة الأولى من لعبة بالغة
الدهاء، خطواتها الثانية هي الإذلال والاستغلال.

لما الست اللي بتتعب نفسها في شغل البيت، وتضحى في سبيل
بورها وعيالها.. تيجي تقول لهم: «ما حدش فيكم حاسس بيا»، «أنا
صعبت بنفسي علشانكم»، «أنا ضيعت حياتي علشان خاطركم»، «أنا
فقدت نفسي بالحياة علشان تعيشوا». يبقى الموضوع مش تعب ومجهود
بله لوجه الله.. لأ.. ده فسخ في منتهى الذكاء.. مستني حضرتك تقع
به بكل أريحية.

لما أتصل بحد فيه بيني وبينه مشكلة واسأل عليه باهتمام شديد..
«ممكن يكون فعلاً كرم أخلاق مني.. بس لما آجي تاني يوم.. وأقول:
«أنا باسأل عليه وهو مش بيسأل عليا»، «ده أنا اللي بدأت بالسلام،
هو لا»، «أنا كده عملت اللي عليا، وهو زي ما هو».. يبقى دي لعبة.

لما أضحك في وش صاحبتى الي أنا لسه متخانقة معاها امبارح ..
واقعد مستنية منها تتغير كده في ثانية .. كأن مافيش حاجة حصلت ..
وأقول: «أهو .. شوفوا باسلم عليها وهي مكشرة ازاي؟»، «قلبي
أبيض .. وهي قلبها اسود جدًا»، «هي عاداتها واللاهتشتريها» .. يبقى
ضحكتي ماكانتش صافية .. وكانت جزء من لعبة (خُد وخُد) .. الأول
(خُد عطاء) .. وبعدين (خُد أذى).

مهم نعرف إن اللي بيعمل اللعبة دي - وغيرها - مش لازم يكون واعى
بيها .. أو ناوي عليها بوضوح .. يعني مش لازم الراجل وهو يبصر ف
يكون عارف إنه هيجي بعد يومين ويذل مراته وولاده بالصراف
عليهم .. ومش لازم الأم وهي بتهلك نفسها في سبيل ولادها، تكون
ناوية إنها تمنّ عليهم باللي بتعمله علشانهم .. ولا لما أتصل بصاحبي الي
فيه بيني وبينه مشكلة، أو أضحك في وش صاحبتى الي متخانقة معاها
امبارح، أكون قاصد أو قاصده ألعب اللعبة دي .. كل ده بيحصل دون
وعى، ودون قصد، ودون نية .. وغالبًا الطرفين بيكونوا أغلب من
الغلب .. بس مش لاقين حاجة تخلي لوجودهم معنى، ولا حاجة تهر
لهم اللي بيعملوه .. غير شوية الألعاب النفسية الخاية دي.

وأدينا بتعلمها ..

علشان نكتشفها أول بأول ..

ونوقفها ..

ونخرج منها فورًا.

فورًا.

لعبة (زعلان بيني وبين نفسي)

دي بقى لعبة مُحيرة جدًا للطرف الثاني فيها.

اللي هو فجأة.. ومن دون سابق إنذار، تلاقى مراتك أو خطيبتك المفجرة، ومش على طبيعتها.. كلامها قليل.. لو اتكلمت، نظراتها الحريسة.. لو بصت، فيه حاجة غلط.. بس انت مش قادر تحدها أو اسميها.

- فيه إيه؟

- مافيش.

- طيب مالِك؟

- ماليش.

- هو أنا زعلتِك في حاجة؟

- لا خالص.

- أمال فيه إيه؟

- مافيش.

وارجع نلف الدائرة دي من أولها تاني، لعدة ساعات.. وأحيانًا لعدة

الرجال بقى لما يلعبوا اللعبة دي بيلعبوها بطريقة أصعب شوية
طريقة (الكهف).. بمعنى إنه ينسحب من العالم في هدوء.. ويقرر إنه
ينعزل ويتقوقع داخل نفسه.. أي صوت ممكن يزعجه.. أي حركة
ممكن تؤرقه.. أي وسيلة للتواصل معاها تنتهي بالفشل.. وربما العنف
- سيبيني لوحدي شوية.

- ليه؟

- محتاج أبقى مع نفسي.

- طيب وأنا وجودي جنبك مش بيخفف عنك؟

- يا ستي بيخفف وكل حاجة.. بس مش دلوقت.

- طيب إنت معايا؟ إنت هنا؟

- لا.. اعتبريني مش هنا.

طبعاً من حق كل واحد يكون ليه وقته الخاص، ومساحة
الشخصية.. بس اللي بيحصل في اللعبة دي (بنسختها الأثوية)، هو
إنك بتصعبى الأمور على شريكك في العلاقة، وترهقيه نفسياً جداً
لغاية ما يزهق ويفقد الأمل، أو يفقد أعصابه. كأنك بتختبريه وتقيس
مدى تحمله، وقدرته على الصبر، أو التخمين.

واللي بيحصل في اللعبة دي (بنسختها الذكورية)، هو إنك بتجسس
شريكك بالرفض.. إنها مالهش لازمة.. وان وجودها مش فارق، بل
قد يكون مزعجاً. كأنك عاوز تستأصلها من حيز حياتك.. ولو لبعض
الوقت.

فيها إيه لما نكون واضحين.. فيها إيه لما أكون زعلانة.. فأفهم
المسافات.. وأقول أنا زعلانة من إيه.. علشان أفتح الباب للمناقشة
والتفاهم؟

فيها إيه لما أحاول أصيغ مشاعري في كلام بسيط.. يقرب شريكتي
الي، ويحسسها بيا، ومايقطعش خيوط الوصل ما بينا؟

أقول لك أنا فيها إيه.. وليه بنضطر أحياناً نلعب اللعبة دي.

إحنا بنكون محتاجين حد يحس بينا.. بس من غير ما نقول..
حد يسمعنا من غير ما نتكلم، ويجاوبنا من غير ما نسأل.. بالظبط زي
الطفل الصغير.. اللي اتعود إن أمه تحس بيه وباحتياجه، وألمه، وجوعه،
وعطشه، وحزنه، وزهقه.. فتضمه لحضنها، وتطمئه، وتشبعه.. من
غير ما ينطق ولا حرف.

بس الحقيقة إن دي أمنية طفولية جداً.. وطريقة بدائية للغاية..
وانفعش تستمر طول العمر.

إحنا دلوقت كبار.. ومهم نتعامل مع نفسنا ومع غيرنا بشكل
مختلف.

لما أكون حزين أقول أنا حزين.. لما أكون متضايقه أقول أنا متضايقه..
لما أكون محتاج حد يحس بيا، أو صف مشاعري.. لما أكون محتاج حد يقبلني
زي ما أنا، أطلب من اللي معايا إنه يقبلني زي ما أنا.

ماستنيش من حبيك أو خطيبك أو جوزك اللي كنتي بتستنيه من
أوكسي أو من أمك.. وماتتوقعش إن كهف الوحدة المظلم اللي بتدخله
هكون بمثابة رحم والدتك الآمن الهادئ.

عبروا عن نفسكم.. واحتاجوا.. واطلبوا.. وخذوا حقيكم.
فأحبال الوصل مهترئة بما فيه الكفاية.

لعبة (اتغير بس خليك زي ما انت)

خلال الفترة اللي فاتت لاحظت ملاحظة غريبة جداً.
تيجي لي واحدة بتشتكي مر الشكوى من جوزها: بيعاملني
وحش.. مش بيحترمني.. مش بيعبس بيا.. قاسي.. أنا ني.. متسلط
مسيطر.. وساعات (بيخونني) أو (يعرف واحدة عليا).

باطلب منها تخلي جوزها يجي لي.. وياكون عارف إن ده صعب
جداً وأحياناً مستحيل.. لكن في الحقيقة بعضهم بييجي فعلاً.. وبيبي
وبينكم.. مش بيكون جاي جدعنة ولا شهامة.. بيكون في معظم
الأحيان جاي علشان يثبت إنه صح.. أو يفشل قصة العلاج دي من
أصله.. أو جاي تحت الضغط من مراته أو أهلها والتهديد بالانفصال.

المهم.. باسمع الزوج وياكون باغلي من جوايا زي البركان المكتوم
بالظبط: بص يا دكتور.. مش بتسمع كلامي.. بتجادلني.. بتعاملني
بندية.. بتعلي صوتها عليا.. مش بتحترم ان انا الراجل وهي الست..
عاويزة نبقى راس براس.. فين القوامة؟ أنا القائد.. أنا صح.. أنا صح
(بصوت حسن شحاتة في فيلم طير انت).

ياكون شايف قدامي طفل صغير، عاوز يثبت لنفسه إنه هرقل، يأمر
الطاع.. ومش من حق حد يجادله.. أو يشاركه.. أو حتى يرد عليه.

بامسك أعصابي.. وأحط كرات دمي الحمرا في تلاجة، وأطلب
منه بكل هدوء إنه يتعالج.. وأفهمه بالراحة إن أي مشكلة زواجية
أو علاقاتية، مهم إن الطرفين فيها يتغيروا علشان العلاقة تستقيم،
والزواج يتصلح.. وماينفعش حد يشيل الشيلة لوحده.

بعض الرجال مش باشوفهم تاني بعد اللقطة دي.. اللي يكسل..
واللي يزهد.. واللي يرفض.. واللي يكابر.. واللي يقول هو انا مريض
علشان أتعالج؟ واللي... واللي.

لكن..

فيه عدد مش قليل يقبل فعلاً الفكرة.. ويقرر إنه يبدأ برنامج علاجي
بجد.. وحتى لو كان ده هدف الاختبار أو حرق كارت العلاج في الأول..
لكنه بيحضر.. ويشارك.. ويكمل.

مش بس كده.. ده بيحسوف خلال رحلة علاجه إنه مسؤول بدرجة
كبيرة عن صعوبات زواجه وعلاقته بمراته.. وبيكتشف البلاوي
الزرقا والمفاهيم الخاطئة اللي اتربينا عليها في مجتمعنا المتدين بطبعه، فيما
يخص الرجولة والأنوثة والقوامة والزواج والعلاقات.. يفتح مخه..
ويفهم.. ويستوعب.. ويقبل.. ويتألم.. والمفاجأة.. إته بيتغير.

تصوروا.. رجل شرقي أسطوري خارق.. بيسمح لنفسه إنه يكبر..
وينضج.. ويتغير!

فين بقى اللعبة؟

فين التكة؟

اصبر عليا.

* * *

المشهد الثاني.. هو مشهد مريض جاي يشتكي من أهله.. معاذة قاسية.. استغلال عاطفي.. ظلم بين.. أمه عاوزة تبليه بلع.. أبو بيديره بمعنى الكلمة.. كوارث ومصائب نفسية يشيب لها الولدان أطلب منه يجيب لي أمه.. تيجي لي واقعد واتكلم معاها واقول لها ان حضر تك اللي محتاجة تتعالجي مش ابنك، (ويحصل كثير بالمناسبة ان أهل المريض يكونوا هم اللي محتاجين علاج مش المريض نفسه). أطلب منها تتعالج وتحضر بانتظام.. وتوافق على ده فعلاً رغم إنه صعب عليها بجد.. تحضر وتتنظم وتسمح لنفسها إنها تشوف.. وتتعلم.. وتتغير.

طيب وبعدين؟

فين اللعبة؟

شوف يا سيدي.. اللعبة في المشهد الصادم القادم.. مشهد الزوج اللي كان زي الفرعون من كام شهر، وهو قاعد قدامي دلوقت (الطفل الحزين اللي بيكي بمنتهى الحرقه:

- أنا اتغيرت يا دكتور.. أنا اكتشفت الزبالة اللي كنت فيها.. ورفضت البلاوي اللي اتربيت عليها.. أنا عرفت إن الرجولة مش هي الصوت العالي.. عرفت إن القوامة مش هي الافتراء.. أنا كنت ظالم نفسي وظالم مراتي.. أنا بطلت اتحكم واسيطر.. أنا باعاملها بمنتهى الاحترام.. بأسببها تعمل اللي هي عاوزاه.. لأ.. أنا شايف إني مش من حقي أصلاً أقول لها اعملي أو ماتعمليش.. أو اخرجي أو ماتخرجيش.. أنا مؤمن إنها كالتن مستقل بذاته ومسؤولة عن نفسها وده حقها.

الله ينور عليك.. أنا فعلاً فخور ببيك وباللي انت وصلت له.. أنا
مصدق إن فيه راجل شرقي يسمح لنفسه بإنه يتغير.. ومش مصدق
إن ممكن أسمع الكلام ده في يوم من الأيام.. تعالى أبوس راسك.. طبعاً
أهد مراتك دلوقت هي أسعد واحدة في الدنيا.. مش كده؟
.. للأسف لأ يا دكتور.. تصور يا دكتور.. مش عاوزه تشوف
إن بتغير.. بتقف لي على الواحدة.. بتفكرني باللي فات، مش عاوزه
تشوف النبي آدم الجديد اللي قدامها.. مش هاتين عليها حتى تقول لي
كلمة حلوة.. أو تبص لي بصة طيبة.
.. معقول؟!

تعالى يا ستي.. إيه؟ كتي بتشتكي من الراجل والراجل اتغير وبيتغير..
ومررد إن راجل شرقي يتغير دي معجزة كونية نادرة الحدوث.. فيه إيه؟
.. مش عارفة.. لسه فيه حاجات زي ما هي.
.. آه بس ده فيه حاجات كتير قوي اتغيرت.
.. لأ.. هو لسه زي ما هو.. ده بيمثل.. كل حاجة زي ما هي..
متغيرش.. ولا عمره هيتغير.. أنا نفسي قافلة منه من زمان.
.. طيب ولما انتي نفسك قافلة منه من زمان.. كتي عاوزاه يتعالج
ويتغير ليه؟! ما كتي تسيبيه من الأول وتريجينا.
.. ما عرفش بقى.

أوبيا.. هنا بقى يا سيدي اللعبة.. ولك أن تتخيل نفس المشهد بالظبط
مع الأم أو الأب اللي بيتغيروا، سواء بالعلاج.. أو بالزمن.. أو بالخبرة..
وبفضل ابنهم أو بنتهم مش شايفين.. أو مش عاوزين يشوفوا تغيرهم..
مهما كان واضح.

الحكاية إننا ساعات بنشتكي من حد.. ونطالبه بكل حماس إننا
يتغير.. وأول ما يتغير.. نقول له لا والله.. كان زمان، أو «لأ.. أنا مش
مصدق تغيرك»، أو «لأ.. مش هو ده اللي انا مستنيه/ مستنيه».

الست تكون بتشتكي من جوزها.. ولما ربنا يهديه ويتغير.. ترفض
تغيره أو ماتشوفهوش أو تشكك فيه.. كأنها عاوزاه (بشكل غير واعي)
يفضل زي ما هو.. مطلع عينيه ومكفر سيئاتها.

الأبناء يشتكوا من آبائهم وأمهاتهم.. ولما ربنا ينور بصيرتهم
ويتغيروا.. يبقى مش هالين عليهم يشوفوا تغيرهم أو يعترفوا بيه..
كأنهم بيدوروا على الغم.. والهم.. والحزن.

وأحياناً بعض الآباء والأمهات اللي جايين ولادهم يتعالجوا
وهيتجننوا علشان يخفوا.. أول ما يبدأوا يتغيروا ويخفوا.. يمنعوهم
من حضور الجلسات.. ويشككوا في علاجهم.. وينكروا تغيرهم.

بالمناسبة.. ما يسري على الأفراد.. قد يسري أحياناً على المجتمعات
اللي بتقاوم التغيير.. وتحن للشكوى.. وتهرب من المسؤولية.

حاجة غريبة جداً..

بس مش هتبقى غريبة قوي لو عرفنا اللي وراها..
اللي حاصل في عقلنا الباطن من تحت لتحت.

هو مين المستفيد الأول من الشكوى؟ الشاكي طبعًا.
مين اللي شايف قدام نفسه إنه مظلوم ومكسور ومتهان؟ الشاكي
طبعًا.

هو مين اللي بيلعب دور الضحية في اللعبة دي كلها؟ أيوه.. الشاكي
طبعًا.

مين اللي يستاهل الانتباه والاهتمام والتقدير والمساعدة؟ الشاكي
طبعًا.

مين بقى اللي هيفخسر كل ده لو الوضع اتغير؟ بالظبط.. الشاكي
طبعًا.

ما هو لو راح الجاني.. لو الجاني اتعالج وما يقاش جاني.. لو ربنا هداه
واتغير.. لو ربنا كرمه وشاف مسؤوليته وبقى إنسان مختلف.. ساعتها
الضحية ينفع يبقى ضحية من غير (جاني)؟
الإجابة.. لأ.. طبعًا.

يعني من فوق أشتكى واشتكى واطلب التغيير.
ومن تحت ممكن أقبل أي حاجة إلا التغيير.

من فوق باقول أنا مظلوم.. ارفعوا الظلم عني.
ومن تحت.. أرجوكم إوعوا ترفعوا الظلم عني.

من فوق يا ريت تتغير.

من تحت: خليك زي ما انت.. إوعى تتغير.

ما هو لو انت اتغيرت.. هاروح فين أنا بقى؟ لو انت اتعالجت..
أشتكى ازاي يعني؟ لو انت اتصلحت.. أعمل إيه إن شاء الله؟

طبعاً ده لا ينفي إنه فعلاً في بعض الأوقات بتكون العلاقة وصلت
لمرحلة سرطانية، ما ينعش معاها أي تغيير ولا أي علاج.. بس ساعتها
يبقى الانفصال (من الأول) أرحم وأهون من ممارسة هذه اللعبة
الصعبة المرهقة.. وكل واحد يتغير لنفسه أحسن.. وبرضه ده لا
ينفي (بل يؤكد) إنه في معظم الأحوال بيكون الطرفين محتاجين علاج
ومساعدة، مش طرف واحد بس.

عندنا قاعدة في العلاج النفسي بتقول إن المريض دايمًا يقاوم علاجه،
علشان فيه جزء من جواه عاوزه يفضل زي ما هو.. يعاني ويشتكى..
بس الألعن من كده.. هو إن أقرب الأقربين للمريض (الزوجة،
الزوج.. الوالدين).. واللي هم جاين يشتكوا منه.. هم شخصيًا يقاوموا
علاجه.. ويرفضوا تغييره.. علشان يفضلوا يشتكوا.. ويشتكوا.. بلا
نهاية. ويكونوا -بشكل ما- مستفيدين من مرض المريض.. اللي بيوزن
دورهم في المعادلة.. ويؤكد لهم قدام أنفسهم إنهم ضحايا.. وإن الحكاية
مالهاش حل.

غريب جدًا.. ومعقد جدًا.. هذا الكائن اللي اسمه إنسان.
غلبان جدًا.. ومفتري جدًا.
ظلم جدًا.. جهول جدًا.. متكبر جدًا.

أبوس إيديكم..
تغيير البني آدمين ييقاس بميزان الذهب.. الجرام فيه ييطب.
شوفوه.. وقدروه.. وامتنوا لصاحبه.
اسمحو لنفسكم.. واسمحو لغيركم بيه.
جددوا رؤيتكم لنفسكم وللناس كل يوم.. كل ساعة.. كل دقيقة.

امنحوا الفرص..
واستغلوا الفرص..
واقتنصوا الفرص..
التي قد لا تعود.

لعبة (أنا اتغيرت أهو)

اللعبة دي شفتها كثير بين بعض المتجوزين.. وفيه أزواج محترفين جداً في اللعبة دي.

الزوج يكون سيئ المعاملة لزوجته.. قسوة وإهانة وأذى نفسي وأحياناً بدني وجنسي.. وساعات يخونها مع واحدة واثنين وثلاثة.. والزوجة مرة تسكت، ومرة تطنش، ومرة تصبر على البلاء، زي ما اللي حواليتها بينصحوها.. وده طبعاً بيزيد الوضع سوءاً وتفاقماً؛ لأن اللي هيوصل للزوج وقتها رسالة مفادها: «كمل.. دوس كمان».

أول بقى ما يفيض بيها الكيل.. وتقرر الزوجة الكريمة إنها تاخذ موقف.. وتتصدى للإهانة والظلم.. وتضرب عرض الحائط بسلبية أهلها وجبنهم.. وتقول (لأ) بصوت عالي وبكل ما تملك.. ويظهر في كلامها وعينيها وطريقتها إنها جادة.. وانها مش فارق معاها الانفصال.. وتهدد بإنها مستعدة لفعل أي شيء وكل شيء علشان تحمي نفسها وتصون كرامتها.. يبدأ صاحبنا -أولاً- في اختبار جديتها بمزيج من التهديد والوعيد، وتاخذة الحماسة والرعوننة شويتين..

بس أول ما يكتشف إن المرة دي غير كل مرة.. وإنها ناوية تسار
آدميتها، وتستعيد ملكية نفسها.. حتى لو اقتضى الأمر فضيحة
العيار الثقيل.. يتراجع صاحبنا حبة حبة.. ويتقهقر للوراء خطوة
خطوة.. ويقول لها: طيب شوفي.. خلاص.. أنا ها تغير علشانك
هاغير من نفسي علشان البيت مايتخرش.. أنا باحبك ومش ها
أستغنى عنك.. قولي لي عاوزة إيه بالظبط وأنا أعمله.
بس..

هي كده وقعت في الفخ..

تقول له تعاملني كويس.. يقول لها حاضر.. بطل تهيني وتضربي
يقول لها من عنيا.. إديني من وقتك واهتمامك.. يقول لها طبعاً
وهكذا. ويبدأ يتغير فعلاً.. تغير سريع وساحر وشامل.

فين بقى المشكلة؟ فين اللعبة؟

اللعبة إن التغير ده مش حقيقي.. وإن عمره قصير.. وإنه ماكانش
ليه أي هدف غير الإطفاء السريع لحريق الغضب.. والاستيعاب
الكاذب لتوتر الأمور.. والخوف المرعب من فضيحة بجلاجل.. مش
الإصلاح الجاد، أو المراجعة الهادئة، أو البدء من جديد.. وده بيظهر
فعلاً بعد شوية.. لما ترجع ريبا لعادتها القديمة.. بس.. غالباً.. بشكل
أسوأ.. مع مزيد من الإهانة والقسوة وسوء المعاملة.. مضاف إليهم
كثير من الانتقام والتنكيل.

طبعاً مش كل المشكلات الزوجية بيحصل فيها التتابع ده.. لكنه
بيحصل كتير.. إلى جانب إن اللعبة دي بتحصل في علاقات تانية غير
العلاقات الزوجية.. معظمها علاقات عاطفية.. خاصة لو كان الطرف
الثاني أحد أساتذة في التقلب والتلون والتلاعب بمشاعر الآخرين.

المشكلات المزمنة في العلاقات ماهاش غير حلين .
إما العلاج الجذري والجاد والحقيقي عند متخصص .
أو بتر العلاقة إلى الأبد .

غير كده ..

يبقى ضياع وقت ..

وضياع عمر .

لعبة (الطلاق اللي اسمه جواز)

أعتقد إن دي أبشع لعبة ممكن اتنين يلعبوها مع بعض.. لأنها مش بس بتؤذيهم.. دي بتؤذي أطراف تانية معاها.

هنا.. إنت قدام اتنين متجوزين على الورق.. لكن الواقع اللي بينهم ماهوش أي علاقة بالجواز.. بيت معلق عليه لافتة الزواج.. وما يحدث داخله طلاق بائن.

اتنين بُعاد نفسياً جدًّا عن بعض.. بينهم هجر وجفاء وبرود.. نفور وصد ووحشة.. يأس وظلام وفقدان أمل.

خناقات ومشكلات ليل نهار.. ما فيش أي نوع ولا أي درجة من التفاهم.. وكل واحد نفسه من جواه يصحى الصبح يلاقى الثاني مختفي من على وجه الأرض.

وبيحصل طبعًا في بعض الأحوال، إن كل واحد منهم يعمل علاقة غير شرعية من ورا الثاني.. وأحيانًا مش من وراه ولا حاجة.

طيب ولما هو الحال كده؟ وطالما الوضع سيئ بهذا الشكل..
مكملين مع بعض ليه؟
هنا بقى اللعبة على أصولها.

يقول لك: علشان العيال.. مكملين مع بعض علشان العيال
مايتأذوش.. علشان الطلاق ممكن يآثر على نفسيتهم.. وهي تقول:
برضه العيال لما يعيشوا في وسط أبوهم وأمهم، غير لما يكبروا، وكل
واحد في حته.

أنا الحقيقة شفت كل طرق وأنواع سوء الاستغلال (Abuse)
للأطفال، لكني ماشفتش طريقة لسوء استغلالهم أظع من دي.. اللي
هي انكم تعلقوا فشلكم على شاعة أولادكم.. وتبرروا جبنكم بأن
ده من مصلحتهم.. وتقرروا الاستمرار في (طريق سد) تحت ادعاء
الخوف على نفسيتهم ومستقبلهم.

طيب هو اللي اتوفيه ده مش مؤذي لأولادكم؟ المسافات النفسية
الطويلة بينكم وبين بعض مش بتمزقهم تمزيقًا؟ الشد والجذب
والخناقات والصوت العالي (والضرب أحيانًا) مش بتشوه عقولهم
وقلوبهم؟

هو المؤذي أكثر للأولاد إنهم يعيشوا في جواز فاشل واللا في طلاق
ناجح؟ المؤذي أكثر إنهم يعيشوا في جو مشدود مُلبَّد بالمشاحنات
الدائمة، واللا في هدوء وسكينة، حتى مع بعض الفقد؟ هو ربنا لما
حلل الطلاق مش كان عارف إنه ممكن يكون فيه أولاد؟

الي بيوصل للأولاد بكل أسف- في هذا النوع من البيوت، هي
صورة مشوهة تمامًا عن معنى الزواج، ومعنى الحب، ومعنى المودة
والرحمة، ومعنى الحياة نفسها.

وده هيخليهم - غالبًا - يكرروا الصورة دي بحذافيرها لما يكبروا ..
أو إنهم يقررروا مايتجوزوش خالص .. أو يدخلوا في علاقات مسهله
للغاية.

أنا مُقدر جدًا تعقيد العلاقات الزوجية في مجتمعنا .. وإصابتها
بأمراض صعبة ومزمنة .. وعارف وشايف مشكلات الطلاق الأسرية
والاجتماعية والاقتصادية والقانونية .. وإن اختيار الاستمرار في زواج
فاشل قد يكون حائط الصد الأخير ضد الكثير من الشقاء والعذاب
والمذلة لكل الأطراف .. وإنه أحيانًا يكون قرار هدفه ترميم آخر
أعمدة منزل يتهاوى فوق رؤوس الجميع .
لكن ..

القرار الأكثر شجاعة .. هو إننا نقف وقفة صادقة مع النفس ..
وننظر للأمور نظرة أمينة تخلو من الأنانية والاستسهال .. ونقرر
نحاول .. ونسعى .. ونعالج .

لو صدقنا النية .. ونفع العلاج .. خير وبركة .
ولو مانفعلش .. مش هنكون أعلم ولا أحكم من ربنا .. اللي بيقول :
﴿ فَأَمْسِكُوهُمْ بِمَعْرُوفٍ أَوْ سَرِّحُوهُمْ بِمَعْرُوفٍ وَلَا تُمْسِكُوهُمْ ضِرَارًا لِّعَعْدُوا
وَمَنْ يَفْعَلْ ذَلِكَ فَقَدْ ظَلَمَ نَفْسَهُ ﴾ (سورة البقرة: ٢٣١) .

بلاش نظلم نفسنا ..

بلاش نظلم عيالنا ..

بلاش اللعبة دي .

إما زواج بما يرضي الله ..

وإما يقضي الله أمرًا كان مفعولاً .

لعبة (السر سوب)

دي بقى لعبة لطيفة بتتلعب في بعض العلاقات العاطفية، اللي بتكون مؤذية ومشوهة نفسياً لأصحابها.. فيقررروا عند نقطة معينة انهم ينهوا العلاقة دي.. اللعبة دي اسمها لعبة (السر سوب).

يعني إيه؟

يعني يبجوا عند لحظات الوداع.. ويقولوا البعض: (إحنا خلاص ننهي حكايتنا، بس ممكن نبقي أصحاب)، أو (لو احتجتي حاجة، أنا موجود)، أو (هاتصل اطمن عليك كل شوية).. وحاجات تانية ليها نفس المعاني دي.

أحب أقول لكل حد بيعمل الحكاية دي: إنت بتضحك على نفسك (ومن جواك عارف إنك بتضحك على نفسك)، وبتضحك على الطرف الثاني (وهو برضه من جواه عارف كده)، وبتلعبوا لعبة عقيمة ومنهكة.. وغالباً أذاها أكثر من أذى العلاقة نفسها.

إنت في الحقيقة تنتهي العلاقة من فوق.. وتخليها مستمرة من تحت
تحت.. إنت بتوصل للطرف الثاني رسالتين في نفس الوقت.. رسالة
واضحة على السطح بتقول (العلاقة بتنتهي)، ورسالة ثانية خفية في
العمق بتقول (طيب خيلنا شوية.. يمكن).

حضرتك كده ما أنهيتش العلاقة ولا أي حاجة.. حضرتك كده
وبكل بساطة سايب الباب موارد.. سايب (ثقب) بينك وبين الطرف
الثاني ممكن توصل منه بعض المشاعر، أو الاهتمام، أو الدفا اللي يخل
الطرف الثاني ما يعدش قوي.. ماسك طرف الخيط، وبتلعب بيه بدلا
من إنك تقطعه.. سايب (سرسوب) صغير من العواطف مش هاتين
عليك تقفله.

عاوز أقول لك إن ما فيش أي توصيف لكلمة (الابتزاز العاطفي)
أبلغ من تفاصيل اللعبة دي.. اللي بتعلق من خلالها نفسك وتعلق الطرف
الثاني معاك في علاقة هلامية، غير واضحة المعالم، مالهش مسمى ولا
ليها شكل ولا ليها هدف.

اللعبة دي مش بس منهكة ومؤذية ومشوهة.. لأ.. دي كمان بتحرم
كل طرف فيكم إنه يدخل في علاقات أخرى حقيقية واضحة.. بتخلي
دائما فيه خط رجعة للعلاقة القديمة، وده يفقد أي علاقة جديدة
طعمها ومعناها وجمالها.. يعني لا ترحم.. ولا تخلي رحمة ربنا تنزل..
كل حاجة تبقى نص-نص.. القديم نص-نص، والجديد نص-نص..
وجودك كله يبقى نص-نص.

فيه أشكال ثانية للعبة (السرسوب).. منها إنكم ترجعوا تكلموا
(أو ترأسلوا) بعض بعد شوية، كأن ما فيش حاجة حصلت.. أو إنك
تتابع الطرف الثاني من بعيد لبعيد.. تسأل عن أخبارها.. تراقبي
صفحته على الفيس بوك.. أو وده أصعبهم- إنكم تفتحوا باب
الانتقام.. ويبقى هم كل حد فيكم انتظار اليوم اللي يشوف الثاني فيه
نادم ذليل على الفراق.

ليه بقى؟
ليه ده كله؟

لما تكون في علاقة ما.. وعاوز تنهيها لأي سبب.. يبقى تنهيها على
كل المستويات.. الظاهرة والخفية.. مهما كان ده صعب.

لما تكون عاوز توقف الأذى اللي جاي لك أو اللي رايح منك.. يبقى
تقطع كل الخيوط.. وماتسيش ولا خيط رفيع باقي.. مهما كان ده مؤلم.

لما تقول (خلاص).. يبقى تقولها بكل خلية فيك.. وتقف الباب
بالضبة والمفتاح.. وترمي المفتاح في البحر.. بالليل.. والدنيا ضلمة.

لما تقطع.. يبقى تقطع.. ماتسيش سر سوب صغير تتسرب منه أي
رسايل تغوي الطرف الثاني بالانتظار أملاً في الرجوع.

السر سوب الصغير ده.. ممكن يتحول في يوم من الأيام لنفق نفسي
كبير.. تدخلوا انتو الاتنين فيه.. وماتعرفوش تطلعوا منه.. طول حياتكم.

عينك في راسك..

مقصك في إيدك..

يا ترجع وتكمل وما تشتكيش..

يا ما تسيش خيط واحد معلق..

وابدأ الآن.

أو لن تبدأ أبداً.

لعبة (لما)

لعبة نفسية مشهورة جدًا.. وكثير منا يستخدمها بشكل يومي.

اللعبة دي بتخلينا نأجل حاجة معينة (لما) تحصل حاجة تانية.. يعني تأجل فرحتك بنفسك وبحياتك لغاية (لما) تنجح، ولو نجحت، تأجل فرحتك تاني لغاية (لما) تمسك الشهادة في إيدك.. وأول ما تستلم الشهادة في إيدك، تستنى على فرحتك شوية كمان لغاية (لما) تستلم الوظيفة.

تستنى على تحقيق أحلامك (لما) تخلص ثانوية عامة، وبعد ما تخلصها، تستنى شوية كمان (لما) تتخرج من الكلية العبقرية، وبعد ما تتخرج، معاك تاني لغاية (لما) تسافر بره.

تسافر بره وتأجل رجوعك لغاية (لما) تحوش قرشين، وبمجرد ما تحوشهم، تقرر تستنى شوية كمان (لما) يزيدوا شوية علشان تأمن مستقبل العيال.. وبعد ما تأمن مستقبل العيال تصبر حبتين (لما) تحس ان الوقت مناسب.

تأجل تعبيرك عن مشاعرك (لما) الطرف الثاني يعبر الأول، ولما يعبر
استنى (لما) تتقل حبتين .. وبعد ما تتقل، معاك شوية كمان لغاية (لما)
ظروف ظروفك.

تأجل حتى سؤالك عن أهلك ومعارفك وناسك (لما) تخلص الي
وراك .. الي هو مش هيخلص أبدًا.

تكتم جواك كلمة (لا) لغاية (لما) تحس إنك قادر تقولها، ولما تقدر
الو لها تأجلها ثاني (لما) تشوف إيه الي هيحصل، ولما يحصل، تستنى
شوية يمكن مايكونش ليها لازمة.

حتى الحزن والألم .. مش بتحس بيه في وقته، وتستنى (لما) تتصور
إنك هتقدر تستحمله.

حتى حقا في الاختلاف عن الموجود، واختيار طريقك المتفرد في
الحياة، بتستنى (لما) تظن إنه طريق آمن .. وفيه أقل قدر من المخاطر.

حتى حضنك لأولادك وبناتك وأصحابك وأحبابك .. بتأجله
لغاية (لما) يكون فيه سبب.

(لما) .. بتسرق السنين ..

لأنك بعد كام سنة ..
هتكتشف إنك أجلت حياتك كلها، واستنيت على أجمل ما فيها،
لغاية (لما) .. تحصل أي حاجة.

(لما) .. بتهرب بالعمر من بين إيديك ..

لأنك .. في الآخر .. هتبص لورا .. وهتلاقي كل (لما) أخذت معاها
كام يوم، أو كام شهر، أو كام سنة.

(لما) .. عمرها ما هتخلص .. غير (لما) تخلص عليك.

إيه رأيك ..

تقرر دلوقت ..

إنك ماتقولش (لما) تاني ..

أبد!!!!!!!!!!!!!!!!!!!!!!

لعبة (أنا مش لاعب)

فيه ملاحظة مهمة جدًا، ومتكررة جدًا جدًا في عيادات الأطباء النفسيين في أوقات الامتحانات.

طالب في كلية مرموقة (أو في ثانوية عامة).. طول عمره متفوق.. مطلع الأول.. يبذاكر زي الفل.. أهله بيحبوه ويصقفوا له على نجاحاته وإنجازاته الدراسية منقطعة النظير.. وييجي وقت الامتحانات.. وهو ووووب.. تحصله حالة غريبة جدًا: مش طايق الكتب.. مش عارف يركز.. مش عارف ينام.. بينسى بسرعة.. قلق فظيع وكثير قوي.. يدخل لجنة الامتحان والمعلومات كلها تطير من دماغه.. أو يجاوب وحش جداااا.. أو يرفض يدخل الامتحانات من أصله.. أو يدخل ويسقط مرة واثنين وتلاتة.

طبعا كل ده ممكن يحصل مع أي طالب في أي سنة، ويبقى جزء من أعراض توتر وقلق نتيجة ضغط الامتحانات.. ويتعالج ويخف ويخلص.. لكن أنا هنا باتكلم عن حد ماشي زي الصاروخ.. نبيه وشاطر ومتفوق جدًا.. لكنه فجأة اتكسر ووقع على الأرض.. لأ.. وقع تحت الأرض.

بعض (وليس كل) الحالات دي بيكون ليه تفسير أعمق شوية
مما يبدو عليه.. تعالوا نشوف الحكاية عن قرب أكثر.

طفل صغير.. وصل له من أبوه وأمه إن الدرجات هي أهم حاجة
في الدنيا.. النتيجة هي معيار رضاهم عنه.. المجموع هو محدد أساس
لعلاقتهم بيه.. وصل له منهم الحب (بشرط) إنه يجيب الدرجة
النهائية.. وصل له منهم القبول (بشرط) إنه يطلع الأول.. وصل له
منهم الاهتمام والاحترام (بشرط) إنه يكون متفوق في دراسته.. ده هو
المقارنة بزمايله وقرايبه وجيرانه.

خلاص تمام.. ندفع التمن علشان ناخذ الحب، ونلاقي القبول،
ونحس بالاهتمام والاحترام.. مش هم عاوزين الدرجة النهائية؟
حاضر.. مش هم مستنين ترتيب الأول؟ ماشي.. مش هم طالبين
التفوق الرهيب؟ من عينيا.

مش بس كده..

ده بعد ما يكبر بشوية، يوصل له من المدرسة والمجتمع والشارع
والناس، إن فيه حاجة اسمها كليات (قمة).. يبقى فيه أكيد كليات
(قاع).. وإنه لازم يدخل كلية من كليات القمة علشان يبقى ليه قيمة
ووضع وبريستيج.. وإلا مستقبله هيبضيع.. ويا سلام لما يقولوا له يا
(دكتور) ويا (باشمهندس) وهو في أولى إعدادي.. وهو طبعا يصدق
الخرافات دي.. ويدخل الكلية المنتظرة.

باختصار شديد.. كل ما وصل له من رسائل عن نفسه وعن وجوده
هي: أنت تساوي مجموع درجاتك.

وهو اضطر يمشي مع الموجة فترة من عمره (قد تطول وقد تقصر)،
ودفع تمن ده من وقته ومجهوده ولعبه ومواهبه وأحلامه هو الشخصية،
اللي اتبدلت بأحلام أهله وهو صدق إنها أحلامه).. لغاية ما يبجي
عليه وقت.. ويقول لك: بس.. لغاية كده أنا مش لاعب.

يعني يبجي مثلاً في ثانوية عامة.. وقت تركيز كل أحلام وطموحات
أهله عليه.. ويطلع عقله الباطن زي المارد بقرار داخلي واجب التنفيذ
فوراً بايقاف هذه المهزلة.. فيقل تركيزه.. ويقل (أو يزيد) نومه.. ويبقى
مش طابق المذاكرة ولا الكتب ولا نفسه ولا أهله.. ويدخل الامتحانات
وما يخلص.. كأنه يفتش نفسه بنفسه.. علشان يوصل رسالة صغيرة (مشفرة)
إلى أهله ومجتمعه، بتقول: مش انتو اختزلتوني في الدرجات؟ طيب والله
ما انا جايب درجات.. مش انتو ماشوفتوش مني غير المجموع؟ طيب
والله لانا ساقط.. مش انتو مش عاوزين مني غير النتيجة؟ طيب والله
لاوريكم.. هافشل لكم كل خططكم.

والألعن طبعاً هو اللي يجيب فعلاً مجموع كبير في ثانوية عامة،
ويقيموا له الأفراح والليالي الملاح.. وينبهروا بيه ويسقفوا له
ويزغرتوا له.. قصدي يزغرتوا (لمجموعه).. ويبجي في امتحانات
أولى أو تانية (أو تالثة أو...) كلية، ويقول لك ستوووووب.. أنا
هابرك هنا (زي الجمل اللي بيبرك كده).. أنا خلااص مش هاتحرك من
هنا.. فيبدأ يضيع وقت.. أو يبجي له خوف وتوتر نفسي مرضي عنيف..
أو ما يدخلش الامتحانات.. أو... أو... كأنه بيغيظهم برسالة أخرى
من عقله الباطن بتقول لهم: مش أخذتوا مني اللي انتو عاوزينه؟ طيب
شوفوا بقى.

فيه نسخة تالثة من اللعبة دي.. اللي هي بقى لما يخلص ويتخرج على
خير.. ويشغل شغلانة هو أصلاً ما كانش عاوزها ولا مختارها..

ويجي بعد شوية .. يعطل فيها .. ونفسه تسد منها .. ويكرهها
ويكره اليوم اللي اشتغلها فيه .. ويبقى عاوز يسيبها بأي شكل .. أنا
شفت دكاترة سابوا شغلهم .. ومهندسين .. وصيادلة .. وغيرهم
وغيرهم ؛ لأنهم اكتشفوا بعد سنين من الشغل .. إن ده ماكانش
اختيارهم أصلاً .

مشكلة ده .. ومشكلة ده .. إنه بيتنقم منهم ، بس في نفسه ..
ويفشلهم ، من خلال إفشالها .. وقد يصل هذا الانتقام في بعض
الأحيان إلى تفسخ كامل في تركيبته النفسية .. اللي تتفكك تمامًا ..
ويتحول لمريض نفسي من الطراز الأصعب .

إلى كل أب وأم ..

إلى كل مدرس ومدرسة ..

إلى كل الناس ..

من فضلكم ..

ماختزلوش أولادكم في درجاتهم ..

ماتسجنوش أولادكم في مجاميعهم .

ماتفرحوش قوي بالمية وخمسة في المية .. ماتصقفوش قوي للأول
على العالم في الثانوية العامة .. ماتنفشخروش قوي بتقفيل ورقة
الإجابة .. علشان تمن ده ممكن يكون شخصيات مشوهة .. ونفوس
مريضة .

بتوصلوا إيه لأولادكم ؟

كفانا مسوخًا بشرية منزوعة الروح ..

ألا قد بلغت ..

اللهم فاشهد .

لعبة (قلب الترابيزة)

فيه ظاهرة نفسية شهيرة اسمها (الإسقاط).. بمعنى إن حد ينسب (إليك) ما يخصه (هو)، من أفكار أو مشاعر أو رغبات أو سلوك أو هوية.. كأنك (إنت) صاحب كل ده مش (هو).. فبدل ما يحس إن (هو) بيكرهك.. يحس إنك (إنت) بتكرهه.. بدل ما يشوف إن (هو) مقصر.. يشوف إنك (إنت) اللي مقصر.. وبدل ما يعترف بفشله.. يتهمك انت شخصياً بالفشل.

ظاهرة معروفة ليها أهداف غير واعية كثيرة، أو لها عدم تحمل المسؤولية؛ مسؤولية ما أفكر فيه أو أشعر بيه أو أفعله، وإلقاؤها على الآخرين، عن طريق استبدال (أنا) بـ (أنت)، أو (هو)، أو (هي)، أو (هم).

الإسقاط هو أحد الدفاعات النفسية البدائية جداً ضد صدمة مواجهة الحقيقة، وألم الشعور بالذنب، ومسؤولية الاعتراف بالخطأ ومواجهته.

الإسقاط لما يستخدم بشكل دائم ومتكرر بيتحول إلى لعبة نفسية مؤذية جداً.. هدفها (قلب الترابيزة) على الطرف الآخر، في حركة لولبية سريعة.. زي مثلاً:

- إنتي زوجة فاشلة.
- إنتي سبب تعستي.
- إنتي مالكيش لازمة.
- إنتي مش مهتمة بيا..
- إنتي مش ست أصلاً.
- إنتي على طول مقصرة في حقي.

على الرغم من إن الطرف الثاني هو اللي فاشل، وهو اللي حاسس بنقص القيمة، وهو اللي مش مهتم بزوجته، وهو اللي عنده مشكلة في إحساسه برجولته.. وهو اللي مقصر في حق مراته.

وزي ما الأفراد بيستخدموا دفاعات وألعاب نفسية.. المجتمعات برضه بتستخدم دفاعات وألعاب نفسية.. وفيه مجتمعات نقدر نقول إنها (متخصصة) في اللعبة دي.

يعني لما واحدة تتعرض للتحرش.. نقول (هي اللي لبسها مُغري).. بدلاً من (إحنا اللي بنخترق خصوصيتها). أو (هي اللي عاوزه تتعاكس).. بدلاً من (إحنا اللي عاوزين نعاكسها)..

ولما نسطح ديننا وناخد منه القشور.. نقول (الغرب عاوز يبعدا عن ديننا).. بدل (إحنا بنبعد عن ديننا).

ولما نتخلف وتأخر ويبقى ترتيبنا الأخير في مستوى التعليم.. نقول (العالم كله عاوزنا نفشل).. بدلاً من (إحنا بنفشل نفسنا بنفسنا).. وهكذا.

- دي واحده حابة تعمل شو إعلامي بس بطريقة رخيصة ووقحة..
الصراحة والولد آه هو عاكس بس بأدب.. وماغتقدش انه فيه حد هينزل
من عربيته لواحدة غير لما يكون شاف منها قبول.

- نازلة تصطاد متحرشين علشان تعمل نفسها بطله.. جتك نبلة
عليكي وعلى اللي رباكي.

- إنتي كنتي واقفة تصيدي أي خطأ وتلفتي نظر الشباب علشان
يعاكسوكي.

- إنتي (...) وكذابة أصلاً.. مش بادافع عن حد والله.. لبسك
ومظهرك هم اللي خلوهم يعملوا كده.

ودي مجموعة من تعليقات أخرى على بنت اتعرضت لمحاولة
اغتصاب من أحد سائقي شركات المواصلات الخاصة:

- لمي نفسك شوية.. راكبة عربية خاصة وعاوزاه يسكت؟

- قعدتها بتقول إنها خبرة.

- البنت دي شكلها بتمثل.. ده شكل واحده اتعرضت لحادث
اغتصاب؟

- أصل البنطلون ده هو السبب.

- القعدة دي مش قعدة أول تحرش.

- السؤال: إيه اللي ركبك معاه؟

- ما هو يمكن افتكرك ذئبة بشرية زيه.

- تستاهلي.

- بشكلك ده أي حد هيغتصبك.

- إنتي إيه يخليكي تركبي سيارة خاصة.. فعلاً تربية واطية.

- أكيد انتي السبب يا مثيرة يا إغرائك.

- إنتي شكلك أساساً ولبسك حاجة تدعو للاغتصاب.

- من غير كلام، هي لو محترمة مش هيعمل كده.
- أولاً أنتي ازاى ركبتى معاه عربية؟ ثانياً نزلي رجلك اللي تنكسر..
- الثالثاً انتي شكلك بتحوري.
- طيب لازمها إيه تطلعي وتشهري بنفسك؟ ماتلمي يا اختي.
- دي لو لابسة عباية ماحدش هيلمسها، لكن الناس هتعمل لها

إيه؟

ودي عينة أخيرة من التعليقات على حادثة تحرش نالسة، قام فيها المتحرش (بقتل) زوج السيدة اللي تحرش بيها، بعد ما تصدى له علشان يدافع عن مراته:

- ما هو أكيد ديوث وسايب الأمور تمشي على الشط.. يستاهل هو واللي شكله.

- هو اللي غلط.. لو لبسها لبس محترم، ماكانش اتحرش بيها.. دور على مراتك الأول يا لطنخ.

- لو راجل بجد، ماكانش راح البحر هو وزوجته.. مكان فيه شباب والناس مختلطة.. لازم يتحمل العواقب.

بالمناسبة.. التعليقات دي معظم اللي كاتبها سيدات.

اللعبة دي (قلب الترابيزه) بتضطر ضحيتها إلى أحد الأركان.. لينهال عليها الجميع بالضرب واللكمات.

اللعبة دي هي اللي ورا ظاهرة (لوم الضحية) المنتشرة بشراسة.

وهي اللي حوّلت مؤخرًا (لوم الضحية) إلى (ذبح الضحية).

وأنا هنا باتكلم عن ضحية بجد.. مش عن حد بيختار ويقرر ويستمرى لعب دور الضحية.

تصور لما مجتمع كامل .. لما مجموعة كبيرة من الناس، تقوم بإسقاط كل ما بداخلها من مخاوف ومساوئ وعيوب وكرهية وكلاكيح وعقد نفسية، على شخص واحد.. لما مئات وآلاف وملايين البشر يقرروا ذبح شخص ما نفسياً ومعنوياً.. لما تُسن كل السكاكين.. وتجهز كل الأسلحة أمام إنسان بمفرده.. لما يصبح الكل أصحاب حق وفضيلة.. وواحد فقط يحمل كل الأوزار.. ويوصم بكل العيوب.. ويسقط في كل الأفخاخ.

الفرد أو المجتمع اللي يستخدم اللعبة دي بيكلمك وهو بيوجه إليك إصبع الاتهام طول الوقت.. لكن الحقيقة إن بقية أصابع يده موجهه كلها ناحيته هو.

لو حد عمل معاك كده.. لو حد عمل معاك كده.. تجيبي مرآة كبيرة طويلة عريضة.. وتخطيها قدامه.. وتثبتها كويس.. وتقول له: «بص.. إنت بتكلم نفسك».

أما لو المجتمع عمل معاك كده.. فماتياسوش.. وماتستسلموش.. اتلموا حوالين بعض.. وقربوا من اللي شبهكم.. واثأكدوا.. إن التغيير الأخلاقي المجتمعي الكبير.. بيبدأ بخطوات فردية صغيرة.. وإن كرة الثلج الضخمة المنطلقة بكل سرعتها.. كانت في يوم من الأيام نقطة مياه وحيدة واقفة على زجاج إحدى النوافذ.. أو ذرة بخار تائهة مرت من أمام...

استنى..

أهي..

أمام عينيك.

شايفها؟

خليك عارف..

إن البداية دائماً من عندك.

لعبة (الساخرون في الأرض)

بمناسبة الألعاب اللي بتلعبها المجتمعات والشعوب.. فيه مجتمعات متخصصة في لعبة اسمها (السخرية).. أو (الساخرون في الأرض).

ويخطئ جداً من يتصور إن (الفكاهة) هي (السخرية).. دي حاجة.. ودي حاجة تانية خالص.

الفكاهة تدعو للفرحة.. وتسبب القرب.. وتريح النفس والروح. إنها السخرية تعبر في معظم الأحيان عن عنف سلبي Passive Aggression، وتعالى، وفوقية في النظر للأمور.

يعني لما تشوف اتنين مخطوبين بيعجوا بعض وانت مش مرتبط.. ممكن تقول لصاحبك وانت بتضحك: «إمتى ربنا يفرجها عليا بقى».. وممكن تقول له برضه وانت بتضحك: «هم ما لهم عايشين الدور كده ليه؟ بكره لما يتجوزوا مش هيطيقوا يبصوا في وش بعض». في الحالتين انت بتضحك، لكن دي فكاهة، ودي سخرية.

الفكاهة فيها خفة ظل وبساطة وأمل.
السخرية فيها ثقل وإحباط ويأس.

لما تقول لابنك أو لبنتك أو لزميلك في الشغل: «إنت اتأخرت كده ليه؟» غير لما تقول له: «ناموسيتك كحلي» أو «إنت جاي ماشي على قشر بيض؟».

الفكاهة مافيهاش إهانة.
السخرية كلها إهانة.

فيه مثل أوضح..

شوف برامج الفكاهة زي الكاميرا الخفية وما (شابهها) عاملة ازاي برة.. وعاملة ازاي عندنا.. تلاقيها برة عبارة عن مواقف بسيطة تثير دهشة الضيوف وترسم البسمة على وجوههم ووجوه المشاهدين.. لكن عندنا هي مواقف تدعو لاستفزاز الضيوف واستشاشة غضبهم وحرق دمهم، أو تخويفهم وإرهابهم وإرغابهم (مرة بالنار ومرة بالغرق ومرة بالعفاريات ومرة بالحوت ومرة بالدب القطبي و... و...)، لينتهي الأمر بخناقة كبيرة، وضرب وشتيمة وسباب للبرنامج والممثلين وفريق العمل.

والمشكلة إن المتفرجين بيتابعوا ويتبسطوا ويستمتعوا ويضحكوا.. في مشهد سادي من الطراز الأول.. شاركنا فيه جميعًا.

الفكاهة تثير فيك الضحك..
السخرية تثير فيك دموعًا مكتومة.

الفكاهة فيها تواصل وحب ومودة..
السخرية فيها بتر وبغض وقسوة.
السخرية تعبر عن رصاصات غاضبة رغم نعومتها الظاهرة..
وتعبر عن رغبة في تشويه وتحطيم ما نسخر منه.

علشان كده سموادي (روح الفكاهة).. وسموادي (مرارة
السخرية)..

إحنا بندعي الفكاهة.. لكننا محترفين في السخرية.

إحنا بنسخر من كل حاجة.. بنسخر من المشاعر.. بنسخر من
الناس.. من الحيوانات.. من نفسنا.. من الحياة.. بنسخر من الموت
شخصياً.

كأننا بدل ما نواجه إحباطنا.. بنحسس غيرنا بيه.
وبدل ما نتعامل مع غضبنا.. بنشيره في الآخرين.
وبدل ما نعالج يأسنا.. بنفرقه على بعض.

في اللحظة التي هانتحول فيها - كمجتمع وكأفراد - من السخرية
إلى الفكاهة..

اعلموا تمام العلم..
أننا سنكون قد تغيرنا بشكل حقيقي.

الباب الثالث

الطريق إلى نفسك

السؤال الملح والي يتكرر دائماً من كثير من القراء والمتابعين .. هو: «نعمل إيه؟»، «أدينا عرفنا إن فيه مشكلة.. الحل إيه بقى؟»، «إنت سلطت الضوء على العقد والكلاليع.. قول لنا نحل ده كله إزاي؟».

في الحقيقة أنا مش من أنصار مدرسة تقديم الحلول الجاهزة للمشكلات.. وإيجاد الإجابات النموذجية للأسئلة.. كل حالة وليها ملاساتها.. كل شخص وليه ظروفه.. وأحياناً كثيرة جداً أنت ممكن تلاقي حل لي أنت فيه أفضل ألف مرة من أي توجيه من عندي.. وتكتشف إجابة لكل أسئلتك أبداع جداً من كل إجاباتي النابعة من خبرتي الشخصية مهما اتسعت.

إحنا اتربينا على الاعتمادية.. من أول الاعتماد على الأب والأم حتى سن ثلاثين وأربعين سنة، لغاية الاعتماد على الحكومة في توفير فرصة عمل، من أول فتاوى دخول الخلاء.. إلى فتاوى الزواج والطلاق، من أول الإبرة.. وحتى الصاروخ.

إحنا محتاجين نفكر.. محتاجين نقرا ونبحث.. محتاجين نجتهد ونوصل.. من غير ما ندور طول الوقت على وصي.. أو حد نعتمد عليه.. حد يفكر بالنيابة عننا، ويبحث لنا، ويجتهد في سبيلنا.. ويقرر هو.. ويختار هو.. ويتحمل المسؤولية هو.. واحنا ناخذ البضاعة على الجاهز.. ونستهلكها كما هي.

علشان كده أنا باقدهم توصيفات دقيقة قدر المستطاع.. لكني مش باقدم حلول.. إنت وظروفك واجتهادك.. أنا بافتح عينيك بالجرعة المناسبة والتوقيت المناسب.. وانت واختيارك وقرارك.. بافهمك نفسك وغيرك وعلاقاتك.. وانت وحياتك ومسؤوليتك عنها.

لكن.. ومع كل ده.. أنا قررت في هذا الكتاب إني أقدم لك خطوط عامة.. وخارطة طريق.. تشاور لك من بعيد على بعض المعالم.. وتوضح لك أكثر بعض الإشارات.. اللي ممكن تساعدك في الوصول لحل من داخلك.. والعشور على إجابة خاصة بيك.. واتخاذ القرار المناسب.. في الوقت المناسب.. وبالطريقة المناسبة.

خارطة الطريق دي هتستعرض لك قصة حياتك من يوم ما اتولدت لغاية النهارده.. هتوريك احتياجاتك.. هتكشف لك مخاوفك.. هتعرّفك حقوقك.. وهتساعدك في قراراتك.. كده بنفس الترتيب. هتوريك كنت محتاج إيه.. إمتى.. والاحتياج ده وذاك فين وعمل فيك إيه.

هتكشف لك المخاوف اللي ارتبطت جواك بأنك تعوز وتطلب احتياجاتك البسيطة في علاقات حياتك. هتعرّفك حقوقك اللي انت اتخلّيت عنها علشان ترضى حد.. أو تحافظ على حد.. أو تتجنب هجر حد. وهتساعدك في اتخاذ قرار واضح وصریح بإنك تكمل.. أو توقّف.. أو تاخذ هدنة للراحة أو للمراجعة.

الخريطة دي اسمها (نموذج الخطوات الأربعة) Four-step Model: الاحتياج- العوّان- الحق- القرار.

ودي طريقة علمية حديثة لفهم صعوبات النفس البشرية، ومساعدتها على النضج والنمو النفسي.. مش بس العلاج.

طريقة مصرية أصيلة تم ابتكارها وتطويرها في قسم الطب النفسي بجامعة المنيا، ابتداء من سنة ٢٠٠٠ على يد فريق كبير من الأساتذة والأطباء والباحثين، أشرف بكوني واحداً منهم، تحت قيادة أستاذي وأبي الروحي أ. د. رفعت محفوظ، أستاذ الطب النفسي.

الطريقة دي اتعمل عليها أكثر من ثلاثين رسالة ماجستير ودكتوراه لغاية النهارده.. واتنشر عنها أبحاث وكتب وفصول كتب داخل مصر وخارج مصر. وتم تقديمها وعمل ورش عمل عليها في أمريكا وإنجلترا وألمانيا والسويد وإسبانيا وإيطاليا واليونان وكرواتيا وغيرها. وبتعمل عليها حالياً برامج علاجية وتدريبية وإشرافية تابعة للجمعية المصرية للعلاج النفسي الجمعي.

في الخريطة دي..

هنبداً من الصفر..

وهنمشي خطوة خطوة..

من أول «أنا موجود»..

وحتى «أنا قررت».

هاورّيك أمثلة..

وهاعلّمك تمارين..

وهادرّبك عليها..

لغاية ما نوصل مع بعض..

لآخر الطريق..

تعالى نبداً..

والله المستعان.

أنا موجود

أقول لك حاجة عمرك ما فكرت فيها؟
بس ماتتخضش ..

هو انت ازاي عرفت إنك موجود؟
يعني إمتى أول مرة سُفّت فيها نفسك؟
مش في المراية .. في الحقيقة.

طيب ..

تعالى نرجع لورا شوية ..

أول ما اتولدت .. أول ما أي طفل بيتولد .. بيشوف نفسه ازاي؟
يعرف ازاي إنه موجود؟

هو بيشوف وشوش ناس .. لكن مش بيشوف وشه.

بيشوف جسم أمه وهي بترضعه ..

بيشوف أيديها ..

بيشوف عينيها ..

لكنه مش بيشوف عينيه.

بيشوف حدودها وأنفها وشفافيتها..
لكنه مش بيشوف حدوده وأنفه وشفافيه.
بيشوف ضحكتها..

لكنه مش بيشوف ضحكته.
أمال بيعرف هو مين ازاي؟
يعرف ملامحه مينين؟

يعرف ازاي إن إيديه اللي هو باصص ليها دي، تبعه هو مش تبع
؟

يعرف ازاي إن رجليه اللي بتتحرك دي، تخصه هو ماتخصش أبوه؟
يعرف ازاي حدود وجوده؟
يعرف ازاي إنه موجود أصلاً؟
ويعرف مينين ان وجوده ليه قيمة.. وأهمية.. ويعمل فرق؟
هنكتشف الإجابة دلوقت.

* * *

أول ما تتولد.. نفسك بتكون عبارة عن مجموعة من الوظائف
النفسية غير المترابطة.. يعني حته تحس.. حته تستقبل.. وحتة تفكر
(بشكل بدائي جداً).

يبقى جوانا بذور نفسية منثورة على مسافات متباعدة.. جُزر نفسية
منعزلة ما فيش أي علاقة أو ترابط بينها.. ويكون جزء مهم من نمونا
ونضجنا النفسي.. هو إن الجزر دي تقرب من بعض، وتتجمع، وتبقى
حاجة واحدة.. اسمها (نفس مترابطة) Cohesive Self زي ما وصفها
عالم النفس النمساوي الشهير هاينز كوهوت - Heinz Kohut.

بس علشان ده يحصل.. وتقرب الجزر النفسية دي من بعضها..
ينقى محتاجين تلات حاجات.. التلات حاجات دول بيكملوا
الأجزاء اللي ناقصة داخلنا.. ويعملوا منها (حاجة واحدة).. تنطلق
وتشق طريقها للحياة.

الثلاث احتياجات دول هم أهم ثلاث احتياجات نفسية على الإطلاق ..
ويسبقوا كل ما عداهم من احتياجات أخرى .. ومن غيرهم سيكون
تكويننا النفسي ناقص ومشوه ومليان ثغوب نفسية عميقة .

الاحتياج الأول أسكنمه (الاحتياج للشوفان) Mirroring Need
احتياج إن حد يوصل لك إنك متشاف ومتندر .. حد يصتف لك
ويقول لك براقو .. حد تشوف في عينيه ضحكة وفرحة وفخر بيك ..
حد يبقى بالنسبة لك زي مرآة سيندريللا .. توريك جمالك وتظهر لك
محاسنك .

الاحتياج الثاني اسمه (الاحتياج للتقديس / التمجيد) Idealizing
Need .. يعني تحتاج إنك تشوف حد على إنه إنسان كامل .. مثالي ..
أسطوري .. يعرف كل حاجة .. يقدر يعمل أي حاجة .. مافيش شيء
يقف قصاده .. ومافيش معضلة تتحداه .

أما الاحتياج الثالث فهو (الاحتياج للتوأمة) Twinship Need ..
يعني تحتاج حد يكون صاحب .. رفيق .. تحس إنه زيك وشبهك .. فيه
منك وفيك منه .. تنس بيه .. تحب معيته .. تنتمي أنت وهو لحاجة
واحدة .

الاحتياج للشوفان هو اللي بيخلي البنت الصغيرة تلبس الفستان
الجديد وتروح لماتها وتقول لها: «بصي عليا .. شوفيني .. أنا حلوة ؟» ..
هو اللي بيخلي الولد يقف قدام المرآة ويستعرض عضلاته .. هو اللي
بيخلي الأطفال يعملوا أي حاجة علشان أهلهم يُعجبوا بيهم ويصفقوا
لهم .. من أول سماعان الكلام (أحياناً) لغاية نتيجة المدرسة والدرجات .

والاحتياج للتقديس / التمجيد هو اللي بيخلي الأطفال يدوروا
طول الوقت على بطل قوي .. خارق .. ماحصلش .. هو اللي ورا الهوس
الرهيب بسوبرمان وسبايدرمان وباتمان وكاتوومان .. بشر فوق مستوى
البشر .. عندهم قدرات خاصة جداً .. لا يُقهرون .. لا يُغلبون .. وأحياناً
لا يموتون .

أما الاحتياج للتوأمة فهو اللي بيخلي الولد يقف جنب أبوه في أثناء علاقة دقنه ويعمل زيه، والبنت تقلد أمها في اللبس والمشي والطبخ، ولعب دور الأم مع عروستها الصغيرة.

طبعاً أول حد في حياتنا يبشبع الاحتياجات دي عندنا هما الأم والأب (أو من يقوم بدورهم).. الطفل لما يشوف في عينين أمه وأبوه وكلامهم وأفعالهم فرحة وفخر وتشجيع وتقدير، ده يُشبع عنده الاحتياج للشوفان.. فيحس إنه موجود، وإن وجوده متقدر، ومُرحب بيه.

ولما يلاقي أمه بتفهمه من غير ما يتكلم، وتلبي احتياجاته بشكل كافي، ويلاقي أبوه بيحب له اللي هو عاوزه لغاية عنده، ويتدخل عند اللزوم علشان يساعده أو يحميه من الخطر والضعف والمرض، ده يُشبع عنده الاحتياج للتقدير.. فيحس بالأمان وبالحماية والسند.. ويتطمئن إن فيه حد كبير في ضهره.

ولما الأب والأم يلعبوا مع أولادهم، كأنهم صغروا في السن زيه.. وتبدأ البنت تحس إنها بتتتمي لعالم النساء (زي أمها)، ويحس الولد إنه بيتتمي لعالم الرجال (زي أبوه)، ده يشبع عندهم الاحتياج للتوأمة.. فيحسوا انهم مش لوحدهم.. وانه فيه حد شبههم.. وجنبهم.. ومعاهم.

إشباع كل احتياج من دول بيملأ ثقب نفسي داخلنا.. وبيروي بذرة من بذور أنفسنا العطشى.. وبيقرب المسافات بين جزرنا المعزولة.. ويساهم في تشييد بنائنا النفسي، وتكوين صورتنا الذاتية، وصقل شخصيتنا الوليدة.. وبيكون هو حجر الأساس في شعورنا بالثقة والاستحقاق.

الثلاث حاجات دول.. هم اللي بيوصلوك لـ (أنا أستاهل).. أستاهل أكون موجود.. ووجودي متشاف، ومتقدر، ومتطمئن، ومتونس.

* * *

طيب هل الاحتياجات الأساسية دي موجودة عند الأطفال بس
لأ.

الاحتياجات دي موجودة عندنا كلنا، من أول ما نتولد لغاية
ما نموت.. بس بتكون في صورة طفولية واحنا صغيرين.. وفي صورة
ناضجة واحنا كبار.

يعني اللي بيخليك تستنى (اللايك والكومنت والشير) لبوستاتك
على فيس بوك هو الاحتياج للشوفان، واللي بيخليكي تلبسي وتأنقي
وتهتمي بجمال مظهرك هو برضه الاحتياج للشوفان.. اللي بيخليك
تشوف حبيبك على إنها ملاك نازل من السما هو الاحتياج للتقديس،
واللي بيخليك تبجل أستاذك ومديرك وشيخك وتأخده قدوة ومثل
أعلى، هو أيضًا الاحتياج للتقديس.. أما اللي بيخليك تدور على
أصحاب، وتحب تتجمع في شلة، وتنتمي لأسرة أو مجموعة هو
الاحتياج للتوأمة.

التلات احتياجات دول هم الوقود النفسي اللي بيساعدنا في سلك
طرق الحياة الوعرة.. هم الطاقة اللي بنشحن بيها نفسنا كل شوية
علشان ماننطفيش ومانبهتش.. هم محركات النفس، ودعامات الروح،
إنت بتحس بوجودك لما تحس إنك متشاف بعيون اللي حواليك..
وبتحس إن ليك أهمية لما تتظمن بوجود حد أكبر معاك.. وبتعرف إنك
عامل فرق لما تلاقي جنبك حد بيونسك.

* * *

طبعا ممكن يكون حواليك ناس كتير بيُشبعوا عندك التلات احتياجات
دول.. ودي حاجة كويسة جدا.. يعني والدك ووالدتك.. اخواتك
ومعلمينك.. أبطالك الخياليين.. زميلك وأصحابك.. لكن من كرم
ربنا ونعمه إنه ممكن واحد بس يقوم بـ بكل بساطة بإشباع التلات
احتياجات عندك في الوقت نفسه، (في الحدود المعقولة ودون اختلاط
في الأدوار بالطبع)..

يعني أبوك يبقى مرابتك، وقدوتك، وصاحبك في الوقت نفسه،
والدتك تبقى عينيك، ومثلك الأعلى، وصدقتك في الوقت نفسه..
استاذك يبقى قدوتك وصاحبك وزى أبوك، صاحبك تبقى مرابتك
ونسك، طبيبك النفسي يبقى مرشدك ورفيقك وزى أبوك برضه.

و... محمد صلاح.

إيه ده؟

ماله محمد صلاح؟

وإيه دخل محمد صلاح في القصة دي دلوقت؟
هاقول لك.

* * *

حب الناس للاعب الكرة المتميز جدًا (محمد صلاح) ظاهرة
استحق الوقوف عندها.. هو مش حب طبيعي من جمهور للاعب
كرة قدم موهوب.. اللاعبين الموهوبين كثير.. ومش سببه بس مهارته
وأخلاقه وتدينه.. الموضوع تخطى ده فعلا.. الناس حبت الفريق اللي
يلعب فيه صلاح وشجعته، ولما اتنقل لفريق تاني، حبوا الفريق التاني
وشجعوه برضه.. ولو اتنقل لفريق تالت.. هيقفوا معاه ضد الفريقين
الأولانيين.. الناس بتفرح لفرحة محمد صلاح.. وتحزن لحزنه.. وتتألم
لألمه.. عاوزينه يلعب كل ماتش.. وعاوزينه يجيب جول واثنين وتلاتة
في كل مباراة.. الأمهات بتدعي له زي ما يكون ابنها، والأطفال
بيعشقوه زي ما يكون سوبرمان.. الجمهور بيقف معاه في أي أزمة،
وبيدافع عنه في كل شدة زي ما يكون (حتى من كل واحد فيهم).

أيوه.. هو ده.

محمد صلاح حتى من كل واحد فينا.. وبيملا جزء داخلي عميق في
نفس كل واحد مننا.

إحنا نقدر نشوف حب الناس لمحمد صلاح بناء على الكلام السابق.

حبنا لمحمد صلاح ليه علاقة بالتلات احتياجات دول.
محمد صلاح خلاك متشاف.. لأنه خلى مصر متشافة.. وخلى
العرب كلهم متشافين.
هو كمان مثل جيد وقدوة متفردة، في نجاحه وبساطته وتواضعه
وإصراره.

والأهم من كل ده.. إنه كمان واحد مننا.. شبهنا.. زينا.. بدأ من
الصفرة.. وتعب وكافح بمنتهى العزيمة والإخلاص لغاية ما وصل لل
هو فيه دلوقت.

محمد صلاح بيشبع أهم تلات احتياجات نفسية جوانا.. الشوفان
والتمجيد والتوأمة.. بيساعدنا نجبر كسور نفسنا.. بيقرب الأمل مننا..
بيجمعنا ويدوب المسافات النفسية بيننا.. من دون قصد أو نية أو عمد..
فقط بكل تلقائية وعفوية.. وودي عبقرته.. اللي ربنا حباه بيها.. زي ما حباه
بحاجات تانية.. أنا ما عرفهاش كلها.. ساهمت في عشقنا الاستثنائي ليه.
واحد..

واحد بس..

يقدر يخلي جروح نفسك تلتئم..
وتصدعات روحك تترمم.

شوف بقى الست إيسا بتقول إيه في أغنياتها الجميلة (حالة حب)..
علشان تعرف قد إيه الفن سابق العلم.. والإبداع سابق البحث:

سيبيني أسرح فيك شوية..

وانسى أيام ضاعو مني..

نفسي عمري يعدي بيا..

وانت بعينيك دول حاضني.. (الشوفان)

وانا جنبك شايقة منك..

حاجة من ريحة أبويا.. (التقديس)

حب الدنيا دي جواك ومعاك..

شايقة حنية أخويا.. (التوأمة)

أدي يا سيدي التلات احتياجات بكل بساطة: عيون تشوفك
والمضحك.. وحد فيه ريحة الأب.. وونس وأخوة وحنية.
ونقعد احنا ندرس وتعلم ونحط نظريات.. ويبجي الفن في جملتين
اليتين يلخص كل حاجة.

* * *

الاحتياجات دي لو أشبعت وتمت تلبيتها في الطفولة، هيطلع
لنا إنسان بيحب نفسه، وواثق فيها، ومصداق إنه يستاهل.. شخص
مش محتاج موافقة من حد علشان يحس إنه موجود.. ولا إذن من حد
علشان يحس إنه مقبول. وده مش معناه إطلاقاً إن الاحتياجات دي
هتختفي بعد كده.. بالعكس.. هي هتفضل موجودة، بس بشكل كبير
وناضح وغير مؤذي (زي ما وضحنا قبل كده).

أما لو لم تشبع الاحتياجات دي في الطفولة، ولم تلبى بشكل كافي،
فالنتيجة هتكون إنسان نرجسي مريض، مغرور، فارغ النفس، منتفخ
الذات (اضطر يملأ ثقوب نفسه بالهواء).. بيحاول يثبت بكل طريقة
إنه مهم، ويستخدم أي حد لصالحه بمنتهى الأنانية.. حد بيدور على
التصفيق عمال على بطال (علشان يرضي طمعه للشوفان).. وبيتملق
الأخرين بكل شكل (علشان يرضي نهمه للتقديس).. ويستخدم غيره
لحساب نفسه (علشان يرضي شرهه للمصاحبة).. يعني يحاول إشباع
الاحتياجات نفسها بس بشكل مريض ومؤذي، وأحياناً مدمر.
أو تكون النتيجة مجموعة أخرى من الأمراض النفسية زي الاكتئاب
والقلق وبعض اضطرابات الشخصية، وحتى الفصام.

يبقى عندنا تلات احتياجات أساسية..

ممکن يكملونا..

وممکن يبهدلونا.

من غيرهم بتبقى شخصيتك مفككة مهلهلة..

وبيهم بتبقى موجود، ومتقدر، ووجودك فارق.

بالمناسبة..

هو انت حاسس إنك موجود.. ومتقدر.. ووجودك فارق؟

أنا محتاج

بعد ما حضرتك تتحول من مجموعة من الوظائف النفسية البدائية جداً إلى (نفس بشرية مترابطة) .. وبعد ما يتم إشباع التلات احتياجات النفسية الأساسية عندك بشكل كافي .. وبعد ما يتم ملء فراغاتك النفسية والتحامها والتئامها .. تنتقل علاقاتك باللي حواليك لمستوى آخر.

في المرحلة اللي فاتت كان كل هدف علاقتك بالآخرين (ابتداء بالأم والأب)، هي الوظيفة اللي بيؤدوها ليك .. يعني هتاخذ منهم إيه علشان يساعذك في تكوينك النفسي .. إنت مش بتعمل علاقة بمعنى علاقة .. لكنها علاقة بمعنى وظيفة واستفادة .. علشان في الآخر تبقى (إنت) .. تبقى موجود .. تبقى هنا.

بعد ما بقيت (إنت) وموجود وهنأ .. علاقتك بالآخر هتبقى علاقة شخص بشخص .. علاقة احتياج من بني آدم لبني آدم .. علاقة رايح جاي.

هنا هيبقى فيه مجموعة تانية من الاحتياجات النفسية .. موجودة برضه من ساعة ما اتولدت .. لكنها من نوعية مختلفة شوية.

هنا..

انت محتاج تتقبل.. وتتحب.. وتُحترم.. ويُهتم بيك.
تتقبل بدون شروط.. وتتحب من غير تفصيل.. وتُحترم كما
انت.. ويُهتم بيك لأجلك.
محتاج تتسمع ويُصغى إليك من دون أحكام.
محتاج تتصدق..
محتاج تقول (لأ)..
محتاج يتعمل لك حساب.. وترسم لك حدود..
وطبعًا..
محتاج تصدق إنك تستاهل كل ده.
واحتياجات تانية كتير.

مش بس كده.. الاحتياجات دي كلها ماشية في اتجاهين.. بمعنى
إنك زي ما انت محتاج تتقبل.. محتاج برضه تقبل.. زي ما انت محتاج
تتحب.. محتاج تحب.. زي ما انت محتاج تقول (لأ).. محتاج أحيانًا
يقال لك (لأ).. وهكذا.

كل الاحتياجات دي زي اللي قبلها.. خاصة بكل النبي آدمين..
خاصة بكل البشر.. في كل عمر.. وكل زمان ومكان في العالم.. وبتبدأ
منذ الطفولة.. علشان كده اسمها (احتياجات إنسانية فطرية طبيعية)..
هي بتتولد جوانا.. وبتكمل معنا طول حياتنا.

الطفل بيبقى جواه الاحتياجات دي من أمه وأبوه..
التلميذ بيبقى محتاجها من أستاذه..
الزوج والزوجة جواهر الاحتياجات دي ناحية بعض..
اللي بيعجبوا بعض..
الأصحاب.. الأصدقاء.

كل علاقة بندخلها في حياتنا بنكون محتاجين فيها بعض الاحتياجات
دي على الأقل.

لو تم إشباعها من اللي معاك بشكل كافي.. هتنمو وتنضج وتزدهر
نفسياً.. هتحس بقيمتك وتحب نفسك وتستمتع بحياتك.. ولو لم يتم
إشباعها بالشكل المناسب.. هتدبل وتنظفي وتفقد جزء مهم (أو أجزاء
مهمة) من نفسك.. وهتفضل الاحتياجات دي موجودة جواك بشكل
حاد وضغط (مش طبيعي ومعتدل)، وتطارذك طول عمرك كتفجع
الصديد من جرح غائر، أو كالأشباح المخيفة في الليالي المظلمة.

علشان كده.. مهم تعرف إنت محتاج إيه في كل علاقة.. وهل
احتياجاتك دي مسددة واللا لأ..
لو كانت مسددة يبقى عظيم وجميل وتمام.. ولو ماكانتش، يبقى
هنقف وقفة.. ونشوف هنعمل إيه.

تعالى بقى نرسم الخطوة الأولى على خريطتنا.. خريطة الأربع
خطوات.

اسأل نفسك وبصراحة شديدة:

هو أنا هنا ودلوقت.. في العلاقة دي.. محتاج إيه؟
وهل الاحتياج ده مُشبع واللا لأ؟

من أول علاقتك بأبوك وأمك..

لغاية علاقتك بزوجتك / زوجك.

محتاج أتقبل من دون شروط.. طيب هو أنا مقبول من دون شروط؟

محتاج أتحب.. طيب هو بيحبني زي ما انا؟

محتاج أصدق إني أستاهل (أتقبل وأتعب وأنجح وأفرح و...
(...))، هو أنا مصدق إني أستاهل كل ده؟

محتاج أرسم لنفسى حدود ما حدش يعديها.. طب أنا باعمل كده
لعلاً؟ واللا باسبب اللي رايح يؤذي.. واللي جاي يجرح؟

محتاج أتشاف وأحس بوجودي وأهميته؟ هل ده متحقق؟

محتاج أأحترم ولا أهان أو أمتهن؟ ده حاصل؟

محتاج أقول (لا) لو كان حد بيؤذيني أو يشوهني أو بيظفيني.. هو
أنا باقولها؟

محتاج أحس بالأمان.. ده موجود؟

طبعاً مش مطلوب إشباع كل هذه الاحتياجات بنفس القدر في كل
أنواع العلاقات..

يعني في علاقات الشغل، إنت محتاج أكثر إنك تُحترم وبيبقى لك
حدود..

في علاقات الحب، إنت محتاج أكثر إنك تتحب وتتشاف وتتقبل..

في علاقات أخرى.. إنت محتاج أكثر إنك تتصدق..

في علاقات تانية.. محتاج يُهتم بيك.. وهكذا.

مزيج متنوع ومتغير من التبادل والتوافق..

لكن ماينفعش في أي حال من الأحوال إنك تتأذى أو تسمح
بالأذى تحت أي بند.. ومن أي حد.

راجع بقى كل العلاقات المهمة في حياتك ..
وأولها علاقتك بنفسك .

راجع تاريخك وحاضرک ومستقبلک ..
وأقف قدام نفسك ..

أنا .. محتاج إيه؟

محتاج إيه من نفسي؟

ومحتاج إيه من غيري؟

واحد .. اثنين .. ثلاثة ..

وأول ما تعرف وتحدد انت محتاج إيه .. حاول تشوف بصراحة
وشجاعة إنت محتاج ده ليه .. علشان إيه .. علشان افتقدته زمان؟ واللا
علشان مفقدته دلوقت؟ علشان وصلتک رسالة إنه مش من حقک؟
واللا علشان انت ما طالبتش بيه؟ علشان تبطل تخاف من بكرة؟
واللا علشان تتطمّن النهاردة؟ علشان اضطريت تدفن نفسك زمان؟
واللا علشان تتولد من جديد؟ علشان وعلشان وعلشان ...

واضحة الحكاية؟

محتاج توضيح أكثر؟

ماشي ..

هاوریک عینة من کلام بعض الناس الی مشیوا الطریق ده قبل کده ..
وبدأوا بخطوة تحديد احتياجاتهم غير المشبعة من الی حوالیهم (أو من
نفسهم):

• أنا محتاج أتشاف وأتقبل وأتُحِبُّ وأُحترم، علشان.....

أنا محتاج أتشاف وأتقبل وأتُحِبُّ وأُحترم، علشان أبطل أسترضي الناس.

أنا محتاج أتشاف وأتقبل وأتُحِبُّ وأُحترم، علشان أبقي نفسي، وما بقاش حد تاني.

أنا محتاج أتشاف وأتقبل وأتُحِبُّ وأُحترم، علشان أنا تعبت من كتر الرفض.

أنا محتاج أتشاف وأتقبل وأتُحِبُّ وأُحترم، علشان ما اضطرش أعمل حاجة مُضرة ليا علشان أتشاف.

أنا محتاج أتشاف وأتقبل وأتُحِبُّ وأُحترم، علشان أحترم نفسي.

أنا محتاج أتشاف وأتقبل وأتُحِبُّ وأُحترم، علشان ماضيّ عيش عمري لي الجري ورا المثالية.

أنا محتاج أتشاف وأتقبل وأتُحِبُّ وأُحترم، علشان أبقي حر.

أنا محتاج أتشاف وأتقبل وأتُحِبُّ وأُحترم، علشان أعرف أقبّل نفسي.

أنا محتاج أتشاف وأتقبل وأتُحِبُّ وأُحترم، علشان أتغير لنفسي مش لحد تاني.

• أنا محتاج أبطل الإحساس بالذنب عمال على بطل، علشان.....
(المقصود الإحساس المرّضي بالذنب):

أنا محتاج أبطل الإحساس بالذنب عمال على بطل، علشان أسمع نفسي.

أنا محتاج أبطل الإحساس بالذنب عمال على بطل، علشان أسمع نفسي إني أفرح.

أنا محتاج أبطل الإحساس بالذنب عمال على بطل، علشان أحس بالحرية.

أنا محتاج أبطل الإحساس بالذنب عمال على بطل، علشان أنا حاسس إني مسجون.

أنا محتاج أبطل الإحساس بالذنب عمال على بطل، علشان أنا مش باستمتع بأي حاجة في حياتي، حتى الأكل والشرب.

أنا محتاج أبطل الإحساس بالذنب عمال على بطل، علشان ما ازرع هوش في أولادي.

أنا محتاج أبطل الإحساس بالذنب عمال على بطل، علشان ما اسمحش لحد يحسني بالذنب.

أنا محتاج أبطل الإحساس بالذنب عمال على بطل، علشان أقبل اختلاف الآخرين عني.

أنا محتاج أبطل الإحساس بالذنب عمال على بطل، علشان اللي وصلني طول عمري من اللي حواليا إن مجرد وجودي ده ذنب.

• أنا محتاج أقبل نفسي كلها على بعضها، بدون شروط ولا أحكام،
علشان.....

أنا محتاج أقبل نفسي كلها على بعضها، بدون شروط ولا أحكام،
علشان أعرف أعيش حياتي.

أنا محتاج أقبل نفسي كلها على بعضها، بدون شروط ولا أحكام،
علشان أنا بشر.

أنا محتاج أقبل نفسي كلها على بعضها، بدون شروط ولا أحكام،
علشان أي خنافة مع نفسي هاطلع منها خسران.

أنا محتاج أقبل نفسي كلها على بعضها، بدون شروط ولا أحكام،
علشان أبطل قسوة على نفسي.

أنا محتاج أقبل نفسي كلها على بعضها، بدون شروط ولا أحكام،
علشان أعرف أغيرها.

أنا محتاج أقبل نفسي كلها على بعضها، علشان لو ما قبلتهاش هاموت
واقص عمر.

**مهم نعرف هنا إن القبول غير الموافقة.. وإني (أقبل نفسي) غير
إلي (أوافق على اللي أنا فيه).. وإني أقبلك مش معناها إني موافق على
اللي انت بتعمله.. إحنا بنقبل الموجود كخطوة أولى في طريق تغييره..
لما إيدك تتجرح، أكيد مش هتقطعها.. لكنك هتقبل اللي حصل فيها
علشان تعرف تعالجها.. لما ابنتك يغلط، مش هينفع تتبرأ منه وتطرده
برة البيت.. لكنك هتقبله وتقبل وجوده على الرغم من عدم موافقتك
على فعله.. وده اللي هيساعده إنه يتغير للأحسن..

إحنا بنقبل نفسنا علشان نزيكها ونطهرها ونعالجها ونغيرها.

• أنا محتاج أشيل شيلتي وبس، وما اشيلش شيلة حد غيري،
علشان.....

أنا محتاج أشيل شيلتي وبس، وما اشيلش شيلة حد غيري، علشان
الحمل بقى ثقيل عليا.

أنا محتاج أشيل شيلتي وبس، وما اشيلش شيلة حد غيري، علشان
ده نوع من أنواع العقاب لنفسى «وليحملن أثقالهم وأثقالاً مع أثقالهم»
(العنكبوت: ١٣).

أنا محتاج أشيل شيلتي وبس، وما اشيلش شيلة حد غيري، علشان
أولادي ما يطلعوش اعتماديين.

أنا محتاج أشيل شيلتي وبس، وما اشيلش شيلة حد غيري، علشان
ما اقعش في حد انتهازي ويستغلني.

أنا محتاج أشيل شيلتي وبس، وما اشيلش شيلة حد غيري، علشان
لو فضلت كده، ممكن بعد شوية أنهار، وحتى شيلتي ما اقدرش أشيلها.

أنا محتاج أشيل شيلتي وبس، وما اشيلش شيلة حد غيري، علشان
«وكلهم آتية يوم القيامة فردًا» (مريم: ٩٥).

• أنا محتاجة أحس وأصدق وأعيش وأمارس إني أستاهل،
علشان.....

أنا محتاجة أحس وأصدق وأعيش وأمارس إني أستاهل، علشان أنا
بني آدمة من حقها تحس بده وتصدق.

أنا محتاجة أحس وأصدق وأعيش وأمارس إني أستاهل، علشان أنا
تعبت من إحساس إني ما استاهلش أي حاجة.

أنا محتاجة أحس وأصدق وأعيش وأمارس إني أستاهل، علشان ما
اسمحش لحد يعاملني على إني ما استاهلش.

أنا محتاجة أحس وأصدق وأعيش وأمارس إني أستاهل، علشان
أحس بحريتي.

أنا محتاجة أحس وأصدق وأعيش وأمارس إني أستاهل، علشان ده
حقي اللي ربنا اداهولي، وما ينفعش أستاه من حد غيره.

أنا محتاجة أحس وأصدق وأعيش وأمارس إني أستاهل، علشان
أتحرك من مكاني.. كفاية بقي.

أنا محتاجة أحس وأصدق وأعيش وأمارس إني أستاهل، علشان
أوصل لأولادي إنهم يستاهلوا.

أنا محتاجة أحس وأصدق وأعيش وأمارس إني أستاهل، علشان..
أول مرة أعيط كده لما شفت إني حاسة إني ما استاهلش.

• أنا محتاجة أصحي أنوثتي الحقيقية اللي اندفنت بالحياة زمان،

علشان.....

أنا محتاجة أصحي أنوثتي الحقيقية اللي اندفنت بالحياة زمان،
علشان أنا زهقت من لعب دور الراجل.

أنا محتاجة أصحي أنوثتي الحقيقية اللي اندفنت بالحياة زمان، علشان
أستريح من المعاناة اللي جوأيا.

أنا محتاجة أصحي أنوثتي الحقيقية اللي اندفنت بالحياة زمان، علشان
ده حقي.

أنا محتاجة أصحي أنوثتي الحقيقية اللي اندفنت بالحياة زمان، علشان
أنوثتي مش عار.

أنا محتاجة أصحي أنوثتي الحقيقية اللي اندفنت بالحياة زمان، علشان
أعرف أحترمها وأحبها.

أنا محتاجة أصحي أنوثتي الحقيقية اللي اندفنت بالحياة زمان، علشان
أتنازل عن دور المتحكم المسيطر على كل شيء.

أنا محتاجة أصحي أنوثتي الحقيقية اللي اندفنت بالحياة زمان، علشان
أنا مابقيتش عارفة أنا مين.

أنا محتاجة أصحي أنوثتي الحقيقية اللي اندفنت بالحياة زمان، علشان
من حقي أستمتع بيها.

أنا محتاجة أصحي أنوثتي الحقيقية اللي اندفنت بالحياة زمان، علشان
أعرف أتجوز.

أنا محتاجة أصحي أنوثتي الحقيقية اللي اندفنت بالحياة زمان، علشان
أبطل عنف وسوء ظن، واتظمن.

أنا محتاجة أصحي أنوثتي الحقيقية اللي اندفنت بالحياة زمان، علشان
أنوثتي مش ذنب.

أنا محتاجة أصحي أنوثتي الحقيقية اللي اندفنت بالحياة زمان، علشان
أتنازل عن دور الغلب والصعابيات وقلة الحيلة.

أنا محتاجة أصحي أنوثتي الحقيقية اللي اندفنت بالحياة زمان، علشان
أسترد حقي في الحياة.

أنا محتاجة أصحي أنوثتي الحقيقية اللي اندفنت بالحياة زمان، علشان
أبطل أتخاف مع نفسي ومع ربنا.

• أنا محتاجة أتصالح مع جسمي، علشان.....

أنا محتاجة أتصالح مع جسمي، علشان أحس بالأمان فيه.

أنا محتاجة أتصالح مع جسمي، علشان جسمي بدأ يتعب بسببي.

أنا محتاجة أتصالح مع جسمي، علشان هو الوحيد اللي مكمل معايا
لآخر يوم في عمري.

أنا محتاجة أتصالح مع جسمي، علشان ده بيتي.

أنا محتاجة أتصالح مع جسمي، علشان جسمي مالوش غيري
بدافع عنه.

أنا محتاجة أتصالح مع جسمي، علشان أوصل له رسايل عكس
كل الرسايل اللي وصلته من المجتمع.

أنا محتاجة أتصالح مع جسمي، علشان ربنا سخره تسخير تام
لخدمتي وتنفيذ اللي أنا عاوزاه منه.

أنا محتاجة أتصالح مع جسمي، علشان يبطل يمرض كل يوم مرض
غير الثاني.

أنا محتاجة أتصالح مع جسمي، علشان هو ماهوش ذنب في أي
حاجة.

أنا محتاجة أتصالح مع جسمي، علشان يبطل يعاقبني بالأكل أو
بعدم الأكل.

• أنا محتاجة أقول (لا) الي تكبرني وتوصل رسالة إيجابية لي
قدامي، علشان.....

أنا محتاجة أقول (لا) الي تكبرني وتوصل رسالة إيجابية لي قدامي
علشان أنا مش طفلة صغيرة.

أنا محتاجة أقول (لا) الي تكبرني وتوصل رسالة إيجابية لي قدامي
علشان ما حدش كان بيسمعني أصلاً.

أنا محتاجة أقول (لا) الي تكبرني وتوصل رسالة إيجابية لي قدامي
علشان الي قدامي ده مش ربنا.

أنا محتاجة أقول (لا) الي تكبرني وتوصل رسالة إيجابية لي قدامي
علشان أنا مش سداح مداح للناس.

أنا محتاجة أقول (لا) الي تكبرني وتوصل رسالة إيجابية لي قدامي
علشان أحط حدود لنفسي.

أنا محتاجة أقول (لا) الي تكبرني وتوصل رسالة إيجابية لي قدامي
علشان أوقف عني الأذى.

• أنا محتاجة أقبل موت أبويا، علشان.....

أنا محتاجة أقبل موت أبويا، علشان حياتي الراكدة دي تتحرك
ويرجع لها النبض والحياة.

أنا محتاجة أقبل موت أبويا، علشان أبطل الصراع اللي داير جوايا
مع ربنا.

أنا محتاجة أقبل موت أبويا، علشان أبطل أرمني نفسي في حضن
رجالة بتبترني عاطفياً.

أنا محتاجة أقبل موت أبويا، علشان أخرج بره سجن الماضي واقفل
ورايا الباب بالضبة والمفتاح.

أنا محتاجة أقبل موت أبويا، علشان الطفلة اللي جوايا تبطل عياط.

أنا محتاجة أقبل موت أبويا، علشان أتحرر من دفتي لنفسي وراه.

أنا محتاجة أقبل موت أبويا، علشان أصدق إن حياتي ونجاحي
وفرحتي من بعده مش خيانة ليه.

* * *

سُفِّت احتياجاتنا وعدم تلبيةها بتعمل فينا إيه؟
سُفِّت ده ممكن يعطلنا ويوقف حياتنا ازاي؟
سُفِّت انك زي ما عندك احتياجات من الناس.. عندك كمان
احتياجات من نفسك

إحنا ممكن نشوف معظم المشكلات والصعوبات النفسية من وجهة
النظر دي.. وهنكتشف إن كل مشكلة علاقاتية أو صعوبة نفسية
أو مرض أو عرض نفسي، وراه في الحقيقة «احتياج إنساني غير مشبع».
كثير من المصابين باضطراب الشخصية الهستيريونية (اللي بتحب
تسليط الأضواء عليها)، كل اللي محتاجينه هو إنهم يتشافوا.
كثير من الناس اللي عندهم أعراض جسدية دون أي تفسير
عضوي (الأمراض النفس-جسدية)، محتاجين يلاقوا حد يهتم بيهم.
كل الناس اللي عندهم اكتئاب محتاجين جدا يحسوا ويصدقوا إنهم
يستهلوا.

حتى الفصامين اللي بيسمعوا أصوات مش موجودة ويشوفوا ناس
مش حقيقية، عندهم احتياج كبير جدًا لعمل علاقات مع آخرين، حتى
لو كانوا هيخترعوهم من خيالهم.

نرجع لك بقى..

عرفت انت محتاج إيه هنا ودلوقت؟

سُفِّت إنت محتاجه ليه؟

اكتشفت احتياجك ده مُشبع واللا لأ؟

تُحِب تبدأ.. تُحِب تجرب؟

تعالى نبدأ بأبسط الاحتياجات وأهمها على الإطلاق.. احتياجك
إنك تقبل نفسك كلها على بعضها، بدون شروط أو أحكام أو مقارنات.

هات ورقة وقلم واكتب ورايا الجملة دي وكملها من عندك على
قد ما تقدر من المرات:

«أنا محتاج أقبل نفسي كلها على بعضها بدون شروط ولا أحكام ولا
مقارنات، علشان.....».

أنا عايز

الخطوة المنطقية الثانية بعد ما تعرف احتياجك، وتعرف إنت محتاجة
ليه.. ومن مين.. ومن إمتى.. هي انك تعوزه.. يعني تطلبه.. تطلبه من
الطرف الثاني (أو من نفسك) بوضوح وبشكل مباشر.. والخطوة دي
مش سهلة على الإطلاق.. لأنها بتحمل في طياتها بعض المخاطر.

تعالى نشوف تاريخها الأول.. علشان تعرف هي مش سهلة ليه..
وإيه مخاطرها.

تفتكر زمان وانت طفل صغير، لما كنت بتحتاج حاجة، بتعمل إيه؟
لما كنت تبقى محتاج تاكل: كنت بتعيط.. أو تمسك بطنك.. أو تقول
أنا جعان.

لما كنت تبقى محتاج تنام: كنت برضه بتعيط.. أو تبدأ تغلس على اللي
حواليك.. أو تدخل في النوم فجأة.
طيب.. ولما كنت تبقى محتاج تتحب؟ كنت تقرب من والدك أو
والدتك.. وتمسح فيهم، وتنام في حضنهم.

ولما كنت تبقى محتاج يُهتم بيك؟ كنت تيجي قدامهم، وتنطط،
وتتشقلب، أو تقعد تحكي عن نفسك شوية.

ولما كنت تبقى محتاج تتشاف؟ كنت تقول لهم بصوالي.. شوفوني..
أنا أهو.

ولما كنت تبقى محتاج تتسمع؟ كنت تقول لهم اسكتوا.. ما حدش
يتكلم.. اسمعوني أنا.

طبعا كل ده كان ممكن يبقى مصحوب بسيمفونية رائعة من الصراخ
والعويل، لإضفاء موسيقى تصويرية مثيرة على الأحداث.

اللي بيحصل بقى من الأب والأم كرد فعل لطلبك إن احتياجاتك
دي تلبى، هو اللي ممكن يشكل حل رائع أو مشكلة معقدة.

الأب والأم (أو من يقوم بدورهما) ممكن يلبوا عوازانات (طلبات)
الطفل بشكل كافي وبدرجة مُرضية.. وممكن يرفضوها ويرفضوه أو
يهددوه أو يعاقبوه.. وهنا تبدأ المشكلة.

يعني هو مطلوب من الآباء والأمهات إنهم يلبوا كل طلبات
أطفالهم؟
لا طبعا.. ما حدش قال كده.. ده يبقى جنان.

أنا باتكلم عن الاحتياجات والطلبات الأساسية في الحب والاهتمام
والقبول والاحترام.. مش إنك تسيب ابنك يلعب بالنار أو يحط إيده في
فيشة الكهرباء.. ومش إنك تهلك نفسك وتحرقها لتلبية اللي هو عاوزه.

يعني.. لما يعبر عن احتياجه للحب.. تحبه.
لما يطلب انك تهتم بيه.. تهتم بيه.. ماتطنشوش ولا تهمله.
لما يقول لك شوفني أو اسمعني.. تشوفه وتسمعه.. وتفهمه وتحس بيه.
لما يعوز يتحضن.. تحضنه.
لما يعترض ويقول لك (لا).. تصبر عليه وتراجع نفسك.
ولو كنت مرهق أو تعبان.. توضح له بهدوء إنك مش قادر
دلوقت.. وده هيعلمه هو كمان إنه مايملمش نفسه فوق طاقتها في يوم
من الأيام.

طيب نربي أولادنا ازاي وانت بتقول ماينفعش نرفض أو نعاقب؟
أنا ماقلتش كده خالص.. من حقاك ترفض ومن حقاك تعاقب
(بمتهى الرحمة) كجزء من التربية السليمة.. بس لما تيجي ترفض،
ترفض تصرف أو سلوك معين.. مش ترفض ابنك كله على بعضه..
ومهم توصل له إنك رافض التصرف ده بعينه.. أو السلوك ده بشكل
خاص.. مش رافضه هو نفسه.
ولما تيجي تطلب منه حاجة.. مهم إنك تكون بتطلبها منه لحسابه
هو مش لحسابك انت.. علشانه هو مش علشانك انت.

لكن للأسف مش ده اللي بيحصل دايمًا.. اللي بيحصل غالبًا حاجات
تانية خالص.

بيحصل إن احتياجات الطفل تصطدم بعوازانات (رغبات
وطلبات) الأهل.. يعني هو يبقى (محتاج) يتشاف.. وأهله (عاوزينه)
يسمع الكلام.. هو يبقى (محتاج) يتقبل بدون شروط.. وأهله
(عاوزينه) يجيب الدرجة النهائية.. هو يبقى (محتاج) يفرح.. وأهله
(عاوزينه) مايضحكش بصوت عالي.. هو يبقى (محتاج) يتسمع..
وأهله (عاوزينه) يوطي صوته.

ده بيولد جوه الطفل صراع نفسي محتدم بين اللي هو (محتاجه) والي
أهله (عاوزينه).. ويربي جواه خوف شديد، يصل إلى حد الرعب
أحياناً من عواقب إنه (يعوز) يلبي احتياجاته النفسية البسيطة، أو
(يطلب) إشباعها.. لأنه لما طلبها اترفض هو شخصياً (مش بس
احتياجاته) واتهدد.. واتعاقب.. واتحرم.

الصراع ده بيتخزن ويفضل جوانا واحنا بنكبر.. ويطلع لنا بعد كده
في علاقاتنا مع الآخرين بمية شكل وبمليون طريقة.. يطلع لنا واحنا
بنصادق.. يطلع لنا واحنا بنحب.. واحنا بنتجوز.. واحنا بنخلف.
يعني لو نقلنا المشهد عليك دلوقت، احتمال تلاقي نفس الصراع ده
موجود جواك في بعض علاقاتك.. صراع (عايز) بس (خايف).. عايز
أطلب احتياجاتي البسيطة من الحب والاهتمام والقبول والاحترام..
بس خايف لحسن ده يرفضني أو ده يزعل مني أو ده يبعد عني أو
ده يسينيني.. خناقة نفسية داخلية مؤرقة ومستهلكة ومعطلة على كل
المستويات.

الخناقة دي بتخلينا نعمل حاجات صعبة جداً.

ممكن تخلينا نستسلم لعوزانات (طلبات ورغبات) الآخرين على
حساب احتياجاتنا.. فتنازل عن الاحترام في مقابل رضا الطرف
الأخر.. وتنازل عن الاهتمام في مقابل عدم حدوث مشكلات..
وتنازل عن الحب في مقابل استمرار العلاقة رغم فشلها الواضح.
مش بس كده.. ده ممكن من كتر الضغط.. نصدق إن رغبات الآخرين
دي هي رغباتنا احنا شخصياً.. ويبقى عندنا رغبات مش بتاعتنا.. وطلبات
غريبة علينا.. وعوزانات بعيدة تماماً عن احتياجاتنا الحقيقية. يعني تبقى
(عايز) تكون أغنى واحد في الدنيا، وتقعده تجمع في فلوس دون شبع..
وانت في الحقيقة من جواك (محتاج) تتحب.. تبقى (عايز) تدخل في
علاقات عاطفية ومتلاحقة (وأحياناً متزامنة).. لكنك من جواك (محتاج)
حد يهتم بيك.. تبقى (عايز) تلبس اورجينال وسينيه وهاي كلاس..
وكل اللي انت (محتاجه) من جواك هو إنك تحترم.

طيب واحتياجاتنا الأصلية تروح فين؟

ننكرها طبعاً.. ونرفضها وننساها.. كأنها ماتخصناش.. يعني تبقى هنموت من كتر (احتياجك) للحب.. وتقول أنا مش (عاوز) حد أهمني.. تبقي (محتاجة) اهتمام كبير جداً.. وتشوفي انك ماتستاهليهوش.. لبقي هنموت من كتر الوجد.. ومستكترين على نفسنا الدوا.

بس خلاص.. خلصت.

أنت تحولت لحد تاني غيرك.. انسلخت من نفسك لحساب الآخرين.. والباقي مكتوب في فصل (نفسك الحقيقية ونفسك المزيفة) من كتاب (الخروج عن النص).

فيه مصدر تاني للمخاوف اللي بتبقي مرتبطة بعوزاناتنا، غير اللي بيتقال ويتعمل بشكل مباشر من الأهل للأبناء.. ألا وهو اللي بيتشاف واللي يتعمل بينهم وبين بعض، أو مع حد تاني.. يعني الطفل يشوف أبوه وأمه بيتخانقوا، فيخاف من الجواز.. البنت تشوف أمها بتتهان وتتضرب، فتخاف من الرجالة.. الولد يشوف طفل بيتعاقب في الشارع علشان بيعيط، فيخاف يعبر عن مشاعره.. وهكذا.

رسايل الخوف بتوصل بأشكال مختلفة، مباشرة وغير مباشرة.. من الأهل والجيران والمعارف والمجتمع بشكل عام.

طيب هنعمل إيه؟

وإيه هي الخطوة الثانية بعد ما عرفنا احتياجاتنا (أنا محتاج...)، وعرفنا مبرراتها وأسبابها وأهدافها (علشان...)?

شوف يا سيدي.

الصراعات القديمة المخزونة جواك من نعومة أظفارك بين (عايز) بس (خايف)، بتلقي بظلالها بكل إصرار على أغلب علاقاتك الحالية، وحتى بعض معاملاتك اليومية.. علشان كده الصراعات دي محتاجة تتكشف وتتحل.. وإلا البديل هيكون إما إنك تنعزل وتزهدي في الناس، أو إنك هتقوم بتصميم وتنفيذ مجموعة لا بأس بها من (الألعاب النفسية) مع اللي حواليك.. أو إنك تعوز وتطلب احتياجاتك من مصدر تاني غير مصدرها الأصلي.. وكل دول في الآخر هيخلوا كل -أو على الأقل- معظم علاقاتك تبوء بالفشل الذريع والمتكرر.

إنت في الخطوة اللي فاتت، عرفت انت محتاج إيه في علاقة معينة (مع حد أو مع نفسك).. وعرفت انت محتاج ده ليه وعلشان إيه.
تعالى دلوقت نحاول نكتشف مع بعض إيه المخاوف الموجودة جواك.. إيه اللي مانعك تطلب احتياجاتك.. إيه اللي واقف في طريق عوزانك.

خليني أديك أمثلة من كلام الناس اللي جربوا الخطوة دي:

• أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن.....

أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن أتساب لو حدي.

أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن ده يكون بيغضب ربنا.

أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن أتأذى أكثر.

أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن يتقال عليا مفترية.

أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن ما حدش يقف جنبي.

أنا عايزة أقول (لأ) للأذى والضرر والتشويه اللي باتعرض لهم، بس خايفة لاحسن أضطر أتحمّل المسؤولية.

• أنا عايزة أصحّي أنوثتي اللي اندفنت بالحياة زمان، بس خايقة لاحسن
لاحسن

أنا عايزة أصحّي أنوثتي اللي اندفنت بالحياة زمان، بس خايقة لاحسن
تتاذى تاني.

أنا عايزة أصحّي أنوثتي اللي اندفنت بالحياة زمان، بس خايقة لاحسن
اكتشف إنى ساهمت في دفنها.

أنا عايزة أصحّي أنوثتي اللي اندفنت بالحياة زمان، بس خايقة لاحسن
ماتلاقيش اللي يستاهلها.

أنا عايزة أصحّي أنوثتي اللي اندفنت بالحياة زمان، بس خايقة لاحسن
ما اقدرش أحميها.

أنا عايزة أصحّي أنوثتي اللي اندفنت بالحياة زمان، بس خايقة لاحسن
مسؤوليتها تطلع أكبر مني.

أنا عايزة أصحّي أنوثتي اللي اندفنت بالحياة زمان، بس خايقة لاحسن
اللي حواليا مايستحملوهاش.

أنا عايزة أصحّي أنوثتي اللي اندفنت بالحياة زمان، بس خايقة لاحسن
ما اعرفش نفسي.

أنا عايزة أصحّي أنوثتي اللي اندفنت بالحياة زمان، بس خايقة لاحسن
الأنوثة تطلع ضعف زي ما كانوا يقولوا.

أنا عايزة أصحّي أنوثتي اللي اندفنت بالحياة زمان، بس خايقة لاحسن
أنتقم من اللي دفنها.

- أنا عايزة أتجوز، بس خايفة ل احسن.....
- أنا عايزة أتجوز، بس خايفة ل احسن أخسر حرיתי وأدّخل حياتي حد يتحكم فيا.
- أنا عايزة أتجوز، بس خايفة ل احسن أتبهدل وأتهان واتمرط.
- أنا عايزة أتجوز، بس خايفة ل احسن أتخان واتطعن في شهري.
- أنا عايزة أتجوز، بس خايفة ل احسن أتضرب.
- أنا عايزة أتجوز، بس خايفة ل احسن أتجس في البيت.
- أنا عايزة أتجوز، بس خايفة ل احسن اللي هتجوزه يحس بضعفي واحتياجي ويلعب بيا.
- أنا عايزة أتجوز، بس خايفة ل احسن أبقى مستباحة.
- أنا عايزة أتجوز، بس خايفة ل احسن ما اعرفش أختار الشخص الصح، وأقضي عمري باندم على اختياري الغلط.
- أنا عايزة أتجوز، بس خايفة ل احسن حياتي بعد الجواز تكون كلها نكد وخناق وعايط.
- أنا عايزة أتجوز، بس خايفة ل احسن أخنق نفسي واللي هتجوزه بالغيرة الزيادة.
- أنا عايزة أتجوز، بس خايفة ل احسن ما اقدرش على مسؤولية الجواز.
- أنا عايزة أتجوز، بس خايفة ل احسن أعيش في نكد وخناق كل يوم.
- أنا عايزة أتجوز، بس خايفة ل احسن أحب جوزي أكثر ما هو هيجبني.
- أنا عايزة أتجوز، بس خايفة ل احسن أتبهدل.
- أنا عايزة أتجوز، بس خايفة ل احسن اضطر أضحي واتنازل علشان أتحب واتقبل.
- أنا عايزة أتجوز، بس خايفة ل احسن بعد الجواز ألاقي جوزي بقى شخص تاني.

طيب.. تمام.. عرفنا مخاوفنا.. وعرفنا تاريخها.. وعرفنا كمان
مصدرها.. نعمل فيها إيه بقى؟ نسيبها تنتظ قدامنا زي العفاريت
كده؟ نوديا فين يا دكتور؟ نحلها ازاى؟
حاضر..

فاكر لما قلت لك في الفصل اللي فات إيه هي أول خطوة في تغيير
أي حاجة وأي حد؟
أيوه.. بالطبط: القبول..

مشكلة الخوف هي إنك بتتخاف معاها.. بترفضه.. مش عاوزه..
والود ودك تقصه وتستأصله من جواك تمامًا.. بس في الحقيقة هو ده
اللي بيزود حجمه ويخليه يكبر ويتعملق، ويتحول لغول نفسي ضخم
يوشك أن يلتهمك.

الخوف جزء أصيل من التكوين الإنساني.. حجر أساس في التركيبة
النفسية السليمة.. زيه زي الحزن والضعف والخطأ.. الخوف هو اللي
بيحركنا علشان نحمي نفسنا.. هو اللي بيدينا الدافع علشان ناخذ
قرارات حياتية حاسمة وسريعة، نتقذنا من مواقف قد تودي بنا إلى
الهلاك (النفسي أو الجسدي).

الخوف غريزة فطرية تساعد على البقاء.
ولعلمك.. لولا خوفك، لولا إنك قدرت تحمي نفسك وتكمل
لغاية دلوقت.

أي نعم، إنت هميتها بإنك تنازلت عن جزء منها.. وطلعت جزء
غيره مكانه..

بس ده الحل اللي كان قدامك وقتها.. ده كان أفضل المتاح بالنسبة لك.
ماينفعش تيجي بقى دلوقت وتكسر الدرع اللي حماك.. ماينفعش
تتخاف مع حته منك.. ماينفعش تتخلص من جزء فيك.. أي خناقة مع
حته منك هتكون إنت الخاسر الوحيد فيها.. أي محاولة للتخلص من جزء
فيك، لن ينتج عنها إلا تضخم هذا الجزء وتورمه بشكل سرطاني مميت.
أمال نعمل إيه؟

نقبله.. أيوه.. نقبل الخوف.. بعد ما اكتشفنا المخاوف.

وبافكرك تاني هنا إن القبول مش معناه الموافقة، ولا معناه الاستسلام.. بالعكس.. معناه الاعتراف بالموجود، من أجل علاجه وتغييره.

وصدقني..

أول ما تقبل خوفك.. هيتضاءل ويتقزم وياخد حجمه الحقيقي.

وأول ما تعترف بمخاوفك.. هتعرف تتعامل معاها.

إيه رايك؟

تيجى تقبله.. تيجى نفص الخناقة دي.. تيجى نحترم خوفنا.

ونقدر مخاوفنا.. تيجى نعرف بطبيعتنا البشرية..

جرب.. مش هاتخسر حاجة.. بالعكس هاتكسب رجوع جزء منك

إليك.. واستقرار نعمة ناشزة منك داخلك.. وعودتك كاملاً إلى نفسك.

* * *

يبقى احنا عرفنا احتياجاتنا المدفونة أو المؤجلة، لما قلنا: «أنا

محتاج..... علشان.....»، واكتشفنا مخاوفنا، وأخرجناها

من كهفها المظلم، لما سبينا نفسنا نكمل بتلقائية وشجاعة: «أنا

عايز..... بس خايف لاحسن.....»، وقبلنا كل اللي اكتشفناه،

وفضينا الخناقة اللي بينا وبينه، بعد كثير من الصبر والجهد.. وكثير

من الجروح والكدمات.. بس ولا يهملك.. دي كدمات محارب شجاع

يخطو خطواته الأولى نحو نفسه.

دلوقت، عاوزك تجرب تقول.. وتكتب.. وتكمل.. على قدم ما تقدر

من المرات:

«أنا عايز أقبل نفسي كلها على بعضها، بدون شروط ولا أحكام ولا

مقارنات، بس خايف لاحسن.....».

وتعالى بينا على الخطوة الثالثة..

خطوة الحقوق:

«أنا من حقي... حتى لو...»

من حقي

الخطوة دي هي خطوة العزم والهمة؛ لأن الخطوة اللي بعدها هي خطوة القرار والتنفيذ.. وأي قرار محتاج عزم.. وأي تنفيذ محتاج همة.

بعد ما تعرف إيه الاحتياجات اللي ناقصاك في أي علاقة.. بداية من علاقتك بأبوك وأمك لغاية علاقتك بشريك حياتك.. وبعد ما تكتشف المخاوف اللي مانعك من المطالبة بتلبية الاحتياجات دي وتقبلها.. مطلوب منك دلوقت تصدق إن احتياجاتك دي هي من حَقك.. وإن تلبيةها مش هبة من الطرف التاني.. وإشباعها مش تفضّل منه.

لو ما صدقتش إن احتياجاتك هي حق أصيل ليك.. مش هتتعرف تاخذها.. ولا هتقدر تطالب بيها.. ولو ما كتش متأكد من ده.. هتعمل حاجة من اتنين.. إما هتقرر إنك تتنازل عن تلبيةها بدرجة أو بأخرى.. وإما هتطلبها بكثير من الضعف والمسكنة.. تشحتها يعني.

ولنا في الأطفال الصغار (قبل تشويه فطرتهم) أسوة حسنة..

الطفل الصغير لما يبه ز يعمل حاجة .. يفضل وراها لغاية ما يعملها، مهما كان فيه قدامه معوقات .. أحياناً يطلب ويُلح في الطلب .. أحياناً يعيط .. أحياناً يصرخ .. لغاية ما أهله يلاقوا إنه مافيش مفر من تلبية احتياجه وإجابة طلبه .. أو رفضه بالطبع في بعض الأوقات.

افتكر الأطفال الصغيرة اللي في عيلتكم .. وخلينا ناخذ أمثلة مفصلة.

طفل (محتاج) إن والده يلعب معاه .. ووالده قاعد مشغول بالموبايل بتاعه .. يروح الطفل لوالده ويقول له: «أنا (عايزك) تلعب معايا». يطنش الأب مرة، ويقول له مش فاضي مرة .. تبص تلاقي الطفل يشد والده من إيده (أو من هدومه) .. ويقومه بالعافية .. علشان ينفذ له طلبه ويلبي احتياجه .. اللي هو شايف في اللحظة دي إنه (حقه) .. علشان كده أصر عليه، بكل ما أوتي من قوة .. لغاية ما أخده.

طفلة (محتاجة) تحس إنها حلوة وجميلة .. في حين إن أهلها وأصحابهم وقرابهم عمالين يهزروا معاها ويقولوا لها: «يا وحشة» .. «إيه الوحشة دي» .. «إنتي طالعة وحشة كده لمين» .. تقعد تقول لهم: «أنا حلوة» .. «أنا مش وحشة» .. «أنا حلوة قوي» .. وممكن تصرخ وتعيط وتضرب كمان .. لغاية يا إما يطلوا صفاقة وعلاسة وهزار سخييف .. وتبقى أخذت حقها منهم .. وإما تضطر بعد ما تُنهك قواها النفسية والجسدية، إنها تستسلم .. وتصدق - بكل أسف - إنها «وحشة».

اللي بيحصل أحياناً هو إن الأهل يوصلوا للطفل إن (احتياجاته) دي أصلاً مش من (حقه) .. وإنه ماينفحش يطالب بيها .. وماينفحش يُصرّ على الطلب .. وإلا يبقى سافل وقليل الأدب.

نفس الكلام يحصل في علاقات ثانية واحنا كبار.. اللي بيحب ويوصل
لي بيحبه إن (احتياجه) للاهتمام والاحترام مش من (حقه).. فيهمله
أو يهينه أو يسيء معاملته.. اللي متجوز ويوصل لمراته إن (احتياجه)
للحب والتقدير مش من (حقها).. وإنه بيتفضل عليها بإنه -أحياناً- يديها
من وقته ومن فلوسه ومن اهتمامه.. اللي بيعلم ويوصل لي بيعلمه، إن
(احتياجه) للقبول والصبر وحسن المعاملة مش من (حقه).. وإنه بيمنّ
عليه ببعض المعلومات التي لا ترقى حتى لدرجة العلم.

إحنا بقى عاوزين نصدق دلوقت إن احتياجنا دي من حقنا.. من
حقنا ناخدها.. من حقنا نلبيها.. من حقنا مانتنازلش عنها.

من حَقك في أي علاقة إنك تُحترم.. مشاعرك تُحترم.. أفكارك
تُحترم.. مساحتك الشخصية الخاصة تُحترم.. اختلافك وتفردك يُحترم.

من حَقك في أي علاقة إنك تتشاف.. تحس بوجودك وبقيمتك
وبأهميتك.. تتقدر على اللي بتعمله.. يتقال لك: (شكراً) و(برافو)
و(كتر خيرك).. مش إن وجودك زي عدمه.. أو إنك مش فارق.. أو
إن وجودك في العلاقة أمر مفروغ منه Taken for granted.

من حَقك تحس بتأثيرك وبأثرك ومردوده.

من حَقك كمان يكون ليك حدود.. حدود نفسية وجسدية
وعاطفية.. والحدود دي إنت اللي ترسمها مع كل شخص كما ترى
وكما تُقدّر.. وتحميها بالشكل اللي تشوفه مناسب.. وتدافع عنها بكل
طريقة متاحة ليك.

من حَقِّك ما حدش يقرب من نفسك أو جسمك أو مشاعرك من دون استئذانك وموافقتك ورضاك.. ماينفعش تسمع لحد يلومك أو يحسسك بالذنب، على حاجة إنت مالكش يد فيها.. ماينفعش حد ياخذ منك حاجة إنت مش عاوز تديها له؛ إن شالله تكون كلمة.. ماينفعش حد يتدخل أو يتطفل فيما يخصك ولا يعنيه.. من حَقِّك ما حدش بيتز مشاعرك أو يستغلك أو يبجي عليك.

برضه من حَقِّك ما حدش يرمي عليك أو يزرع جواك أي أفكار أو مشاعر مش تبعك.. يزهدق بيقى عاوزك تزهدق.. يغضب ويستنى منك تغضب.. يضحي ويطلب منك التضحية.. ماينفعش حد يشيلك شيلة غير شيلتك.. ولا حد يشوف فيك نفسه.. أو يفرض عليك وجوده.

من حَقِّك تقول (لأ) عند اللزوم، لكل حد بيحاول يؤذيك بأي شكل، أو يظلمك بأي طريقة، أو يضغط عليك بأي درجة.

من حَقِّك تصدق وتتصدق.. تحس ويتحس بيك.. تهتم ويهتم بيك.. وماتعاملش إلا بما تستحقه.

وقبل كل دول.. وبعد كل دول.. من حَقِّك تتقبل زي ما انت وكما أنت.. من غير ما تعير نفسك علشان حد، ولا تفصل نفسك على مقاس حد.. ولا تشوه نفسك لحساب حد.

وهنا هتيجي المعضلة..

معضلة التمن..

مش انت شايف ان ده حَقك؟
مش انتي شايفة ان دي حقوقك؟
طيب ادفع المقابل بقى..
طيب ادفعي التمن بقى..

التمن ده ممكن يكون زعل.. ممكن يكون خصام.. ممكن يكون
بُعد وهجر وانفصال.
التمن ممكن يكون إنك تغير شغلك.. أو تسيب وظيفتك.. أو تبدأ
مهنة تانية من أول وجديد.
التمن ممكن يكون وحدة.. ممكن يكون فقد.. ممكن يكون صعوبة
نفسية أو اجتماعية أو مادية.
بس الحقيقة كل ده أرحم من إن التمن يكون نفسك.

علشان كده في الخطوة دي، زي ما هو مهم إنك تصدق وتأكد إن
احتياجاتك وتلبيتها من حَقك.. مهم كمان تعرف وتوقع التمن اللي
هتدفعه.. وتشوف إنك مستعد لدفعه واللا لأ.. وتحسب هل هو ده
الوقت المناسب واللا تستنى شوية.. وتحط قدام عينيك تصور واضح
-بقدر الإمكان- عن اللي هيحصل بعدها.

وده لأنك في الخطوة الجاية هتختار وهتقرر: تكمل في اللي انت فيه
وتدفع تمنه.. واللا توقفه، وتدفع تمن توقيفه؟

وعلشان كده.. الصيغة بتاعة الخطوة الثالثة هي: «أنا من
حقي..... حتى لو/ على الرغم من.....».

مع العلم إن (حتى لو) تعبر -غالبًا- عن شيء متوقع حدوثه في
المستقبل.. و(على الرغم من) تعبر -غالبًا- عن شيء موجود بالفعل في
الحاضر.

ومع العلم أيضًا.. إن أول وأهم حد تاخذ منه حَقُّك.. هو أنت شخصيًا.. لأن أكثر حد ظلمك هو أنت.. وأكثر حد جه عليك هو أنت.. وأكثر حد بخسك حقوقك وأنكر عليك احتياجاتك هو برضه أنت.

تعالى بقى نقرا الناس اللي مرّوا بالخطوة دي قالوا إيه.. وبعدين تجرب بنفسك.

• أنا من حقي أفرح، حتى لو/ بالرغم من.....

أنا من حقي أفرح، حتى لو أيامي اللي فاتت ماكانش فيها فرح.

أنا من حقي أفرح، حتى لو أهلي واخواتي ماكانوش سامحين لنفسهم يفرحوا.

أنا من حقي أفرح، حتى لو كل الظروف والناس اللي حواليا مش مساعداني.

أنا من حقي أفرح، حتى لو اللي دخلوا حياتي قبل كده مش شايفين إنني أستاهل.

أنا من حقي أفرح، بالرغم من الصوت اللي جويا اللي بيقول لي إزاي تعيشي وتفرحي؟

أنا من حقي أفرح، بالرغم من إن نفسي بتقول لي إنتي كبرتي في السن.

أنا من حقي أفرح، بالرغم من إن ماحدث من أهلي حبني ولا حس بيا ولا شافني أصلاً.

أنا من حقي أفرح، بالرغم من إن أهلي كانوا عاوزين ولد مش بنت.

• أنا من حقي أتولد من جديد، حتى لو/ بالرغم من.....

أنا من حقي أتولد من جديد، بالرغم من مخاوفي.

أنا من حقي أتولد من جديد، بالرغم من وجودي وسط ناس بيهدموا فيا.

أنا من حقي أتولد من جديد، بالرغم من البيت غير المستقر اللي أنا فيه.

أنا من حقي أتولد من جديد، بالرغم من كل اللي فات.

أنا من حقي أتولد من جديد، حتى لو الحياة صعبة.

أنا من حقي أتولد من جديد، حتى لو ماعرفتش نفسي بعد كده.

أنا من حقي أتولد من جديد، حتى لو الميلاد الجديد ده هيجتاج
مني عناية و طاقة لحمايته.

أنا من حقي أتولد من جديد، حتى لو ده خلانى أبعد عن بعض
الناس.

أنا من حقي أتولد من جديد، حتى لو ده كان صعب ومؤلم وله تمن.

• أنا من حقي أحس وأصدق وأعيش وأمارس إني أستاهل،
وما اسمحش لحد يعاملني على إني ما استاهلش حتى لو/ بالرغم
من.....

أنا من حقي أحس وأصدق وأعيش وأمارس إني أستاهل، وما
اسمحش لحد يعاملني على إني ما استاهلش، حتى لو أقرب الناس ليا
بيستكثروا عليا أي لحظة فرح أو نجاح.

أنا من حقي أحس وأصدق وأعيش وأمارس إني أستاهل، وما
اسمحش لحد يعاملني على إني ما استاهلش، بالرغم من كل الأخطاء
اللي عملتها في حياتي.

أنا من حقي أحس وأصدق وأعيش وأمارس إني أستاهل، وما
اسمحش لحد يعاملني على إني ما استاهلش، بالرغم من نظرات ورسايل
أهلي والناس اللي حواليا، والناس اللي في الشارع، اللي بتقول لي كفاية
عليكي اللي انتي فيه، إنتي أصلاً تحمدي ربنا انك عايشة.

أنا من حقي أحس وأصدق وأعيش وأمارس إني أستاهل، وما
اسمحش لحد يعاملني على إني ما استاهلش، بالرغم من إني اتولدت
بنت في مجتمع مش بيحب ولا بيحترم البنات.

أنا من حقي أحس وأصدق وأعيش وأمارس إني أستاهل، وما
اسمحش لحد يعاملني على إني ما استاهلش، بالرغم من الإحساس اللي
مسيطر عليا إني عليا دين لأهلي ولازم لازم أوفيه، بإني أعيش حياتهم
كل مشكلاتها وآلامها النفسية والجسدية.

أنا من حقي أحس وأصدق وأعيش وأمارس إني أستاهل، وما
اسمحش لحد يعاملني على إني ما استاهلش، حتى لو خسرت بعض
لناس، بس هاكسب نفسي.

* * *

ياللا جرب انت بقى.. وكمل من عندك.. وكررها على قد ما تقدر
بكملة مختلفة كل مرة:

«أنا من حقي أقبل نفسي كلها على بعضها، بدون شروط ولا أحكام
لا مقارنات، حتى لو/ بالرغم من.....».

أنا قررت

وصلنا للخطوة الأخيرة في طريقك إلى نفسك.. ومحطة النهاية في هذا الكتاب.
محطة (القرار).

بعد ما عرفت احتياجاتك ودوافعها.. واكتشفت مخاوفك وقبلتها.. وصدقت إن تلبية احتياجاتك هو حق أصيل ليك.. آن الأوان إنك تختار.. وتقرر.. هتمشي في أي اتجاه.

هتمشي في نفس اتجاهك القديم.. اتجاه إنكار الاحتياجات.. والاستسلام للمخاوف.. والتنازل عن الحقوق في أي علاقة.
واللاها تحفر بإيدك طريق جديد.. تاخذ فيها احتياجاتك.. وتقبل فيه مخاوفك.. وتنتزع فيه حقوقك النفسية المهذرة؟

قبل ما تجاوب.. عاوزك تعرف حاجتين مهمين.

الحاجة الأولى: هي إنك تكون مصدق ومتأكد، إنك وقت ما أخذت القرار الأول بإنكار احتياجاتك والاستسلام لمخاوفك وتنازلك عن حقوقك النفسية.. كنت مُضطرب.. كنت مُجبر.. كان هو ده الاختيار الوحيد اللي هتتجنب بيه مزيد من الأذى.. والقرار الأخير قبل حدوث الكارثة.. وده يخليك تعذر نفسك.. وتتعاطف معها.. وتساعدها.. مافيش حد بيتغير وهو كاره نفسه وظالمها ومحاصرها باللوم والذنب.

الحاجة الثانية: هي إننا طول مشوار حياتنا، بناخد قرارات مصيرية.. بعضها غلط.. وبعضها صحيح.. بعضها مفيد.. وبعضها مؤذي.. بس دي مش نهاية المطاف.. ولا آخر الدنيا.. دايماً فيه فرصة للمراجعة.. ودايماً فيه طريقة لإعادة النظر.. حتى لو كان ليها تمن. قراراتنا المصيرية دي بعضها بيكون في طفولتنا.. وبعضها في شبابتنا.. وعلى طول امتداد حياتنا.. لغاية قبل الموت بثواني.

يعني لما اللي حواليك علقوا جبهم ليك - و انت طفل - على بعض الشروط.. إنت قررت (مضطراً) إنك تدفن نفسك الحقيقية، وتعيش بنفس مزيفة، علشان ترضيهم.

ولما لقيت الكبار اللي معاك - و انت صغير - فاهمين الرجولة غلط.. وبيمارسوها على إنها قسوة وعنف وتحرش.. قررت (مضطراً) إنك تتخلي عن رجولتك الحقيقية، في مقابل ذكورة وهمية مصطنعة.

ولما اللي انتي بتحبيه هددك بالهجر والزعل والخصام.. اضطرتي إنك (تقرري) عملي تعديل في نفسك، وتفصيل على مقاسه، علشان ماييسيكيش.

ولما اتعرضتي للإهانة والقسوة وسوء المعاملة بعد الجواز.. اضطرتي برضه إنك (تقرري) تصبري وتعاني وتحملي، خوفاً من الوحدة.. أو أذى الأطفال (رغم إنهم كانوا بيتأذوا بالفعل.. بس حسبتك وقتها كانت كده).

وفي كل المرات دي.. إنت اتخليت عن احتياجاتك الأساسية
الفطرية المهمة جداً.. وإنتي استسلمتي لمخاوفك (اللي أكيد كان ليها
ما يبررها).. وانتم الاتنين اتنازلتم عن حقوقكم النفسية في الحب
والاهتمام والشوفان والاحترام (وغيرهم).

بس دي كانت اختيارات امبارح.. وقرارات زمان.
وانت دلوقت كبرت.. وانتي دلوقت وعيتي.. وعرفتوا إن
الاختيارات دي لو كانت سليمة وقتها.. فمش لازم الاستمرار بيها
يكون سليم.. وإن القرارات دي لو كانت مفيدة ساعتها.. فهي مش
بنفس الفائدة دلوقت.

وعرفتوا كمان إن احتياجاتكم ما زالت موجودة تحت السطح.. في
انتظار إشباعها بشكل حقيقي وكافي.
وإن مخاوفكم، ممكن تقبلوها وتستحملوها، لكن ده لا يعني
الاستسلام ليها.
وإن حقكم في تلبية احتياجاتكم النفسية لا يمكن المساومة عليه..
في أي علاقة.

مش بس كده..
إحنا عرفنا- في الفصول السابقة- إيه اللي محتاجينه هنا ودلوقت
(من نفسنا ومن اللي معنا).. وإيه المخاوف اللي واقفة في طريق عَوَازان
الاحتياجات دي بالتفصيل.. وإيه الموانع والعقبات في سبيل تحويل
الاحتياجات دي لحقوق.

يبقى فاضل إيه؟

قول انت بقى 😊

فاضل ناخذ قرارات جديدة.. بعد وقفنا الطويلة مع نفسنا..
فاضل نحسب حسبة مختلفة.. بعد مراجعة حساباتنا السابقة..
فاضل نشوف حل آخر.. لمعادلة حياتنا المعقدة..

صعب؟

آه صعب.. أنا عارف.

وصعب جداً كمان..

بس.. هو اللي انت فيه دلوقت ده سهل؟
ما هو برضه صعب.. ويمكن أصعب.

مخاطرة؟

طبعاً.. ما هو التغيير مخاطرة.

بس مخاطرة في اتجاه الحياة.. مش مخاطرة في اتجاه الموت.

فيه تمن؟

أكيد.. زي ما استمرارك في اللي انت فيه ليه تمن..
تغييرك ليه، برضه ليه تمن.

يعني أعمل إيه؟

لا.. هنا انت مش هتعمل لوحدك.. هنا هنعمل مع بعض.. أنا
وانت وكل اللي بيقرأ معنا الكتاب.

إحنا هنقرر مع بعض.. ونعيد الاختيار مع بعض.

إحنا هنشارك بعض.. وهنونس بعض.

والصيغة اللي هتستخدمها المرة دي مافيهاش نقط.. مالهش تكملة..
إحنا هناخد قرارات مصيرية، ونتحمل مسؤوليتها.. إحنا هنعلن مواقف
حياتية، ونشهد عليها.. إحنا هنقول ونردد ونكرر.. لغاية ما كل واحد
فينا يحس إنها تحولت لأجزاء من تكوينه.. وعناصر من خلاياه.

فيه هنا عشرين قرار.. مرتبطين بكل اللي قرينه وشفته وفهمته من
التلات كتب: (الخروج عن النص)، (علاقات خطيرة)، (لأ.. بطعم
الفلامنكو).

عشرين قرار.. ممكن يغيروا حياتك.. ويبدلوا نوعية وجودك.
عشرين قرار.. احتمال يكونوا عكس كل القرارات اللي أخذتها قبل
كده.

مش لازم تقرهم كلهم دلوقت.. ومش مطلوب منك تنفيذهم فوراً.
كل المطلوب منك هو الوعي بيهم.. والصبر على نفسك حتى حين.

اللي تحس إنك مستعد لتنفيذه.. اتفضل.
اللي تحس إنك محتاج تأجله.. مافيش أي مشكلة.
اللي تحس إنك محتاج تعيد حساباتك فيه شوية.. ده من حقك تماماً.

هتتخيل نفسك دلوقت قاعد في دايرة مكونة من مجموعة كبيرة جداً
من الناس.. اللي بيقروا معاك الكتاب.. والناس اللي قرأوا الكتب
اللي فاتت.. الناس اللي قررت تتغير من جواها بجد.. رفقاء الرحلة..
وونس الطريق.

اتخيل إنك مع كل جملة، هتبص لواحد فيهم وتكلمه.. والباقين
قاعدين وشايفين وشاهدين.
واتخيلنسي كمان معاك.. موجود جنبك.. وباردد وراك.. ليك..
وليا.. ولكل الموجودين:

أنا محتاج وعائز ومن حقي وقررت، أقبل نفسي كلها على بعضها، بكل أجزائها، بطولها وعرضها، بدون شروط ولا أحكام ولا مقارنات، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت أحمي حدودي النفسية، وأدافع عنها، وما اسمحش لحد يؤذيني أو يتهكني أو يستغلني، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أبقي نفسي الحقيقية، مش نفس مزيفة، مُعدلة متفصلة على مقاس حد ثاني، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، ما أعبش في أي يوم من الأيام ولا دور الضحية، ولا دور الجاني، ولا دور المنتقد، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أشوف نفسي كل يوم من أول جديد، وأشوف العالم كل يوم من أول وجديد، وأنا مسؤول عن قراري ده، قدام نفسي وقدام غيري وقدام ربنا.

أنا محتاج (ة) وعائز (ة) ومن حقي وقررت، أصحي أنوثتي (أو رجولتي) الحقيقية، اللي اندفنت بالحياة زمان، وأنا مسؤول (ة) عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أعب في البيت والشغل والحياة بري وبس، وما أعبش دور حد غيري، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أخرج من وهم (الكومفورت
زون)، واجرب واخاطر واكتشف، وأنا مسؤول عن قراري ده، قدام
نفسي وقدام غيري وقدام ربنا.

أنا محتاج وعائز ومن حقي وقررت، أتحرر من أي سيناريو مرضي
موروث، وأبدأ كتابة نص حياتي الخاص، وأنا مسؤول عن قراري ده،
قدام نفسي وقدام غيري وقدام ربنا.

أنا محتاج وعائز ومن حقي وقررت، أبطل الإحساس (المَرَضِي)
بالذنب عمال على بطل، وأنا مسؤول عن قراري ده، قدام نفسي وقدام
غيري وقدام ربنا.

أنا محتاج وعائز ومن حقي وقررت، أشيل شيلتي ويس، وما اشيلش
شيلة حد غيري، وأنا مسؤول عن قراري ده، قدام نفسي وقدام غيري
وقدام ربنا.

أنا محتاج وعائز ومن حقي وقررت، أحس وأصدق وأعيش وأمارس
إني أستاهل، وما اسمحش لحد يعاملني على إني ما استاهلش، وأنا مسؤول
عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أتصالح مع جسمي، وأقبله،
وأحبه، وأحترمه، وأنا مسؤول عن قراري ده، قدام نفسي وقدام غيري
وقدام ربنا.

أنا محتاج وعائز ومن حقي وقررت، أتجوز (أو أخلي جوازي) جواز
حقيقي، من بني آدم حقيقي، وأنا مسؤول عن قراري ده، قدام نفسي
وقدام غيري وقدام ربنا.

أنا محتاج وعائز ومن حقي وقررت، أقول (لا)، اللي تكبرني وتوصل رسالة إيجابية للي قدامي، مش (لا) العند والترفيص، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أسمح لنفسي أفرح من قلبي، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أقبل موت اللي ماتوا، وفقد اللي راحوا، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أتولد من جديد، وما اسمحش لحد يموتني بالحياة تاني، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أتحمل مسؤولية الوعي اللي وبعيته، والاختيارات اللي اخترتها، وأنا مسؤول عن قراري ده، قدام نفسي وقدام غيري وقدام ربنا.

أنا محتاج وعائز ومن حقي وقررت، أقبل وجودي الجديد، وأرحب بيه، وأفرح بيه، وأفخر بيه، وأتحمّل مسؤوليته، وأنا مسؤول عن قراري ده، قدام نفسي وقدام غيري وقدام ربنا.

حاسس؟
سامع؟

لسه شايف الناس قدامك؟
لسه موجودين حواليك؟
لسه أنا جنبك؟

طيب.. غمض عينيك..
وخزن المشهد ده كويس..
في أعمق نقطة في روحك..
مشهد القرار الجديد،
والوجود الجديد،
والولادة الجديدة..
وسط الناس..
والصحة..
والونس.

خد وقتك..

* * *

تقدر دلوقت تفتح عينيك..
وتسمع صوتي..
وأنا باهمس في ودنك..
وباقول لك:
مبروك عليك نفسك..
مبروك عليك نفسك.

نتقابل تاني على خير إن شاء الله.

محمد طه

ودلوقت.. ابدأ طريقك إلى نفسك..

• أنا محتاج.....، علشان.....

• أنا عايز.....، بس خايف لاحسن.....

• أنا من حقى.....، حتى لو / بالرغم من.....

.....

.....

.....

.....

.....

.....

.....

.....

.....

.....

.....

.....

.....

.....

.....

للتواصل مع د. محمد طه:

Website: www.mohamedtaha.net

Email: mohamedtaha.online@gmail.com

Facebook: www.facebook.com/mohamedtaha.net

Twitter: https://twitter.com/Dr_Mohamad_Taha

Instagram: www.instagram.com/dr._mohamed_taha

أبطلنا الفلا منكو

التغيير هو أكبر تحدي ممكن يواجهك في حياتك..

والتغيير الحقيقي، سيكون معاه صعوبتين..

الصعوبة الأولى.. إنك هاتكون عامل زي الطفل المولود جديد.. بتخرج للحياة ومعك

كل المخاوف زي ما معاك كل الفرص.. بتتعرف على نفسك وعلى الناس وكأنك

بتشوفهم لأول مرة.. بتختار اختيارات جديدة.. وتمشي في سلك مختلفة.. حتى لو

كانت مُحشّة.. أو مهجورة..

الصعوبة الثانية.. هي إن التغيير له تمن.. والتمن ده ممكن يكون غالي جدًا..

الكتاب ده عن التغيير.. عن خطواته.. وعن تمنه..

عن احتياجاتك.. ومخاوفك.. وحقوقك النفسية..

عن قراراتك اللي أخذتها زمان.. وقراراتك اللي هاتخذها دلوقت..

الكتاب ده هابتقلك بهدوء وثقة.. من مرحلة (الحبو) خارج النص..

و(المشي) فوق أشواك العلاقات الخطرة وتجاوزها..

إلى الضرب على الأرض بشكل إيقاعي متتابع ومبهر..

وكانك راقص فلامينكو محترف..

يرقص فوق آلامه.. ويزلزل القلوب أمام عينيه..

يعلن عن نفسه في وجه العالم.. مع كل دبدبة عالية مدوّية من قدميه..

يرفع عنقه نحو السماء.. ويغرس بذور وجوده الجديد في أعماق الأرض..

جهز قلبك وعقلك وروحك..

لتقابل نفسك..

كما لم تعرفها من قبل..

